


Jusiñamui uai:  
Jusiñamui jito rafue  
illa rabenico



New Testament in Huitoto, Murui (PE:huu:Huitoto, Murui)

**Jusiñamui uai: Jusiñamui jito rafue illa rabenico**  
**New Testament in Huitoto, Murui (PE:huu:Huitoto, Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huitoto, Murui

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

## Contents

MATEO . . . . .	1
MARCOS . . . . .	67
LUCAS . . . . .	106
JUAN . . . . .	171
HECHOS . . . . .	216
ROMANOS . . . . .	270
1 CORINTIOS . . . . .	295
2 CORINTIOS . . . . .	324
GÁLATAS . . . . .	340
EFESIOS . . . . .	349
FILIPENSES . . . . .	358
COLOSENSES . . . . .	364
1 TESALONICENSES . . . . .	370
2 TESALONCENSES . . . . .	375
1 TIMOTEO . . . . .	378
2 TIMOTEO . . . . .	385
TITO . . . . .	390
FILEMÓN . . . . .	393
HEBREOS . . . . .	395
SANTIAGO . . . . .	417
1 PEDRO . . . . .	424
2 PEDRO . . . . .	431
1 JUAN . . . . .	435
2 JUAN . . . . .	441
3 JUAN . . . . .	442
JUDAS . . . . .	443
APOCALIPSIS . . . . .	446

## MATEO JESUCRISTO ENIRUEMO ILLA RAFUE CUAFUE

*Jesucristo ie usumatiai*

*(Lc 3.23-38)*

<sup>1</sup> Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori.

<sup>2</sup> Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori.

<sup>3</sup> Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori.

<sup>4</sup> Aram micori jitodi Aminadab micori. Aminadab micori jitodi Naasón micori. Naasón micori jitodi Salmón.

<sup>5</sup> Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori.

<sup>6</sup> Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiña ollena, David micori Urías micorina jobaimemo orede. Jobaimemo naimie fiodailla mei, naiñaiña ote.

<sup>7</sup> Salomón micori jitodi Roboam micori. Roboam micori jitodi Abías micori. Abías micori jitodi Asa micori.

<sup>8</sup> Asa micori jitodi Josafat micori. Josafat micori jitodi Joram micori. Joram micori jitodi Uzías micori.

<sup>9</sup> Uzías micori jitodi Jotam. Jotam micori jitodi Acaz. Acaz micori jitodi Ezequías micori.

<sup>10</sup> Ezequías micori jitodi Manasés. Manasés micori jitodi Amón. Amón micori jitodi Josías.

<sup>11</sup> Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci.

<sup>12</sup> Naie meinomo Jeconías micori Salatiel micorina comuitate. Salatiel micori jitodi Zorobabel micori.

<sup>13</sup> Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori.

<sup>14</sup> Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori.

<sup>15</sup> Eliud micori jitodi Eleazar micori. Eleazar micori jitodi Matán. Matán micori jitodi Jacob micori.

<sup>16</sup> Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

<sup>17</sup> Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamoo ite nairai anamo cai jaiagai illa facaisemo catorce nanoramaci mameci jiai ite. Babiloniamoo ite nairai anamo cai jaiagai illa facaisemona Jesús jeicia facaisemo catorce nanoramaci mameci jiai ite.

*Jesús jeicia rafue*

*(Lc 2.1-7)*

<sup>18</sup> Jesucristo comuilla rafuena lloiticue. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate.

<sup>19</sup> José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade.

<sup>20</sup> Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñona jai uruesitate.

<sup>21</sup> Himana jocoite. Ie comini naimaci jeacinomona naimie jilloitajabilla jira, Jesúsna o jitalle naimie mamecidi —raite.

<sup>22</sup> Bie rafue suide, Jusiñamuidi ie lloraima micori jaie llotataga uaina suilena.

<sup>23</sup> Jaie llotatate:

Himana uiñoñediñaiño como comuite uruedi.

Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

<sup>24</sup> José micori casidemo, Jusiñamui jaienici lloga uaina finode. Maríana ote, ie aina illena;

<sup>25</sup> iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitade naimie mamecina Jesúsna.

## 2

### *Monamo ite ramo comeciaina facauidino rafue*

<sup>1</sup> Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeciaina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

<sup>2</sup> —¿Ninomo como jeiciga omoi judíuai illaimadi? Jitoma bisoillafomo como bairede ucuduna codicai. Naiemona naimie jeiciana jai uiñoticaí. Naimiemo iobillacinona fecallena biticaí.

<sup>3</sup> Herodes micoridi naicinona cacajanona, ie comeci jarire ite. Jiaimie naimie meifomo illana jitaiñede. Jerusalémo itinodi jiai jarire itimaci.

<sup>4</sup> Ie facaise Herodes micori judíuai illaicomínina uaiduanona, naimacimo Cristo raillamie jeiciana jicanote.

<sup>5</sup> Uai otimaci:

—Judea railla eniruemo. Belémo. Iena Jusiñamui facaina micoridi jaie cuega:

<sup>6</sup> Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla comínina sedaite.

Iemona Belén nairai Judea illaicomíni baifemo faite cuega.

<sup>7</sup> Iena cacaja mei, Herodes micoridi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote.

<sup>8</sup> Naimacina Belémo orede. Llote:

—Naie uruena raise jeno. Naimiena omoi cúa mei, cuemo lluaibi, naimie dine cue jaillesa. Naimiemo iobillacinona jiai fecaacadícue —llote.

—Jii —fairiotimaci.

9-10 Iena naimie micori llua mei, jaidimaci. Ucluduna naimaci dane ciuamona, eo iobidimaci. Naimaci ciua uclududi naimacina ifuanona, monamo naie urue afemo ride.

11 Fo jaillano uruena, ie ei María diga, cioidimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.

12 Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

### *Egiptomo Jesús jailla rafue*

13 Naimaci jailla mei, José micori inia anamo nicairite. Nicairillanona, Jusiñamui jaienicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

14 José micori raire casillano, nai urue diga, Jesús ei diga, Egiptomo naiona jaide.

15 Herodes micori fiodable dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jitona jai uaidoticue”.

### *Mena años itisaiai dierisedena faia rafue*

16 Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite isaiai diese faetate. Belén ecimo itino uruiaina jiai faetate. Naie ucludu mena años jaie nano bairena jira, mena años itisaiai dierisedena faetate.

17 Raquel micori jaie eia isoi, Belén itino birui eedimaci. Jeremías micori iena jaie cuega:

18 Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori urui ai micoriai facaina eede.

Jiaie cominimona firaduacinona jitañede, naiñaiño urui ai micoriai jai fiodailla jira.

19 Digarui illanona, Herodes micori fiodailla mei, Egiptomo José micori dane nicairillanona, Jusiñamui jaienicidi naimiemo bairede.

20 Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

21 Ie jira ie eniruemo naie urue diga, ie ei diga, abido jaide.

22 Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillena naimiemo llote.

23 Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuegafuiai jai suide. Cristona jaie cuetimaci: “Naimiedi Nazaret imie”.

## 3

*Jofue iñenanomo Juan Bautista micorì illa rafue  
(Mr 1.1-8; Lc 3.1-9, 15-17; Jn 1.19-28)*

<sup>1</sup> Dìga años illanona, Juan Bautista raillamie micorìdi jofue iñenanomo illanona, cominina dafaifia, Jusiñamui rafuena naimacina llofueuide.

<sup>2</sup> Comini naimie micorìdine billanona, naimacimo llote:

—Omoì jeacinona faionocaida, omoì comeciaì iuailaì meido. Jusiñamui dìbeimo omoì i. Naimie anamo omoì illana naimie jitailla jira, omoìmo iena lloiticue —llote.

<sup>3</sup> Isaías micorìdi Jusiñamui facaina lloiraìma. Juan Bautista micorì nia iñenia, Isaías micorìdi naimie micorìna jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedì naimie uaina naimacì feiñollena, naimacì comeciaì marena finuana ñaite.

<sup>4</sup> Juan micorìdi camello itiraiaì ie nilla iniroina jítade. Igoì iena ie moilligaina jítade. Fioduaina rite. Ciifona mete. Jamai rana guite.

<sup>5</sup> Dìga comini naimie micorìdine jai jaisoidimacì. Jerusalémona, nana Judea-mona, nana Jordán fuemona jai jaisoidimacì.

<sup>6</sup> Jusiñamui naimacì jeacinona naimacì llua meino, naimacìdi Juan micorì bautizaga.

<sup>7</sup> Bautizallena, dìga fariseuai, dìga saduceuai, naimie micorìdine bitimacì; iadedì naimacì billana naimie micorì ciuano llote:

—Maraiñede rafuena finocana omoì jailla jira, jaio nairaì isoidomoi. ¿Niese Jusiñamui riicaillifuemona jilloitomoi? Cue dìne omoì billena, ¿bu omoìmo llua?

<sup>8</sup> Omoì comeciaì iuailaì meido. Omoì jeacinona faionocai. Iemona Jusiñamui jitaillacinona fino. Mare rafuena finocana jai. Naiemona omoì comeciaì iuailaì meiduana uiñoiticaì. Ie mei omoì bautizallomoi.

<sup>9</sup> Omoì comeciaina facañeno: “¿Bue ñellena o llua isoì finoiticaì? Jusiñamui Abraham micorìna jaie eo raise nabaide. Abraham micorì cai moo illa-mona, Jusiñamui riicaillifuemona jilloiticaì”. Ero, omoìmo lloiticue: Cue llua isoì omoì finoñenia, naimie riicaillifuemona jilloñeitomoi. Abraham micorì uruiaidomoi; iadedì Jusiñamui jitaillacinodo jaiacaiñedomoi. Naimie jitaia, naimie jitaillacinona naimacì finollena, bene ite noficìmona naimiedi Abraham micorì facaina uruiaina comuitarede.

<sup>10</sup> Ero, lliñede riara tiedomoi. Tia mei, maraiñena jira, iena jobaidomoi. Ie isoidomoi. Omoì maraiñena jira, Jusiñamui omoìna jai duere finoacade. Ie riicaillafue anamo jai itomoi. Omoì comeciaì iuai omoì meidoñenia, omoìna duere finoite.

<sup>11</sup> Jusiñamui dìbeimo omoì comeciaì iuai omoì meidoia, jinui dìga omoìna bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dìbeimo omoì jaillamona, Jusiñamui Joreño omoìmo itataite. Omoì comeciaì iuai omoì meidoñenia, omoìna duere finoite.

<sup>12</sup> Trigona omoì betaia, mare trigona eenotomoi. Maraiñede ra oni dota-janona, iena jobaitomoi. Ie isoide. Naimie rafuena lluanona, comeciaì iuailaì meidotinona ie moo illanomo naimiedi ofitaite; iadedì jiaie cominina duere finoite. Iraimo dotaite. Naie irai jaca duiñede —llote.

*Jesús bautizaja rafue  
(Mr 1.9-11; Lc 3.21-22)*

<sup>13</sup> Juan micorí Jordán dine nia ia, Galileamona Jesús bite. Naimiena bautizallena, Juan micorí dine bite.

<sup>14</sup> Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

<sup>15</sup> Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade.

<sup>16</sup> Jesús bautizaja mei, jinuimona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

<sup>17</sup> Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

## 4

### *Jesúna Taife ramo faia rafue*

*(Mr 1.12-13; Lc 4.1-13)*

<sup>1</sup> Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite.

<sup>2</sup> Cuarenta digarui Jesús guiñede. Naie facaise fuilla mei, guiñeno illamona, aimetaite.

<sup>3</sup> Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomeniconajaita”.

<sup>4</sup> Jesús uai ote:

—Dama ite. O llwana finoñeiticue. Jusiñamui facaina lloraima micorí iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

<sup>5</sup> Ie mei Jerusalémo Jusiñamui jofo muidomo Taife Jesúna uite.

<sup>6</sup> Raite:

—Jusiñamui Jitodiodena, eniruemo mai ana uai. David micorí ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci

cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>7</sup> Jesús uai ote:

—Dama ite. Ana uaiñeiticue. Ero, ie cominimo Moisés micorí jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O llwana finoñeiticue.

<sup>8</sup> Ie mei a ite anedumo Taife naimiena uite, naie anedumona nana nairaiaina cioillena. Naie nairaiiai eo ebire eruaide.

<sup>9</sup> Naimiemo llote:

—Nana bie nairaiiai cue anamo birui illamona, cuena o sedaia, nana bie nairaiiai omo iiticue. O caiñici ifodo ana rainada, cuemo iobillacino o fecallena.

<sup>10</sup> Jesús uai ote:

—Dama ite. Ona sedañeiticue. Ie cominimo Moisés micorí jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai.

<sup>11</sup> —Ie facaise naimiemonona Taife jaide. Naimie jailla mei, Jusiñamui jaienisaí Jesús dine bitimaci. Naimiena ecallena bitimaci.



*Galileamo Jesús illa rafue  
(Mr 1.14-15; Lc 4.14-15)*

<sup>12</sup> Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide.

<sup>13</sup> Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite.

<sup>14</sup> Nainomo Jesús jailla jira, Isaías micori jaie ciegafuiai jai suide.

<sup>15</sup> Naimie micori naie cominina jaie cueda:

Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judíuaiñedino jai itimaci.

<sup>16</sup> Jeacino anamo naimaci illamona, naga naie eniruemo ite comini jitiñedonomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare rafue birui ca-caitimaci.

Naie rafue naimaci comeciaina lligaiñoite. Naie rafuena uitimie bairenite cueda. Jusiñamuina naimaci uiñoñoena jira, naimacina iese cueda. Jesús nainomo birui llofuia jira, mare rafuena jai cacadimaci.

<sup>17</sup> Galileamo rilla mei, Jesús llocana jaide. Llofuede:

—Jusiñamui dibeimo illena, omoi jeacinona fainonocaida, omoi comeciaina iuaina meido. Ie cominina omoi jaillena birui jitaide.

*Ie llofueoicaiganona jaillena, Jesúsdi nagaamagamiena fetua rafue  
(Mr 1.16-20; Lc 5.1-11)*

<sup>18</sup> Jaiñuido Galilea railla jorai fuemo Jesús macaritemo, menamienda ciede. Naga ie ama iaimaiai. Dame Simón. Jiaici naimie mamecidi Pedro. Ie ama Andrés diga ite. Lloijina fairaima iaimaiai. Iese jaca naie iaimaiaidi maiñuidiaimaiai.

<sup>19</sup> Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaide. Lliciaina birui ocabitomico; iadedi cominina oitomico, cue dibeimo naimaci illena.

<sup>20</sup> Iena cacajanona, ieconi iaimaiai lloijina fainonocaida, naimie diga jaidiaimaiai. Ie llofueganona jaillena, jaidiaimaiai.

<sup>21</sup> Lliai bai Jesús jaidemo, jiaie menamienda ciede. Naga ie ama iaimaiai. Dame Jacobo. Jiaimie Juan Iaimaiai moodi Zebedeo. Naimie diga botemo itiaimaiai. Lloijina sigaidimaci. Jesús iaimaiaina uaidote, naimie llofueganona jaillena.

<sup>22</sup> Ieconi iaimaiai moona fainonocaida, botemona ari billanona, Jesús diga jaidiaimaiai.

*Jesús ailluena cominina llofuia rafue  
(Lc 6.17-19)*

<sup>23</sup> Nana Galileamo Jesús jaide. Judíuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciaina iuaina meiduana llofuede. Ie cominina naimaci illena llofuede. Naga isoide duiconona duidinona jillotate.

<sup>24</sup> Iemona nana Siria railla eniruemo naimie mameci soride. Naie comini naga isoide duiconona duidinona naimie dine atidimaci. Abi isiredinona atidimaci. Jananiai anamo illa cominina atidimaci. Naillidinona atidimaci. Nirañidanidinona atidimaci. Nana naimacina jillotate.

<sup>25</sup> Ailluena comini naimiema racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

## 5

*Anedumo naimie ia, Jesús lloga rafue*  
(Lc 6.20-23)

<sup>1-2</sup> Ailluena cominina Jesúna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoina Jusiñamui ie cominina sedaacana rafuena ja llofueitícue. Naimie anamo naimaci illena llofueitícue.

<sup>3</sup> Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona dani finonidicai; ia naimie caina canuanona, iena finoitícai”. Naimie cominina naie isoidino illamona, naimie naimacina canoite. Iemona caimare iitimaci.

<sup>4</sup> Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñotaite. Iemona caimare iitimaci.

<sup>5</sup> Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci.

<sup>6</sup> Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci.

<sup>7</sup> Jusiñamui cominina duenaitinona sedaite. Naimacina naimie duenailamona, Jusiñamui naimacina ico duere finoñeite. Iemona caimare iitimaci.

<sup>8</sup> Jusiñamui jeanide começiredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci.

<sup>9</sup> Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mameçirenitimaci. Iemona caimare iitimaci.

<sup>10</sup> Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaiatimaci. Iemona caimare iitimaci.

<sup>11</sup> Cuemo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreñaona tainona lloitimaci. Duere sefuitomoi; iadedi Jusiñamui omoina caimare itataite.

<sup>12</sup> Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefuia, iocire omoi jai.

*Jesús comini illa rafue*  
(Mr 9.50; Lc 14.34-35)

<sup>13</sup> Jesús llote:

—Jusiñamui ie cominina sedaacalle rafue nia llofueitícue. Llicisi rifaia, jai marañede. Iena rifaiñellena, llicisimo sal jonetícai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Salie caimano jai iñenia, ¿niese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

<sup>14</sup> ‘Cuemo omoi duilla jira, jiaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñotícai. Jusiñamui jitailla isoi omoi illamona, jiaie comini naimiena uiñoitimaci.

<sup>15</sup> Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena.

<sup>16</sup> Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare fino ca rafuena uiñoitimaci. Iemona: “Juiñamui maremiena” raitimaci.

*Jesúdi Moisés micorina llofuia rafue*

<sup>17</sup> Jesús llote:

—Jusiñamui ie cominina sedaacalle rafue nia llofueiticue. Iena cue llofuia jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jaie llogacinuai maraiñede” jiai raiñedicue; iadedi omoina naie llogacinaina raise uiñoaacadicue.

<sup>18</sup> Biemo omoi comeciaina faca. Mona, enirue diga, nia ia, nana naie llogacinuai jaca suite.

<sup>19</sup> Omoi einamací raitimaci: “Dajerie llogacino jiaie llogacino baifemo faite”. Cue raiticue: Naga llogacino omoi inoñenia, naga omoi llofueñenia, nana Jusiñamui jitaillacinona finoñedomoi.

<sup>20</sup> Ero, Jusiñamui jitailla rafuedo judíuai illacomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñoitimaci; iadedi naimaci comeciái Jusiñamui díbeimo iñedimaci.

*Jesúdi iciriñena llofuia rafue*

*(Lc 12.57-59)*

<sup>21</sup> Jesús llote:

—Omoi llofueraimona bie jai cacadomoi. Moisés micori omoi jaiagaimo llote: “Comena meineñeno. Comena bu meineia, jeacino jai finode. Naimie fiodaillena juez llua”.

<sup>22</sup> Naie llogacino jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illacomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

<sup>23-24</sup> Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra fañonocaida, naimie dine nano mai jai. Naie rafue raise finollena, naimie dine jai. Ie mei Jusiñamui omoi rana feca.

<sup>25</sup> Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaita.

<sup>26</sup> Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitañeno. Jeacino finoñellena, jiaimie diga iciriñeno.

*Jesúdi iima ie aiñede riño diga illa llua rafue*

<sup>27</sup> Jesús llote:

—Omoi llofueraimona bie jai cacadomoi. Moisés micori jaie llote: “Omoi aiñede riñoiaí diga iñeno. Omoi iniñede iñiaí diga iñeno”. “Iena bu finoia, jeacino jai finode” raitomoi.

<sup>28</sup> Jiaie rafue birui lloiticue. Ie aiñede riñoimo eruaillamona naiñaiñoa bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode.

<sup>29-30</sup> Biena ñaiticue. Nie isoide rafue omoina jeacino finotaia, iemo eruañeno. Iena llinoñeno. Iemo comecina facañeno. Omoi ciua rana jira,

omoi jitaillamona jeacino finodomoï. Rana omoi jetaja jira, omoi jitaillamona jeacino finodomoï. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoï. Nana omoi abi diga iraimo jaitomoï. Iramo omoi jaiñellena, jeacino finoñeno.

*Jesúdi iima ie aina dotaja llua rafue*  
(Mt 19.9; Mr 10.11-12; Lc 16.18)

<sup>31</sup> Jesús llote:

–Omoi llofuerañimona bie jai cacadomoï. Moisés micori jaie llote: “Te aina bu dotaacania, naiñaiño mo dotajacanabena fecaja”. Iedo jai jaicabidomoï. Iena bu finoia, omoi mona mare.

<sup>32</sup> Jiaie rafue birui lloticue. Jiaimie diga naiñaiño iñenia, ie aina bu dotajia, marañede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacina jai finode. Jeacino finoñellena, aina dotaño.

*Jesúdi Jusiñamui mameci jamai ebena llinoñenana llua rafue*

<sup>33-35</sup> Jesús llote:

–Omoi llofuerañimona bie jai cacadomoï. Moisés micori omoi jaiagaimo llote: “Taino lloño; ia Jusiñamuimo omoi lloga uaina fino”. Iedo jai jaicabidomoï. Omoi lloga uai omoi finollena jiaie comini uiñollena, Jusiñamui mamecina llinotomoï. “Tena cai llinoia, cai lloga uaina cai finoñenia, Jusiñamui caina duere finoite” raitomoï. Jusiñamui mameci omoi llinoñenia, omoi lloga uai omoi finoñenia, omoi mona mare. “Jusiñamui caina duere finoñeite” raitomoï. Iemona monamo ite ra mamecina jamai ebena llinotomoï. Eniruemo ite ra mamecina jamai ebena llinotomoï. Jerusalén railla nairai mamecina jamai ebena llinotomoï. Omoi ifogi mamecina jamai ebena jiai llinotomoï. Jusiñamui mamecina jamai ebena llinoñedomoï; ia jiaie ra mamecina jamai ebena llinotomoï. Ero, monamo ite ra mamecina omoi llinoia, Jusiñamui mamecina jiai llinotomoï, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoï. Jerusalén railla nairai mamecina omoi llinoia, Jerusalén naimie nairaina jira, naimie mamecina jiai llinotomoï.

<sup>36</sup> Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai llinoño. Dama Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jiai llinotomoï.

<sup>37</sup> Ie jira Jusiñamui mameci jamai ebena llinoño. Jiaie ra mameci jamai ebena llinoño; iadedi nie isoide rafuena omoi finoia, omoi lloga uaina taino lloño fino. Uanaicinona jaca llono. Uanaicinona omoi lloñenia, Taifemona omoi uaina otomoï.

*Jesúdi iba oñenana llofuia rafue*  
(Lc 6.29-30)

<sup>38</sup> Jesús llote:

–Omoi llofuerañimona bie jai cacadomoï. Moisés micori jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoï;

<sup>39</sup> Iadedi birui omoi mo lloticue: Iba oño. Marañede rafue finodimimona omoi abina riidoño. Omoi cacaina naimie dutaia, naimie

diga iciriñeno. Enefebeimo omoi uieco dobaiño, enefebei omoina naimie dutallesa. Naimie omoina duere finoia, ibana oñeno.

<sup>40</sup> Omoi iniroi bairollena omoina bu llogidoia, juez nia omoimo lloñenia, naimie jitailla iniroi baifemo naimiemo feca.

<sup>41</sup> Daje kilómetro naimaci raruiá omoina uillana illaicomini ocuia, iena uiño. Nibai omoi comeci jitaiñede; ia naimacina canollena, iena mena kilómetros uiño. Naimaci ocuilla baifemo uiño.

<sup>42</sup> Omoimo ite rana bu jicaia, iena caidiñeno. Omoi rana bu jamai jicuano uia, abido atillena, iena caidiñeno feca.

*Jesúdi omoina gaiñenano isiruillena llua rafue*

*(Lc 6.27-28, 32-36)*

<sup>43</sup> Jesús llote:

—Omoi llofueraimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi.

<sup>44</sup> Omoimo birui lloticue: Omoi nairaiñedinona isirui. Omoi gaiñenanona isirui. Omoina duere finodino facaina Jusiñamuimo jii. Naimaci comeciá iuai meiduana naimiemo jicano.

<sup>45</sup> Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiaí lligaiñotade. Maraiñedino dine noci deitate. Mareuidino dine jiaí noci deitate.

<sup>46</sup> Naimie comini omoi illamona, nana comini daje isoi isirui. Omoina isiruitinona omoi isirui, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baifemo faiñedomoi. Naimaci isoi itomoi.

<sup>47</sup> Dani omoi cominina omoi uaidoia, mare; ia omoina gaiñenanona omoi uaidoñenia, naimaci baifemo faiñedomoi. Jusiñamuina inoñedino baifemo faiñedomoi. Naimaci isoi itomoi.

<sup>48</sup> Iena omoi uiñuamona, omoi Moo Jusiñamui finua isoi, mare rafuena finocana omoi jai.

## 6

*Jesúdi mare rafue finuana llua rafue*

<sup>1</sup> Jesús llote:

—Omoina nia llofueiticue. Jiaie comini iena cioillena, mare rafuena omoi finoiadedi, omoina: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue.

<sup>2</sup> Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci.

<sup>3</sup> Dueredinomo rana omoi fecaia, jiaie cominimo iena lloñeno.

<sup>4</sup> Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoina: “Mare” raite.

*Jesús Jusiñamuimo jia rafue*

*(Lc 11.2-4)*

<sup>5</sup> Jesús llote:

–Jusiñamuimo omoi jiiia, maredinona abi caitadino isoi omoi iñeno. Ofiracomo naimacina comini cioillena, marefodo jiidimaci. Jicabilla fa-  
caiseconi naisomo naimaci ia, naimacina comini cioillena, marefodo jiai  
jiidimaci. Naimacina: “Jusiñamuina eo sedadimaci” comini raillana ji-  
taidimaci. Cominimona iobillacinona birui jai feiñotimaci.

<sup>6</sup> Omoi jiiacania, omoi jofomo fo jai. Nainomo Jusiñamuimo anado omoi jii.  
Iena Jusiñamui uiñuamona, omoi jicaca rafue naimiemona feiñoitomoi.

<sup>7</sup> Jusiñamuimo omoi jiiia, naimiena ñnoñedino isoi jamaicinona ñaiñeno.  
Naimaci comecina facadimaci: “Daje jiracinona diga icaiño cai jiiia jira, ja  
muidomo cai Moo caina raise cacaite”.

<sup>8</sup> Naimaci isoi iñeno. Nia omoi jicañenia, naimie omoi jitaille rafuena uiñote.

<sup>9</sup> Naimiemo omoi jiiacania, iese jii:

Ore Moo, monamo itio.

Comini ori iobidesa.

<sup>10</sup> O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

<sup>11</sup> Nagarui guille caimo itata.

<sup>12</sup> Caina jeare jaiino finoia, iena caimona feilla isoi, cai jeacinona omona feilla  
jira, cai jeacinona oni dota.

<sup>13</sup> Caimo ramo bu faia, caina cano, iena cai ñnoi raillano. Jeacinona  
finuamona caina jillota.

Iese omoi jii.

<sup>14</sup> Omoína jiaie comini jeare finoia, iena omoi feitaia, omoi monamo ite Moo  
omoi jeacinona iena faitajanona, jiai oni dotaite;

<sup>15</sup> iadedi jiaie comini finoia jeacinona omoi feitañenia, omoi Moo Jusiñamui  
omoi jeacinona feitañeite. Iena oni dotañeite.

### *Jesús guiñenaruina llua rafue*

<sup>16</sup> Jesús llote:

–Omoína nia llofueiticue. Raitomoi: “Jusiñamuina eo raise cai seda-  
janona, birui cai guiñeticai. Iemona naimie caina eo duenaite” raitomoi.  
Iese Jusiñamuina omoi sedajia, sunaiñeno, mareuidinona abi caitadino isoi.  
Sunaitimaci. Naimaci uieco finobicabiside. Naimaci guiñenarui facaise illana  
comini uiñollena, naimacina comini cioillena, iese itimaci. Naimacina: “Mare”  
comini raillamona, iobillacinona birui jai feiñotimaci. Jusiñamuimona ico iena  
feiñoñeitimaci.

<sup>17</sup> Ero, naimaci isoi omoi iñeno; iadedi omoi guiñenarui ia, omoi abiaí raise  
fino.

<sup>18</sup> Iemei cominidi omoi guiñenarui illana uiñoñeitimaci. Naimacimona  
iobillacinona feiñoñeitomoi. Dama Jusiñamui iena uiñoite. Bainino omoi  
finoia rafue naimie uiñua jira, naimiemona iba feiñoitomoi.

### *Jesúdi Jusiñamuimo comecina facaja rafue*

*(Lc 12.33-34)*

<sup>19</sup> Jesús llote:

–Omoi jofomo ailluena rana eenocana uiñeno. Giireco iena guicabite.  
Dajerie ra nemuide. Omoi jofomona jiaie comini iena fiicadimaci. Ailluena  
ra eenuamo omoi comeciaina facañeno;

<sup>20</sup> iadedi Jusiñamui dine monamo omoi ra illa isoi, iemo omoi comeciaina  
faca. Naimiemo comeciaina cai facajamona, nainomo cai iobillacino iite.  
Giirecuaimona, nemuillamona, firirainimona, iena nainomo faifiñeitomoi.

<sup>21</sup> Aillue ra omoimo ia, Jusiñamuimo comeciaina facañedomoi; iadedi naimie  
jitaillacinona omoi finoia, naimiemo comeciaina facadomoi.



*Jesús cai comecina llua rafue*  
(Lc 11.34-36)

22-23 Jesús llote:

—Cai uisi diga rana ciodicai. Cai uisi maraiñenia, rana raise cioiñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

*Jesús raruiaina llua rafue*  
(Lc 16.13)

24 Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoite. Ie isoide. Raruia ollemo comecina omoi eo facaia, Jusiñamui jitaillacinomo comecina raise facañeitomoi.

*Jesúdi Jusiñamui cai sedajana llua rafue*  
(Lc 12.22-31)

25 Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite.

26 Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite.

27 Omoimona, ¿bu ie comeci jarire facajamona a sairite? Iese jaca buna a sairine. Dama Jusiñamui omoina a sairitarede.

28 ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tiforiñedimaci;

29 iadedi Salomón micori naimaci isoi jaie ñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

30 Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ñno.

31 Omoi comeci jarire finoñeno. “¿Buena guiticai? ¿Buena jitaiticai?” raiñeno. Iemo comeciaina eo facañeno.

32 Jusiñamuina ñnoñedino iemo comecina facacabidimaci. Nana omoi jitaillacinona omoi Moodi uinua jira, naimaci isoi ñeno.

33 Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite.

34 Jusiñamui omoi birui jitailla ra omoimo iite. Iena uinua mona, jiairuido sulle rafuemo jarire comecina facañeno. Ico omoi jitailla ra omoimo jiai iite.

## 7

*Jesúdi jiaie cominina mameriñenana llua rafue*  
(Lc 6.37-38, 41-42)

1 Jesús llote:

—Omoina nia llofueiacadicue. Jiaie cominina mameriñeno. Jiaie cominina omoï mameria, omoïmo ite maraiñede rafue facaina Jusiñamui omoïna duere finoite.

<sup>2</sup> Jiaie cominina omoï mamerilla diese Jusiñamui omoïna duere finoite.

<sup>3</sup> Omoï ecïmo itimïemo janore maraiñedicino illana omoï uiñoia, iemo comecina facañeno; iadedi omoïmo ailluena ite maraiñedicinomo nano omoï comecina faca.

<sup>4</sup> Omoïmo maraiñedicino illamona, ¿niесе omoï ecïmo itimïena mamerit-omoï?

<sup>5</sup> Omoïmo ite maraiñedicinomo omoï comecina facaacaiñena jira, maredinona abi caitadinodomoï. Omoï comeciaina nano raise fino. Iemei omoï ecïmo itimïena canorenitomoï. Naimie comecina raise canorenitomoï.

<sup>6</sup> 'Ero, eo mare rana omoï jiconiaino fecañeno. Eo raifide rana omoï chanchuaimo fecañeno. Naimacimo omoï fecaiadedi, iena feiñoñeitimaci. Omoïna gaiñenamona, jiconiai omoïna ainitimaci. Chanchuai iena jamail-lamona, iena saitaitimaci. Ie isoide. Damierie Jusiñamui uaina uaita-cabitimaci. Iena naimaci jaca feiñoñena jira, naie rafue naimacimo llo-cabiñeno. Naimacimo omoï llocabia, omoïna duere finoitimaci. Omoï ra-fuena jamaitimaci.

*Jesúdi cai jitailla ra jicaja llua rafue*

*(Lc 6.31; 11.9-13)*

<sup>7-8</sup> Jesús llote:

—Daje ra omoï faifia, iena jenodomoï. Raise jenoia, iena baitomoï. Damiēna omoï jenoia, naimie illanomo jaidomoï. Nainomo naimiēna baillamona, omoïna feiñoite. Ie isoide. Buena omoï jitaia, Jusiñamuimo jica. Iena omoï jicaja jira, iena naimie cacajamona, omoïmo iite.

<sup>9</sup> Ero, omoïmona naimiēmo llomeniconā ie moomo ie jito jicaia, noficina fecañede.

<sup>10</sup> Lliciaina jicaia, jaiona fecañede.

<sup>11</sup> Jeacinona finocabidomoï; iadedi mare ra omoï uruiaimo fecacabillana uiñotomoï. Cai Moo Jusiñamuidi jaca mareuidimie. Cai baifemo naimie faite. Ie muidona naimiēmo jicanotïnomo mare rana fecate.

<sup>12</sup> 'Jusiñamui jitaillacinona omoï finuamona, jiaie cominina marena fino. Jiaie comini omoïna finuana omoï jitailla isoi, naimacina fino. Naimaci omoïna marena finuana omoï jitaia, naimacina marena fino. Naimaci omoïna maraiñeno finuana omoï jitaia, naimacina ie isoi maraiñeno fino. Moisés micori ie isoidicinona jaie llofujete. Jusiñamui facaina lloraini micoriai ie isoidicinona jaie jiai llofuetimaci.

*Jesúdi Jusiñamui dine rille llua rafue*

*(Lc 13.24)*

<sup>13-14</sup> Jesús llote:

—Jusiñamui dine omoï rillena, janorede naisodo omoï jailla isoi isoilla. Naisomo ite nasedi janorede isoide. Naimie dine naie rilla jira, naiedo omoï jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

*Jesúdi abi caitadinomona abi rairuillana llua rafue*

*(Lc 6.43-44)*

<sup>15</sup> Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoï raise jaiñellena, omoïna



jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi.

<sup>16</sup> Naimaci lloga rafuemona naimaci Jusiñamui llorainiñenana uiñoitomoi. Ero, eecuaïmona uvas raila riarã oñega. Eecuaïmona higos raila riarã jiaï oñega.

<sup>17</sup> Mare riarãmona mare llisilla comuide. Maraiñede riarãmona maraiñede llisilla comuide.

<sup>18</sup> Mare riarãmona maraiñede llisilla comuiñede. Maraiñede riarãmona mare llisilla comuiñede.

<sup>19</sup> Mare llisilla comuitañena jira, naga maraiñede riarã jaitaca, iena jobail-lena.

<sup>20</sup> Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusinamui naimacina duere finoite.

*Jesúdi ie Moo ie comini sedajanomo ille llua rafue*

*(Lc 13.25-27)*

<sup>21</sup> Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite.

<sup>22</sup> Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticaï. O uaido jananiaina oni oredicaï. O uai diga siño rafuena finodicaï” lloitimaci.

<sup>23</sup> Uai oiticue: “Omoïna uiñoñedicue. Cue cominiñedomoi. Jecino omoi começimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

*Jesúdi naimiena ñnuana ñaia rafue*

*(Lc 6.47-49; Mr 1.22)*

<sup>24</sup> Jesús llote:

—Cue lluaana cacadomoi; iadedi omoïmona nana ñnoñedomoi. Cue lluaana ñnotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa ñnori eo ana raite.

<sup>25</sup> Noci deidemo, eo jinuidemo, jofomo ille toia, aifi bitemo, jofu raise finua jira, jofu goiñede. Iena faifiñede. Ie isoide. Cue lluaana ñnotimie faifiñeite.

<sup>26</sup> Cue lluaana ñnoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana rañede.

<sup>27</sup> Noci deidemo, eo jinuidemo, jofomo ille toia, aifi bitemo, jofu goillamona, jai eo judaisite. Iena faifide. Ie isoide. Cue lluaana ñnoñedimie faifite —llote.

<sup>28-29</sup> Moisés micori rafue uiñoraini isoi naimie llofueñena jira, illaïmamo ite uai itimie isoi naimie llofuaia jira, nainomo ite cominidi naimie lluari rajicaidimaci.

## 8

*Jesúdi efonaitimiena jillotaja rafue*

*(Mr 1.40-45; Lc 5.12-16)*

<sup>1</sup> Naimie llofuaia mei, anedumona Jesús ie llofueoicaigano diga ana bite. Ailluena comini naimiena racadimaci.

<sup>2</sup> Efonaitimie naimie ñine billanona, naimiena raise uaiduamona, caiñici ifodo ana rainadate. Raite:

—Maestro, o jitaïadedi, cuena jillotaredio.

<sup>3</sup> Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. —Ieconï naimie jillode.

<sup>4</sup> Jesús naimiemo llote:

—O jilluana bumo lloñeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca. —Iemei Jesús oni jaide.

*Jesúdi capitán mullaimana jillotaja rafue*

*(Lc 7.1-10)*

<sup>5</sup> Capernaum railla nairaimo Jesús ria, capitán raillamie naimie dine bite. Naie capitán Roma railla nairai imie. Judíuñedimie. Billanona, duere llote:

<sup>6</sup> —Maestro, cuena cano. Cue jofomo cue mullaima ite. Ie abina niraídanide. Naimie abi eo isirede. Naimiena jillota.

<sup>7</sup> Jesús uai ote:

—Naimie dine jaiticue, naimiena cue jilloitallena.

<sup>8</sup> Naie capitán dane llote:

—Jaiñeno. Jamai bue isoidicue. Iemo, ¿ñiese cue jofomo biitio? O uaido bene lluanona cue mullaima jilloite.

<sup>9</sup> Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaima illa jira, naimiedi cue uaina ñnote. O anamo naie duico illa jira, o uaina o lloia, cue mullaima jilloite.

<sup>10</sup> Iena cacajanona, Jesús rajicaide. Naimie diga jaidinomo llote:

—Bie isoi cue uaina ñnotimiena jaca baiñedicue. Cai judíuai cominimona biesedimiena jaca iñede.

<sup>11</sup> Ero, Jusiñamui ie cominina sedajanomo naimaci illena, diga judíuaiñedino cue llua uaina ñnoitimaci. Naga nairaiaimona ñnoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci.

<sup>12</sup> Ailluena judíuaiñedino ñnoitimaci. Jusiñamui ie cominina sedajanomo duillanodi omoi judíuai. Naimiena omoi ñnoñena jira, omoína oni dotaite. Dotaja mei, eo duere sefuillamona eeditomoi.

<sup>13</sup> Capitámo Jesús llote:

—Mai jai. Cue uai siñonana o ñnua jira, o jitailla rafue omo jai suide. —Ieconí naimie mullaima jillode.

*Jesús Pedro jifaiñona jillotaja rafue*

*(Mr 1.29-31; Lc 4.38-39)*

<sup>14</sup> Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride.

<sup>15</sup> Naiñaiño dine jaillanona, naiñaiño jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue*

*(Mr 1.32-34; Lc 4.40-41)*

<sup>16</sup> Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate.

<sup>17</sup> Naimacina Jesús jillotajamona, Isaías micori jaie cufafuiaí iese jai suide. Naimie micori jaie cufaga: “Caina jilloitajanona, cai duiconona oni oretate”.

*Jesús ie llofuegamiena damie jaillana ie rafue*

*(Lc 9.57-62)*

18 Ailluena comini naimie ecimo illana Jesús cianona, ie llofueoicaiganomo ruica dine jaillena llote.

19 Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacadie. O llofuegamiena jaiacadie.

20 Jesús uai ote:

—Janorede ocainaiadi joforedimaci. Silliñiai jillainiaredimaci; iadedi jofonidie. Monamona billanona, imana jaidie; iadedi buenidie. Jofonidie. Cue diga o jaiacania, bue isoidena cuemona oñeitio. Iemo o comecina raise faca.

21 Ie facaise jiaie llofuegamie Jesúmo llote:

—O diga jaitie; ia cue moo nia fioidañena jira, o diga nia jaiñeitie.

22 Jesús naimie uai ote:

—Cue diga idai mai bi. Cuena inoñedinodi o moona canoredimaci. Naimie fioidaia, naimiena naimaci raille. Cue rafue jiaie rafue baifemo faite. Cue diga mai bi.

*Jesúdi joraina llucaitaja rafue*

*(Mr 4.35-41; Lc 8.22-25)*

23 Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jia jaidimaci.

24 Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira,

25 jaciruillamona, Jesúna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

26 Jesús uai ote:

—¿Bue ñellena jacinaitomoi? Cuena raise inoñedomoi. Jacinaiñeno.

Iemei Jesús naidacaillano, aifina lletade. Joraina jia llucaitade. Ieconi llucaide. Bagoñede.

27 Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jia inote.

Bai jaillanona, ruica dine ridimaci.

*Jesúdi Gadara raila enruemo illa rafue*

*(Mr 5.1-20; Lc 8.26-39)*

28 Ruica dine naimaci ridemo, Gadara raila enruemo sijidimaci. Ieconi menamie Jesús dine bitiaimaia. Jananiai anamo ite iaimaia. Comini raioillanomo nofie moto ifuaimona bitiaimaia. Nai iaimaia eo riirena jira, jaca bu nainomo jainide.

29 Jesúna iaimaia cúa facaise jananiai iaimaiaina cuirioitate:

—Jusiñamui Jitodio. ¿Ñiese cocona nibaiacadio? Coco duere sefuelle facaise nia ñede; iadedi birui cocona duere finuaibidio —cuirioidiaimaia.

30 Naie bai iaie ailluena chanchuai guillano itimaci.

31 Jananiai Jesúmo duere llotimaci:

—Oni caina o oretajanona, chanchuai abimo caina oreta.

32 Jesús uai ote:

—Mai jai.

Ieconi nai iaimaiaimona jananiai oni jaillanona, chanchuai abimo jaide. Iemona iconiido chanchuai joraimo aisicana jaillanona, corobaiside.

33 Iena cianona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaia rafuena llotimaci.

<sup>34</sup> Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

## 9

### *Jesús tisitaitimiena jillotaja rafue*

(Mr 2.1-12; Lc 5.17-26)

<sup>1</sup> Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride.

<sup>2</sup> Nainomo rilla mei, naimie dine comini ie bairamo biide tisitaitimiena atide. Naimiena atidinodi Jesús naimiena jillotajana inote. Iena Jesús uiñuanona, tisitaitimie mo lloste:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

<sup>3</sup> Jesús dine ofidinomona dajerie Moisés micori llogacinona llofueraini itimaci. Jesús llua naimaci cacajano, Moisés micori llogacinona llofueraini comecina facadimaci: “Dama Jusiñamui jeacina dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

<sup>4</sup> Naimaci comecina facajacinona Jesús uiñuamona, Jesús dinena jicanote:

—¿Bue ñellena omoi comecina jeare facadomoi?

<sup>5</sup> Bimiemo: “O jeacina jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi.

<sup>6</sup> Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie mo lloiticue: “Mai naidacai. O baira ferianona, o jofomo mai jai”.

<sup>7</sup> Iese naimie raillamona, tisitaitimie jillode. Naidacaida, ie jofomo jaide.

<sup>8</sup> Comini iena ciuanona, jacinaitimaci. Bimiemo ie uaina Jusiñamui fecajana naimaci uiñuamona, Jusiñamuimo iobillacinona fecadimaci.

### *Jesúdi Mateona fetua rafue*

(Mr 2.13-17; Lc 5.27-32)

<sup>9</sup> Jesús bai macaritemo, cuena ucubena oranomo cue raillana ciode. Ma-teodicue. Gobierno ucube oraímadicue. Jesús cuemo lloste:

—Cue llofuegamiena o jaillena, cue diga bi.

Naidacaida, naimie diga jaidicue.

<sup>10</sup> Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci.

<sup>11</sup> Nainomo fariseuai comini jamai bitimaci. Moisés micori llogacinodo eo jaidimaci. Jesúsna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

<sup>12</sup> Iena cacajano, Jesús lloste:

—Ecairedinodi médicona jitañedimaci; ia duidinodi médicona jitaídimaci. Ie isoide. Mareuidino cuena jitañedimaci; ia maraiñedino cuena jitaídimaci.

<sup>13</sup> Jusiñamui facaina lloaíma micori jaie cuega rafuemo omoi comecina faca: “Jusiñamui lloste: ‘Rana cuemo omoi fecajana jitaídicue; ia cominina omoi dueruillana jiai jitaídicue’ lloste”. Cominina cue dueruilla jira, Jusiñamui dibeimo naimaci illena, mareuidinona itatajaibiñedicue; iadedi

Jusiñamui ðibeimo naimaci illena, maraiñedinona itatajai biticue. Omoimona maraiñedino diga nabairiticue; ia naimacina uaibiticue.

*Jesús ðine Juan Bautista llofueoicaigano billa rafue  
(Mr 2.18-22; Lc 5.33-39)*

<sup>14</sup> Naie facaise Juan Bautista llofueoicaiganodi Jesús ðine bite. Naimiemo llote:

—Cai einamacì llua isoi, Jusiñamuina cai raise iobitallena, guiñenaruillai illa facaiseconi guiñedìcai. Cai jeacino facaina sunaicabitìcai. Fariseuai cominì jiaì guiñedìmacì; iadedì o llofueoicaigano guitìmacì. Cai einamacì llogacinodo jaidìcai. ¿Bue ñellena o llofueoicaigano iedo jaiñedìmacì?

<sup>15</sup> Jesús uai ote:

—Jiaie rafuedo iena lloiticue. Coniruedì ie aina uarui ia, iobilla jira, ie nabaiñiaì sunaiñedìmacì. Iobillamona guitìmacì. Jiaìruido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidì iite. Ie isoide. Cue cominì diga birui cue illa jira, iocìre itìmacì. Ico cue jaille mei, sunaitìmacì. Ie muidona birui cue llofueoicaigano guicabitìmacì.

<sup>16</sup> Jiaie rafuedo iena lloiticue. Nia jocoñega comue iniroidì jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

<sup>17</sup> Jacagomona finoca bolsa como finoca vino joneñega. Jonegadena, mairiñena jira, sirillamona, igoì raire cuararite. Vino faifite. Igoì jiaì faifite. Como finoca vino comogomo jonelle. Iemei iena faifìñeite. Ie isoide. Omoì einamacì rafue ifomo jiaie rafue birui ite. Iena omoìmo llocabitìcue. Iedo jaidìcai —llote.

*Jesúdi mena duide riñona jillotaja rafue  
(Mr 5.21-43; Lc 8.40-56)*

<sup>18</sup> Juan Bautista llofueoicaigano diga Jesús llotemo, jiaimie naimie ðine bite. Naimiedì judíuai ofiraco sedaraima. Jesúna duere jìcanollena, caiñìci ifodo rainadacaida llote:

—Cue jisa como fodaite. O onollì naiñaiñomo o jonellesa, naiñaiño jilloillesa, cue jofomo cue diga mai bi.

<sup>19</sup> Iena cacajano, Jesús naimie diga jaide. Ie llofueoicaigano jiaì jaidìmacì.

<sup>20</sup> Bai jaillanona, duidiñaiño jinafona jaide. Naimie iniroina jetallena, naimie ðine bite. Ie jeraimona doce años jaca ðiaide. Billanona naimie iniroina jetade.

<sup>21</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade.

<sup>22</sup> Ieconì Jesús dobaidacaida, abido erodatemo, naiñaiñoona ciode. Raite:

—Ñoo, o comecina ocuiño. Cuena o ñnua jira, jai jillodìo.

Ieconì naiñaiño jillode.

<sup>23</sup> Ofiraco sedaraima jofomo Jesús rillano, naie jofona jisa jai fiodailla jira, cominì merìre fillana cacade. Ailluena failliñailana cacade.

<sup>24</sup> Jesús ðinena raite:

—Jofomona nana omoì jino jaillana jitaìdicue. Cuemona biñaiño fiodañedesas. Jamai inìde.

Iena cacajano, naiñaiño jai fiodaite uiñuamona, Jesúri jaisitìmacì.

<sup>25</sup> Cominì jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodì naidacaide.

<sup>26</sup> Naie rafue nana naie enìrue itinomo llocana jaide.

*Jesúdi uisínide iaímaiaína jillotaja rafue*

<sup>27</sup> Ofiraco sedaraima jofomona Jesús bai jaidemo, uisínide iaímaiaí naimie jinafona jaidiaímaiaí. Jesúna ado uaidotiaímaiaí:

—Cai illaíma David micorí jitodio. Jusiñamuimona o billa jira, cocona duenai.

<sup>28</sup> Uai oñeno Jesús Capernaumo jaide. Naimie fo jailla mei, naimie dine bitiaímaiaí. Iaímaiaímo Jesús jicánote:

—¿Omiconona cue jillotajana inotomíco?

Fairiotiaímaiaí:

—Jii.

<sup>29</sup> Iaímaiaí uisína Jesús jetajano raite:

—Cuena omíco inua diese jilloitomíco.

<sup>30</sup> Ieconí iaímaiaí uisídi cide. Jesús naie rafuena llwana eo janotade.

—Bumo lloñeno —llote;

<sup>31</sup> iadedí iena llocana jaidiaímaiaí. Iemona Jesús mamecí nana naie eniruemo itinomo soride.

*Jesús ñaiñedimíena jillotaja rafue*

<sup>32</sup> Capernaumona Jesús bai jaidemo, naimie dine Janaba anamo illamíena jiaíe comíní atidimací. Janaba anamo naimie illa jira, naimie ñainide.

<sup>33</sup> Jesús Janabana oní orede. Oretaja mei, naie íma ñaíte. Nainomo ite comíní raíjicaillanona raitimací:

—Cai comíní dine bie isoide íma jillwana jaca cioñedicai.

<sup>34</sup> Ie jira fariseuaí comíní dinena raitimací:

—Taífe díbeimo Janaba illamona, Jesúdi Taífe uaido Janabana oní orede — raitimací.

*Jesúdi comínina duenaila rafue*

<sup>35</sup> Díga nairaíaimo ie llofueoicaigano díga Jesús llocana jaide. Nainomo judíuaí ofiracuaimo llofueuide. Naimie anamo comíní illana Jusiñamui jitailla jira, Jesúdi Jusiñamui díbeimo naimací comeciaí iuaina meiduana llofueite. Ailluena duidínona jillotate. Naga isoide duicomona jillotate.

<sup>36</sup> Naimacina duenaite. Naimací comeciaí iticino oní duiñoitimie íñena jira, naimacina duenaite. Ailluena comínina cide. Toíca llaudaíai isoi ebe isoi jaidimací. Naimací comeciaí ocuiñonidimací. Jusiñamui naimacina sedaacana uiñoñedimací.

<sup>37</sup> Naimacina duenailamona, ie llofueoicaiganomo llote:

—Illímo ailluena trigo ia, iena ollena, ailluena maijirainína jitailla. Ie isoide. Ailluena comíní ite naimacimo Jusiñamui rafuena cai lollena; iadedí naie rafuena llorainí eo íñedimací.

<sup>38</sup> Ie rafue naimací lollena, ailluena comínina raíre naimie oretallena Jusiñamuimo jicano.

**10***Jesúdi ie doce llofueoicaiganona fetua rafue*

(Mr 3.13-19; Lc 6.12-16)

<sup>1</sup> Ie doce llofueoicaiganona Jesús uaiduanona, naimacimo ie uai íñonocaide, jananaí anamona comínina jilloitallena. Duiconona oní oretallena, iena jiaí íñonocaide.

<sup>2</sup> Ie llofueoicaiganodí iese mamecíredimací: Simón. Naimie mamecí jiaicídí Pedro. Andrés. Naimiedí Simón ama. Jacobo. Juan. Iaímaiaí Zebedeo jito iaímaiaí.

<sup>3</sup> Felipe. Bartolomé. Tomás. Cuena jiaí uaidote. Mateodícue. Gobierno ucubena oraimadícue. Jiaíe Jacobo. Naimiedí Alfeo jito. Tadeo.



<sup>4</sup> Jiaie Simón. Naimiedi cananista comini facaisemo duide. Judas Iscariote micori. Naimiedi Jesúna gaitatate.

*Jesúdi ie llofueoicaiganona oretaja rafue*  
(Mr 6.7-13; Lc 9.1-6)

<sup>5</sup> Jesús ie llofueoicaiganona oni oretajanona, raite:

—Judíuaiñedino dine jaiñeno. Samaritano railla comini dine jaiñeno;

<sup>6</sup> ia cai judíuai comini dine jai. Naimacimona ailluena comini Jusiñamui rafuena nia inoñedimaci. Faificana nia jaidimaci.

<sup>7</sup> Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”.

<sup>8</sup> Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno.

<sup>9</sup> Ucubena uiñeno. Guille ifo meidollena, rana uiñeno.

<sup>10</sup> Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi ridollena, jiguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno.

<sup>11</sup> Nie nairaimo omoi ria, omoi rafuena jitaidimiena jeno, naimie jofomo omoi illena. Naie jofomo omoi i, naie nairaimo omoi ille dinori.

<sup>12</sup> Naie jofomo omoi rillanona, naie cominina marena uaido.

<sup>13</sup> Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitañenia: “Jusiñamui omoina canoite” naimacimo lloñeno.

<sup>14</sup> Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eillaimo ite jearacuaina jaidino. Maraiñede rafuena naimaci finuana naimaci uiñollena, omoi eillaina jaidino.

<sup>15</sup> Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

*Jesús duere sefuillifuenta llua rafue*

<sup>16</sup> Jesús ie llofueoicaiganomo nia llote:

—Naimacina janallari fañellena, naimaci duere sefuiñellena, toica llaudaiai raise sedajana jitaidimaci. Ie isoide. Eo maraiñede comini motomo omoina oretaiticue. Omoina duere finoacanitimaci. Raise sedajana jitaidomoi. Jaio fodaiñellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i.

<sup>17</sup> Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci.

<sup>18</sup> Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitinomo cue rafuena lloitomoi. Naie illaicominimo iena jiai lloitomoi.

<sup>19</sup> Naie illaicomini dine omoi ia, omoi ridollicinomo omoi comeciaina jarire facañeno. Naie facaise omoi ñaillicinona uiñoitomoi.

<sup>20</sup> Dani omoi comeciai icinodo ñañeitomoi; ia Jusiñamui Joreño uaido ñañitomoi.

<sup>21</sup> Cuen a inotomoi; ia ailluena cuena inoñeitimaci. Cuen omoi inua jira, omoina enoitimaci. Iemona dajerie ie amana meinetallena, naimiena

llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci.

<sup>22</sup> Cue muidona ailluena comini omoina enoitimaci; iadedi cue uaina fainonocañedimie cue Moo diga monamo ja muidomo jaca iite. Naimiena jillotaiticue.

<sup>23</sup> Cue rafue naimaci jitaiñenamona, omoina nie nairai duere finoia, dinomona cue rafuena lollena, jiaie nairaimo raire jai. Cue rafuena omoi lollena, diga judíuai illanuaimo nia jaitomoi. Nana naie comini nia ñinoñenia, Jusiñamui dinena dane abido biiticue.

<sup>24</sup> Ero, ie llofueraima duere sefuia, ie llofuegamie daje isoi duere sefuite. Ie eci illamie duere sefuia, ie mullaíma daje isoi duere sefuite.

<sup>25</sup> Ie isoide. Cue cominina omoi jaillamona, cue duere sefuia, jiai duere sefuitomoi. Taife mameci jiaici llinuanona, “Beelzebúdio” jiaíno cuena raitimaci. Iese cuena naimaci jeare ñaía jira, cue cominina omoi illa jira, omoina jiai jeare ñaitimaci.

*Jesúdi jaciruiñeno llofuia rafue*

*(Lc 12.2-9)*

<sup>26</sup> Jesús nia llote:

—Cuenta ñinoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno.

<sup>27</sup> Omoimo rafuena anado jai lloticue. Iena nana cominimo marefodo llono. Ado llono.

<sup>28</sup> Omoi abina meineredimaci; ia omoi joreño meinenidimaci. Omoina naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede.

<sup>29</sup> Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaiñenia, naimacimona daje fiódaiñede.

<sup>30</sup> Ero, niga ifotirai omoimo illana Jusiñamui uiñote.

<sup>31</sup> Naimiedi omoina sedajana jiai uiñote. Silliñiaí baífemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

*Jesús naimiena janoñenana llofuia rafue*

*(Lc 12.8-9)*

<sup>32</sup> Ie llofueoicaiganomo Jesús nia llote:

—Cue rafuena omoi llamona, jiaíno omoina duere finoitimaci. Cuenta birui omoi janoñenia, nana comini Jusiñamui uicomo íco ia, nainomo omoina janoñeiticue. “Cue cominidomoi” omoina raiticue.

<sup>33</sup> Cuenta birui omoi janoia, nana comini Jusiñamui uicomo íco ia, nainomo omoina janoiticue. “Cue cominiñedomoi” omoina raiticue.

*Jesús muidona nana comini uri iñena rafue*

*(Lc 12.51-53; 14.26-27)*

<sup>34</sup> Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuenta ñinoñedinodi cuenta ñnotinona enoitimaci. Enoillamona cuenta ñnotinona duere finoitimaci.

<sup>35</sup> Cue lloga rafuena damierie ñnua muidona, ie moo illa díbeimo ie jito iñeite. Ie ei illa díbeimo naiñaiño jisa iñeite. Ie jifaiño illa díbeimo naiñaiño mio iñeite. Iese cominina uri itatañedicue.



<sup>36</sup> Omoi comini coninina enoitomoi. Iemona duere sefuitomoi.

<sup>37</sup> Ero, ie moona cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise duiñede. Ie uruia cue baifemo bu isirua, cuemo raise duiñede.

<sup>38</sup> Cue facaina bu fiolaiacaiñenia, cuemo raise duiñede. Naimiedi cue comini naimiena lloiacaiñedicue.

<sup>39</sup> Cue facaina fiolaiacaiñedimie ja muidomo faifite. Cue diga jaca iñeite; iadedi cue facaina fiolaitimie monamo cue diga jaca iite.

*Jesús Jusiñamuimona ibana feiñua llua rafue*

*(Mr 9.41)*

<sup>40</sup> Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimiedi cuena oretatimiena jiai feiñote.

<sup>41</sup> Naimie cue comini illamona, damerie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite.

<sup>42</sup> Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena lollena, orede.

## 11

*Jesús dine Juan Bautista micori ie llofueoicaiganona oretaja rafue*

*(Lc 7.18-35)*

<sup>1</sup> Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

<sup>2</sup> Ie facaiseconi cárcelmo Juan Bautista micori Jesús finoca rafuena fidiano, iena raise uñollena, Jesús dine ie llofueoicaiganona orede.

<sup>3</sup> Jesús mo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uñoiacadica. Imieñedi odena, jaimie billemo nia ocuridica.

<sup>4</sup> Jesús uai ote:

—Cue llua cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.

<sup>5</sup> “Uisidino jai ciotimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiolailamona damerie jai jillodimaci. Dueredino mare rafuena jai cacadimaci” naimiemo llono.

<sup>6</sup> Jiai llono: “Nibai nana cue rafuena raise cacaiñedio; ia cuena jaca nia inocana o jaia, camare iitio”.

<sup>7</sup> Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide.

<sup>8</sup> ¿Bue ñellena naimie dine jaidomoi? Mare iniroina jitaadinona cioñedomoi. Mare iniroina jitaadinona omoi cioacaniadedi, illaicomini dine jaidomoi.

<sup>9</sup> Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.

<sup>10</sup> Malaquíás micori naimiena jaie cuega:

Jusiñamui raite: “Ero, o uicodo cue rafuena lollena, damiena oretaiticue, comini comeciaina marecinona duiñollena” cuega. Malaquíás Juan Bautistana cuete.

<sup>11</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuate; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

<sup>12</sup> Juan llofua tainiamona ailluena comini cue rafuena inuamona, Jusiñamui dibeimo birui duere iacadimaci.

<sup>13</sup> Nana Jusiñamui facaina lloraini micoriaidi cue billena jaie llotimaci. Moisés micori iena jia jaie llote. Juan facaise naie llogacino jai suide.

<sup>14</sup> Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena inotomoidena, Juandi naimiena uiñotomoi.

<sup>15</sup> Omoi jeforena jira, raise fueollena, cue llamo cacarei.

<sup>16</sup> Jesús nia llofuate:

—Ero, omoina ñaiticue. Jifanote uruia isoidomoi. Uruia jifanoiacania, naimaci nabairiñaina uaiduanona, raitimaci:

<sup>17</sup> “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci.

<sup>18</sup> Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci.

<sup>19</sup> Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuen jia gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”. Iese raitomoi; iadedi Jusiñamuina inotinodi cue finoca rafuena marenana uiñotimaci.

### *Dajerie nairai Jesúna inoñena rafue*

*(Lc 10.13-15)*

<sup>20</sup> Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite.

<sup>21</sup> Llote:

—Omoimona damerie Corazín railla illanomona bitomoi. Omoimona damerie Betsaida railla illanomona bitomoi. Cue rafuena omoi inoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitananona, naimaci ifogiamo jusefona jonetimaci.

<sup>22</sup> Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi.

<sup>23</sup> Omoimona damerie Capernaum railla illanomona bitomoi. Birui abina iedoiacadomoi; iadedi jairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñena, monamo cue Moo diga jaca iñeitomoi; iadedi naimie omoina duere finollemona sunaitomoi.

<sup>24</sup> Jusiñamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi –llote.

*Jesús ie Moo diga ñaia rafue  
(Lc 10.21-22)*

<sup>25-26</sup> Ie facaiseconi Jesús ie Moo diga ñaianona raite:

–Ore Moo, oca mona Namadio. Oca enirue Namadio. Abina uiñotina bue isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaacadicue. Mai.

<sup>27</sup> Jesús dinena naimie ecimo ite cominimo dane llote:

–Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitaille diese omoina naimiena uiñotadicue. Ie muidona naimiena uiñotomoi.

<sup>28</sup> Omoi jeacinomona omoi jillobillena, duere jaidomoi. Omoi comeciai marena uri illena, cue dibeimo mai omoi i.

<sup>29</sup> Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite.

<sup>30</sup> Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

## 12

*Sábadoruimo Jesús llofueoicaigano majia rafue  
(Mr 2.23-28; Lc 6.1-5)*

<sup>1</sup> Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naido jaide. Ie llofueoicaigano aimetailla jira, trigona tijiano, golluano, guicana jaidimaci.

<sup>2</sup> Dajerie fariseuai iena ciuano, llotimaci:

–Ero, o llofueoicaigano rairuica rana finosite. Moisés micori rairuilla jira, sábadoruimo majinidicai; iadedi trigona naimaci tijiamona, caimona jai majidimaci. Iese cai abimo jeacinona jai finodimaci.

<sup>3</sup> Ie llofueoicaiganona riiduanu, Jesús uai ote:

–Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide.

<sup>4</sup> Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede.

<sup>5</sup> Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini majiuidimaci. Jusiñamuina naimaci sedallena, ocainana fatimaci. Iraina bonodimaci. Iese majiuidimaci; iadedi Jusiñamuimona jeacino finoñedimaci. Moisés micori jaie ciegafuiaina raise cacañedomoi. Iena raise facañedomoi.

<sup>6</sup> Omoimo nia lloiticue. Jusiñamui jofomo finoca rafue baifemo faiticue.

<sup>7</sup> Jusiñamui facaina lloraïma iena jaie cueda: “Cuemo rana omoi fecajana jitaidicue; ia omoi jitaillamona, jiaie cominina omoi duenillacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedinona finodomoi” lloñedomoi. Cuemona cue llofueoicaigano jeacino finoñedimaci.

<sup>8</sup> Monamona billanona, ñimana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

*Jesúdi onollina idisarodimiena jillotaja rafue*  
(Mr 3.1-6; Lc 6.6-11)

<sup>9</sup> Bai jaillanona, nairai dine rillanona, naimaci ofiracomo Jesús fo jaide.

<sup>10</sup> Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci.

<sup>11</sup> Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi.

<sup>12</sup> Ero, cominidi llauda bai femo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

<sup>13</sup> Onollina idisarodimie mo lloite:

—O onolli mai oni ñuita.  
Iena ñuitajamona jillode.

<sup>14</sup> Iena ciuanona, fariseuai jino jaidimaci. Naimiena meinellena, coniniri siadotimaci.

*Isaías micori jaie Jesúna ñaia rafue*

<sup>15</sup> Naimiena naimaci meineiacanana Jesús uñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

<sup>16</sup> —Cuenallocana jaiñeno —naimacimo lloite. Naimie mameci are sorillana jitañede. Fariseuai diga ie uai uaitaiacaiñede.

<sup>17</sup> Iemona Isaías micori jaie ciegafuai jai suide. Jusiñamui Isaías micorina jaie cuetataga:

<sup>18</sup> Ero, cue fetoca mullaíma ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judíuaiñedinomo naimacina cue jilloitaacanana lloite.

<sup>19</sup> Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

<sup>20</sup> Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue llamona, naimiena inotinona canoite.

Nana comini naimie anamo ille dinori iese naimie canoite.

<sup>21</sup> Naimaci jillobillena, ie rafue cacajanona, ailluena judíuaiñedinono naimiena inoitimaci.

*Fariseuai Jesúna jeare ñaia rafue*  
(Mr 3.19-30; Lc 11.14-23; 12.10)

<sup>22</sup> Jesús dine damieriedi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Cíode.

<sup>23</sup> Naiena ciódino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

<sup>24</sup> Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

<sup>25</sup> Naimiena naimaci enoillana Jesús uñuanona, naimacimo lloite:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci.

<sup>26</sup> Ie isoide. Beelzebú uaido jananiaina omoi llua isoi cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci.

<sup>27</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jcano, bie isoide rafuena omoi raise uiñollena. Iemei cue finoca rafuena uaitañeitomoi.

<sup>28-29</sup> Ero, mairidimie ie jofomo ite rana nibai fiiacadomoi. Iena fillena, naimiena nano raise omoi maiga. Raise maia mei, ie rana fiiedomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua jai uiñotomoi.

<sup>30</sup> Cue dibeimo iñedimie cuena enoide. Cue dibeimo cominina itañedimiedi naie cominina cuena inotañede.

<sup>31</sup> Ie jira omoiimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreñoña jeare ñaiacinona dotañeite.

<sup>32</sup> “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreñoña omoi jeare ñaia, Jusiñamui iena birui feitañeite. Iena ico jaca feitañeite.

### *Jesúdi riará llisilla llua rafue*

*(Lc 6.43-45)*

<sup>33</sup> Jesús llote:

—Llisillamona nie isoide riará illana uiñoticaí. Amena ie llisilla llillamona, amena marena uiñoga. Llillamona, amena marañenana jiaí uiñoga.

<sup>34</sup> Ie isoide. Omoi ñaiamona omoi na uiñoticaí. Cuena omoi marañeno ñaia jira, omoi comeciái iticinona uiñoticaí. Omoi marañena jira, jaió nairaidomoi isoidomoi.

<sup>35</sup> Mareuidimie mare ie comecimona ñaite; iadedi marañedimie marañede ie comecimona ñaite.

<sup>36</sup> Jamaí ebena birui omoi ñaia, Jusiñamui uicomo nana comini ico illa facaiseconi Jusiñamui iba oite.

<sup>37</sup> Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciái iuai meido.

### *Dajerie Jesús siño rafuena finuana jitailla rafue*

*(Mr 8.12; Lc 11.29-32)*

<sup>38</sup> Naie facaiseconi dajerie Moisés micori llogacinona llofueraini dajerie fariseuai diga Jesúmo llotimaci:

—Maestro, o lloga uaina caí inollena, siño rafuena o finuana cioacadicaí.

<sup>39</sup> Jesús uai ote:

—Marañedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamaí cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca.

<sup>40</sup> Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue.

<sup>41</sup> Lliciaí jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciái icinuaina meidotimaci. Cue rafuena omoi cacajamona, omoi

comeciai icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoi na raiñeiticue. Jonás micori baifemo birui uaidicue; iadedi cuena ñnoñedomoi.

<sup>42</sup> Ero, Saba railla nairai ie illaiño micoridi Salomón micori dine jaie aarena jaide. Naimie micori uinuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena ñnoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoi na ico ñaite: “Naimiedi siño rafue finuana ciodomoi. ¿Bue ñellena naimiena ñnoñedomoi?” omoi na ico ñaite.

*Janaba anamo illamie rafue*  
(Lc 11.24-26)

<sup>43</sup> Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede.

<sup>44</sup> Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie iima comeci namanidena naimie baite.

<sup>45</sup> Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci ñnoñena, eo fodo jaitimaci.

*Jesús ie comini*  
(Mr 3.31-35; Lc 8.19-21)

<sup>46</sup> Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide.

<sup>47</sup> Damie Jesúmo llote:

—O ei, o amatiai diga, jino ite. O diga ñaiacade.

<sup>48</sup> Naimiemo Jesús dinena jicanote:

—¿Bu cue ei? ¿Bu cue amatiai?

<sup>49</sup> Ie llofueoicaigano dine ie onolli ñuitajanona, raite:

—Jadi, cue ei, cue amatiai.

<sup>50</sup> Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

## 13

*Trigo judaidimie rafue*  
(Mr 4.1-9; Lc 8.4-8)

<sup>1</sup> Nai jofomona nairui Jesús jaillanona, jorai fue dine jaide.

<sup>2</sup> Ailluena comini nainomo ofilla jira, botemo Jesús jaillano, ana raide; iadedi comini jorai fueo itimaci.

<sup>3</sup> Ailluena rafue naimacimo llote:

—Jusiñamui omoi na sedaacana omoi fueollena, bie rafuena lloiticue. Damie trigona judaiaide.

<sup>4</sup> Naimie judaiamona, naisomo janore iduai juide. Naimie bai jailla mei, silliniñai iena guisaibitimaci. Ie jira sicoñede.

<sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

<sup>6</sup> raise jainañena jira, ecasillamona duide. Ie jira llisiñede.

<sup>7</sup> Eecuai illanomo jiaie iduai juide. Eecuai sicuamona, riarra eecuai ibaica. Ie jira llisiñede.



<sup>8</sup> Mare eniruemo jiaie iduai juide. Sicode. Llisillamona danademo cien diga llisillana ote. Jiainamona sesenta diga llisillana ote. Jiainamona treinta diga llisillana ote.

<sup>9</sup> Omoi jeforena jira, raise fueollena, cue lluomo cacarei. Iena #no.

*Jesús ie como lloga rafuena llofuia rafue*

*(Mr 4.10-12; Lc 8.9-10)*

<sup>10</sup> Ie llofueoicaigano Jesúmo jicanuaibiside:

—¿Bue ñellena bie isoide rafuedo cominina llofuetio?

<sup>11</sup> Uai ote:

—Jusiñamuidi omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñoñañede.

<sup>12</sup> Jusiñamuina #notimie Jusiñamui rafuena #nocana jaite. Jusiñamui naimiena uiñoñotaite; iadedi Jusiñamuina #noñedimie Jusiñamui rafuena uiñoñecana jaite.

<sup>13</sup> Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci #noñena jira, uiñoño jaitimaci. Cue llofuiana jamai cacadimaci; iadedi naimaci #noñena jira, raise cacaiñedimaci. Uiñoñedimaci.

<sup>14</sup> Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>15</sup> Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisnidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona”.

Isaías micori Jusiñamuina #noñedinona iese jaie cuete;

<sup>16</sup> iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi #nua jira, ni ua omoi marena ille jillaci.

<sup>17</sup> Jusiñamui facaina jaie lloraini micoriai omoi siñoña ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie #notino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

*Jesúdi trigo judaidimiena llua rafue*

*(Mr 4.13-20; Lc 8.11-15)*

<sup>18</sup> Jesús llote:

—Ero, omoina trigo iduaina judaidimie rafuena llofueiticue.

<sup>19</sup> Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaimo cacaja uaina #notañede.

<sup>20</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

<sup>21</sup> Nofiemo riga iduai jainaonidedi raise sicoñede. Naie comini janore #nua jira, ie isoidimaci. Dallu nano #notimaci. Jusiñamui uai muidona duere naimaci sefuia, abido danomo uaidimaci.

<sup>22</sup> Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. #notimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaimo itabiñede. Jusiñamui jitaille rafuena finocana jaiñedimaci.

<sup>23</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside

isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

### *Raiticiai trigo motomo illa rafue*

<sup>24</sup> Jesús jiaie rafuena llote:

–Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide.

<sup>25</sup> Naimie inia mei, ie enoidimie trigona eruaide raiticiaina bainino judaiaide. Iemei oni jaide.

<sup>26</sup> Trigo sicuamona lliside. Naie facaise naie raiticiai como raise bairede.

<sup>27</sup> Judaidimie majiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?”

<sup>28</sup> Uai ote: “Cuen a enoidimie iese finoca”. Naie majiraini naimiemo jicanotimaci: “¿Birui nai raiticiai cai raitiana jitaideo?”

<sup>29</sup> Uai ote: “Dama ite. Raiticiai omoi raitia, trigona jiai jaitaitomoi. Dama iesede.

<sup>30</sup> Danomo sicoite. Ua facaiseconi cue majirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

### *Jesúdi mostaza ido llua rafue*

(Mr 4.30-34; Lc 13.18-19)

<sup>31</sup> Jesús jiaie rafue llote:

–Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riar a sicode.

<sup>32</sup> Mostaza ido eo janorede; iadedi sicua mei, eo aillue riar a jaillamona, nainomo sillini jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

### *Jesús siritate rana llofuia rafue*

(Mr 4.33-34; Lc 13.20-21)

<sup>33</sup> Jesús jiaie rafuena llote:

–Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

<sup>34</sup> Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede.

<sup>35</sup> Jusiñamui facaina lloraíma micori iena jaie cuega:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaisemona jaca bu iena uiñoñede.

Birui naimaci uiñoñena, iena lloiticue”.

### *Jesús trigo motomo riga raiticiaina llofuia rafue*

<sup>36</sup> Comini jino faionocaida, Jesús ie risoilla jofomo abido jaide. Ie llofueoicaigano naimiemo llotimaci:

–Iena raise cai uiñoñena, trigo motomo riga raiticiai rafuena caimo llono.

<sup>37</sup> Uai ote:

–Mare iduai judaidimiedi cue. Jusiñamui rafuena lloticue.

<sup>38</sup> Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini.



<sup>39</sup> Naie marañede iduai judaídímiedi Taife. Ua facaisedi cue abido bille facaise. Trigo otinodi Jusiñamui jaienisaí. Trigodi cuena ñnotino.

<sup>40</sup> Jobailena raiticiaí ofitaja isoi, ico abido cue bia, daje isoi iite.

<sup>41</sup> Cue jaienisaína oretaiticue, nana jeacinona finoraini diese ofitallena, cue illanomona iraimo dotallena.

<sup>42</sup> Nainomo eo duere sefuillamona, eetitímaci. Subicaitímaci.

<sup>43</sup> Iemei jitoma lligaiñua isoi, Jusiñamui sedajanomo naimiëna ñnotinodi marena bairenitímaci. Omoi jeforena jira, raise fueollena, cue lluomo cacarei. Bie isoi omoi duere sefuiñellena, cue lluana ñno.

#### *Jesúdi eniruemo isiruiga reica rana llofua rafue*

<sup>44</sup> Jesús llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñena jira, naie eniruena uainino íbaacade, naie ra ollena. Ucube ollena, naie rari íobilla jira, nana naimiëmo ite raruiaina fecaite. Iemei eniruena íbaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

#### *Perlas railla rafue*

<sup>45</sup> Jesús llote:

—Jusiñamui díbeimo comini jailla rafuena lloiticue. Iena omoi raise uñollena, perlas railla rana íbaraimana lloiticue. Eo mare perlas íballena jenocabide.

<sup>46</sup> Eo raifide perla naimië baia, naie perlana íballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

#### *Jesús lloijina ñaia rafue*

<sup>47</sup> Jesús llote:

—Jusiñamui díbeimo comini jailla rafuena lloiticue. Iena omoi raise uñollena, lloijina lloiticue. Joraimo lloijina comini faianona, naga isoide lliciaína otímaci.

<sup>48</sup> Ari sonua mei, mare lliciaí diese fetodímaci. Marañede lliciaí diese oni faitímaci.

<sup>49</sup> Ie isoide. Ico abido cue bia, iese iite. Jusiñamuina ñnotinomona naimiëna ñnoñedino diese oni fetollena, Jusiñamui jaienisaí biitímaci.

<sup>50</sup> Iemei iraimo Jusiñamuina ñnoñedinona dotaitímaci. Nainomo eo duere sefuillamona eetitímaci. Subicaitímaci.

#### *Jesús llofueoicaiganodi mare rafuena jai uñua rafue*

<sup>51</sup> Ie llofueoicaiganomo Jesús jicanote:

—¿Nana cue lluana cacadomoi?

Uai otímaci:

—Jii, nana cacadicaí.

<sup>52</sup> Naimacimo llote:

—Ie jofomo comini bia, naimacina raise nafuellena, naimacina caimare itatallena, jofo nama ie mare raruiaimona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriaí llogacinona uñotomoi. Cuemona Jusiñamui ie cominina sedaja rafuena fueocana jiaí jai jaidomoi. Comini comeciaina caimare itatallena, birui llofueredomoi.

#### *Nazaretmo Jesús illa rafue*

(Mr 6.1-6; Lc 4.16-30)

<sup>53</sup> Naie rafuena Jesús llua mei, nainomona Nazaretmo jaide.

<sup>54</sup> Ie eniruemo rillanona, Nazaretmo ite ofiracomo llofuede. Naiemona cominidi rajjicaillamona raitimaci:

—¿Niese naimiedi eo abina uifnote? ¿Niese siño rafuena naimiedi finode? Naimiedi jamai bue isoidimie.

<sup>55</sup> Naimie amederaima jito. Naimie eidi María. Naimie amatiaidi Jacobo, José, Simón, Judas.

<sup>56</sup> Naimie miriñotiaidi cai motomo jiai ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

<sup>57</sup> “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

<sup>58</sup> Naimie uaina naimaci ñnoñena jira, Jesús ailluena siño rafue finoñede.

## 14

### *Juan Bautista micori fiodailla rafue (Mr 6.14-29; Lc 9.7-9)*

<sup>1</sup> Naie facaiseconi Herodes railla gobernador Jesús mamecina cacade.

<sup>2</sup> Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

<sup>3-4</sup> Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiena duere finode. Herodes Juan micorina gaitatajanona, cárcelmo jonetade.

<sup>5</sup> Naimie micorina meinetacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite.

<sup>6</sup> Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade.

<sup>7</sup> Ie jira naiñaiño llote:

—Nie isoide rana o jitaiadedi, omo iiticue. Illaíma uai cuemo illa jira, iena ua finoiticue.

<sup>8</sup> Naiñaiño ei naiñaiño lluanona, naiñaiño uai ote:

—Juan Bautista ifogí bandejamo jonecaida, cuemo ine.

<sup>9</sup> Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote.

<sup>10</sup> Ie lloga uaina finollena, cárcelmo soldadona orede. Nainomo Juan micori ifogina jaitade.

<sup>11</sup> Bandejamo naimie micori ifogí jonecaida, soldado atiano, Herodías jisamo fecade. Ieconi ie eimo fecade.

<sup>12</sup> Iena fidianona, Juan micori llofueoicaigano naimie micori abina uaibitimaci. Iena naimaci raia mei, Jesús lluidimaci.

### *Jesús cinco mil iñiaina ecaja rafue (Mr 6.30-44; Lc 9.10-17; Jn 6.1-14)*

<sup>13</sup> Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

<sup>14</sup> Eniruemo Jesús sijia, ailluena cominina dafaifide. Naimacina ciuanona, naimacina duenailanona, duidinona jillotate.

<sup>15</sup> Jitoma ana itemo, ie llofueoicaigano naimie dine lluaibitimaci. Raitimaci:  
—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

<sup>16</sup> Uai ote:

—Naimacina oretañeiticue. Naimacina omoi eca.

<sup>17</sup> Uai onaisite:

—Dani caimo ite cinco llomenico, mena lliciai diga.

<sup>18</sup> Uai ote:

—Iena cuemo ati.

<sup>19</sup> Raitie illanomo comini ana raillesa llono —raite.

Naie cinco llomeniconona naie mena lliciai diga uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena.

<sup>20</sup> Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

<sup>21</sup> Cinco mil iñiaie diese guitimaci. Naimaci aitiaie jiaie guitimaci. Naimaci uruiaie jiaie guitimaci.

*Jesús jinui emododo macarilla rafue*

*(Mr 6.45-52; Jn 6.16-21)*

<sup>22</sup> Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote.

<sup>23</sup> Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite.

<sup>24</sup> Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci.

<sup>25</sup> Nia monañedemo, jinui emododo naimaci dine Jesús bite.

<sup>26</sup> Naimiena naimaci ciuanona, jacinaillamona, raitimaci:

—¿Bu joreño caimo billana ciodicai? —Jacinaillamona cuiridimaci.

<sup>27</sup> Naie dacaiño Jesús naimacimo llote:

—Omoi joreñonicañeno. Cuesa. Jaciruiñeno.

<sup>28</sup> Pedro uai ote:

—Uanai cai Namadio. O dine cue billesa cuemo llono.

<sup>29</sup> Jesús uai ote:

—Cue dine bi. —Ie jira botemona jinui emodo Jesús dine Pedro macarite;

<sup>30</sup> iadedi aifi billana naimie ciuanona, jacinaitie. Jinuimo anabaiacade. Ado cuiroidie:

—Nama, cuena cano.

<sup>31</sup> Jesús ie onolli oni ñuitajanona, naimiena llinuanona, raite:

—Eo janore cue uaina inotio. ¿Bue ñellena eo inoñedio? Cuenan inotiodena, jinui emododo cue dine niadedi ridio.

<sup>32</sup> Botemo a iaiaiaie jaillamona, ie facaise aifi llicaiide.

<sup>33</sup> Ie jira botemo itino Jesúsimo iobillacinona fecadimaci.

—Odi ua Jusiñamui Jitodio —raitimaci.

*Jesúdi duidinona Genesaret eniruemo jillotaja rafue*

*(Mr 6.53-56)*

<sup>34</sup> Ruica dine jaillanona, Genesaret railla eniruemo ridimaci.

<sup>35</sup> Jesúsna nainomo itino uiñuamona, naimie dine duidinona atillena, nana nairaimo jiaie cominina oredimaci.

<sup>36</sup> Naimie dine billanona, daní ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

## 15

### *Jesúdi comini comeciaina ñaia rafue (Mr 7.1-23)*

<sup>1</sup> Jerusalémona fariseuai comini Jesús dine bitimaci. Moisés micori llogacinona llofueraíni jiaí bitimaci.

<sup>2</sup> Naimiemo jicanotimaci:

—¿Bue ñellena o llofueoicaigano cai einamací rafuedo jaiñedomoi? Naimaci guiacania, naimaci onolli cai einamací llua isoi raise jocoñedomoi. Ie jira cai abimo jeacino finodomoí.

<sup>3</sup> Jesús uai ote:

—¿Bue ñellena nana Jusiñamui llogacinodo jaiñedomoi? Omoi einamací llogacinodo jaidomoí; iadedí nana Jusiñamui llogacinodo raise jaiñedomoi.

<sup>4</sup> Jusiñamui jaie llote: “O moo uai inuanona, naimiena cano. O ei uai inuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

<sup>5</sup> Iese Jusiñamui llote; iadedí omoi einamací llotimaci: “Jusiñamuimo cai ucubena cai fecajamona, cai moona, cai eina jai canonidicaí”.

<sup>6</sup> Iese omoi finocabilla jira, omoi einamací llogacinodo omoi jaillamona, Jusiñamui uaina jamaidomoí.

<sup>7</sup> Mareuidinona abi caitauidinodomoí. Isaías micori omoína jaie raise llote. Naimiedí Jusiñamui llua cuete:

<sup>8</sup> Bimaci naimaci uaido marecinona cuemo llote; iadedí cue rafuedo raise jaiacaiñedomoi.

“Ona isiruiticaí” llotimaci. “Ona sedadicaí” llotimaci. Jamai ñaitimaci. Naimaci comeciái cue díbeimo raise iñede.

<sup>9</sup> Cue uai itena, jamai comini llucacinona naimaci llofuecabilla jira, tainona cuena sedadimaci.

<sup>10</sup> Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llua mo cacarei.

<sup>11</sup> Omoi einamací isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoi mo jeacino illa jira, Jusiñamuina nabaiñedomoi. Omoi comeciái jearena jira, jeacina finocabidomoí.

<sup>12</sup> Ie llofueoicaigano naimiemo lluaíbitimaci:

—O llua muidona, fairseuai cominina icidío.

<sup>13</sup> Naimie dinena uai ote:

—Dama ite. Nana cue Moomona oñega rafuedí jai ieconi duite. Naimaci rafue cue Moomona oñenia, ja muidomo ieconi duite.

<sup>14</sup> Naimacina faionocai. Uanaicinona naimaci uiñoñena jira, uisnidino isoidimaci. Jiaimiena uisnidimie ifoia, dafomo uaidiaimaiaí. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedomoi. Ja muidomo faifitimaci.

<sup>15</sup> Pedro naimiemo llote:

—Aillinano o llua caimo raise llono.

<sup>16</sup> Uai ote:

—¿Ñiese cue llua jiaí nia cacaiñedomoi?

<sup>17</sup> Nie isoide ra guitomona, omoi jebemo jaide. Ie mei omoi abiamona jino bite;

<sup>18</sup> iadedi omoi comeciaino iticinomona jearedena ñaitomoi. Omoi comeciaino jearena jira, jearede rafuena finocabidomoi.

<sup>19</sup> Omoi comeciaino jearena jira, jeare comeciaina facacabidomoi. Comena meinecabitomoi. Omoi añede riño diga icabitomoi. Omoi iniñede ima diga icabitomoi. Firicabitomoi. Tainona llogiricabitomoi. Jiaie comini joreña jeare ñaicabitomoi.

<sup>20</sup> Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuñede.

*Jesúdi judío ñañiñediñañiñona jillotaja rafue  
(Mr 7.24-30)*

<sup>21</sup> Genesaret railla enruemona ie llofueoicaigano diga Jesús jaillanona, Tiro railla enruemo jaide. Sidón railla enruemo jia jaide.

<sup>22</sup> Ie facaiseconi naie enruemona judíuñediñañiñodi billanona, raite:  
—Maestro, David micorí jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

<sup>23</sup> Jesús uai oñede. Ie jira ie llofueoicaigano naimie dine billanona, duere llote:

—Naiñaiñona abido ie jofomo oreta. Caimo duere jicanuaibitesa.

<sup>24</sup> Jesús uai ote:

—Fañicana jaillana naimací jai jailla jira, dani cai judíuai cominimo cue Moo cuena oretate. Naimiedi judíuñediñañiñomo cuena oretañede.

<sup>25</sup> Ie facaise naimie dine naiñaiño billanona, naimiemo iobillacinona fecalena, cañici ifodo ana rainada raite:

—Maestro, cuena cano.

<sup>26</sup> Judíuaiñedinona naimie canoñenana naiñaiño uñollena, naiñaiñomo Jesús llote:

—Uruiai guillamona jiconiaina ecadicaidena, marañede.

<sup>27</sup> Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiaie rafuemo comecina facade. Uruiaina llote; iadedi judíuaino comecina facade. Jiconiaina llote; ia judíuaiñedinomo jia comecina facade. Comecina facade: “O cominimo o rafue duide; ia cai Namana o illa jira, nibai o rafue caimo janore duide”.

<sup>28</sup> Jesús uai ote:

—Cue uaina o ñnua jira, o jitaila rafuena finoiticue. —Ieconí naiñaiño jisa jillode. Janaba naiñaiñomona oni jaide.

*Jesús ailluena duidinona jillotaja rafue*

<sup>29</sup> Nainomona Jesús bai jaillanona, Galilea railla jorai fuedo jaide. Iemei aneduaino jaillanona, nainomo ana raide. Nainomo rilla mei,

<sup>30</sup> ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruaidinona, uisididina, uainidinona atidimaci. Diga duidinona naimie dine atidimaci. Iemei naimacina jillotate.

<sup>31</sup> Ailli uainidino jai ñaiana cacajamona, ailli onollina idisaruaidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisididino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

*Jesúdi cuatro mil iñiaina ecaja rafue  
(Mr 8.1-10)*

<sup>32</sup> Jesús ie llofueoicaigano naimie dine uaiduanona, raite:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci baii raillanona. Naimacina cue duenailla jira, naimacina canoacadie.

<sup>33</sup> Jicanotimaci:

—¿Ninomona guille oiticaí, naimacina caí ecallena? Ailluena comini ite; iadedi jofue iñenanomo iticaí.

<sup>34</sup> Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

<sup>35</sup> Comini ana raillena Jesús llote.

<sup>36</sup> Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena.

<sup>37</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

<sup>38</sup> Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci.

<sup>39</sup> Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

## 16

*Fariseuai comini Jesúmo siño rafuena finuana jicanuano billa rafue  
(Mr 8.11-13; Lc 12.54-56)*

<sup>1</sup> Dajerie fariseuai comini Jesús dine bitimaci. Naimiena facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena caí cioillena, Jusiñamuina siño rafuena finota.

<sup>2</sup> Jesús uai ote:

—Jitoma sojicaidemo, mona jiaírenia, raitomoi: “Ico are maremonanite”.

<sup>3</sup> Jiaí raitomoi: “Jitiramo mona jiaírenia, ja noci deite”. Monamo omoí eruaillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoí motomo birui suide rafuena raise cacaiñedomoi. Abina uiñotinona abi caitadomoi.

<sup>4</sup> Jeacinona finocabidomoi. Jusiñamui díbeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeциаina omoí faca. Fiodaillamona naimie jillode. Ie isoi cue jiaí jilloiticue. —Ie llua mei, naimacimona Jesús ie llofueoicaigano diga oni jaide.

*Jesús siritate rana llofuia rafue  
(Mr 8.14-21)*

<sup>5</sup> Ruica dine naimaci rillanona, ie llofueoicaigano llomeniconona feillana uibiñotimaci.

<sup>6</sup> Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiaicinomona abi rairuillena ñaite.

<sup>7</sup> Jesús iese llua jira, iena naimaci raise cacaiñena jira, daní coniniri siadotimaci:

—Llomeniconona caí atañena jira, caimo iese llote.



<sup>8</sup> Naimaci siaduana Jesús uñua jira, naimie lluana naimaci nia raise cacaiñena jira, naimacimo llote:

—Cue uaina nia raise ñnoñedomoi. Omoína canoredicue. ¿Bue ñellena dani omoi llomenico iñenana siadotomoi?

<sup>9</sup> ¿Ñiese ñnoñedomoi? ¿Ñiese cue navui siño fino ca rafuemo comeciaina facañedomoi? Navui cinco mil iñiaí cinco diganicodemo guitimaci. Monillamona, guigamona fiebillamona, doce cirigaiaimo iraidomoi.

<sup>10</sup> Jiaicaiño cuatro mil iñiaí siete diganicodemona guitimaci. Monillamona guigamona fiebillamona, siete cirigaiaimo iraidomoi.

<sup>11</sup> Omoína cue ecallena, ¿ñiese cuena birui ñnoñedomoi? Llomenicon ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

<sup>12</sup> Ie facaise naimie lluana jai cacadimaci. Llomenico siritate rana naimie ñañede; iadedi fariseui llofuiacinomona naimaci abina rairuillena ñaite. Saduceuai llofuiacinomona naimaci abina rairuillena ñaite.

*Pedro Jesúsna llua rafue*

*(Mr 8.27-30; Lc 9.18-21)*

<sup>13</sup> Cesarea Filipino railla enruemo Jesús jaidemo, ie llofueoicaiganomo jicante:

—¿Ñiese jiaie comini cuena raitimaci?

<sup>14</sup> Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

<sup>15</sup> Jesús dane jicante:

—¿Ñiese omoi cuena raitomoi?

<sup>16</sup> Pedro uai ote:

—Odi cai Jilloitaraimadio. Cristodio. Jusiñamui facaina lloraini micoriai o billena jaie llotimaci. Cai cajede Jusiñamui Jitodio.

<sup>17</sup> Jesús dinena uai ote:

—Simón Pedro, Jonás jitodio. Marena llotio. Comini ona iena uñotañede; iadedi cue Moo Jusiñamui ona iena uñotade.

<sup>18</sup> Pedro, o comeciaina uñotacue. Cuena como o lloga uaina meidoñeitio. Bie rafuena jiaie cominimo o llumona, jiaí ñnoitimaci. Cuena ñnuamona, cue cominina jaitimaci. Cue díbeimo iñedino iena itatanidimaci.

<sup>19</sup> Ailluena cominimo Jusiñamui ie cominina jailla rafuena nano lloraimana jaitio. O llucacino jaitino cue cominina jaitimaci. O llucacino jaiñeitino cue cominina jaiñeitimaci

<sup>20</sup> Iena llua mei, ie llofueoicaiganona rairuide:

—Cue Cristonana bumona nia lloño.

*Jesús ie fodaillena llofua rafue*

*(Mr 8.31-9.1; Lc 9.22-27)*

<sup>21</sup> Naie facaisemona ie llofueoicaiganomo Jerusalémo naimie jaillena marefodo llote:

—Nainomona cai judíuai illaicomini cuena eo duere finoitimaci. Cuena meineitimaci; iadedi darui amani illanona, fodaillamona jilloiticue.

<sup>22</sup> Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

<sup>23</sup> Jesús jinafo dine naimiemo erodate. Raite:

—Cuemona oni jai. Iese ñañeno, Taife isoi o comeciaina o facaja jira. Jusiñamui isoi cuemo comeciaina facañedio. Comini isoi cuemo comeciaina facadio. Iese o comeciaina facañeno.

<sup>24</sup> Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite.

<sup>25</sup> Duere sefuillana jaciruillamona cue cominina bu jiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite.

<sup>26</sup> Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite.

<sup>27</sup> Cue jaienisaí diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue.

<sup>28</sup> Uanaicinona omoimo lloiticue. Omoimona dajerie nia fioidañeitomoimo, illaimana cue bairellena cioitomoí.

## 17

### *Jesús abí meidocaila rafue (Mr 9.2-13; Lc 9.28-36)*

<sup>1</sup> Seis digarui illanona, anedumo comini ñenanomo Jesús jaide. Naimie diga jaillena, Pedrona uite. Jacobona jiaí uite. Jacobo ama, Juan, jiaí uite. Jiaie llofueoicaiganona uiñede.

<sup>2</sup> Nainomo rilla mei, naimaci uicomo naimie abí meidocaide. Jitoma isoi naimie uieco bairecaide. Naimie iniroi naie dacaiño eo userecaide.

<sup>3</sup> Naie facaise naimacimo Moisés micorí joreño, Elías diga bairede. Elíadi Jusiñamui facaina jaie lloiraíma. Jesús diga ñaitiaímaiaí.

<sup>4</sup> Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micorí ie; jiaie Elías ie.

<sup>5</sup> Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiuga Jito. Naimieri iobidicue. Naimie lluomo cacareil-lanona, iena ñno —llote.

<sup>6</sup> Jesús llofueoicaigana iena cacajanona, eo jaciruillanona, naimaci uieco dinena ana bitadatimaci.

<sup>7</sup> Jesús naimaci dine billano, naimacina jetajanona, raite:

—Mai jaciruiñeno naidacai.

<sup>8</sup> Naimaci erorillamona, dama Jesúna cioidimaci.

<sup>9</sup> Anedumona bitimacimo, naimacimo Jesús llote:

—Omoí ailli ciua rafuena bumo lloñeno, cue fioidaillamona cue jillua dinori.

<sup>10</sup> Naimiemo llotimaci:

—Moisés micorí llogacinona llofueraíni birui raicabitimaci: “Elías raillamie dane biite. Ie mei cai Jilloitaraíma biite” raitimaci. Jusiñamui mona o billana ñnoticai. Odi cai Jilloitaraímana ñnoticai. Odi cai Jilloitaraímadíomo, ¿bue ñelli iese raitimaci?

<sup>11</sup> Uai ote:

—Raise ñnotomoí. Elías isoidimie jai bite, nana Jusiñamui jitaila rafue raise lollena. Jusiñamui dibeimo naimaci illena, comini imaci comeciaí meiduana llote.

<sup>12</sup> Ero, naimie jai bite; iadedi bie comini naimiena raise uiñoñedimaci. Naimaci jitaila jira, naimiena jai meinetimaci. Ie isoide. Naimacimona duere sefuiticue. Monamona biticue, imana cue jaillena; iadedi duere sefuiticue.

<sup>13</sup> Ie muidona Jesús llofueoicaigano naimiedi Juan Bautista micorina ñaiana jai uiñotimaci.



*Jesúdi Janaba anamo itimiena jillotaja rafue  
(Mr 9.14-29; Lc 9.37-43)*

<sup>14</sup> Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, caiñici ifodo rainadacaida raite:

<sup>15</sup> —Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uaicabide. Jiaicaiñodedi iraimo uaillanona, uside. Jinuimo jiaí uaillanona, niadedi corobaite.

<sup>16</sup> Naimiena jilloitallena o llofueoicaigano dine naimiena atidicue; iadedi naimiena jillotanidimaci.

<sup>17</sup> Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

<sup>18</sup> Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemonona Janaba oni jaide. Ieconí naie urue jillode.

<sup>19</sup> Ie mei ie llofueoicaigano Jesúmo anado jicannotimaci:

—¿Bue ñellena Janabana oni oretanidicai?

<sup>20</sup> Uai ote:

—Raise nia omoi ñnoñena jira, uanaicinona omoi mo lloiticue. Janaba oni oretallena, cue uai navui omoi mo iticue. Birui raise cuena omoi ñnoñena, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoi na naimie canuamona, bie anedu oni lliai bai jaite. Jusiñamuina omoi ñnoia, naga rana finoredomoi.

<sup>21</sup> Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

*Jesús ie fiodaillena dane llofua rafue  
(Mr 9.30-32; Lc 9.43-45)*

<sup>22</sup> Galileamo ie llofueoicaigano diga danomo itemo, Jesús naimacimo llote: —Monamona billanona, imana jaidicue. Jusiñamui jitailla jira, cuena jiaie comini gaitajanona, illaicomini mo fecaitimaci.

<sup>23</sup> Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

*Jesúmo Jusiñamui jofo facaina damie ibataja rafue*

<sup>24</sup> Capernaumo naimaci rilla mei, Jusiñamui jofo ucube oraini Pedro dine jicanuaibite:

—Moisés micorí llua isoi, ¿o llofueraima Jusiñamui jofomo ucubena fecacabide?

<sup>25</sup> Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comeciaina raitio? ¿Bumona illaicomini di imaci ucubena ocabitimaci? Imaci jitonaiamona ocabiñedimaci; ia naimacimo duide cominimona otimaci.

<sup>26</sup> Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitonaiaina ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede;

27 iadedi Jusiñamui jofo ucube orainina coco iciñellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

## 18

*Jesús ie llofueoicaigano moto imiena ille rafue*

*(Mr 9.33-37; Lc 9.46-48)*

1 Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiena ille?

2 Iena cacajanona, Jesús daje urue uaiduanona, naimaci motomo jonete.

3 Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi.

4 Bie urue isoi abi iedoñedimiedi Jusiñamui ie cominina sedajanomo imie moto naimiena ille.

5 Bie isoidimie cuemo duillamona, naimiena feiñotimiedi cuena jai feiñote;

6 iadedi cuena iñotimiena jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimiena dotacadena, cuemona mare.

*Jesúdi jeacinona finoñenana llofuia rafue*

*(Mr 9.42-48; Lc 17.1-2)*

7 Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite.

8-9 Biena ñaiticue. Nie isoide rafue omoina jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomo. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoñeno.

*Jesúdi naimiena iñotinomona damie faifillana jitañena rafue*

*(Lc 15.3-7)*

10 Jesús llote:

—Urue isoi omoi illena como lloiticue. Iena dane lloiticue. Cue Moo naimacina uñua jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena.

11 Jusiñamui mona cue billanona, naimiena iñoñedinona naimaci jeacinomona jilloitallena biticue.

12 Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifiñellena, jiaie llaudaiaina fainonocaida, iena jenuaite.

13 Iena baillanona, ieri iobite. Baillari oni jaiñedinori baifemo iobite.

14 Ie isoide. Jusiñamui naimiena iñotinomona damie faifillana jitañede. Ie jira naimacina jeacinona finotaño.

*Jesús omoi ecimo itimie omoina jeare fñuana llofuia rafue*

*(Lc 17.3)*

15 Jesús nia llote:

—O ecimo itimie ona jeare finoia, naimie dine iena lluai. Daímaiaí iena omico llono. O uai naimie fairioia, naimie o díbeimo jai iite.

<sup>16</sup> O uai naimie fairioñenia, jiaí menamiena uiño, o lluomo iaímaiaí cacareillesa.

<sup>17</sup> O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ññoñedimiena omoi nabaiñena isoi, Moisés llogacinodo raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoño.

<sup>18</sup> Iese omoi finoia, omoi comeciaí daje isoi lloillamona, Jusiñamuimona mare.

<sup>19</sup> Omoi nia lloiticue. Daje isoi comecina cue Moo Jusiñamuimo jicallena menamaiaí facajamona, cue Moomo iaímaiaí jianona, cue Moo iaímaiaí jitaille rafuena finoite.

<sup>20</sup> Menamie cue díbeimo illamona, damie amani cue díbeimo illamona, naimaci motomo iticue.

<sup>21</sup> Pedro naimiemo jicanuaíbite:

—Nama, cue ecimo itimie cuena jeare finoia, ¿niga icaiño ibana cue oñeno iena feitaiticue? Nibaí siete digacaiño.

<sup>22</sup> Jesús dinena uai ote:

—“Nibaí siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloiticue.

<sup>23-24</sup> Jusiñamui ie díbeimo itinona iese sedaite: Daje nairaí illaímadí ie maijiraína uaidote, naimaci cuentas iballena. Damie eo debede. Diez mil ucubena debede.

<sup>25</sup> Naimie ucube iñena jira, naie illaímadí ie cuenta iballena, naimie aí, ie uruiaí diga, nana ie raruiaí diga, fecallena llote.

<sup>26</sup> Iena cacajano, ie illaíma uicomo caiñici ifodo raita duere jicade: “Nama, dama ite. Fecuisse omo íbaiticue”.

<sup>27</sup> Naimie duenaillamona, naie illaíma llote: “Íbatañeiticue. Cuemo jai debeñedio. Mai jai”.

<sup>28</sup> Ie mei naimie jaide. Bai jaillanona, jiaíe maijiraíma diga dafaífide. Jai debeñedimieo janore debede. Cien ucubena debede. Jai debeñedimieo dinena ie cimiona llinuana llote: “O debia cuemo mai íba”.

<sup>29</sup> Ie jira debedimie caiñici ifodo ana rainadacaida, duere jicade: “Ucube cuemo íñede; íadedí cuena duenai. Fecuisse omo íbaiticue”.

<sup>30</sup> Uai ote: “Ja raire jitaídícue”. Naimiena duenaiñena jira, cárcelmo naimiena jonetade, ie cuenta íballe dínorí.

<sup>31</sup> Naimie nabaiñiaí iena fidianona, sunaitimaci. Ie jira naimaci illaíma dine nana naie rafuena lluaídímací.

<sup>32</sup> Naie illaímadí nano debedimiena abido uaiduano, naimiemo llote: “Maraiñedio. Navui o cuentana íbatañedícue, cuemo o duere jicanua jira.

<sup>33</sup> ¿Bue ñe o nabaina duenaiñedio, ona cue duenailla isoi?”

<sup>34</sup> Ícírillamona, naie illaíma naimiena cárcelmo jonetade, nainomo duere sefuillena, nana ie cuenta íballe dínorí.

<sup>35</sup> Ie isoide. Cue Moo Jusiñamui omoína duere finoite, omoi comeciaí jitaillamona omoi ecimo itimie ie maraiñede finoca rafuena omoi feitañenia —llote.

## 19

*Jesús íma ie aína dotaja rafuena llofua rafue  
(Mr 10.1-12; Lc 16.18)*

<sup>1</sup> Ie llofueoicaigano diga Galileamona jaillanona, Jordán railla ille ruica díbeimo Judeamo Jesús jaide.

<sup>2</sup> Ailluena comini naimiena racadimaci Nainomo duidinona jillotate.

<sup>3</sup> Naimiena facacillena, dajerie fariseuai naimie dine bitimaci. Ra-fuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio? ¿Nie isoide rafue muidona damie ie aina dotarede?

<sup>4</sup> Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaïmaïaina finode. Iimana finode. Riñona jiai finode”.

<sup>5</sup> Ie jira Jusiñamuidi jaie llote: “Ie ai diga illena, iima ie moona faïnonocaite. Ie eina jiai faïnonocaite. Ie ai diga illamona, menade comedi daamiena jai jaide” llote.

<sup>6</sup> Menade come jai damiena jai ite. Jusiñamui iese iaïmaïaina itataja jira, iima ie aina dotañellesa. Riño ie inina dotañellesa.

<sup>7</sup> Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

<sup>8</sup> Jesús uai ote:

—Jusiñamui uaina raise omoi ñnoñena jira, Moisés micori iima ie aina dotajana rairuiñede; iadedi nano dofoconi iese iñede.

<sup>9</sup> Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

<sup>10</sup> Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

<sup>11</sup> Naimacimo Jesús llote:

—Nana comini omoi como llucinodo jainidimaci. Dani Jusiñamuina jitaïdino iedo jairedimaci.

<sup>12</sup> Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

*Jesúdi naimie dine uruiai billana jitailla rafue*

*(Mr 10.13-16; Lc 18.15-17)*

<sup>13</sup> Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo lollena jitaïdimaci. Ie llofueoicaigano iena rairuidimaci;

<sup>14</sup> iadedi Jesús raite:

—Uruiai cue dine billesa. Naimacina rairuiñeno. Cuen a bie isoide ñnotinodi Jusiñamui ie cominina sedajanomo jainaiïdimaci.

<sup>15</sup> Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue*

*(Mr 10.17-31; Lc 18.18-30)*

<sup>16</sup> Jesús oni jaïllanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

<sup>17</sup> Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñnocana jai.

<sup>18</sup> Uai ote:

—¿Nie llogacinuaina ñnoiticue?

Jesús dinena uai ote:

—Comena meineñeno. O aiñede riño diga iñeno. Fiiñeno. Jiaimiena o llogidoia, tainona lloñeno.

<sup>19</sup> O moo uaina ñno. O ei uaina ñno. O abina o isiruilla isoi, nana cominina isirui.

<sup>20</sup> Naie conirue uai ote:

—Nana iena jai ñnoticue. ¿Ñie isoide rafuena nia finoiticue?

<sup>21</sup> Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cueno o ñnuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena naimie cacajano, sunaite. Naimiemo eo ailluena ra illa jira, iena fecaacaiñede.

<sup>23</sup> Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite.

<sup>24</sup> Iena nia lloiticue. Igrado ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jia raise jainide.

<sup>25</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

<sup>26</sup> Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>27</sup> Pedro uai ote:

—Ero, o llua isoi nana cai rana fañonocaida, o diga jaicabidicai. ¿Ñiese Jusiñamuimona ibana feiñoiticai?

<sup>28</sup> Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omo jaicabilla jira, nainomo omo illanuai jia iite, nainomona omo judíuai doce nairaiaina omo sedallena.

<sup>29</sup> Cueno naimie isiruillamona, ie jofona bu fañonocaia, ie amatiaina bu fañonocaia, ie miriñuaina bu fañonocaia, ie moona bu fañonocaia, ie eina bu fañonocaia, ie uruiaina bu fañonocaia, ie enruena bu fañonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite.

<sup>30</sup> Jamai bue isidomoi. Omoimona jaino jamai bue isoñedimaci; ia naimie cominina naimaci jaillamona, Jusiñamuimona naimaci diga daje isidomoi. Naimie diga jaca iitomoi.

## 20

### *Jesús Jusiñamui ie cominina sedaacana llua rafue*

<sup>1</sup> Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omo uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide.

<sup>2</sup> Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede.

<sup>3</sup> Jitoma nia oni daidemo, mercadomo naimie jiañona cide. Jamai itimaci.

<sup>4</sup> Ie jira naimacimo llote: “Cue illimo maijiai. Raise ibaiticue” llote.

<sup>5</sup> Ie mei jaidimaci. Jitoma naidai ia, jiaínona ciuanona, naimacimo maijillena llote. Jitoma oni caidemo, jiaínona ciuanona, naimacimo maijillena jiai llote.

<sup>6</sup> Jitoma jasici muido itemo, jiaínona ciuanona, jicanote: “¿Bue ñellena namonana jamai itomoi?”

<sup>7</sup> Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote.

<sup>8</sup> Jitoma edacidemmo, naie patrón ie mullaímamo llote: “Maijirainina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote.

<sup>9</sup> Ie jira jinafona maijiaidinona nano ibade. Dabe ibade.

<sup>10</sup> “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñoitimaci.

<sup>11</sup> Ie jira naie patrón joreñaona jeare ñaitimaci:

<sup>12</sup> “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicaí. Dani cai ibaja isoi ibadio” ñaitimaci.

<sup>13</sup> Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio.

<sup>14</sup> O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue.

<sup>15</sup> Cue ucubena jira, cue jitailla isoi cue ibaia, ¿ñiese cuena jeare ñaitomoi? Jiaínona cue duenaillanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue.

<sup>16</sup> Jamai bue isoidomoi. Omoimona jiaíno jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

*Jesúdi ie fiodaillena dane llua rafue*

*(Mr 10.32-34; Lc 18.31-34)*

<sup>17</sup> Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite.

<sup>18</sup> Raite:

—Ero, Jerusalémo jai jaidicaí. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci.

<sup>19</sup> Judíuaíñedino illaicomínimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

*Jesús dine Jacobo Juan iaímaiaí ei billa rafue*

*(Mr 10.35-45)*

<sup>20</sup> Naie facaise Jesús dine Jacobo, Juan iaímaiaí ei diga, bitiaímaiaí. Iaímaiaí moodi Zebedeo. Jesús dine iaímaiaí ei rillanona, naimiena raise uaidollena, caíñici ifodo ana rainadacaida llote:

—Omo daje rafue jicanoiacadicue.

<sup>21</sup> Naiñaiño Jesús dinena jicanote:

—¿Bue ñiaíbitio?

Naiñaiño uai ote:

—Illaímana o jailla mei, cue jito iaímaiaí o ecimo illana o llua jitaidicue. Damie o nabeimo. Jiaímie o jarifebeimo. —Jiaíno baifemo iaímaiaí illena, naiñaiño iese llote.

<sup>22</sup> Naimacimo eruaillanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaímaiaímo jicanote:

—¿Ie isoi duere sefuiacadomíco?



Uai otiaimaia:

—Jii.

<sup>23</sup> Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>24</sup> Iena jiaie llofueoicaigano cacajano, naie iaiaimaiairi iciritimaci.

<sup>25</sup> Jesús nana naimacina uaiduanona, raite:

—Nana illaicomini naimaci anamo itinona ocuicabidimaci;

<sup>26</sup> iadedi omoi dine iese iñena. Omoimona bu imiēna iacania, omoi mullaimana naimie jaisoillasa.

<sup>27</sup> Omoimona bu imiēna iacania, omoina naimie canocana jaisoillasa.

<sup>28</sup> Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena inuamona jilloitimaci. Coninina omoi canua —llote.

*Jesús mena uisnidiaimaiaina jillotaja rafue*

*(Mr 10.46-52; Lc 18.35-43)*

<sup>29</sup> Jericó railla nairaimona jaidimacimo, ailluena comini naimaci jinafona racadimaci.

<sup>30</sup> Ie facaiseconi mena uisnidiaimaiaina fuemo raidiaimaiaina. Jesús naiedo jaillano cacajano, naimiēna ado uaidotiaimaiaina:

—David micori Jitona o illamona, Jusiñamuimona o billa jira, cocona duenai. Cocona cano.

<sup>31</sup> Iaimaiaina llicaillena, Jesús diga jaidino iaimaiaina lletade; iadedi eo cuiroidiaimaiaina:

—Maestro, David micori Jitona o illamona, cocona duenai.

<sup>32</sup> Iaimaiaina Jesús cacajano, ieconi naidadajanona, iaimaiaina uaidote. Jicanote:

—¿Niese omiconona cue nibaiana jitaidomico?

<sup>33</sup> Uai otiaimaia:

—Maestro, coco uisina o cioitajana jitaidicoco.

<sup>34</sup> Iaimaiaina duenaillanona, iaimaiaina uisina jetade. Ieconi iaimaiaina uisidiciede. Iaimaiaina jai cianona, ie llofueganona iaimaiaina jaillena, Jesús diga jaidiaimaiaina.

## 21

*Jesús illaima isoi Jerusalémo jailla rafue*

*(Mr 11.1-11; Lc 19.28-40; Jn 12.12-19)*

<sup>1</sup> Oni jaillanona, Jerusalémo iaieicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiēna orede.

<sup>2</sup> Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaimaiaina suiñuano bene ati.

<sup>3</sup> Omicomo “¿Bue ñellena bie suiñodomico?” bu jicanoia, llono: “Coco Nama naie iaimaiaina jitaide. Nailli naimie iaimaiaina raire abido oretaite” —raite.

<sup>4</sup> Jusiñamui facaina lloaima micori jaie llua isoi, bie rafue suide.

<sup>5</sup> Naimie micori jaie cuete:

Jerusalén itinomo llono:

“Ero, omoi illaima omoina sedallena biite.

Abi iedoñeno biite.

Burra urue emododo naimie biite”

cuete.

<sup>6</sup> Iaimaiaia jaillanona, Jesús llua isoi finodiaimaiaia.

<sup>7</sup> Burra ie urue diga atidiaimaiaia. Burra urue emodomo naimie llofueoicaigano naimaci iniroina jobianona, ie emodomo Jesús rainadate.

<sup>8</sup> Naimiena iobitallena, illaia isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci.

<sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

<sup>10</sup> Jerusalémo naimie ridemo, nana nainomo itino naie rafuena uiñoiacadimaci.

—¿Buta bite? —jicanotimaci.

<sup>11</sup> Jesús diga bitino dinena uai otimaci:

—Jesús bite. Naimiedi Jusiñamui facaina lloaraima. Galileamo ite Nazaret imie.

*Jesúdi Jusiñamui jofomona damieriena dotaja rafue*

*(Mr 11.15-19; Lc 19.45-48; Jn 2.13-22)*

<sup>12</sup> Jerusalémo Jesús rilla mei, Jusiñamui jofomo naimie jaide. Naie jofu eo ail-lue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecaudimaci. Iena Jesús ciuanona, naimaci mesaiaina oni caicode. Ucugina fecaudino rairacuai jiaia oni caicode.

<sup>13</sup> Naimacimo llote:

—Ie facaina lloaraima Jusiñamui llogacino jaie cuega: “Cue jofu ite, nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>14</sup> Ie facaise uisnidino Jusiñamui jofomo naimie dine bitimaci. Ñujañujacaida macaritino jiaia bitimaci. Naimaci billanona, Jesús naimacina jillotate.

<sup>15</sup> Nainomo Jesúdi diga mare rafuena finode. Diga cominina jillotate. Iena ciuanona, nainomo ite uruiaia ado cuiriisite:

—David micori Jitori iobidicaia. Jusiñamui lloraini micoriaia jaie llua isoi, cai Jilloitaraima jai ite.

Iena ciuanona, iena cacajanona, judúuai illaicomini iciritimaci.

<sup>16</sup> Naimiemo jicanotimaci:

—¿Bie uruiaia cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Ñiese iena cacaiñedomoi?

Naimie cuete:

Naimiemo Jusiñamuidi uruiaina mare iobillacinona fecataite.

<sup>17</sup> Naimacina faionocaida, Betaniamo Jesús jaide, nainomo inillena.

*Jesús higuera railla riarana faidua rafue*

*(Mr 11.12-14, 20-26)*

<sup>18</sup> Ie areruido Jerusalémo abido ie llofueoicaigano diga Jesús bia, aimetaite.

<sup>19</sup> Nai fuemo higuera railla riarana ciuanona, iena jibuide. Naiemo naie llisilladi iñede. Dama ie ibena cioda. Ie jira naie amenana llote:

—Biemona jaca llisiñeite. —Iese railla dacaiño naie riaradi duide.

<sup>20</sup> Ie llofueoicaigano iena ciuanona, raijicaillamona raitimaci:

—¿Ñiese naie riarara raire duide?

21 Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoí. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite.

22 Naimie iena finuana omoi ñnuamona, nie isoide rafue cue Moomo omoi jicajia, iena naimie finoite.

*Jesúdi ie siño uaina llua rafue*

*(Mr 11.27-33; Lc 20.1-8)*

23 Jerusalémo rillanona, Jusiñamui jofomo Jesús fo jailla mei, nainomo ite cominina llofujete. Judíuai illaicominí naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

24 Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

25 Juan Bautista micorídi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Cominí? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micorí lluana ñnoñedomoí?”

26 “Cominí” cai fairioia, bene itino caina nibai meineitimaci, Juan micorídi Jusiñamui facaina lloraima naimaci raila jira.

27 Ie jira fairiotimaci:

—Uiñoñedicai.

Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi mena jito iaímaiaí illa llua rafue*

28 Judíuai illaicominímo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiaí”.

29 Uai ote: “Jaiacaiñedicue” llote. Dallu illanona, ie comeciina dane facajano, maijiaide.

30 Jiaie jitomo daje isoi llote. Naimie uai ote: “Jii, maijiaitícue” llote. Iese llote; iadedí maijiaíñede.

31 ¿Nie jitoca ie moo jitaille rana finode? —jicanote.

Uai otimaci:

—Nano doforamiemo.

Jesús dinena naimacimo llote:

—Uanaicinona omoimo lloiticue. Omoína ñaitícue. Omoimona marañedimaci; iadedí Jusiñamui cominina naimaci jaillamona, gobierno ucube orainí Jusiñamui illanomo iitimaci. Calliredíñaiñuaidí nainomo jiaí iitimaci; iadedí nainomo jaca iñeítomoí.

32 Marena omoi comeciaina itatallena, Juan micorí navui bite; iadedí naimie micorina ñnoñedomoí. Ucube orainí naimie micorí rafuena ñnotimaci. Calliredíñaiñuái naimie micorí rafuena ñnotimaci. Iena uiñotomoí; iadedí omoi comeciái iuaillaina meidoiñedomoí. ñnoñedomoí.

*Jesúdi marañede maijiraíni rafuena llua rafue*

*(Mr 12.1-12; Lc 20.9-19)*

33 Judíuai illaicominímo Jesús llote:

—Jiaie rafuena omoimo lloiticue. Iemo cacarei. Daje patrón uvas raila riaraiaina rite. Naie abí llaite. Jiaíruido uvas ijina eenollena, eniruemo

ifona raite. Naie illina raise eruaillena, tidacana finode. Iena sedallena, ibatajanona jiaïnomo fecade. Ie mei jiaïe eniruemo jaide.

<sup>34</sup> Uvas jai einaila facaise riaraiaina sedaraini dine naie patrón janore mullaïaina orede, naimie facaise iedinona naimie feiñollena;

<sup>35</sup> iadedi naie sedarainidi ie mullaïaina duere finosite. Daje mullaïmana fatimaci. Jiaïmiena meinetimaci. Jiaïmiena noficina fairinotimaci.

<sup>36</sup> Ie mei patrón jiaïe mullaïaina orede. Naimacina jiaï duere finodimaci.

<sup>37</sup> Ja muidomo ie jitona orede. “Cue jitona jaciruitimaci. Naimie uaina ñnoitimaci” comecina facade.

<sup>38</sup> Riaraiaina sedaraini naimiena ciuanona, coniniri raitimaci: “Bimïemo bie illi fiebiite, naimie moo fiodailla mei. Naimiena cai meinelli, bie illi caïmo fiebillesa” raitimaci.

<sup>39</sup> Naimiena jino dotajanona, naimiena meinetimaci.

<sup>40</sup> Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono –llote.

<sup>41</sup> Judíuai illaïcomini uai otimaci:

–Naie marañedinona dueruiño meinite. Ie mei jiaïe cominimo naie illi fecaite, iena sedallena, naïmona riarana feiñollena.

<sup>42</sup> Naimacimo Jesús llote:

–Naie illi sedaraini isidomoi. Jusiñamui facaina lloraima micori omoina jaie cuete. Ie ciegafuena raise facañedomoi. Naimie micori cueda: Jofo finoraini jitaïñena noficidi nana naie jofomo ite nofici baïfemo jai uaide. Jusiñamui iena finotate.

Iena cai uïñuamona, “Eo mare” raiticai

cueda. Jusiñamui cominina damierie jaillana naimie micori cuete. Jusiñamui oretagamiena damierie jitaïñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isidomoi. Naie nofici isoidicue. Cue rafuena omoi jitaïñena jira, naimie cominina jaiñeitomoi.

<sup>43</sup> Jusiñamuidi ie cominina sedajanomo omoina itatañeite; iadedi jiaïe cominina nainomo itataite, naimie jitailla rafuena naimaci finua jira.

<sup>44</sup> Jesús llote:

–Naie noficina dane ñaiticue. Noficimo bu eicaitaia, bofedaite; ia naie nofici bumo ana uai, naimiena saitaite. Ie isoide. Cue llua omoi jamaia, duere sefuitomoi. Iena omoi ñnoñenia, ja muidomo faïfitomoi.

<sup>45</sup> Jesús llua naie judíuai illaïcomini cacajanona, naimiedi naimacina ñaïana jai uïñotimaci.

<sup>46</sup> Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

## 22

### *Jesúdi illaïma ie jito aïna ua llua rafue*

<sup>1</sup> Jusiñamui jofomo Jesús nia illanona, nainomo itinona llofuede:

<sup>2</sup> –Jusiñamui díbeimo comini jailla rafuena omoi lloiticue. Iena omoi uïñollena, bie rafuedo iena lloiticue. Illaïmadi ie jito aï ua rafue finode.

<sup>3</sup> Naimie ie mullaïni orede, rafuemo llogano uaidollena; iadedi nai llogano biacaiñedimaci.

<sup>4</sup> Dane jiaïe mullaïni oretajano llote: “Nai lloganomo llono: ‘Rafue guille jai finocasa. Iretaiï, farediretaiï diga, jai faga. Jai nana fuite. Rafuemo mai bi’”

<sup>5</sup> Naimaci cacarefiacaiñede. Damie ie illimo jaide. Jiaïmie ie chinganamo jaide.

<sup>6</sup> Jiaïno mullaïnina gaitadimaci. Gaitajanona naimaciri jifanotimaci. Ja muidomo naimacina meinetimaci.

<sup>7</sup> Ie jira naie illaïma eo icirite. Naimie soldaduai oretate, naimie mullaïni meinetinona meinellena. Naimie naimaci illano jobaitate.

<sup>8</sup> Ie meinoconi ie fiebide mullaïnimo llote: “Rafue guille jai nana finoca; ia llogano maraiñedimaci.

<sup>9</sup> Naiso bojicaïllanomo jai. Nana o ciolle diese llono: ‘Rafuemo bi’ llono”.

<sup>10</sup> Ie jira ie mullaïni jai naisona jaide. Maraiñedino baïllanona diese ofitatimaci. Jiaï maredino diese ofitatimaci. Rafue finua jofo naie llogano diga oruide. Illaïma nainomo fecaca ñiroina jïtadimaci.

<sup>11</sup> Illaïma fo bia, mesamo itino jïbuïllena, dinomo daje ñima rafue ie mare ñiroina jïtañenana ciode.

<sup>12</sup> Naimiemo jïcanote: “Nabai, ¿ñiese bene rafue ie mare ñiroina jïtañeno bitio?” jïcanote. Naimie uainicaide.

<sup>13</sup> Ie jira naie illaïma ie mullaïaïmo llote: “Naimie cuena ñnoñena jira, naimie onolli dajemo nitaicaïda maino. Ie eïllina daje isoi maino. Cuemona naimie jino dota. Nainomo itino diga duere sefuite. Jiaï sunaite” llote.

<sup>14</sup> Ero, naie rafuemono omoï fueo. Illaïma aïlluena uaidote; ia nana biñedimaci. Ie isoïde. Jusiñamui aïlluena comïnina uaidote; iadedi naimacimona janore fetode.

*Jesúmo gobiernomo ucubena fecajana jïcanua rafue  
(Mr 12.13-17; Lc 20.20-26)*

<sup>15</sup> Naimacimo Jesús llua mei, fariseuai comïni abïdo jaïllanona, coniniri siadotimaci. Naimie raise uai oñedena, naimiena duere finollena, Jesúsna facaciïcadimaci.

<sup>16</sup> Ie jira naimie ñine naimaci comïnimona dajerie oredimaci. Herodianuai raïlla comïnina jiaï jaidimaci. Jesús ñine rïllanona, raitimaci:

—Maestro, uanaicïnona llofuecabitio. Jusiñamui rafuedo caï marena jailana raise llofuetio. Nana comïni dauaïdo llofuetio. Comïnina iobitallena llofueñedio.

<sup>17</sup> Omo rafuena jïcanoïacadïcaï. Dani Jusiñamuina sedadïcaï; iadedi romanos raïlla nairai anamo birui caï illa jira, ¿naimaci illaïma Césarmo ucubena caï fecajana rairuidio? Caïmo llono —lloïtimaci.

<sup>18</sup> Naimaci comeciïna maraiñedicïnona facajana Jesús uïñuamona, uai ote: —¿Bue ñellena cuena facacïtomoi? Maredinona abi caitadomoi.

<sup>19</sup> Ucube cuemo acata —llote. Ie jira acatatimaci.

<sup>20</sup> Jesús ñinena jïcanote:

—¿Bu ie joreño nainomo ite? ¿Bumo jainaiïaide bie cuega radi?

<sup>21</sup> Uai otimaci:

—César.

Jesús ñinena raite:

—César iena itedi Césarmo ille. Jusiñamui iena itedi Jusiñamuïmo ille —raite.

<sup>22</sup> Naimie llwana cacajano, raïjicaïdïmaci. Naimie jeare uai oñena jira, naimie ñinomona oni jaidimaci.

*Jesús ñine saduceuai raïlla comïni billa rafue  
(Mr 12.18-27; Lc 20.27-40)*

<sup>23</sup> Naie facaise saduceuai raïlla comïni naimie ñine bitimaci. Fiodaïllamona jaca buna jilloñellena ñnotimaci. Jesúmo lloïtimaci:

<sup>24</sup> —Maestro, Moïses micori jaie cuega: “Ñima fiodaïlla meinoconi, naimie urue iñenia, ie ama naie feciño olle. Naimiedi uruiïna ie ama facaina comuitaite” cuega.

<sup>25</sup> Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciñona ote. Uruiainide jiai fiodailla.

<sup>26</sup> Naie siete digamiedemona iese sefuide.

<sup>27</sup> Ja muidomo naie riño jiai fiodaite.

<sup>28</sup> Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede –lloimaci.

<sup>29</sup> Jesús uai ote:

–Moisés micori ciegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

<sup>30</sup> Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi iitimaci.

<sup>31</sup> Fiodaitino jilluana omoimo lloiticue. Jusiñamui omoi jaiagaimo jaiellogacinona inoñedomoi. Naimie llote:

<sup>32</sup> “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite –llote.

<sup>33</sup> Nainomo ite comini iena cacajano, naimie llofuiari rajicaidimaci; ia saduceuai dinena uainicaidimaci.

*Jesús nanoca llogacinona llofui rafue*

*(Mr 12.28-34)*

<sup>34</sup> Saduceuai comini uainicaillana fariseuaidi jai fidiano, Jesús dine ofidimaci.

<sup>35</sup> Naimacimona damiedi Moisés micori jaiellogacinona eo uiñote. Jesúsna facacillena, naimiemo jicanote:

<sup>36</sup> –Maestro, Moisés micori jaiellogacinuaimona, ¿nie llogacino ua nanoca llogacinona?

<sup>37</sup> Jesús dinena uai ote:

–Moisés micori jaiellogacinona: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”.

<sup>38</sup> Bie ua nanoca llogacino.

<sup>39</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”.

<sup>40</sup> Bie mena llogacinomona nana jaiellogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide –llote.

*Jesús dinena fariseuai cominimo jicanua rafue*

*(Mr 12.35-37; Lc 20.41-44)*

<sup>41</sup> Naimie dine nia fariseuai comini ia, Jesús naimacimo llote:

<sup>42</sup> –Jusiñamui lloraini micoriai jaiellogacinuai: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

–David micori jito. David micori isoi Cristo ie cominina sedaite.

<sup>43</sup> Jesús dinena jicanote:

–Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

<sup>44</sup> Jusiñamuidi cue Namamo llote:

“Illaimana o illamona, cue nabei dine ana rai.



Ona ñnoñedino o anamo itataitícue”.

<sup>45</sup> “Cristodí cue Nama” David micorí raite. Iese naimíe micorí railla jira, Cristo David micorí afemo faite. Naimíedi jamai David micorí jitoñede; ia jiaí ie Nama.

<sup>46</sup> Uaina onidimaci. Naie facaisemona Jesús ie uaina dane uaitañedimaci.

## 23

*Jesúdi judíuai illaicomínina ñaia rafue  
(Mr 12.38-40; Lc 11.37-54; 20.45-47)*

<sup>1</sup> Jusiñamui jofomo Jesús nia illanona, naimíe díne ailluena comíní bitimaci. Ie llofueoicaigano nainomo jiaí illanona, nana naimacímó llote:

<sup>2</sup> —Moisés micorí llogacínuaína llofuerainídí naie rafuedo jai jaicabidimaci. Fariseuai comíní iedo jiaí jaicabidimaci.

<sup>3</sup> Naimací llofuiacínodo omoí jai. Naimací llofuiana omoí cacarefí; iadedí naimací illa isoí omoí iñeno, naimací llofuiacínodo naimací jaiñena jira.

<sup>4</sup> Omoí einamací llogacínuaído raise omoí jaillena, díga rafuena omoí finuana jitaídímaci; iadedí iedo omoí jaillena, omoína jaca canoñedimaci. “Jusiñamuína eo raise sedadícaí” comecína facadímaci. Iemo naimací comecína facajamona,

<sup>5</sup> iena omoí cioillena, nana naimací finua rafuena marefodo finodímaci. Jiaíe comínímó ite Jusiñamuímo jírabe baífemo faitíbena uiacacabidimaci. ñiroí fuedadí allofena jonegana gaídímaci.

<sup>6</sup> Rafue ia, naimací jamai bue isoíñedínomo comecína facajanona, rafue nama ecímó raíacadímaci. Ofiracómo uícomo raíacadímaci, comíní naimacírí acarillena.

<sup>7</sup> Nine naimací jaía, nana comíní naimacína uaiduana gaídímaci. Maestrodícínona uaiduana jiaí gaídímaci.

<sup>8</sup> Jusiñamuína eo raise naimací sedajana omoí uiñuana jitaídímaci. Naimací isoí iñeno. Omoí damacína jira, omoímona damíe omoí baífemo faíamo comecína facañeno. Naimíena maestróna raíñeno. Omoí baífemo cue illanona, omoí maestrodícue.

<sup>9</sup> Omoí Moo Jusiñamui monamo illanona, dama naimíena seda. Jiaímíena sedañeno. Jusiñamui isoí jiaímíena “Moo” raíñeno.

<sup>10</sup> Omoí damacína jira, omoímona damíena “Caí illaíma” raíñeno. Omoí illaímána jai itícue.

<sup>11</sup> Omoímona bu imíena jaiacanía, omoí mullaímána naimíe nano jaillamóna, omoína naimíe canua.

<sup>12</sup> Jusiñamuidí “Jiaíno afemo itícue” raillano comecína facadímíena jamai bue isoidímíena itataíte; ia Jusiñamuidí “Jiaíno afemo iñedícue” raillano comecína facadímíena jamai bue isoíñedímíena itataíte.

<sup>13</sup> Naie facaise Moisés micorí llogacínóna llofuerainídí fariseuai comíní díga illanona, Jesús naimacímó llote:

—Jusiñamui omoína duere fínoíte. Mareuidínóna abí caitadínodómoí. Jusiñamui díbeímó comíní illána jitaíñedomóí. Naimíe díbeímó omoí illána jiaí jitaíñedomóí. Ie muidóna Jusiñamuímona duere sefuitómoí.

<sup>14</sup> “Jusiñamuína eo sedadímaci” omoímó comíní comecíána facajána jitaídómoí. Ie jira are jídomóí; iadedí íese iñedomóí. Maraiñede rafuena finocabidómoí. Jífuíanóna fecíñuai rana bairocabidómoí. Ie jira Jusiñamui omoína eo duere fínoíte.

<sup>15</sup> Damíena omoí díbeímó itatallena, omoí isoí Jusiñamui rafuedo naimíe jaillena, díga rafuena finodómoí. Omoí díbeímó illa meí, omoí baífemo omoí einamací llogacínodo naimíe jaillána jitaídómoí. Omoí díga íco naimíe

ua faifite. Cominina uanañedicinodo jaitatomoí. Iese omoí illa jira, duere sefuitomoí.

16 'Omoí llofuiacino diga cominina canoñedomoí. Mareuidinona abi caitadinodomoí. Raicabitomoí: “Cai lloga uai cai finollena jiaí comini uiñollena, Jusiñamui jofomo ite oro mamecina llinotícaí; iadedí Jusiñamui jofo mamecina cai linoia, cai lloga uaina cai finoñenia, caimona mare. Jusiñamuimona duere sefuiñeíticai” raicabitomoí.

17 Abi uiñoñedomoí. Omoí llofuiacino diga cominina canoñedomoí. Jusiñamui jofomo naie oro jainaiáilla jira, naie orodí mare; iadedí naie oro naie jofo baífemo uaiñede. Abina omoí uiñoñena jira, Jusiñamui omoína duere finoite.

18 Jiaí raitomoí: “Jusiñamuimo faga toíca ocaina jobaisoillano mamecina cai linoia, cai lloga uaina cai finoñenia, caimona mare; iadedí Jusiñamuimo fecaca toíca ocaina mamecina cai linoia, cai lloga uaina jaca finoíticai”.

19 Abi uiñoñedomoí. Omoí llofuiacino diga cominina canoñedomoí. Naie jobaisoillanomo naie ocaina illa jira, naie ocaina mare; iadedí naie ocaina naie jobaisoillano baífemo uaiñede.

20 Ero, Jusiñamuimo ocaina jobaisoillano mamecina omoí linoia, nainomo ite ocaina mamecina jiaí llinotomoí.

21 Jusiñamui jofo mamecina omoí linoia, Jusiñamui nainomo illa jira, naimie mamecina jiaí llinotomoí.

22 Monamo ite ra mamecina omoí linoia, Jusiñamui illano nainomo illa jira, nainomona cominina naimie sedaja jira, naimie mamecina jiaí llinotomoí. Omoí llua rafuena omoí finoñenia, Jusiñamui omoína duere finoite.

23 'Mareuidinona abi caitadinona omoí illamona, omoímo nia lloíticue. Nana omoí illimo ite ramona, nana omoímo ite ucubemona Jusiñamuimo janore jisa fecacabidomoí. Nana comini omoí isoi illena jitaídomoí. Mare; iadedí nanoca rafuena jaca finoñedomoí. Jiaíe cominimo omoí comecina facañedomoí. Jiaíe cominina duenaiñedomoí. Omoí lloga uaina finoñedomoí. Nana naie isoide rafuena omoí jiaí finua. Iena omoí finoñenia, Jusiñamui omoína duere finoite.

24 Abina uiñoñedomoí. Jallecima jiroracomo ía, iena oni faíga; ía aillue ra nainomo ía, iena cioíñeno namo gutadomoí. Íe isoide. Omoí llofuiacino diga cominina canoñedomoí. Jusiñamui íe eo jitaílla rafuedo comini jaíllana llofueñedomoí. Nanocafueñededo comini jaílla rafuena llofuetomoí. Nanoca rafuedo comini jaíllana llofueñedomoí.

25 'Omoímo nia lloíticue. Omoí einamací llogacínodo eo jaidomoí; iadedí omoí comeciáina raise finoñedomoí. Eo fiídomoí. Jífuianona comini rana bairodomoí. Jeacínona finocana jaidomoí.

26 Abina uiñoñedomoí. Da pocillos jinafo, da platos jinafo jocodino isoidomoí. Pocillos jerai, platos jerai jocoñedino isoidomoí. Omoí abina finodomoí; iadedí omoí comeciáina raise finoñedomoí. Nano omoí comecina raise fino. Mare rafue finocana jai. Omoí einamací rafuemo comecina facañeno; ía Jusiñamui rafuemo comecina faca. Iese omoí jaiñenia, Jusiñamui omoína duere finoite.

27 'Omoímo nia lloíticue. Marena finoca raíáfo isoidomoí. Jinofe marena eruaíde; iadedí nainomo mare ra íñede. Comini illaíci jamai íte. Jai maraiñede.

28 Íe isoidomoí. Marena eruaídomoí; iadedí maredínona abi eo caitadomoí. Omoí comeciái eo maraííñede. Omoí comecina raise omoí finoñenia, Jusiñamui omoína duere finoite.

<sup>29</sup> Omoimo nia lloiticue. Naimacimo birui omoi comeaiina raise facallena, Jusiñamui facaina lloraini micoriai raiafona marena eruaillena finodomoí. Mareuidino micoriai raiafo emodo marena eruaillena finodomoí,

<sup>30</sup> raillano: “Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí” raitomoí;

<sup>31</sup> iadedi omoi llumona Jusiñamui facaina lloraini micoriai meinetino uruiái omoína uiñoticaí.

<sup>32</sup> Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai.

<sup>33</sup> Omoi marañena jira, jaio nairai isoidomoí. Ja muidomo iraimona jillobiñetomoí. Nainomo duere sefuitomoí.

<sup>34</sup> Cue rafuena lollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiai oretaiticue. Dajeriena meineitomoí. Naimacina coraitomoí. Omoi ofiracomo dajeriena faitomoí. Diga nairaimo naimacina duere finoitomoí.

<sup>35</sup> Abel micori jaie ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacaríana meinetimaci. Naimiedi Berequías jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci.

<sup>36</sup> Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi marañede rafuena finocana jaidomoí. Jusiñamui omoína duere finoite.

### *Jesús Jerusalémo itinomo llua rafue*

*(Lc 13.34-35)*

<sup>37</sup> Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoí. Naimie omoi dine oretaganona noficina fairinuano, naimacina meinetomoí. Omoína cue sedallena, atava ie uruiái sedaja isoi, diga icaiño cue anamo omoína uaidoiacadícue; iadedi omoi dinena cuena jitañedomoí.

<sup>38</sup> Iemona Jusiñamuidi omoi illanona jai fañonocai.

<sup>39</sup> Cue Moo dine jaiticue. Cue jailla mei, cuena cioñetomoí. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

## 24

### *Jesúdi Jerusalémo ite Jusiñamui jofo judaiana llua rafue*

*(Mr 13.3-23; Lc 17.22-24; 21.5-24)*

<sup>1</sup> Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci.

<sup>2</sup> Jesús dinena llote:

—Bie jofona ciodomoí. Uanaicinona omoimo lloiticue. Nana bie jofomo ite noficiai ico judaisite —llote.

<sup>3</sup> Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofo judaiana omo jicanoiacadicaí. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina cai uiñollena?

<sup>4</sup> Uai ote:

—Omoína bie rafuena bu jifueñellena, omoi abina rairui.

<sup>5</sup> Ailluena comini cue mamecido billanona: “Cristodicue” raitimaci. Diga cominina jifueitimaci. Iemona omoi abina rairui.

<sup>6</sup> Jobaimiai illena fiditomo; iadedi jaciruiñeno. Iese suite; iadedi abido nia biñeiticue.

<sup>7</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuai suite.

<sup>8</sup> Iese suia, omoi duere sefuillifue omoimo suite.

<sup>9</sup> Cuen a ñoñedino omoina gaitatajanona, omoina meineitimaci. Cue cominina omoi illamona, nana nairaiiai omoina enoitimaci.

<sup>10</sup> Naie facaise cue dibeimo itinomona ailluena abido danomo jaitimaci. Iemona duere omoi sefuillena, omoina janoñeitimaci; iadedi omoina enoilamona, omoina llogidoitimaci.

<sup>11</sup> Naie facaise diga comini raitimaci: “Jusiñamui facaina llorainidicai”; iadedi Jusiñamui facaina llorainiñedimaci. Uanaicinona lloñeitimaci. Diga comini naimaci dibeimo itataitimaci.

<sup>12</sup> Jeacino eo comucana jailla jira, ailluena comini conini isiruiñeitimaci;

<sup>13</sup> iadedi cuena fainonocaiñedimie ja muidomo monamo jaca iite. Naimiena jillotaiticue.

<sup>14</sup> Diga cominidi Jusiñamui dibeimo comini ille rafuena nana nairaimo lloitimaci, nana nairaiiai iena cacaillena. Ie mei abido biiticue.

<sup>15</sup> Cue llamo cacarei. Daniel micori Jusiñamui facaina lloraima. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona,

<sup>16</sup> naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

<sup>17</sup> Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno.

<sup>18</sup> Aneduai dine raire rillena, illimo omoi ia, abido jofomo biñeno, omoi ñiroi omoi diga uillena.

<sup>19</sup> Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite.

<sup>20</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano.

<sup>21</sup> Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci.

<sup>22</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>23</sup> Ie facaise omoimo bu raia: “Jai, Jusiñamui facaina lloraima benomo birui bairede. Naimiedi Cristo”, iena ñoñeno. Jiaimie raia: “Oni batine Cristo birui bairede”, iena ñoñeno.

<sup>24</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

<sup>25</sup> Ero, bie rafue nia suiñenia, iena omoimo jai lloticue.

<sup>26</sup> Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ñoñeno.

<sup>27</sup> Mona borillamona mona jillacidi usere cide. Nana cominimo bairede. Ie isoide. Cue abido bia, nana comini iena uiñoitimaci.

<sup>28</sup> Urujaisai rifaide ramo ofillana uiñua isoi, nana cuena ñnotino cue billena uiñoitimaci.

*Jesús abido ie bille rafue**(Mr 13.24-37; Lc 17.26-30, 34-36; 21.25-33)*

<sup>29</sup> Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite.

<sup>30</sup> Ie mei monamo baireiticue. Ieconi nana nairaiaí jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue.

<sup>31</sup> Cue jaienisaína cue ecimona oretaiticue. Ado trompeta ficiretajano, cue fetocano diese naganomona ofitaitimaci.

<sup>32</sup> Higuera railla riaramona omoi fueo. Bie eniruemo naie riararuillamona, fiemona raire illana uiñotomoi.

<sup>33</sup> Ie isoide. Bie rafue ico suia, cue billirui iairei illena uiñoitomoi.

<sup>34</sup> Uanaicinona omoimo lloiticue. Nana bie rafue suille facaiseconi bie nairaí nia iite.

<sup>35</sup> Mona enirue diga fuite; iadedi cue lloga uai jaca suite.

<sup>36</sup> Cue abido billirui jaca bu uiñoñede. Jusiñamui jaienisaí iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote.

<sup>37</sup> Abido cue billirui iairei ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci.

<sup>38</sup> Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori.

<sup>39</sup> Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

<sup>40</sup> Naie facaiseconi menamie illimo danomo iitiaimaiaí. Damie Jusiñamui dine jaite. Jiaimie fiebillanona, Jusiñamuimona duere sefuite.

<sup>41</sup> Mena riño danomo doberitiaiñuai. Dañaiño Jusiñamui dine jaite. Jiañaiño fiebillanona, Jusiñamuimona duere sefuite.

<sup>42</sup> Cue billirui omoi uiñoñena jira, iemo ocuri.

<sup>43</sup> Bie rafuemo omoi comeciaina omoi faca. Jofo namadi firiraima nie naiona billena uiñotena, ie rana faifñellena, ie jofona raise sedade.

<sup>44</sup> Ie isoi cue billemo ocuri. Monamona ico abido biiticue. Omoi ocuriñena facaisemo riiticue. Ie jira cue billemo nagarui ocuri.

*Jesúdi patrón ie mullaimana ie jofona sedataja llua rafue**(Lc 12.41-48)*

<sup>45</sup> Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaíma ñnogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide.

<sup>46</sup> Patrón ico abido bia, ie jofona ie mullaíma raise sedaia, mullaímari naimie iobillamona, ie mullaíma marena iite.

<sup>47</sup> Iobillamona, patrón ie mullaimana nana ie raruiaína sedatataite;

<sup>48</sup> iadedi ie mullaíma marañenia, ie comecina facaite: “Cue patrón are biñeite. Naimie lloga uaina finoñeiticue”.



<sup>49</sup> Ie começina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

<sup>50</sup> Ie ocuiriñena facaise ie patrón abido billanona, naimiena duere finoite.

<sup>51</sup> Ie isoide. Cue abido bia, cuena ñnotinori iobiticue; ia cuena ñnotinona abi caitadino dine cuena ñnoñedinona dotaiticue. Nainomo duere sefuillano eetimaci.

## 25

### *Jesúdi diez jitañuaia llua rafue*

<sup>1</sup> Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitañuaimo ite rafue isoidimaci. Naiñaiñuai lamparíniai llinuanona, ñima ie aina ua meinomo finoca rafuemo jaiacadimaci.

<sup>2-4</sup> Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedinaci.

<sup>5</sup> Ñima diga ie rafue dine jaillemo ocuiritimaci. Ñima are biñena jira, inidimaci.

<sup>6</sup> Daje ñiberuise ñamie ado lluaana cacadimaci. Llote: “Jadi, naie ñimadi jai bite. Mai bi, naimie uicomo naimiemo cai ñafañillesa”.

<sup>7</sup> Casillanona, naie jitañuai lamparíniai unedinaci.

<sup>8</sup> Abi uiñoñediñaiñuai ñinena abi uiñotiñaiñuaimo jicadimaci: “Farena caimo feca. Cai lamparíniai boacañedesa”.

<sup>9</sup> Uai otimaci: “Fecaacañedicai. Omoimo cai fecaiadedi, caimo baiñeite. Omoi jitaia, chinganomo ñabajai”.

<sup>10</sup> Naiñaiñuai ñabajai mei, naie ñima ride. Naimiemo ocuiritiñaiñuai ñiese naimie diga nainomo guillena, rafuemo jaidimaci. Naimaci fo jai mei, nase naie ñimabaide.

<sup>11</sup> Ie mei naie farena ñabajaiñaiñuai abido billano, raitimaci: “Ñase econo”.

<sup>12</sup> Naie ñima uai ote: “Uanaicinona omoimo lloiticue. Omoina uiñoñedicue. Econoñeiticue”.

<sup>13</sup> Ie isoide. Cue billiruina omoi uiñoñena jira, nagarui cuemo omoi ocuiri.

### *Jesúdi patrón ie mullaiaimo ucubena fecaja llua rafue*

<sup>14</sup> Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaina ie ucubena eenotade.

<sup>15</sup> Ñamie cinco diga ucubena fecade. Jiaimie menacubena fecade. Jiaimie dacubena fecade. Nagamie ie maijille ñinori fecade. Ie mei oni jaide.

<sup>16</sup> Cinco diga ucubena feñotimie jaillanona, iena fecallena, rana ñibade. Iemona jiaie cinco diga ucubena ote.

<sup>17</sup> Menacubena feñotimie iena fecallena, rana ñibade. Iemona jiaie menacubena ote.

<sup>18</sup> Daucubena feñotimie eniruemo naie ucube eenote. Iena fecallena, rana ñibañede. Iemona buena oñede.

<sup>19</sup> Digarui illanona, naie patrón abido bite. Naimaci cuentas siadollena, ie mullaiaina uaidote.

<sup>20</sup> Cinco diga ucubena feñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”.



21 Patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataitucue. Cue diga caimare jaca iitio”.

22 Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”.

23 Naimie patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataitucue. Cue diga caimare jaca iitio”.

24 Daucubena feiñotimie bite. Raite: “Patrón, o riirenana uiñoticue. O mullaiai maijiamona ganacabidio.

25 Ucubena cue faifiñellena ona jaciruitucue. Ie jira eniruemo o cuemo iga ucubena eenoticue. Jadi, iena jai abido atidicue”.

26 Patrón uai ote: “Maraiñedio. Rairaiedio. Cue mullaiai maijiamona cue ucube uana uiñotio.

27 Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”.

28-30 Ie mullaiaimo llote: “Naimiemona ie ucubena bairo. Diez ucube illamiemo iena feca. Bie maraiñede mullaima jitiredinomo cuemona oni dota. Nainomo comini duere sefuillanona eetimaci”. Jusiñamui ie jitailla rafuena finodinona: “Mare” raite; iadedi ie jitaille rafuena finoñedinona duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitaillacinona finocana omoi jai.

### *Jesúdi cominina duere finolle llua rafue*

31 Jesús llote:

—Omoina nia llofueitucue. Abido cue bia, nana cue jaienisai diga biitucue. Illaimana ico cue bia, illaima illa ifomo iitucue. Eo siño uaido biitucue.

32 Cue uicomo nana nairaiai ofitimaci. Toica llaudaiai sedaraima ie chivos motomona ie llaudaiai oni fetua isoi, naimacina fetoitucue.

33 Cue jitaillacinona finodino diese cue fetuanona, cue nabeimo itataitucue. Cue jitaillacinona finoñedino diese cue fetuanona, cue jarifebeimo itataitucue.

34 Cue illaimana jira, cue nabeimo itinomo lloiticue: “Cue Moo omoi iobillanona, omoina jai caimare itatate. Cue Moo cominina omoi illa jira, cue sedajanomo mai bi. Nainomo duidomoi.

35 Cue jitaillacinona omoi finuamona navui aimetaitucue, cuena ecadomoi. Jiroacaducue, jinui cuemo fecadomoi. Omoi nairai dine cue macaria, cuena omoi uiñoñoeno omoi jofomo cuena feiñotomoi.

36 Iniroiniducue, iniroi cuemo fecadomoi. Duiducue, cuena canollena, cuena jibuisaibidomoi. Cárcelmo itucue, cuena canollena, cuena jibuisaibidomoi”.

37 Cue jitaillacinona finodino dinena cuemo jicanoitimaci: “Nama, ¿niruido aimetaitiomo, ona ecadicai? ¿Niruido jiroacadomoi, jinui omo fecadicai?

38 ¿Niruido ona ciodicai, cai jofomo ona feiñollena? ¿Niruido iniroina omo fecadicai?

39 ¿Niruido duidomoi, ona jibuisaidicai? ¿Niruido cárcelmo itiomoi, ona jibuisaidicai?”

40 Uai oiticue: “Uanaicinona omoimo lloiticue. Cuena inotinomona jamai bue isoidimiena canodomoi, cuena jiai canodomoi” lloiticue.

41 Iemei cue jarifebeimo itinomo lloiticue: “Cuemona oni mai jai. Cue cominiñedomoi. Jai faifidomoi. Duere omoi sefuillena, iraimo mai jai. Naie irai jaca duñede. Jusiñamuidi naiena Taife iena jai finode. Jusiñamuidi Taife comini iena jiai jai finode.

<sup>42</sup> Cue jitaillacinona omoi finoñenamona, navui aimetaiticue, cuena ecañedomoi. Jiroacaducue, jinui cuemo fecañedomoi.

<sup>43</sup> Omoi nairai dine cue macaria, omoi jofomo cuena feiñoñedomoi. Iniroinidicue, iniroi cuemo fecañedomoi. Duidicue, cuena canollena, cuena jibuisaibiñedomoi. Cárcelmo iticue, cue canollena, cuena jibuisaibiñedomoi”.

<sup>44</sup> Cuemo jicanoitimaci: “¿Niruido aimetaitiomo, ona ecañedicaí? ¿Niruido jiroacadiomo, jinui omo fecañedicaí? ¿Niruido ona ciodicaí, cai jofomo ona feiñollena? ¿Niruido iniroinidiamo, omo fecañedicaí? ¿Niruido duidiamo, ona jibuisaiñedicaí? ¿Niruido cárcelmo itiomo, ona jibuisaiñedicaí?”

<sup>45</sup> Uai oiticue: “Uanaicinona omoimo lloiticue. Diga comini cuena innotimaci. Naimacimona jamai bue isoidimiena omoi canoñena jira, cuena canoñedomoi” lloiticue.

<sup>46</sup> Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

## 26

### *Judíuai illaicomini Jesúna gaitallena siadua rafue*

(Mr 14.1-2; Lc 22.1-2; Jn 11.45-53)

<sup>1</sup> Ie llofueoicaiganona llofua mei, naimacimo Jesús llote:

<sup>2</sup> —Pascua railla rafue illena, menarui fiebide. Iena uiñotomoi. Monamona jaie cue billamona, imana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote.

<sup>3</sup> Naie facaiseconi Jusiñamui diga nanoca ñairainidi, jaie illaicomini diga, nanoca ñairaima jofomo ofidimaci Nanoca ñairaimadi Caifás.

<sup>4</sup> Jesúna jifuiano gaitallena coniniri siadotimaci. Naimiena meinellena jiai siadotimaci.

<sup>5</sup> Raitimaci:

—Pascua railla facaise naimiena nia gaitañeiticaí. Naie facaise naimiena cai gaitataia, iena gaiñenamona, comini cai diga fuititimaci. Nia sedaiticaí.

### *Jesúmo riño caimare soride ra totaja rafue*

(Mr 14.3-9; Jn 12.1-8)

<sup>6</sup> Betania railla nairaimo Jesús jaillanona, Simón jofomo jaide. Simódi jaie efonaitimie.

<sup>7</sup> Naifomo mesamo Jesús guitemo, daje riñodi noficimona finoca frasco atiano, naie frasco llailanona, nainomo ite caimare soride ra naimie ifogimo totade. Naie ra eo raifide.

<sup>8</sup> Jesús llofueoicaigano iena cianona, iciritimaci. Coniniri dani ñaitimaci:

—Naie caimare soride ra jamai dotade. Jai faifide.

<sup>9</sup> Iena fecacadena, eo ailluena raifide. Naie ucube dueredinomo fecadena, caimona mare.

<sup>10</sup> Naimaci ñaiana Jesús uiñua jira, naimacimo llote:

—¿Bue ñellena naiñaiñoña jeare ñaitomoi? Mare rafuena cuemo finode.

<sup>11</sup> Omoi diga dueredino jaca itimaci; iadedi omoi diga jaca iñeiticue.

<sup>12</sup> Cue abimo bie caimare soride ra naiñaiño totajamona, cue fiodaillirui facaina naiñaiño iese finode.

<sup>13</sup> Omoimo uanaicinona lloiticue. Ninomo cue mare finoca rafuena bu lloia, naiñaiñoña uibiñollena, nana cominimo naiñaiño finoca rafuena lloite.

### *Judas micori raillamie Jesúna gaitataiacana rafue*

(Mr 14.10-11; Lc 22.3-6)

<sup>14</sup> Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide.

15 Naimacimo jìcanote:

—Omoïmo Jesúna cue fecaia, ¿niga ucubena cuemo fecaitomoi? —jìcanote. Naimaci siadua mei, treinta ucubena naimiemo fecadimaci.

16 Naie facaiseconimona Jesúna gaitatalliruimo naimie ocuiride.

*Jesúdi ie fiodaille rafuena llua rafue*

*(Mr 14.12-25; Lc 22.7-23; Jn 13.21-30; 1 Co 11.23-26)*

17 Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jìcanotimaci:

—¿Ninomo pascua railla rafue ie guille finuana jitaideo?

18 Uai ote:

—Jerusalémo omoï jaillanona, omoïmo cue llogamiëna omoï ciuanona, naimiemo llono: “Cai llofueraïma fiodaille facaise iaiei ite. O jofomo ie llofueoicaigano diga pascua rafuena finoacade” llono.

19 Ie muidona ie llofueoicaiganodi ie lluaana finodimaci. Pascua railla rafue guille finodimaci.

20 Nairui jitoma ana itemo, Jesús ie doce llofueoicaigano diga nainomo guisaide.

21 Naimaci mesamo guitimacimo, Jesús llote:

—Omoïmona damie cuena gaitataite —llote.

22 Iena cacajanona, eo sunaitimaci. Damierie naimiemo jìcanoside:

—¿Cuena ñaitio?

23 Uai ote:

—Omoïmona damie bie platomo cue diga llomenico diga mutade.

24 Jusiñamui facaina lloiraïma cuega isoi, monamona jai billamona fioidaiticue; iadedi cuena gaitataitimie eo duere sefuite. Naimie jeiciñegadena, cuemonona mare.

25 Jesúna gaitataitimiëdi Judas micori. Naimie jìcanote:

—Maestro, ¿ona iese finotaiticue?

Uai ote:

—Jii, iese finotaitio.

26 Naimaci nia guitimacimo, llomeniconona Jesús llinuanona, Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoï começina facajano, iena guiño.

27 Ie mei naimie jiroracona jiaï llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoï jiro.

28 Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoïmo jiaie rafue birui itatajanona, omoï jeacino oni dotajana jai llote. Bie vinodi naie rafue facai ie. Cue llua isoi bie vinona omoï jiruamona, cue fiodaillamo omoï começi.

29 Omoïna bene dane iese caimare nabaiñeiticue. Cue Moo sedajanomo omoï diga cue ia, nainomo omoïna dane iese caimare marena nabaiticue. —Iena jirodimaci.

*Jesúdi Pedro naimiëna januana llua rafue*

*(Mr 14.26-31; Lc 22.31-34; Jn 13.36-38)*

30 Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci.

31 Jesús naimacimo llote:

—Cuemo suille rafue muidona, ja naio cuena fañonocaitomoi. Jusiñamui facaina lloraima micori iena jaie cuega: “Toica llaudaia sedaraimana meinetaiticue. Naimie toinaia uaficaida jaitimaci” cuega. Naimie micori caina cuete.

<sup>32</sup> Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

<sup>33</sup> Pedro uai ote:

—O finolle rafue muidona nana jaino ona fañonocaia, ona jaca fañonocaiñeiticue.

<sup>34</sup> Jesús dinena raite:

—Uanai omo lloiticue. Ja naio itava nia ñaiñenia, dacaiño amani cuena janoitio.

<sup>35</sup> Pedro uai ote:

—O diga cue fiodaia dedi, ona janoñeiticue.

Nana ie llofueoicaigano daje uaido jia raitimaci.

*Jesúdi Getsemanímo Jusiñamuimo jia rafue*

*(Mr 14.32-42; Lc 22.39-46)*

<sup>36</sup> Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

<sup>37</sup> Pedrona uite. Zebedeo ie jito iaimaiaina jia uite. Naimie sunaicaide. Ie comeci uri iñede.

<sup>38</sup> Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

<sup>39</sup> Naimie janore bai jaillanona, eniruemo bitadate. Jide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jide.

<sup>40</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Ñiese raire inidio? daje hora nia iñedemo.

<sup>41</sup> Iniñeno. Taife ramo omoina fai raillano, iena omoi iñoñellena, Jusiñamuimo jii. Omoi comeci mare rafuena finoacade; iadedi omoi comeci dan ocuiñoñede. Ie muidona Jusiñamuimo jii, omoina naimie ocuiñotallena —llote.

<sup>42</sup> Ie mei dane jillena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

<sup>43</sup> Ie llofueoicaigano dine dane billanona, naimaci uisi lliñoilla jira, naimaci inisitemo ride.

<sup>44</sup> Abido jaillanona dane jide. Ailli daje isoiduaido jide.

<sup>45</sup> Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla jira, naimiena iñoñedino anamo ja iticue.

<sup>46</sup> A naidacai. Maiña. Cue gaitaitimie jai bite.

*Jesúna gaitalle rafue*

*(Mr 14.43-50; Lc 22.47-53; Jn 18.2-11)*

<sup>47</sup> Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jia atidimaci. Jusiñamui diga nanoca ñairainimona bitimaci. Einamaci dinena jia bitimaci.

<sup>48</sup> Jesús dine naimaci nia riñenia, Judas micori naimie diga bitinomo jai llote:  
—Jesúna omoi uiñollena, naimiena llibanoitícue. Ie mei naimiena gaita —  
llote.

<sup>49</sup> Jesús dine naimaci rillanona, Judas micori Jesús dine raire jaide.  
Naimiena uaidote:

—Maestro, jai bitícue. —Ieconí naimiena llibanote.

<sup>50</sup> Jesús dinena raite:

—¿Bue ñiaíbitio?

Ie mei Judas micori diga bitinodí Jesúsna gaitadimaci.

<sup>51</sup> Iena cüanona, Jesús diga itinomona damie ie lloebi llinuanona,  
Jusiñamui diga nanoca ñairaima ie mullaíma jefona jaíbonote.

<sup>52</sup> Jesús naimiemo llote:

—O fuiriacania, o jiaí fiodaitio. O lloebi dane eeno. Cue riiduanona,  
fuiriñeno.

<sup>53</sup> Cuena riidollena, cue Moomo cue jicaia, eo ailluena jaienisaí cue dine  
naimie oretaite;

<sup>54</sup> iadedí iese cuena riidoia, Jusiñamui facaina llorainí micoriaí ciegafuiaí  
suiñeite. Cue fiodaille rafuena cuetimaci —llote.

<sup>55</sup> Ieconí naimie dine bitinomo Jesús llote:

—Omoi butaralluna uitomoi. Omoi lloebi diga jiaí bitomoi.  
Fíriraímadícueta cuena omoi gaitajaíbillá. Jusiñamui jofomo nagarui  
llofuecabitícue; iadedí cuena gaitañedomoi.

<sup>56</sup> Nana bie rafue suide, Jusiñamui facaina llorainí micoriaí ciega-  
fuiá suillena —llote. Ie facaise nana naimie llofueoicaigano naimiena  
fainonocaillano, aisidimaci.

*Jesúdí judíuáí illaícominí dine illa rafue*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Jesúsna gaitadinodí Caifás jofomo Jesúsna uitimaci. Caifás Jusiñamui diga  
nanoca ñairaima. Naimie jofomo jiaíe illaícominí jai ofidimaci. Moisés micori  
llogacinona llofueraíni ofidimaci. Einamací jiaí ofidimaci.

<sup>58</sup> Jesús jinafona Pedro aarena jaide. Caifás jofo nairaíbirimo jaide. Naie  
rafue fuiduana naimie uiñollena, nainomo ite jofomo maijiraíni diga raide.

<sup>59</sup> Naimiena meinellena, nana naie illaícominí Jesúsno nicino illana  
uiñoiacadimaci.

<sup>60</sup> Iena coniníri siadotimaci; iadedí naimiemo jaca nie isoide marañede ra-  
fue illana uiñoñedimaci. Diga cominí Jesúsna ñaitimaci; iadedí taino llotimaci.  
Ie mei menamie bitiaímaiaí.

<sup>61</sup> Raitiaímaiaí:

—Bimie llote: “Jusiñamui jofona judaíredícue. Judaía mei, darui amani  
illanona, iena dane finoredícue” —lloitiaímaiaí.

<sup>62</sup> Jusiñamui diga nanoca ñairaima Jesúsno jicanote:

—¿Nie se iaímaiaí uai oitio? ¿Nie isoide rafue ona llogidotiaímaiaí?

<sup>63</sup> Jesús uai oñede. Naie ñairaima dinena llote:

—Caí Jusiñamui cajede. Naimie caína uiñua jira, uanaicinona caí lloñenia,  
caína duere finoite. Uanaicinona caímo llono. “¿Odí Cristodio?” omo  
jicanotícue. “¿Odí Jusiñamui Jitodio?” omo jicanotícue.

<sup>64</sup> Jesús dinena uai ote:

—Jí, naimiedícue. Iena raise llotio. Monamona jaie cue billamona,  
imana jaidícue; iadedí ico jiaíruido illaímana cue illena, Jusiñamui ecímo  
cue raillana omoi nairaí cíoitimaci. Mona uillie motodo cue abido billena jiaí  
cíoitimaci.

<sup>65</sup> Iena cacajanona, naimiemonona Jusiñamuina Jesús jeare ñaía jira, naie  
nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitañedicai. Ie ñaiamona dama naimie abina llogidote.

<sup>66</sup> ¿Niese naimiena raitomoi?

Jiai illaicomini dinena uai otimaci:

—Naimie fiodaillesa.

<sup>67</sup> Ie mei naimie uiecona tuallaitimaci. Naimiena ducoidimaci. Jiai bucoidimaci.

<sup>68</sup> Raitimaci:

—O Cristodiødena, ¿bu o bucoia? caimo llono.

Jesús uai oñede.

### *Pedrodi Jesúna janua rafue*

*(Mr 14.66-72; Lc 22.56-62; Jn 18.15-18, 25-27)*

<sup>69</sup> Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite.

<sup>70</sup> Nana nainomo itinomo Pedro llote:

—O lluana uiñoñedicue.

<sup>71</sup> Nase fuemo Pedro jaidemo, naimiena jiaie mullaño ciuanona, nainomo itinomo llote:

—Bimiedi Nazaret ie Jesús comini imie.

<sup>72</sup> Pedro uai ote:

—Uanaicinona cue lluana Jusiñamuidi uiñote. O llogamiena uiñoñedicue.

<sup>73</sup> Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

<sup>74</sup> Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúna uiñoñedicue. —Iecon iitava ñaite.

<sup>75</sup> Iena cacajano, Pedro Jesús lluana uibiñote. Jaive Jesús Pedromo llote: “Itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

## 27

### *Pilato dine Jesús illa rafue*

*(Mr 15.1; Lc 23.1-2; Jn 18.28-32)*

<sup>1</sup> Monaidemo, nana Jusiñamui diga nanoca ñairainidi, nana einamaci diga, Jesúna siadotimaci. Naimiena meinellena siadotimaci.

<sup>2</sup> Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

### *Judas micori fodailla rafue*

<sup>3</sup> Judas micori Jesúna jai gaitatate. Naie illaicomini Jesúna meiniana lluana naimie micoridi uiñuamona, ie comeci iuaina meidote. Illaicominimo ie treinta diga ucubena abido atide.

<sup>4</sup> Raite:

—Jesús maraiñede rafuena jaca finoñede. Naimie fiodaiñeite. Naimiena cue gaitatajamona, maraiñedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

<sup>5</sup> Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona.

<sup>6-7</sup> Jusiñamui diga nanoca ñairaini naie ucubena iraiia mei, iena siadotimaci. Coniniri raitimaci:



—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci.

<sup>8</sup> Naie ucube muidona damie fiodailla jira, birui naie enirue mamecidi dirue ie enirue.

<sup>9</sup> Iemona Jeremías micori jaie cuega rafue jai suide. Naimie micoridi Jusiñamui facaina lloaíma. Naimie micori cuega: “Cai Israel railla cominimona damerie railla jira, naimiena meinellena, treinta ucubena fecaitimaci.

<sup>10</sup> Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

*Pilato dine Jesús illa rafue*

*(Mr 15.2-5; Lc 23.3-5; Jn 18.33-38)*

<sup>11</sup> Pilato railla gobernador uicomo Jesúna atia mei, Pilato Jesúmo jicante:

—¿Judíuai comini illaimadio?

Jesús uai ote:

—Jii. Raise llotio.

<sup>12</sup> Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede.

<sup>13</sup> Ie muidona Pilato naimiemo llote:

—Diga rafuena ona llogidotimaci. ¿Niese uai oñedio?

<sup>14</sup> Jesús nia uai oñede. Ie jira Pilato uainicaide.

*Pilatodi Jesús fiodaillana llua rafue*

*(Mr 15.6-20; Lc 23.13-25; Jn 18.38-19.16)*

<sup>15</sup> Naga año pascua railla rafue facaiseconi cárcelmo itinomona Pilatodi comini jicacamiéna jamai jino orede.

<sup>16</sup> Bie año cárcelmo Barrabás raillamie ite. Naimie mameci eo are soride.

<sup>17</sup> Naie rafue illa jira, ailluena comini naimie dine ofillano, naimacimo Pilato jicante:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiaí ite. Naimiedi Cristona jiaí mameciredede.

<sup>18</sup> Iese jicante; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meineiácanana jiaí uiñote.

<sup>19</sup> Ie maijiracomo naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”.

<sup>20</sup> Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica—llotimaci.

<sup>21</sup> Comini ofilla mei, naimacimo Pilato dane jicante:

—¿Nimie cue jino oretajana jitaidomoi?

Uai otimaci:

—Barrabás.

<sup>22</sup> Pilato dinena jicante:

—¿Niese Jesúna cue finuana jitaidomoi? Naimiedi Cristona jiaí mameciredede.

Nana uai otimaci:

—Naimiena cruzmo corai.

<sup>23</sup> Pilato dane jicante:

—¿Nie isoide maraiñede rafuena finode?

Naimaci dinena ado ibi llonoidimaci:

—Naimiena corai.

<sup>24</sup> Jesúsna jino oretajana jitaiñedimaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

<sup>25</sup> Uai otimaci:

—Dama iesede. Naimie fiodaite cai muidona. Jiai cai uruia muidona.

<sup>26</sup> Ie mei Pilatodi Barrabás naimaci jitailla jira, jino orede; iadedi Jesúsna sechedotajanona, naimiena coraillena orede.

<sup>27</sup> Dajerie soldaduai di Pilato jofomo Jesúsna uite. Nana soldaduai nainomo ofidimaci.

<sup>28</sup> Naimie iniroi duiñuano, naimiemo jiduirede iniroina jitadimaci.

<sup>29</sup> Eecuaimona niga nuiciraina naimie ifogimo jitadimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaíma. —Iese raillanona naimiena jifanododimaci.

<sup>30</sup> Naimiena tuallaítimaci. Naimie onollimo ite radosina naimaci llinocaida, naiedo naimie ifogina buta-butadimaci.

<sup>31</sup> Jesúsna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

### *Jesúna coraia rafue*

*(Mr 15.21-32; Lc 23.26-43; Jn 19.17-27)*

<sup>32</sup> Jerusalémona naimaci jaillanona, Cirene railla eniruemona bitimie mo dafaifidimaci. Naimie mameci Simón. Naimiena Jesús uiga cruzna rocatatimaci.

<sup>33</sup> Gólgota raillanomo jaidimaci. Ifocoraina eruaila jira, iese mameciredede.

<sup>34</sup> Nainomo rillanona, ie abi isirena cacaiñellena, vinomo eriredede rana faianona, naimiemo fecadimaci; iadedi iena naimie facajano, iena jiroñede.

<sup>35</sup> Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci.

<sup>36</sup> Ie mei ana raidimaci, naimiemo eruaillena.

<sup>37</sup> Naimie ifogi afebeimo ie llogiduaifuena jonetimaci. Iese cuega: “Bimiedi Jesús. Judíuai comini illaíma”.

<sup>38</sup> Ie mei mena firiruide iaímaiaína coraidimaci. Damie Jesús nabeimo coraica. Jaiimie Jesús jarifebeimo coraica.

<sup>39</sup> Naisodo jamai jaidino Jesúsna mameritimaci. Mamerillamona, ifogiaína jaididimaci.

<sup>40</sup> Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

<sup>41</sup> Ie facaise Jusiñamui diga nanoca ñairaini naimiena mameritimaci. Moisés micori llogacino llofueraíni naimiena jiai mameritimaci. Einamaci naimiena jiai mameritimaci. Raitimaci:

<sup>42</sup> —Jiaie cominina jillotate; iadedi dama naimie abina jilloitanide. Naimiedi cai judíuai comini illaíma raillamiedena, cruzmona naimie ana niade billasa. Ie mei naimiena inoíticai.

<sup>43</sup> “Jusiñamui Jitodícue” naimie railla jira, naimiedi Jusiñamuina ja inotena, Jusiñamui jitaia, Jusiñamui naimiena jillotaite. —Iese naimiena mameritimaci.

44 Naimie diga coraica ia:maiai daje isoi naimiena mameritia:maiai.

*Jesús fiodailla rafue*

(Mr 15.33-41; Lc 23.44-49; Jn 19.28-30; Heb 9)

45 Jitoma naidai itemona, daje amani horas mona jitibicaide.

46 Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fa:nonocaidio?” raite.

47 Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.

48 Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade.

49 Ieconi jia:ino raitimaci:

—Ina nai. Dallu seda. Elías naimiena jilloitaja:billena sedaiticai.

50 Ieconi Jesús dane ado cuirioita, fiodaite.

51 Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconi ñuisaño suide. Iemona nofie oni bojode.

52 Diga raiafuai econote. Jesús jillua mei, raiafomona, fiodaillamona, ailluena Jusiñamuina inotinodi jillodimaci.

53 Ie mei Jerusalémo naimaci jaillanona, diga comini naimacina cioidimaci.

54 Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinaillamona, naimie raite:

—Uanai bimiedi Jusiñamui Jito.

55 Ailluena riñoniai naie rafuena aarena cioidimaci. Naimiena canollena, Galileamona Jesús diga navui bitimaci.

56 Naimaci motomo María Magdalena ite. Jiaie María jia: ite. Naiñaiñodi Jacobo ei. Naiñaiño jia: José ei. Zebedeo uruai ei jia: ite.

*Jesús raiafomo jonia rafue*

(Mr 15.42-47; Lc 23.50-56; Jn 19.38-42)

57 Jitoma ana itemo, eo ucuberedimie Pilato dine jaide. Naimiedi Arimatea naira: imie. Naimie mameci José. Jesús dibeimo jaidimie.

58 Jesús abina jicallena, Pilato dine jaide. Pilato “Jee” raillanona, Jesús abina naimie ollena llote.

59 Ie mei Jesús abina cruzmona ana José uanona, jeanide mare userede iniroi diga naimie abina ferinote.

60 Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide.

61 María Magdalena raiafo uico dine jiaie María diga rainadatia:ñuai.

*Soldaduai Jesús raiafo sedaja rafue*

62 Ie areruido, pascua railla rafue illarui, dajerie judíuai illaicomini Pilato dine jaidimaci.

63 Raitimaci:

—Ero, naie abi caitadimie nia fiodaiñenia, navui llote: “Cue fiodaillamona, darui amani illanona, jilloiticue”.

64 Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fñanona lloitimaci: “Naimie jai jillode”. Iese suia, cominina eo jifueitimaci.

65 Pilato uai ote:

—Soldaduai omoïdo oreitïcue, naie raiafo raise sedallena.

<sup>66</sup> Ie jira jaidimaci. Raona nitajano, raiafo raise ibaidimaci. Naiena sedallena, soldaduaïna nainomo fainonocaidimaci.

## 28

*Jesús fiodaillamona jillua rafue*

*(Mr 16.1-8; Lc 24.1-12; Jn 20.1-10)*

<sup>1</sup> Sábado fuilla mei, monaiacania, María Magdalena, jiaïe María diga, raiafona jibuisaidiaïñuai.

<sup>2</sup> Ieconï ñuisaño suide. Monamona billanona, Jusiñamui jaienicï raiafomo ibaica noficïna oni ñuitade. Naie noficïmo raïde.

<sup>3</sup> Eo queniredena eruaïde. Naimïe inïroi eo userede.

<sup>4</sup> Nainomo ite soldaduai naimïena eo jacïnaillamona, abi docaidimaci. Iemona fiodaitïno isoi dallu itïmacï.

<sup>5</sup> Ie facaise naie jaienicïdï ñinena naie riño iaïñuaïmo llote:

—Jacïruiñeno. Coraïca Jesúna omuiño jenuana uiñotïcue.

<sup>6</sup> Naimïe bene iñede. Naimïe llua isoi, fiodaillamona naimïe jai jillode. Naimïe ifo jeraimo billano mai jibuisaïbi.

<sup>7</sup> Ie mei ie llofueoïcaïgano ñine raïre omuiño jai. Fiodaillamona naimïe jilluana naimacïmo llono. “Galileamo omoï uïcomo naimïe jaite” llono. Bie rafue omuiño jai llotïcue —llote.

<sup>8</sup> Ie jira raiafomona raïjicaïllanona, eo iobïllanona, raïre jaidiaïñuai. Ie llofueoïcaïgano ñine aisidïaïñuai.

<sup>9</sup> Ie llofueoïcaïgano ñine iaïñuai ñia riñenia, Jesús iaïñuaïmo dafaïfillano, raite:

—Itomuiño. —Naimïe ñine iaïñuai rïllanona, naimïena sedallena, naimïe eïllïna llïnotïaïñuai.

<sup>10</sup> Jesús ñinena raite:

—Jacïruiñeno. Cue llofueoïcaïganomo llono: “Galileamo jai. Nainomo omoïna cioitïcue” llono.

*Soldaduai raiafona sedademo suide rafue*

<sup>11</sup> Jaidiaïñuaïmo, nainomo ite soldaduaïmona dajerie Jerusalémo jaide, nanoca Jusiñamui diga ñairainïmo nana naimacïmo suide rafue lollena.

<sup>12</sup> Iena cacajano, einamacï diga iena siadotïmacï. Ie mei naie soldaduaïmo ucubena fecadïmacï.

<sup>13</sup> Raitïmacï:

—Jiaïe cominïmo llono: “Cai inïa mei, ie llofueoïcaïgano ie abïna fïano uitïmacï” llono.

<sup>14</sup> Iena cai gobernador fidïa, naimïe diga ñaitïcai, omoïna naimïe duere fïnoñellena —raitïmacï.

<sup>15</sup> Ie jira naie ucubena feïñuanona, cominïmo illaïcominï llua isoi llotïmacï. Naie rafue uiñocana jaide. Birui ñia iena uiñocana jaide.

*Jesús ie llofueoïcaïganomo iraïcaiño lloga rafue*

*(Mr 16.14-18; Lc 24.36-49; Jn 20.19-23)*

<sup>16</sup> Ie mei Galileamo naie once llofueoïcaïgano jaidïmacï. Jesús lloga anedumo jaidïmacï.

<sup>17</sup> Naimïena naimacï cïuanona, naimïena sedadïmacï; iadedï dajerie Jesús jilluana raise ñia ñnoñedïmacï.

<sup>18</sup> Jesús ñinena raite:

—Cue Moo cue uai cuemo iga, monamo cue jitaïlla rafue cue fïnollena, enïruemo cue jitaïlla rafue cue fïnollena.

<sup>19</sup> Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza.

<sup>20</sup> Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodice.

## MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micorì illa rafue*

*(Mt 3.1-12; Lc 3.1-9, 15-17; Jn 1.19-28)*

<sup>1-2</sup> Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micorì Jusiñamui facaina jaie llumona, Juan Bautista micorì llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micorì cuete:

“Ero, o uicodo cue rafuena lollena, damiena oretaiticue” Jusiñamui raite.

<sup>3</sup> Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

<sup>4</sup> Isaías micorì llua isoi, Juan Bautista raillamie micorìdi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoì jeacinona fañonocaida, Jusiñamui dibeimo omoì comeciai iuaillai meido. Iemona omoì jeacinona feitaite. Omoì comeciai iuaillai omoì meidoia, cominina iena uifotallena, mai omoì bautizallomoi.

<sup>5</sup> Diga comini naimie micorì dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micorì bautizaga.

<sup>6</sup> Juan micorìdi camello itiraiai ie nilla iniroina jitade. Igoi iena ie moiligaina jitade. Fioduaina rite. Cifona mete. Jamai rana guite.

<sup>7</sup> Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uifnoñedicue.

<sup>8</sup> Jusiñamui dibeimo omoì illamona, jinui diga omoina bautizadicue; ia naimie bia, naimie dibeimo omoì jaillamona, Jusiñamui Joreña omoimo itataite.

*Jesús bautizaja rafue*

*(Mt 3.13-17; Lc 3.21-22)*

<sup>9</sup> Jordán dine Juan micorì nia ia, Galileamona, Nazaretmona naimie dine Jesús bite. Nainomo Jesúdi Juan bautizaga.

<sup>10</sup> Bautizaja mei, jinuimona billanona, ieconi mona bojodena ciode. Jusiñamui Joreño, ucugi isoi, naimie emodomo ana billana ciode.

<sup>11</sup> Monamona Jusiñamui llote:

—Cue isiruiga jitodio. Ori iobidicue.

*Jesúna Taife ramo faia rafue*

*(Mt 4.1-11; Lc 4.1-13)*

<sup>12</sup> Jesús bautizaja mei, Jusiñamui Joreño jofue iñenanomo naimiena uite.

<sup>13</sup> Comini nainomo iñede. Difai ocainai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

*Galileamo Jesús illa rafue*

*(Mt 4.12-17; Lc 4.14-15)*

<sup>14</sup> Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide.

<sup>15</sup> Llote:



—Jusiñamui birui omoina sedaacade. Ie cominina omoi jaillena birui jitaide. Jusiñamui ðibeimo illena, omoi jeacinona fainonocaida, omoi comeciai iuaina meido. Bie rafuena mai omoi ñno.

*Ie llofueoicaigano jaillena, Jesús ði nagaamagamiena fetua rafue*

*(Mt 4.18-22; Lc 5.1-11)*

<sup>16</sup> Jiairuido Galilea railla jorai fuemo Jesús macaritemo, menamiena cide. Naga ie ama iaimaiai. Damie Simón. Jiaimie Andrés. Lloijina fairaima iaimaiai. Iese jaca naie iaimaiaidi maijuidiaimaiai.

<sup>17</sup> Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaide. Lliciana birui ocabitomico; iadedi cominina oitomico, cue ðibeimo naimaci illena.

<sup>18</sup> Iena cacajanona, ieconi iaimaiai lloijina fainonocaida, naimie diga jaidiaimaiai. Ie llofueganona jaillena, jaidiaimaiai.

<sup>19</sup> Lliai bai Jesús jaidemo, jiaie menamiena cide. Naga ie ama iaimaiai. Damie Jacobo. Jiaimie Juan. Iaimaiai moodi Zebedeo. Botemo iaimaiai lloijina sigaidiaimaiai.

<sup>20</sup> Jesús iaimaiaina uaidote, ie llofueganona jaillena. Ie maijiraini diga iaimaiai moonna fainonocaida, botemona ari billanona, Jesús diga jaidiaimaiai.

*Jesús ði Janaba anamo itimie jillotaja rafue*

*(Lc 4.31-37)*

<sup>21</sup> Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofue.

<sup>22</sup> Moisés micori llogacino llofueraini isoi llofueñede. Illaima uai isoi naimie llofua jira, nainomo ite comini naimie llofuiamona rajicaidimaci.

<sup>23</sup> Janaba anamo illamie nainomo ite.

<sup>24</sup> Jesús llofuiana cacaita, Janabadi imana ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaibidio. Ona uiñoticue. Odi Jusiñamui ie mare fetocamedio.

<sup>25</sup> Jesús naimiena lletade:

—Llicai. Naimiemoni oni jai.

<sup>26</sup> Janaba naimiena docaitajanona, ado cuirioillanona, naimiemoni oni jaide.

<sup>27</sup> Iena cianona, nana nainomo itino rajicaidimaci. Coniniri siadotimaci:

—¿Ñiese ite? Bimie jiaie uaido llofue. Janabamo naimie llua mei, imamona Janaba oni jaide. Janaba Jesús uaina ñnote.

<sup>28</sup> Iemona nana Galilea eniruemo Jesús mameci are soride.

*Jesús Pedro jifaiña jillotaja rafue*

*(Mt 8.14-15; Lc 4.38-39)*

<sup>29</sup> Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiide. Jacobo, Juan diga jiai fo jaide.

<sup>30</sup> Ie facaise Simón jifaiño duide. Abi cuaride. Nainomo itino Jesús mo naiñaiño duillana llote.

<sup>31</sup> Iena cacajanona, naiñaiño ðine jaillanona, Jesús naiñaiño onollina llinote. Naiñaiño naidacaitade. Ieconi abi cuarilla fainonocaide. Guille finuanona, ie jofomo itinona ecade.

*Jesús ði ailluena duidinona jillotaja rafue*

*(Mt 8.16-17; Lc 4.40-41)*

<sup>32</sup> Navuida, jibicaidemo, Jesús ðine comini ailluena duidinona atidimaci. Janaba anamo itinona jiai atidimaci.

<sup>33</sup> Nana Capernaum comini naie jofu nasemo ofidimaci.

<sup>34</sup> Jesúsdi diga duiconu ailluena duidinona jillotate. Ailluena comini Janaba anamona jillotate. Naimiena jananiai uíñua jira, Jesús naimaci ñaiana rairuide.

*Galileamo Jesús llofui rafe*

*(Lc 4.42-44)*

<sup>35</sup> Ie areruido nia monañenia, Jesús casillanona, Capernaumona comini iñenanomo Jesús jaide. Nainomo Jusiñamuimo jide.

<sup>36</sup> Monaia, casidemo, jofomo Jesús iñena jira, Simón, ie nabaiñiai diga, Jesúsna jenuaide.

<sup>37</sup> Baillanona, raite:

—Nana comini ona jenodimaci.

<sup>38</sup> Jesús uai ote:

—Jiaie nairaiai dine mai cai jailli. Nainomo llofueiacadicue. Ie jira Capernaumona jino biticue.

<sup>39</sup> Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

*Jesúdi efonaitimiena jillotaja rafe*

*(Mt 8.1-4; Lc 5.12-16)*

<sup>40</sup> Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiededi, cuena jillotaredio.

<sup>41</sup> Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo.

<sup>42</sup> —Iecon naimie jillode.

<sup>43</sup> Ie facaise Jesús naimiena oretaiacanano, naimiemo riire llote:

<sup>44</sup> —O jilluana bumo lloñeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uíñollena, naimiemo o abina acatajai. Moisés micori jaie lloga rana Jusiñamuimo feca.

<sup>45</sup> Iese Jesús naimiemo llote; iadedi Jesús finoca rafe llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

## 2

*Jesús tisitaitimiena jillotaja rafe*

*(Mt 9.1-8; Lc 5.17-26)*

<sup>1</sup> Nigarui illanona, Capernaumo Jesús dane abido ride. Comini iena fidianona,

<sup>2</sup> ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuate.

<sup>3</sup> Cominina Jesús llofuetemo, naimie dine nagaamagamie ie biramo bide tisitaitimiena atidimaci.

<sup>4</sup> Ailluena comini illa jira, Jesús dine naimaci rinidimaci. Naie jofu bibanilla jira, jofu emodomo a jaidimaci. Jofu beicimo ite tidabacuido a jaidimaci. Jofu emodo econuano, Jesús ecimo naimiena ie biramo bide diga, rao diga, ana ñuitadimaci.

<sup>5</sup> Iena Jesús cianona, tisitaitimie jilluana naimaci inuana Jesús uíñote. Tisitaitimie llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

<sup>6</sup> Nainomo itinomona damierie Moisés micori llogacinona llofueraini nainomo raidimaci. Comecina facadimaci:

<sup>7</sup> “¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

<sup>8</sup> Naimaci comeciai facajacinona Jesús uñuanona, naimacimo jicanote:

—¿Bue ñellena omoi comeciaina iese facadomoi?

<sup>9</sup> Bimie mo: “O jeacinona jai oni dotaducue” cue lloia, cue uai siñonana uññoñeitomoi; ia bimie mo: “Mai naidacaillanona, o bira ferinocaida, mai macari” cue lloia, cue uai siñonana uññoitomoi.

<sup>10</sup> Monamona jaie cue billanona, imana jaiducue. Ie jira jeacino oni dotaja uai cuemo ite. Iena omoi uññollena, tsitaitimie mo lloiticue:

<sup>11</sup> “Mai naidacai. O bira ferianona, o jofomo mai jai”.

<sup>12</sup> Iese naimie raillanona, tsitaitimie jillode. Naidacaida, ie bira feria mei, naimacimona jino jaide. Nana nainomo itino rajicadimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicaí.

### *Jesúdi Levína fetua rafue*

*(Mt 9.9-13; Lc 5.27-32)*

<sup>13</sup> Jiairuido jorai fuemo Jesús dane jaide. Ailluena comini naimie dine ofillanona, naimacina llofuate.

<sup>14</sup> Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijuide. Nainomo raidena Levína ciode. Naimie mo llote:

—Cue llofuegamiena o jaillena, cue diga bi. —Naidacaida, Jesús diga jaide.

<sup>15</sup> Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci.

<sup>16</sup> Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci.

<sup>17</sup> Iena cacajano, Jesús llote:

—Ecairedinodi médicona jitañedimaci; ia duidinodi médicona jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci. Jusiñamui dibeimo mareuidinona uaibiñeducue; iadedi maraiñedino uaibitucue. Omoimona maraiñedino diga nabairitucue; ia naimacina uaibitucue.

### *Jesúmo comini guiñenana jicanua rafue*

*(Mt 9.14-17; Lc 5.33-39)*

<sup>18</sup> Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimie mo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

<sup>19-20</sup> Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillanona guitimaci. Jiairuido jai aireiacade

conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>21</sup> Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

<sup>22</sup> Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifiñeite. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai –llote.

*Sábadoruimo Jesús llofueoicaigano maijia rafue  
(Mt 12.1-8; Lc 6.1-5)*

<sup>23</sup> Jiairuido sábadoruimo Jesús, ie llofueoicaigano diga, trigo illa illi motodo joide nasona jaide. Ie llofueoicaigano trigona tijano, guicana jaidimaci.

<sup>24</sup> Dajerie fariseuai iena ciuano, llotimaci:

–Rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

<sup>25</sup> Ie llofueoicaiganona riiduano, Jesús uai ote:

–Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide.

<sup>26</sup> Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede.

<sup>27</sup> Jusiñamui sábadona finuamona, sábadu ite, nairui illamona comini caimare illena; ia omoi llofuiamona, iese iñedimaci. Nairuimo rairuica rana finoñellena, comini iese illena llofuecabitomoi.

<sup>28</sup> Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

### 3

*Jesúdi onollina idisarodimiena jillotaja rafue  
(Mt 12.9-14; Lc 6.6-11)*

<sup>1</sup> Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite.

<sup>2</sup> Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoa, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode.

<sup>3</sup> Onollina idisarodimie mo Jesús llote:

–Cue ecimo mai bai bi.

<sup>4</sup> Jesús nainomo itinomo jicanote:

–¿Nie isoide rafue sábadoruimo finuadi mare? Bimie birui cue jillotajadedi, birui mare rafuena finodicue. Cuena birui omoi meineiadedi, birui marañede rafue finodomoi. Sábadoruimo, ¿nie isoide rafue finuana rairuidomoi?

Comini dinena uai oñedimaci.

<sup>5</sup> Naimie uaina naimaci ñinoñena jira, ricailanona, Jesús naimacimo erodate. Duidimie mo llote:

—O onolli mai oni ñuita.

Iena oni ñuitajamona jillode.

<sup>6</sup> Iena ciuanona, fariseuai jino jaidimaci. Naimiena meinellena, illaima Herodes ñibeimo itinona baillanona, naimaci ñiga coniniri siadotimaci.

*Jorai fuemo Jesús ñailluena cominina llofua rafue*

<sup>7</sup> Naie nairaimona jorai fuemo Jesús, ie llofueoicaigano ñiga, oni jaide. Galilea railla eniruemona ailluena comini naimie ñine bitimaci. Judeamona jaiaño bitimaci.

<sup>8</sup> Jerusalémona, Idumeamona, Jordán ruicafebellemona, Tiro jinofemo ite eniruemona, Sidón jinofemo ite eniruemona ailluena bitimaci. Nana naimie ñiño finoca rafuena cacajanona, naimiena cioacadimaci.

<sup>9</sup> Comini naimiena meetasi raillanona, ie llofueoicaiganomo ñaje botemo naimie jaillena eenogana llote.

<sup>10</sup> Ailluena duidinona naimie jai jillotaja jira, nana duidino naimie mo riacadimaci. Jilloillena naimiena jetaacadimaci. Iemona naimie illa bote eenuana jitaide.

<sup>11</sup> Jananiai anamo itino Jesúsna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio.

<sup>12</sup> —Ia Jesús naimiena naimaci lluaña rairuide.

*Jesús ñe doce llofueoicaiganona fetua rafue*

*(Mt 10.1-4; Lc 6.12-16)*

<sup>13</sup> Naie facaise anedumo Jesús jaide. Ie jitaillano ñese naimie ñine uaidote. Naimie ñine billa mei,

<sup>14</sup> doce ñigamiena fetode. Naimie ñiga jaicabillena, naimacina fetode. Ie rafuena lollena, naimacina oretaiacade.

<sup>15</sup> Janaba anamo itinomona Janabana oni oretallena, ie uai naimacimo ite.

<sup>16</sup> Iese mameciredimaci: Simón; naimie mameci jaicidi Jesús jítaca Pedrona.

<sup>17</sup> Jacobo, Juan; iaiaiaia Zebedeo jito iaiaiaia. Jiaie mameci iaiaiaia Jesús jonete Boanergesna. Naie mameci oni ñobaiñuamona mona guruama. Iciriruilla jira, iese mamecirediaiaiaia.

<sup>18</sup> Andrés, Felipe, Bartolomé, Mateo, Tomás, jaie Jacobo; naimiedi Alfeo jito. Tadeo, jaie Simón; naimiedi cananista comini facaisemo ñuide.

<sup>19</sup> Judas Iscariote micori; naimiedi Jesúsna gaitatatimie.

*Fariseuai Jesúsna jeare ñaia rafue*

*(Mt 12.22-32; Lc 11.14-23; 12.10)*

<sup>20</sup> Ie llofueoicaiganona fetua mei, ie risoilla jofomo naimaci ñiga Jesús abido jaide. Ailluena comini naimie ñine billa jira, naimie guillena, naimie abi juanide.

<sup>21</sup> Naimiena ie comini fidiano: “Naimiedi jai uairico isoi iacade” raillanona, comequina facadimaci. Ie jira naimiena ie ei jofomo isañiacadimaci.

<sup>22</sup> Jerusalémona Moisés micori llogacinona llofuerañi naie facaise billanona, raitimaci:

—Beelzebú ñi Janaba comini. Beelzebú anamo Jesús illamona, Beelzebú uaido Janaba illa cominimona Jesús ñi Janabana oni oretate —raitimaci.

<sup>23</sup> Naimaci raillana naimie cacajanona, naimie ñine Jesús naimacina uaidote. Llote:

—Janaba díbeimo Beelzebú illamona, dama ie abina oretanide.

<sup>24</sup> Ero, daje isoi comeciaina lloñenamo daje nairai facañenia, danomo maijinidimaci. Oni jaidimaci.

<sup>25</sup> Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci.

<sup>26</sup> Ie isoide. Beelzebú uaido jananiaina omoi llua isoi cue oretaia, Janaba ie díbeimo itino díga jai nabairiñede. Iemona naimie comini danomo iñeitimaci. Ie uai ieconi saite.

<sup>27</sup> Ero, mairidimie ie jofomo ite rana nibai fiacadomoi. Iena fillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue.

<sup>28</sup> Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede;

<sup>29</sup> iadedi naimiedi ie Joreñoña jeare ñaiacinona jaca dotañeite. Jusiñamui iena jaca feitañeite —llote.

<sup>30</sup> —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini*

*(Mt 12.46-50; Lc 8.19-21)*

<sup>31</sup> Jesús comini naimie díne rillanona, naimie díga ñaiacanano jino naidaidimaci.

<sup>32</sup> Ie facaise ailluena comini naimie ecimo raídímaci. Naimie comini rillana naimaci cacajano, naimiemo llotimaci:

—O ei, o amatiai díga jino ite. O díga ñaiacade.

<sup>33</sup> Jesús dínená uai ote:

—¿Bu cue ei? ¿Bu cue amatiai?

<sup>34</sup> Naimie ecimo itinomo erodajanona, llote:

—Jadí, cue ei, cue amatiai.

<sup>35</sup> Jusiñamui jitaillacinona finodimie cue amana, cue miriñoña, cue eina. Imaci ua cue cominina.

## 4

*Jesúdi trigona judaidimiena llua rafue*

*(Mt 13.1-9; Lc 8.4-8)*

<sup>1</sup> Jiairuido jorai fuemo dane jaillanona, ailluena comini naimie díne ofillamona, Jesús naimacina llofujete. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci.

<sup>2</sup> Ailluena rafuena naimacina llofujete. Raite:

<sup>3</sup> —Omoi fueollena, bie rafuemo raise cacarei. Damie trigona judaiaide.

<sup>4</sup> Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

<sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

<sup>6</sup> raise jainañena jira, ecasillamona duide. Ie jira llisiñede.

<sup>7</sup> Eecuai illanomo jiaie iduai juide. Eecuai sicuamona riara eecuai ibaica. Ie jira llisiñede.

<sup>8</sup> Mare eniruemo jiaie iduai juide. Sicode. Llisillamona danademo treinta díga llisillana ote. Jainamona sesenta díga llisillana ote. Jainamona cien díga llisillana ote.

<sup>9</sup> Omoi jeforena jira, raise fueollena, cue lluamo cacarei. Iena ñno.



*Jesús ie como lloga rafuena llofuia rafue  
(Mt 13.10-23; Lc 8.9-15)*

<sup>10</sup> Ailluena cominimona jailla mei, naimie diga jaisoidinodi, ie doce llofueoicaigano diga, Jesúmo ie llofuiana jicanotimaci.

<sup>11</sup> Uai ote:

—Jusiñamuidi omoína ie sedaacana rafuena jai uiñotade. Jai ie iena uiñoñedomoi. Jai ie cominina iena nia uiñoñañede.

<sup>12</sup> Ie jira bie isoidicinodo naimacimo lloticue. Cue siño finoca rafuena ciotimaci; iadedi iena naimaci ñnoñena jira, uiñoño jaitimaci. Cue llofuiana jamai cacatimaci; iadedi naimaci ñnoñena jira, raise cacaiñeditimaci. Uiñoñeditimaci. Jusiñamui ñibeimo naimaci jaiacaiñena jira, Jusiñamui naimaci jecinona oni dotañeite. Iena feitañeite.

<sup>13</sup> Cue como llofuiacinona omoi raise cacaiñenia, dane cue llofuia, iena jiai raise ñibai cacaiñeitomoi;

<sup>14</sup> ia iena omoína llofueiticue. Trigona judaidimiedi Jusiñamui rafue lloraima isoide.

<sup>15</sup> Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacatimaci; ia Taife naimaci comeciaino cacaja uaina ñnotañede.

<sup>16</sup> Jai ie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaja, iena caimare feiñotimaci.

<sup>17</sup> Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci.

<sup>18</sup> Jai ie iduai eecuai illanomo juide. Naie iduai sicua mei, iena eecuai ibaila jira, raise lliñede. Dajerie comini comeciai naie illano isoidimaci. Jusiñamui uaina cacatimaci. ñnotimaci;

<sup>19</sup> iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaile rafuena finocana jaiñeditimaci.

<sup>20</sup> Jai ie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparina ñaia rafue  
(Lc 8.16-18)*

<sup>21</sup> Jorai fuedo Jesúdi cominina nia llofuate:

—Jai uneca lamparín jai ie illanomona atia mei, jai ie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade.

<sup>22</sup> Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñeditimaci.

<sup>23</sup> Omoi jeforena jira, raise fueollena, cue lluomo cacarei. Iena ñno.

<sup>24</sup> Cue lluomo raise cacarei. Omoi cacaja diese Jusiñamui omoína uiñoñaitaite.

<sup>25</sup> Iena omoi ñnoia, Jusiñamui omoína canoite. Omoína uiñoñocana jaitaite. Jai mie iena janore cacajamona, iena ñnoñenia, Jusiñamui naimiena faifitaite.

*Jesúdi Jusiñamui ie cominina sedaacana llofuia rafue*

<sup>26</sup> Jesús llote:

—Jusiñamui ñibeimo comini jailla rafuena nia lloiticue. Naimie ñibeimo comini jaillena, naimie rafue llocana jaidicue. Jai ie uaido iena omoimo lloiticue. Damie ie illimo judaiaide.

<sup>27</sup> Judaia mei, ie illimo nagarui ie maijicabilla isoi naimie jaide. Niese iduai denuana naimie raise uiñoñede;

<sup>28</sup> ia eniruemonana nano sicode. Monaila mei, lliside. Iemonana naicuai comuide.

<sup>29</sup> Jai einaia, iena ote. Ie isoide. Jusiñamui rafuena raise cacaiñedomoi; ia iena ñinocana jaidomoi.

*Jesúdi mostaza ido llua rafue*  
(Mt 13.31-35; Lc 13.18-19)

<sup>30</sup> Jesús jiaie rafuena llote:

—Jusiñamui ñibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>31</sup> Jiaie rafuedo iena omoimo lloiticue. Dame mostaza idona rillamona, naiemona eo aillue riarasicode. Mostaza ido eo janorede;

<sup>32</sup> iadedi sicua mei, eo aillue riarajaillamona, ie onogaillaie jegairiena jira, icairo anamo manaidinomo silliniñiaie jicaciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>33</sup> Naie isoide rafuiaido Jesúdi Jusiñamui ie cominina sedaacana rafuena cominimo llote.

<sup>34</sup> Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofuede.

*Jesúdi jorai baguana llucaitaja rafue*  
(Mt 8.23-27; Lc 8.22-25)

<sup>35</sup> Ailluena comini llofuia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

<sup>36</sup> Cominina faionocaida, botemo naimie jai illamona, naimie llua isoi, oni jaidimaci. Jiaie botes jiaie jaide.

<sup>37-38</sup> Bai jaillanona, jillacimo Jesús inide. Ie ifogi almohadamo biide. Ie facaise aifi eo riire bite. Joraide eo bagode. Baguamona, botemo jinui a uaide. Oruiacana jira, jacinailamona, Jesúna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

<sup>39</sup> Naimie casillano, aifina lletade. Jinui baguana llucaitade. Ieconia aifi llucaide. Bagoñede.

<sup>40</sup> Ie llofueoicaiganomo jicanote:

—¿Bue ñellena jacinaitomoi? ¿Niese cuena raise ñinoñedomoi?

<sup>41</sup> Uai oñeno eo rajicaidimaci. Coniniri ñaitimaci:

—Bimiedi ¿nie isoidimie? Aifi naimie uaina ñnote. Jorai naimie uaina jiaie ñnote. —Bai jaillanona, ruica ñine ridimaci.

## 5

*Jesúdi Gadara railla eniruemo illa rafue*  
(Mt 8.28-34; Lc 8.26-39)

<sup>1</sup> Ruica ñine naimaci ridemo, Gadara railla eniruemo sijidimaci.

<sup>2</sup> Botemona ari Jesús jaidemo, naimie ñine dame bite. Naimiedi Janaba anamo itimie.

<sup>3</sup> Comini raioillanomo nofie moto ifuaimo naimie i-isoide. Janaba anamo naimie illamona, comini ñiga marena jaca irainide.

<sup>4</sup> Diga icaiño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide.

<sup>5</sup> Nagarui nofie motomo ite. Anedumo jaisoide. Cuiricuirisoide. Dama ie abina nofici diga jaidode. Iese naimie isoide.

<sup>6</sup> Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate.

<sup>7-8</sup> Jesús llote:

—Janaba, bimiemona oni jai.

Janabadi imana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

<sup>9</sup> Jesús Janabamo jicanote:

—¿O mameci bu?

Uai ote:

—Aillosiedicai.

<sup>10</sup> Bie illanomona naimacina oretañellena Jesúmo duere jicanotimaci.

<sup>11</sup> Naie facaise nainomo ite anedumo ailluena chanchuai itimaci.

<sup>12</sup> Chanchuai abimo naimaci jaillena Jesúmo duere jicanotimaci.

<sup>13</sup> Jesús dinena:

—Jee —raite. Ieconí ima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconi jillacimo joraimo chanchuai aisiano corobaisidimaci.

<sup>14</sup> Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena.

<sup>15</sup> Jesús dine naimaci ridemo, jaive Janaba anamo illamiena Jesús ecimo raillana ciotimaci. Naimie iniroina jai jitade. Naimie jai uairicoñede. Iena ciuanona, Jesúna jaciruitimaci.

<sup>16</sup> Naie rafuena ciotino jaive Janaba anamo illamie jilluana llotimaci. Chanchuaimo suide rafuena jiai llotimaci.

<sup>17</sup> Naie enirue itinodi Jesúmo naimaci eniruemona oni jaillena duere jicanotimaci.

<sup>18</sup> Botemo Jesús jaiacania, jaive Janaba anamo illamie Jesúmo jicanote, naimie diga jaillena;

<sup>19</sup> ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

<sup>20</sup> Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajicaidimaci.

*Jesúdi mena duide riñona jillotaja rafue  
(Mt 9.18-26; Lc 8.40-56)*

<sup>21</sup> Ruica díbeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia,

<sup>22</sup> Jairona mameciredimiedi Jesús dine bite. Naimiedi judúuai rafue ofiraco sedarima. Jesúmo duere jicanollena, ana bitadate.

<sup>23</sup> Duere jicanote:

—Cue jisa jai fiodiacade. Cue jofomo cue diga bi, o onolli naiñaiñomo o jonellena, naiñaiño jilloillena.

<sup>24</sup> Iena cacajano, ie llofueoicaigano diga, naimie diga Jesús jaide. Ailluena comini Jesúmo ñajillanona jaidimaci.

<sup>25</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide.

<sup>26</sup> Diga manorainimona duere sefuide. Jilloñede; ia fodo jaide. Nana ie ucube jiai fuite.

<sup>27</sup> Jesús duidinona jilluana naiñaiño fidiamona, jinafo dinena billanona, naimie iniroina jetade.

<sup>28</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade.

<sup>29</sup> Ieconí diailladi fainonocaide. Ie abi jilluana naiñaiño jai uiñote.

<sup>30</sup> Ie abimona ie uai oni jaillana Jesús uiñuanona, dobaicaide. Cominimo jicánote:

—¿Bu cue iniroina jetade?

<sup>31</sup> Ie llofueoicaigano dinena uai otimaci:

—Ailluena comini o ecimo jaidimaci. Omo ñajidinona: “¿Bu cue iniroi jetade?” raitio.

<sup>32</sup> Raise uiñollena, Jesús ie ecimo itinomo erodate.

<sup>33</sup> Duidiñaiño ie jilluana uiñua jira, Jesús dine jacirucana bite. Naimie uicomo ana bitadajanona, nana naiñaiño ite rafuena llote.

<sup>34</sup> Naiñaiño Jesús llote:

—Ñoo, cuena o ñnua jira, jai jillodio. Mai marena o jai. O duicomona jai jillobidio.

<sup>35</sup> Naiñaiño diga Jesús nia ñaitemo, Jairo jofomona jiaino bite. Jairomo llote:

—O jisa jai fodaite. Maestrona ñaidoño.

<sup>36</sup> Iena cacajano, Jairomo Jesús llote:

—O comeci jarire iño; ia cuena nia ñno.

<sup>37</sup> Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama.

<sup>38</sup> Jairo jofomo rillanona, nainomo itino eecuinaillana cacade. Failliñaillana cacade.

<sup>39</sup> Jesús fo jailla mei, nainomo itinomo jicánote:

—¿Ñiese itomoi eecuinailla? Cuemona naiñaiño fioidañedesa. Jamai inide.

<sup>40</sup> Iena cacajano, naiñaiño jai fodaite uiñuamona, Jesús jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide.

<sup>41</sup> Naiñaiño onollina llinocaida, judíuai uaido raite:

—Talita, cumi. —Iena oni dobañuamona: “Jitaibici, mai naidacai” raite.

<sup>42</sup> Ieconí jilluanona naidacaide. Jai jilluano macarite. Naiñaiño doce años jai ite. Nana nainomo itino ieri eo raijicaidimaci.

<sup>43</sup> —Bumo bie rafuena lloño —naimacimo Jesús llote. Guillena naiñaiño ecajana jiai llote.

## 6

### *Nazaretmo Jesús illa rafue*

*(Mt 13.53-58; Lc 4.16-30)*

<sup>1</sup> Naie illanomona Jesús oni jailla mei, ie llofueoicaigano diga Nazaretmo ride.

<sup>2</sup> Rilla mei, sábadoruimo nainomo ite ofiracomo llofuate. Iena cacajanona, nainomo itino raijicaidimaci. Raitimaci:

—¿Ñiese eo abina uiñote? ¿Bumona ie uaina ote? ¿Ñiese siño rafuena naimiedi finode? Naimiedi jamai bue isoidimie.

<sup>3</sup> Naimiedi amederaima. María jito. Ie amatiaidi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

<sup>4</sup> Jesús naimacimo llote:

—Naga illanomo cominidi Jusiñamui facaina lloraima uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina inoñedomoi.

<sup>5</sup> Ie muidona nainomo siño rafuena eo finonide. Damierie duidinona jetajamona, naimacina jillotate;

<sup>6</sup> ia naimaci inoñenari rajicaide. Ie mei diga nairaimo Jesús llofuecana jaide.

*Jesúdi ie llofueoicaiganona oretaja rafue  
(Mt 13.53-58; Lc 4.16-30)*

<sup>7</sup> Ie doce llofueoicaiganona Jesús uaiduanona, naimacimo ie uai iñonocai, jananiai anamona cominina jilloitallena. Ie rafuena lollena, jiaie illanuaimo naimacina menamierie oretaiacade.

<sup>8</sup> Raite:

—Ailluena rana uiñeno. Omoi abi riidollena, jiguidana uiño. Llomenicon a uiñeno. Ailluena rana omoi uiñellena, bolsana uiñeno. Ucubena uiñeno.

<sup>9</sup> Zapatona jitajano jai. Abi omoi meidolle iniroina uiñeno.

<sup>10</sup> Nie nairaimo omoi jai, daacomo omoi ri. Naie nairaimo omoi ille dinori, daacomo omoi i.

<sup>11</sup> Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliammo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

<sup>12</sup> Jesús naimacimo llua mei, jaidimaci.

—Omoi jeacinona fañonocaillanona, Jusiñamui dibeimo omoi comeciai iuai meiduana omoi jai —llofuecana jaidimaci.

<sup>13</sup> Janaba anamo ite cominimona Janabana oredimaci. Duidino abimo farena gia mei, naimacina jillotate.

*Juan Bautista micori fiodailla rafue  
(Mt 14.1-12; Lc 9.7-9)*

<sup>14</sup> Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

<sup>15</sup> Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jai lloraima micori jai jillode.

<sup>16</sup> Jesúsna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

<sup>17-18</sup> Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

<sup>19</sup> Ie muidona Herodías dinena Juan Bautista micorina jearuite. Naimiena meinetaiacade;

<sup>20</sup> ia finonide, Juan Bautista micorina Herodes jaciruilla jira. Naimiedi Juan micorina mareuidimiena uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga

icaiño naimie micori lluana cacade. Iena gaide; ia iena raise cacaiñede. Ie muidona Herodías naimie micorina meinetanide;

<sup>21</sup> ia ja muidomo naiñaiño sedallirui ride. Herodes cumpleaños ie rafuena finode. Ailluena illaicomina ie rafuemo uaidote. Eo ucuberedinona jiai uaidote.

<sup>22</sup> Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue.

<sup>23</sup> Illaïma uai cuemo illa jira, iena ua finoiticue. Nie isoide rana o jitaia, omo iititcue. Cue anamo ite nairai o jicadiodena, atuedo omo iititcue.

<sup>24</sup> Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

<sup>25</sup> Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

<sup>26</sup> Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede.

<sup>27</sup> Ie facaise ie soldaduaïmona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade.

<sup>28</sup> Bandejamo naimie ifogi jonecaida, iena atiano, Herodías jisamo fecade. Ieconi ie eimo fecade.

<sup>29</sup> Iena fidianona, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaïna ecaja rafue*

*(Mt 14.13-21; Lc 9.10-17; Jn 6.1-14)*

<sup>30</sup> Jesús llofueoicaigano abido bia, Jesúmo nana naimaci finoca rafuena llotimaci.

<sup>31</sup> Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

<sup>32</sup> Ie muidona botedo comini iñenanomo dani jaidimaci.

<sup>33</sup> Ailluena comini naimaci oni jaillana cioidimaci. Naimacina uiñuamona, diga nairaïamona aisicana jaidimaci. Jesús nia riñenia, uicodo ie jaillanomo ridimaci.

<sup>34</sup> Jesús sijianona, ailluena cominina ciode. Naimacina sedallena bu iñena jira, toïca llaudaïaina sedaraïma iñena isoi, isoidimaci. Iena uiñuamona, Jesús naimacina duenante. Ailluena rafuena naimacina llofue.

<sup>35</sup> Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade.

<sup>36</sup> Comini mai abido oreta. Ianori ite nairaïaimo, ianori ite jofuemo naimaci guille ollena, bie cominina abido oreta.

<sup>37</sup> Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nïbai jitaïdio.

<sup>38</sup> Naimacimo jicanote:

—¿Nïga llomenico omoïmo ite? Mai jïbuisai.

Jïbuisailla mei, raitimaci:

—Cinco llomenico mena lliciaï diga.

<sup>39</sup> Iena cacajano, cominimo raitie illanomo dajerise ana raïllena Jesús llote.

<sup>40</sup> Naimaci cien digamierie ana raisite. Jiaïno cincuenta digamierie ana raisite.



<sup>41</sup> Naie cinco llomenicono, naie mena lliciai diga, Jesús uanona, mon-amo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade.

<sup>42</sup> Nana guillanona monidimaci.

<sup>43</sup> Monillamona, fiebide guillena iraidimaci. Doce cirigaiamo oruitatimaci.

<sup>44</sup> Cinco mil iñiaiai diese guitimaci. Naimaci ainiaiai, imaci uruiaiai diga, jiaiai guitimaci.

*Jesús jinui emododo macarilla rafue*

*(Mt 14.22-27; Jn 6.16-21)*

<sup>45</sup> Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote.

<sup>46</sup> Cominina facadua mei, aneduaimo dane jaide, Jusiñamui diga ñaillena.

<sup>47</sup> Jitibicaidemo, nainomo dama ite. Ie llofueoicaigano jorai motomo jaitimaci.

<sup>48</sup> Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide;

<sup>49</sup> ia naimiena naimaci ciuanona, comecina facadimaci: “¿Bu joreño caimo billana ciodicai?”

<sup>50</sup> Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoï joreñonicaiño. Cuesa. Jaciruiño.

<sup>51</sup> Botemo Jesús jaide. Ie facaise aifi llicaiide. Ieri eo rajicaidimaci.

<sup>52</sup> Janore guillemona ailluena cominina naimie ecajana jaive ciodicimaci; ia naimie uai siñonana nia raise uiñoñedimaci. Naimiena nia raise iñoñedimaci.

*Jesúdi duidinona Genesaret eniruemo jillotaja rafue*

*(Mr 14.34-36)*

<sup>53</sup> Ruica dine jaillanona, Genesaret railla eniruemo ridimaci. Nainomo sijidimaci.

<sup>54</sup> Botemona ari jaidemo, nainomo itino Jesúsna uiñotimaci.

<sup>55</sup> Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuuidimaci.

<sup>56</sup> Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

## 7

*Jesúdi comini comeciaina ñaia rafue*

*(Mt 15.1-20)*

<sup>1</sup> Naie facaise fariseuai cominidi Jesús dine bitimaci. Moisés micori llogacinona llofueraini Jerusalémoma jiaiai bitimaci.

<sup>2</sup> Jesús llofueoicaiganomona damerie naimaci isoi guiñenana ciodicimaci.

<sup>3-5</sup> Fariseuai dinena Jesúsno jicanotimaci:

—¿Bue ñellena omoï llofueoicaigano cai einamacï rafuedo jaiñedimaci? Naimaci guiacania, naimaci onollï cai einamacï llua isoi, raise jocoñedimaci. Ie jira cai abimo jeacino finodomoï.

Iese jicanotimaci, naimaci einamacï rafuedo naimaci jailla jira. Maraiñede rafue naimacimo suiñellena, iese ailluena judíuai jaidimaci. Naimaci guiacania, naimaci einamacï llua isoi, onollina diga icaiño jocuano, guitimaci. Mercadomona bia, naimaci einamacï llua isoi, abina lleredimaci. Naimaci

einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona marañede. Naimie caina duere finoite”. Jearede rafue naimaci abimo oñellena, iese finouidimaci.

<sup>6</sup> Jesús uai ote:

—Mareuidinona abi caitauidinodomoí. Isaías micorí jaie omoína raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci.

“Ona sedadicaí” llotimaci.

Jamai ñaitimaci. Naimaci comeciaí cue díbeimo raise iñede.

<sup>7</sup> Cue uai itena, jamai cominí llucanona naimaci llofuecabilla jira, tainona cuena sedadimaci cuete.

<sup>8</sup> Isaías micorí llua isoi itomoi. Jusiñamui llogacinona fañonocaida, omoi einamaci rafuedo jaidomoi.

<sup>9</sup> ¿Bue ñellena nana Jusiñamui llogacinodo jaiñedomoi? Omoi einamaci llogacinodo jaidomoi; iadedi nana Jusiñamui llogacinodo raise jaiñedomoi.

<sup>10</sup> Moisés micorí jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

<sup>11-12</sup> Iese Moisés micorí llote; iadedi omoi einamaci llotimaci: “Jusiñamuimo cai ucubena cai fecajamona, cai moona, cai eina jai canonidicaí”.

<sup>13</sup> Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoi. Bie isoide rafuedo jaca jaidomoi.

<sup>14</sup> Fariseuai diga iese llua mei, naimie ecimo ailluena cominí dane ofillanona, naimacimo llote:

—Iena raise omoi uiñollena, cue lluomo cacarei.

<sup>15</sup> Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoi. Omoi guillamona, omoi onollina jocuamona. Jusiñamuina nabaiñedomoi. Omoimo jeacino illa jira, Jusiñamuina nabaiñedomoi. Omoi comeciaí jearena jira, jeacinona finocabidomoi.

<sup>16</sup> Omoi jeforena jira, raise fueollena, cue lluomo cacarei. Iena ñno.

<sup>17</sup> Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie llua jicanotimaci.

<sup>18</sup> Uai ote:

—¿Ñiese cue llua jiai nia cacaiñedomoi? Ñie isoide ra guitomoina, omoi comeciaino jeare iñede.

<sup>19</sup> Omoi comeciaino jaiñede; ia omoi jebemo jaide. Ie mei omoi abiaimona jino bite.

Jesús llua mona, nana guille radi mare uiñoticaí.

<sup>20</sup> Jesús llote:

—Omoi comeciaí jearena jira, jearede rafuena finocabidomoi.

<sup>21</sup> Omoi comeciaí jearena jira, jeare comeciaina facacabidomoi. Omoi aiñede riño diga icabitomoi. Omoi iniñede ima diga icabitomoi. Firicabitomoi. Cominina meinecabitomoi.

<sup>22</sup> Jiai cominí rana nicidocabitomoi. Jearede rafuena finocabidomoi. Iena ebiruitomoi. Jifuericabidomoi. Abina uradoicabidomoi. Jiaie cominí joreña jeare ñaicabitomoi. Abina iedocabitomoi. Ebena jaicabidomoi.

<sup>23</sup> Bie isoidicinuai omoi comeciaino illa jira, jearede rafuena finocabidomoi; iadedi omoi einamaci llua isoi, omoi onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue  
(Mt 15.21-28)*

<sup>24</sup> Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jitaiñede; ia iena janonide.

<sup>25-26</sup> Ie facaise judío iñaiñoñediñaiño ñaño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidiana, naimie ñine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade.

<sup>27</sup> Judíuaiñedinona naimie canoñenana naiñaiño uiñollena, naiñaiñoño Jesús llote:

—Uruiai guillamona jiconiaina ecadicaidena, maraiñede. Uruiai nano ecadicai.

<sup>28</sup> Naiñaiño ñinena uai ote:

—Jii, maestro; iadedi jiconiadi uruai guillamona fiebide guillemona guitimaci. —Iese llote; ia jiaie rafuemo começina facade. Uruiaina llote; iadedi judíuaimo começina facade. Jiconiaina llote; ia judíuaiñedinomo jiai começina facade. Começina facade: “O cominimo o rafue duide; ia cai Namana o illa jira, ñibai o rafue caimo janore duide”.

<sup>29</sup> Jesús uai ote:

—Raise llotio. O jofomo mai abido jai. O jisamona Janaba oni jaide.

<sup>30</sup> Naimie llua isoi jofomo jaide. Ie jisa biramo bidenena cide. Janaba naiñaiñoñomona oni jaillana jai uiñote.

*Jesús jefona cacaiñediñiñena jillotaja rafue*

<sup>31</sup> Tiro railla eniruemonona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride.

<sup>32</sup> Iena fidiano, naimie ñine comini jefona cacaiñediñiñena atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci.

<sup>33</sup> Ailluena comini naimie ñine jai billa jira, jefona cacaiñediñiñena eneno oni uite. Nagafebe jefomo onocai ñuitade. Ie onocaimo tuajanona, iima iifena jetade.

<sup>34</sup> Jusiñamui ñine monamo eruaita, naimiena duenailamona, jafaicina faite. Judíuai uaido naimiemo llote:

—¡Efata! —Oni dobaiñuamona: “¡Ecorica!” raite.

<sup>35</sup> Ieconi ie jefodi ecoricaide. Jai raise cacade. Jai raise ñaite.

<sup>36</sup> Cominimo:

—Bimie jai jilluana bummo lloñoño —Jesús ñiga icaiño llote; ia naimie uaina iñoñediñimaci. Iena llocana uitimaci.

<sup>37</sup> Naimieri eo rajicadimaci. Coninina naimiena raitimaci:

—Naga rafuena raise finode. Jefona cacaiñediñiñena jai jillotate. Gogonaitimiena jai jillotate.

## 8

*Jesúdi cuatro mil iñiñiñena ecaja rafue  
(Mt 15.32-39)*

<sup>1</sup> Naie facaise naimie ñine ailluena comini illanona, naimaci guille jai iñena jira, Jesús ie llofueoicaigano naimie ñine uaidote. Raite:

<sup>2-3</sup> —Bie comini darui amani bene cue ñiga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue,

naisomo naimaci bai raillano. Naimacina cue duenaila jira, naimacina canoiacaducue.

<sup>4</sup> Jicanotimaci:

—¿Niese naimacina bene ecaiticai? Jofue iñenanomo iticai.

<sup>5</sup> Jesús jicanote:

—¿Niga llomenico omoimo ite?

Uai otimaci:

—Siete.

<sup>6</sup> Comini ana raillena Jesús llote. Naie llomeniconu uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci.

<sup>7</sup> Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote.

<sup>8</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

<sup>9</sup> Nainomo cuatro mil iñiai guitimaci. Naimaci ainiai, imaci uruiai diga, jiai guitimaci.

<sup>10</sup> Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

*Fariseuai comini Jesúmo siño rafuena finuana jicanuano billa rafuena (Mt 16.1-4; Lc 12.54-56)*

<sup>11</sup> Dajerie fariseuai comini Jesús dine bitimaci. Naimie uaina uaitaia-cadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>12</sup> Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

<sup>13</sup> Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

*Jesús siritate rana llofui rafue (Mt 16.5-12)*

<sup>14</sup> Ruica dine rilla mei, Jesús llofueoicaigano llomeniconu feillana uibiñotimaci. Naimacimo daje llomenico ite.

<sup>15</sup> Iena naimie uiñuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacinomona abi rairuil-lena ñaite.

<sup>16</sup> Jesús iese llua jira, iena naimaci raise cacaiñena jira, dani coniniri siadotimaci:

—Llomeniconu cai atiñena jira, caimo iese llote.

<sup>17</sup> Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuena ñinoñedomoi? Cuemo siño uai illana nia raise cacaiñedomoi.

<sup>18</sup> Uisiredomoi. Jeforedomoi. ¿Niese cue navui siño finoca rafuemo comeciaina facañedomoi?

<sup>19</sup> Navui cinco mil iñiai cinco diga llomeniconu guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

<sup>20</sup> Jesús llote:

—Jiaicaiño cuatro mil iñia siete diga llomenicono guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

<sup>21</sup> Jesús dinena jicanote:

—¿Niese cuena nia raise iñoñedomoi? Siño uai cuemo illana nia raise iñoñedomoi.

### *Jesús uisnidimiena jillotaja rafue*

<sup>22</sup> Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúmo jicanote.

<sup>23</sup> Iena Jesús cacajanona, ie onollina llinuanona, nairai illa jinofemo uisnidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

<sup>24</sup> A eruaillanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

<sup>25</sup> Ie uisina Jesús dane jetade. Iemona oni erocaillamona, jai jillode. Jai raise ciode.

<sup>26</sup> Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñoeno; ia nainomo jaiñoeno o jofomo mai abido jai.

### *Pedro Jesúna llua rafue*

*(Mt 16.13-20; Lc 9.18-21)*

<sup>27</sup> Cesarea Filipo eniruemo ite nairaiamo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>28</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaiete ite llorainimona damie jai jillode. Imiedio”.

<sup>29</sup> Jesús dane jicanote:

—¿Niese omoi cuena raitomoi?

Pedro uai ote:

—Odi cai jilloitaramadio. Jusiñamui facaina lloraini micoriai o billena jaiete llotimaci

<sup>30</sup> Jesús iena bummo llua rairuide.

### *Jesús ie fodaillena llofua rafue*

*(Mt 16.21-28; Lc 9.22-27)*

<sup>31</sup> Ie facaise ie llofueoicaiganona ie duere sefuillena llofuate. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fodaillamona jilloiticue.

<sup>32</sup> Iena marefodo naimacimo llote. Iena cacajano, Pedro dinena lletade:

—Dama ite. Iese lloñoeno. Bie isoide rafuena lloñoeno.

<sup>33</sup> Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñoeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

<sup>34</sup> Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitailla rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite.

<sup>35-37</sup> Duere sefuillana jaciruillamona, cue cominina bu jaiacaiñena, ja muidomo faifite; iadedi duere sefuillana jaciruiñenamona, cue cominina bu jaia, jaca faifiñeite. Cue cominina bu jaiñena, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite.

<sup>38</sup> Birui ite comini Jusiñamuina jitañedimaci. Naimiena jai fañonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñena, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biiticue. Cue Moo uai cuemo illanona, ebire biiticue.

## 9

<sup>1</sup> Omoimo uanaicinona lloticue. Omoimona dajerie nia fioidañeitomoimo, illaimana ebire cue bairellena cioitomoio.

*Jesús abi meidocaila rafue  
(Mt 17.1-13; Lc 9.28-36)*

<sup>2</sup> Seis digaruji illanona, anedumo comini iñenanomo Jesús jaide. Naimie diga jaillena, Pedrona uite. Jacobo jiaí uite. Juan jiaí uite. Jiaie llofueoicaiganona uñede. Nainomo rilla mei, naimaci uicomo naimie abi meidocaide.

<sup>3</sup> Naie dacaiño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede.

<sup>4</sup> Naie facaise naimacimo Moisés micori joreño, Elías diga, bairede. Elíadi Jusiñamui facaina jaie lloraíma. Jesús diga ñaitiaímaiaí.

<sup>5</sup> Iaímaiaí jaiacania, Pedro Jesúsimo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

<sup>6</sup> Eo jaciruilla jira, naimie ñaia rafuena raise uñeñoño jamai ebena ñaite.

<sup>7</sup> Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie llamo cacareillanona, iena ñno —llote.

<sup>8</sup> Ieconi oni erodajanona, dama Jesúsna cioidimaci. Jiaínona cioñedimaci.

<sup>9</sup> Anedumona bitimacimo, naimacimo Jesús llote:

—Omoí ailli ciua rafuena bumo lloñoño, cue fioidaillamona cue jillua dinori.

<sup>10</sup> Jesús llua isoi finodimaci. Iena bumo lloñedimaci; ia fioidaillamona naimie jilluana naimaci raise nia cacaiñena jira, iemo comecina facadimaci.

<sup>11</sup> Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraíma biite” raitimaci. Jusiñamuimona o billana ñnoticaí. Odi cai Jilloitaraímana ñnoticaí. Odi cai Jilloitaraímadíomo, ¿bue ñelli iese raitimaci?

<sup>12</sup> Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lollena. Jusiñamui dibeimo naimaci illena, comini imaci comeciái meiduana llote. Jusiñamui facaina lloraíni micoriaí cue eo duere sefuillena cuetimaci. Comini cue jeare finollena cuetimaci. Iemo omoí comeciaina jiaí faca.

<sup>13</sup> Elías isoidimie jai bite; iadedi Jusiñamui facaina lloraíma micori jaie cuega isoi, naimaci jitailla jira, naimiena jai meinetimaci.

*Jesúdi Janaba anamo itimiena jillotaja rafue  
(Mt 17.14-21; Lc 9.37-43)*



14 Ie jiaie llofueoicaigano dine Jesús abido ria, nainomo ailluena comini itimacimo ride. Moisés micori llogacinona llofueraini dinena ie llofueoicaigano uaina uaitaside.

15 Jesús billana comini cüanona, jacinaisidimaci. Naimiena feiñollena, naimie dine aisida jaidimaci.

16 Moisés micori llogacinona llofuerainimo Jesús jicanote:

—¿Ñiese cue llofueoicaigano uaina uaitatomo?

17 Uai oñedimaci; ia cominimona damie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona ñainide.

18 Nagarui Janaba bille diese, naimiena eniruemo uaitate. Iemona fueði mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micori llogacinona llofueraini bie rafuena, o llofueoicaigano diga, uaina uaitatimaci.

19 Iena cacajanona, Jesús ie llofueoicaiganomo llote:

—Cue uai siñonana nia ñinoñedomoi. Omoi diga are iticue. Raise omoi ñinollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

20 Naie urue Jesús dine atianona, Janaba naimiena naillitate. Iemona urue eniruemo uaide. Jabi-jabide. Fue mullede.

21 Jesús dinena naie urue moomo jicanote:

—¿Ñie dinori o jitodi bie isoi ite?

Uai ote:

—Naimie uruenamona.

22 Janabadi, diga icaiño iraimo usillena, naimiena uaitate. Corobaillena, diga icaiño jinuimo jiai uaitate. Janaba oni o oretarenia, cocona duenaillamona, cocona cano.

23 Jesús uai ote:

—“O oretarenia” raitio. Ero, o jito jillotaredicue. Cuen a o ñinoia, o jito jilloite.

24 Naie urue moo ieconi llote:

—Ona ñinoticue. Raise nia cue ñinoñenia, cuena raise ñinota.

25 Naie facaise ailluena comini naimie dine raire ofillana naimie cüanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie dine dane biñeno.

26 Ado cuirioillanona, naimiena eo raire naillitajanona, Janaba oni jaide. Iemona naie urue fiodaitimie isoi ero caide. Naimiena cüanona, nainomo itino raitimaci:

—Naimie jai fiodaite;

27 —ia Jesús naimie onollina llinocaida, naimiena a naidanete.

28 Iemona oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñellena Janabana oni oretanidicai?

29 Jesús uai ote:

—Jusiñamuimo omoi jñamona, naimiena raise omoi ñnuamona, bie isoide Janabana oretaredomoi. Naimiena omoi raise ñinoñena jira, bie uruemon a Janabana oni oretañedomoi.

*Jesús ie fiodaillena dane llofuia rafue  
(Mt 17.22-23; Lc 9.43-45)*

30-31 Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

32 Ie llofueoicaigano iena raise cacaiñedimaci; ia naimiemo iena jicauana meirutimaci.

*Jesús ie llofueoicaigano moto imiēna ille rafue*

*(Mt 18.1-5; Lc 9.46-48)*

33 Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

34 Uai oñedimaci. Naimaci moto imiēna illena, naisodo siadocana bitimaci. Meiruillanona, uai oñedimaci.

35 Naimie ana rainadaja mei, ie ecimo naimacina uaidote. Raite:

—Omoi moto imiēna bu iacania, jamai bue isoidimiēna naimie illa. Omoi muillaimana naimie jailla isoilla.

36 Iena naimaci raise uiñollena, nainomo ite cominimona daje urue bai jainanocaida, naimaci motomo naimiēna jonete. Naimiēna menioita, naimacimo llote:

37 —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiēna feiñotimiedi cuena jai feiñote. Cuena feiñotimie Jusiñamuina jia jai feiñote, Jusiñamui cuena oretaja jira.

*Jesúdi ie dibeimo itinona llua rafue*

*(Mt 10.42; Lc 9.49-50)*

38 Naie facaise ie llofueoicaiganomona Jesús Juan llote:

—Maestro, o mamecido jananiaina oretacabitimiēna ciodicai. Cai diga naimie jaicabiñena jira, iena finuana rairuidicai.

39 Jesús uai ote:

—Naimiēna rairuiñeno. Cue mamecido siño rafuena bu finoia, cuena jeare raire ñaiñeite.

40 Cai dibeimo itimiedi cai facaisena ite.

41 Ero, cuemo omoi duillamona, omoi na bu janore canoia, Jusiñamuimona ibana feiñoite. Omoi mo nibai jamai jinuina fecaite; iadedi omoi na naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

*Jesúdi jeacinona finoñenana llofua rafue*

*(Mt 18.6-9; Lc 17.1-2)*

42 Jesús nia llofuate:

—Cuena como inotinona jeacinona finotaiacadimie iena finoñellena, naimie cimaimo aillue nofici maianona, joraimo corobaillena naimiēna dotacadena, mare.

43-48 Biena ñaiticue. Nie isoide rafue omoi na jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino

finoño. Naimacimo ite aiaí fioidañena jira, naie irai jaca duiñenamona, nainomo itino jaca duere sefuitimaci.

<sup>49</sup> 'Ero, birui omoi duere sefuillamona, cue cominina jai jaidinona uiñoiticue.

<sup>50</sup> Guille caimaretallena, sal mare; iadedi ie caimano jai iñenia, iena dane caimaretañedicaí. Ie isoide. Jeacino omoi finoia, omoi comeciaí caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

## 10

*Jesús iima ie aina dotaja rafuena llofua rafue  
(Mt 19.1-12; Lc 16.18)*

<sup>1</sup> Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica díbeimo jaide. Ailluena comini naimie dine ofillamona, naimie llofueuilla isoi, naimacina llofue.

<sup>2</sup> Naimiena facacillena, dajerie fariseuaí naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

<sup>3</sup> Uai ote:

—¿Ñiese Moisés micorí llote?

<sup>4</sup> Uai otimaci:

—Moisés micorí jaie cuete: “Iima ie aina dotaacania, dotalle rabena nano cueite. Ie mei naiñaiñoña dotaite”.

<sup>5</sup> Jesús uai ote:

—Jusiñamui uaina raise omoi iñoña jira, Moisés micorí iima ie aina dotajana rairuiñede;

<sup>6</sup> iadedi nano dofoconi iese iñede. Enirue finua facaiseconi Jusiñamuidi come iaiaiaína finode. Imana finode. Riñoña jiaí finode.

<sup>7</sup> Ie jira Jusiñamuidi jaie llote: “Ie ai diga illena, iima ie moonocaite. Ie eina jiaí faionocaite. Ie ai diga illamona, menade comedi daamiena jai jaide” llote.

<sup>8</sup> Menade come jai daamiena jai ite.

<sup>9</sup> Jusiñamui iese iaiaiaína itataja jira, iima ie aina dotajana rairuidicue. Riño ie inina dotajana rairuidicue.

<sup>10</sup> Jofomo ie llofueoicaigano diga, naimie nailli illanona, naimiemo bie rafuena jicanotimaci.

<sup>11</sup> Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiaí finode.

<sup>12</sup> Ie inina faionocaillanona, jiaimiena nie riño uamona, naiñaiño jeacino jai finode.

*Jesúdi naimie dine uruiaí billana jitailla rafue  
(Mt 19.13-15; Lc 18.15-17)*

<sup>13</sup> Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci;

<sup>14</sup> iadedi iena cacajano, Jesús icirite. Jesús raite:

—Uruiaí cue dine billesa. Naimacina rairuiño. Cuena bie isoi iñotínodi Jusiñamui cominidimaci.

<sup>15</sup> Bie uruiaí abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

<sup>16</sup> Naie uruiaí dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

*Ucuberedimie Jesús diga ñaia rafue  
(Mt 19.16-30; Lc 18.18-30)*

<sup>17</sup> Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremedio. Jusiñamui diga ico cue jaca illena, ¿buena finoiticue?

<sup>18</sup> Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano.

<sup>19</sup> Moisés micori llogacinuaina inocana jai. Jaie cuete: “Comena meineño. O aiñede riño diga iñeno. Fñño. Jiaimiena o llogidoia, tainona lloño. O moo uaina ino. O ei uaina ino”.

<sup>20</sup> Uai ote:

—Maestro, uruena cue illa facaisemona nana bie llogacinuaina inotícue.

<sup>21</sup> Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacínodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o inuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide.

<sup>23</sup> Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

<sup>24</sup> Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite.

<sup>25</sup> Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

<sup>26</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Ñese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

<sup>27</sup> Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro dinena llote:

—O llua isoi jai finodicaí. Nana cai rana faínonocaida, o diga jai jaicabidicaí.

<sup>29</sup> Jesús uai ote:

—Uanaicino lloiticue. Cuena naimie isiruillamona, cue rafuena naimie llumona, ie jofona bu faínonocaia, ie amatiaina bu faínonocaia, ie miriñuaina bu faínonocaia, ie moonu bu faínonocaia, ie eina bu faínonocaia, ie uruiaina bu faínonocaia, ie eniruena bu faínonocaia,

<sup>30</sup> Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuái, ie eitíai, ie uruiaí, ie enirue birui iite. Monamo naimie ico caimare iocire jaca iite.

31 Birui damieriemo ailluena ra illamona, Jusiñamuimo eo começina fa-cañedimaci. Naimacimona jamai bue isoiñedimaci; ia Jusiñamuimona ico jamai bue isoitimaci Jiaïnomo ailluena ra birui iñede; ia Jusiñamuimo começina facadimaci. Naimacimona jamai bue isoidimaci; ia Jusiñamuimona ico jamai bue isoiñeitimaci.

*Jesús ie fiodaillena dane llua rafue*

*(Mt 20.17-19; Lc 18.31-34)*

32 Jerusalémo nia jaillanona, Jesús uicodo jaide. Nainomo naimie jaciruiñeno jaillamona, ie llofueoicaigano rajjicaidimaci. Naimaci diga jaidino jaciruiñeicaida jaidimaci. Naimacina jiaï meiniana jaciruitimaci. Ie llofueoicaigano diga ñaianona, naimiemo suille rafuena llote:

33 —Ero, Jerusalémo jai jaidicaï. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Judíuainedino illaicominimo cuena fecaitimaci.

34 Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue — llote.

*Jesús dine Jacobo Juan iaïmaiaï billa rafue*

*(Mt 20.20-28)*

35 Naie facaise Jesús dine Jacobo, Juan diga bitiaïmaiaï. Iaïmaiaï moodi Zebedeo. Raitiaïmaiaï:

—Omo coco jicalle rafue cocoena finuana jitaïdicoco.

36 Jesús uai ote:

—¿Nie isoide rafuena jitaïdomico?

37 Uai otiaïmaiaï:

—Illaïmana o jailla mei, o ecimo coco illena o llua jitaïdicoco. Damie o nabeimo. Jiaïmie o jarifebeimo. —Jiaïno afemo iaïmaiaï illena, iese llotiaïmaiaï.

38 Jesús ñinena llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Je isoi duere sefuiacadomico? ¿Je isoi llegi cacaiacadomico?

39 Uai otiaïmaiaï:

—Jii. Sefuiacadomico.

Jesús ñinena raite:

—Cue isoi duere sefuitomico. Llegi cacaitomico;

40 iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

41 Iena jiaïe llofueoicaigano cacajano, naie iaïmaiaïri iciritimaci.

42 Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci;

43 iadedi omoi ñine iese iñena. Omoïmona bu imiëna iacania, omoi mullaïmana naimie jaisoïllasa.

44 Omoïmona bu imiëna iacania, omoïna naimie canocana jaisoïllasa.

45 Cuemona fueo. Biñedicue, cominina cue ocuillena; iadedi cominina canuaïbidicue. Cue jitailla jira, nana comini facaina fiodaisaïbiticue. Naimaci jeacimona naimaci jillobillena, fiodaisaïbiticue. Ailluena comini cuena ñnuamona, jilloitimaci. Coninina omoi canua —llote.

*Jesúdi Bartimeona jillotaja rafue*

*(Mt 20.29-34; Lc 18.35-43)*

46 Oni jaillanona, Jericó railla nairaïmo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie

facaise nai fuemo uisnidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena.

<sup>47</sup> Nazaret ie Jesús jaillana naimie cacajano, ado cuirioide:

—David micori Jitona o illamona, Jusiñamuimona o billa jira, cuena duenai. Cueno cano.

<sup>48</sup> Naimie llucallena, Jesús diga jaidino naimiena lletade; iadedi eo cuirioide:

—Maestro, David micori Jitona o illamona, cuena duenai.

<sup>49</sup> Naimiena cacajano, Jesús naidadajanona, llote:

—Naimiena cue dine uaido.

Bartimeona uaiduanona, raitimaci:

—O começina ocuiño. Mai naidacai. Jesús ona uaidote.

<sup>50</sup> Iena cacajano, ie emodomo itiroina duiñuanona, raire naidacaida, Jesús dine bite.

<sup>51</sup> Naimiemo Jesús jicanote:

—¿Ñiese ona cue nibaiana jitaideo?

Uai ote:

—Maestro, cioacadie.

<sup>52</sup> Jesús dinena uai ote:

—Cueno o ñnua jira, jai jillodio. Mai jai. —Iecon naimie jai ciode. Jesús diga jaidino diga naimie jiai jaide.

## 11

*Jesús illaima isoi Jerusalémo jailla rafue  
(Mt 21.1-11; Lc 19.28-40; Jn 12.12-19)*

<sup>1</sup> Oni jaillanona, Jerusalémo iaieicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaimaiai ite. Ie llofueoicaiganomona Jesús menamiena orede.

<sup>2</sup> Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati.

<sup>3</sup> Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaite llote”.

<sup>4</sup> Naimie llua isoi, jaidiaimaiai. Naisomo jofo nasemo burritona bailanona, iena suiñodiaimaiai.

<sup>5</sup> Ie facaise nainomo itino jicanote:

—¿Bue ñellena burritona suiñodomico?

<sup>6</sup> Jesús llua isoi uai otiaimaiai. Ie muidona:

—Jee —raitimaci.

<sup>7</sup> Burritona atidiaimaiai. Ie emodomo naimie llofueoicaigano naimaci ñiroi jobianona, ie emodomo Jesús rainadate.

<sup>8</sup> Naimiena iobitallena, illaima isoi naimie jaillena, diga comini, imaci ñiroi diga, naiso motomo jobedimaci. Jiaino nai fuemona raforona uanona, naiso motomo jobedimaci.

<sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! Jusiñamui mamecido bitimie eo mare.

<sup>10</sup> Cai illaima David micori ifomo caina sedallena, damie billemo birui ocuiridicai. Jusiñamui caina jilloitajasa.



<sup>11</sup> Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaiide. Jitoma ana illa jira, ie doce llofueoicaigano diga, Betaniamona inillena jaide.

*Jesús higuera railla riarana faidua rafue*

*(Mt 21.18-19)*

<sup>12</sup> Ie areruido Betaniamona Jerusalémo abido ie llofueoicaigano diga Jesús bia, aimetaite.

<sup>13</sup> Arena higuera railla riarana cianona, iena jibuide. Como firuide; ia naie llisilladi ñede. Ie llisilla facaise nia ñede.

<sup>14</sup> Ie jira naie riarana llote:

—Biemona jaca llisiñeite. —Ie llofueoicaigano naimie lluana cacadimaci.

*Jesúdi Jusiñamui jofomona damieriena dotaja rafue*

*(Mt 21.12-17; Lc 19.45-48; Jn 2.13-22)*

<sup>15</sup> Jerusalémo Jesús rilla mei, Jusiñamui jofomo naimie jaide. Naie jofo eo ail-lue. Diga cuartos nainomo ite. Jusiñamuimo ofomaiana fecallena, naimiemo toica llaudaiana fecallena, nainomo comini jaisoidimaci. Naie cominina ibatajanona, ofomaiana, toica llaudaia diga, damierie fecauidimaci. Iena Jesús cianona, naimaci mesaiana oni caicode. Ucugina fecauidino rairacuai jia oni caicode.

<sup>16</sup> Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide.

<sup>17</sup> Naimacina llofueite:

—Ie facaina lloraima micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>18</sup> Judíuai illaicomini naimie finoca rafuena fidianona, naimiena meinel-lena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judíuai illaicomini naimiena jaciruillanona, naimiena nia meinenidimaci.

<sup>19</sup> Nairui navuida ie llofueoicaigano diga, Jerusalémona Jesús oni jaide.

*Jesús faidoca riaru duilla rafue*

*(Mt 21.20-22)*

<sup>20</sup> Ie are ie llofueoicaigano diga, Jerusalén dine Jesús jaillanona, higuera railla riaru duillana ciodimaci. Nana ie jainao diga duillana ciodimaci.

<sup>21</sup> Jesús navui are lluana Pedro uibiñuanona, naimiemo llote:

—Maestro, ero. O faidoca higuera jai duide.

<sup>22</sup> Jesús uai ote:

—Jusiñamuina ñnocana jai.

<sup>23</sup> Uanaicinona omoimo lloiticue. Jusiñamui lluana raise bu ñnoia, naimie comece igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite.

<sup>24</sup> Nie isoide rafue Jusiñamuimo omoi jicajia, naimie iena finuana omoi ñnuamona, iena naimie finoite.

<sup>25</sup> Jusiñamuimo o jiacania, jaimie diga o rafue ia iena feita. Ie isoi cai Moo Jusiñamui omoimo ite jeacino jia feitaite;

<sup>26</sup> Iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

*Jesúdi ie siño uaina lua rafue*

*(Mt 21.23-27; Lc 20.1-8)*

<sup>27</sup> Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca

ñairaini. Naimacidi Moisés micori llogacino llofueraini. Naimacidi einamaci. Diese billanona,

<sup>28</sup> jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

<sup>29</sup> Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

<sup>30</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

<sup>31</sup> Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llwana ñnoñedomoi?”

<sup>32</sup> “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

<sup>33</sup> Ie jira fairiotimaci:

—Uiñoñedical.

Jesús dinena raite:

—Ie muidona cuemo nie isoide uai illana omoimo lloñeiticue.

## 12

*Jesúdi marañede majiraini rafuena llua rafue*

*(Mt 21.33-46; Lc 20.9-19)*

<sup>1</sup> Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiaruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jiaimomo fecade. Ie mei jiaie eniruemo jaide.

<sup>2</sup> Uvas jai einalla facaise riaraiaina sedaraini dine naie patrón ie mullaimana orede, naie illimona dajerie riara llisilla ollena;

<sup>3</sup> iadedi naie sedarainidi ie mullaimana fatimaci. Ie mei naimiemo riara fecañoena naimiema abido oredimaci.

<sup>4</sup> Ie mei patrón jiaie mullaimana orede. Naimie ifogina bofedimaci. Naimiema jeare finodimaci.

<sup>5</sup> Ie mei patrón jiaimema orede. Naimiema meinetimaci. Ie mei ailluena mullaiana orede. Damieriena fatimaci. Damieriena meinetimaci.

<sup>6</sup> Patrómo ie isiruiga jito ite. “Cue jitona jaciruitimaci. Naimie uaina ñnoitimaci. Naimiema oretaiticue” patrón comequina facade.

<sup>7</sup> Riaraiaina sedaraini naimiema ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci.

<sup>8</sup> Naimaci dine naimie rilla mei, naimiema meinetimaci. Ie mei ie abina illimona jino dotadimaci.

<sup>9</sup> Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jiaimona ie illina sedataite.

<sup>10-11</sup> Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie ciegafuena raise facañedomoi. Naimie micori ciega:

Jofu finoraini jitañena noficidi nana naie jofomo ite nofici baifemo jai uaide. Jusiñamui iena finotate.

Iena cai uiñuamona: “Eo mare” raiticai ciega. Jusiñamui cominina damierie jaillana naimie micori cuete. Jusiñamui oretagamiena damierie jitañenamona, naimie cominina jaiñeitimaci; iadedi

Jusiñamui oretagamiena ailluena ñnuamona, naimie cominina jaitimaci. Ero, Jusiñamui facaina lloraima micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

<sup>12</sup> Judíuai illaicomini iena cacajanona, Jesús naimacina ñaiana naimaci uiñuamona, naimiena gaitaacadimaci; ia cominina jaciruitimaci. Ie jira naimiemona oni jaidimaci.

*Jesúmo gobiernomo ucubena fecajana jicanua rafue*

*(Mt 22.15-22; Lc 20.20-26)*

<sup>13</sup> Judíuai illaicomini jailla mei, dajerie fariseuai cominina Jesús dine oredimaci. Illaíma Herodes dibeimo itinona oredimaci. Naimie raise uai oñenia, naimiena duere finollena, Jesúsna facaciacadimaci.

<sup>14-15</sup> Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jailana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoi? Ucube cuemo acata.

<sup>16</sup> Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

<sup>17</sup> Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaana cacajano, naimie raise uai ua jira, ieri rajicadimaci. Naimie iese llua jira, naimiena duere finonidimaci.

*Jesús dine saduceuai railla comini billa rafue*

*(Mt 22.23-33; Lc 20.27-40)*

<sup>18</sup> Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo llotimaci:

<sup>19</sup> —Maestro, cai facaina Moisés micori jaie cuega: “Tima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

<sup>20</sup> Bie rafuena uiñoiacadicaí. Siete amatiai ite. Nano doforamie ie aina ote. Naimie nia uruiainide fiodailla.

<sup>21</sup> Ie emodo imie ie ama feciñona ote. Naimie uruiainide jiai fiodailla. Naie siete digamiedemona iese sefuide.

<sup>22</sup> Uruiaínide nana fiodailla. Ja muidomo naie riño jiai fiodaite.

<sup>23</sup> Fiodaillamona, ico naimaci jilloiadedi, ¿bu naie riño ienite? Naiñaiño siete digamienna ñniredede —llotimaci.

<sup>24</sup> Jesús uai ote:

—Moisés micori cuegafuiaína raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

<sup>25</sup> Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiai iitimaci.

<sup>26</sup> Fiodaitino ico jilloillena omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

<sup>27</sup> Jai fioidaitimaci; ia naimaci joreñuái nia itimaci. Jusiñamuidi dani cagedino imaci Jusiñamuina jira, naimaci joreñuái naimie dine itimaci. Ico naimaci abiaína jiaí jillotaite. Fiodaillamona jilluana omoi raise uiñoñedomoi —llote.

*Jesús nanoca llogacinona llofuia rafue*

*(Mt 22.34-40)*

<sup>28</sup> Naie facaise Moisés micorí llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micorí jaie llogacinuaimona, ¿nie llogacino ua nanoca llogacinona?

<sup>29</sup> Jesús dinena uai ote:

—Moisés micorí jaie cuela: “Israel comini, bie rafuemo cacarei. Cai Nama Jusiñamui jaca dajede.

<sup>30</sup> Omoi jitailla jira, nana omoi comeciái diga, cai Nama Jusiñamuina isirui. Naimiemo omoi comeciái na eo faca”.

<sup>31</sup> Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiaí isirui”. Bie mena llogacino jiaie llogacinuái baifemo faite.

<sup>32</sup> Naie llofueraíma dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede.

<sup>33</sup> Cai jitailla jira, nana cai comeciái diga naimiema cai isiruía, naimiemo cai comeciái na eo facaía, cai abina cai isiruilla isoi cai ecimo itinona cai isiruía, Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

<sup>34</sup> Naimie raise uai ua jira, naimiemo Jesús llote:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiema facaciaibiñede.

*Jesús dinena fariseuái cominimo jicanua rafue*

*(Mt 22.41-46; Lc 20.41-44)*

<sup>35</sup> Jusiñamui jofomo Jesús jailla mei, nainomo itinomo jicanote:

—¿Niese Moisés micorí llogacinona llofueraíni Cristona raitimaci? ¿Niese naimiedi David micorí jítóna raitimaci?

<sup>36</sup> Jusiñamui Joreñodí David micorína ñaitatajanona, David micorí llote: Jusiñamuidi cue Namamo llote: “Illaímana o illamona, cue nabei dine ana raí. Ona inoñedino o anamo itataitícue”.

<sup>37</sup> “Cristodí cue Nama” David micorí raite. Iese naimie micorí railla jira, Cristo David micorí afemo faite. Naimiedi jamai David micorí jitoñede; ia jiaí ie Nama. —Nainomo itino naimie llofuiana iocire cacareidimaci.

*Jesúdi judíuái illaícominina ñaía rafue*

*(Mt 23.1-36; Lc 11.37-54; 20.45-47)*

<sup>38</sup> Jusiñamui jofomo Jesús nia llofuianona, raite:

—Moisés micorí llogacinona llofueraínimona abina rairui. Ilaícominina naimaci itimacidená, naimacina comini cioillena, eo mare iniroina jitaacacabidimaci. Níne naimaci macaria, naimaci jamai bue isoíñedinona itimacidená, comini naimacina uaiduana gaidimaci.

<sup>39</sup> Comini naimacimo acarillena, ofiracomo uicomo raíacadimaci. Rafue ia: “Jamai bue isoíñedicaí” raillamo comecina facajanona, rafue nama ecimo raíacadimaci.

<sup>40</sup> Feciñuaimona rana ocabillanona, naiñaiñuaina duere finodimaci. Naimiema eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

*Jesúdi Jusiñamui jofomo duerede feciño ucube fecajana ciua rafue  
(Lc 21.1-4)*

<sup>41</sup> Jusiñamui jofomo Jesús nia ia, ucube fecarano uicomo ana raide. Nain-omo comini ucubena joniamo eruaide. Ailluena ucuberedino ailluena ucubena jonetimaci.

<sup>42</sup> Ie facaise eo duerede feciño menaruñu jonete.

<sup>43</sup> Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete.

<sup>44</sup> Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

## 13

*Jesúdi Jerusalémo ite Jusiñamui jofo judaiana llua rafue  
(Mt 24.1-2; Lc 21.5-6)*

<sup>1</sup> Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiái co ebirede. Bico eo ebire cide.

<sup>2</sup> Jesús dinena uai ote:

—Bie jofo birui eo mare; ia nana bie jofomo ite noficiái ico judaisite —llote.

<sup>3</sup> Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

<sup>4</sup> —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>5</sup> Uai ote:

—Omoína bie rafuena bu jifueñellena, omoi abina rairui.

<sup>6</sup> Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui.

<sup>7</sup> Jobaimiaí illena fiditomoí; iadedi jaciruiñoite. Iese suite; iadedi abido nia biñeiticue.

<sup>8</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuaí suite. Diga illanuaimo comini aime guitimaci. Iese suia, omoi duere sefuillifue omoimo suite.

<sup>9</sup> Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitoimoí.

<sup>10</sup> Diga comini cue rafuena nana nairaímo lloitoitimaci, nana nairaíai iena cacaillena. Ie mei abido biiticue.

<sup>11</sup> Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uiñoitoimoí. Dani omoi comeciái icinodo ñaiñeitoimoí; ia Jusiñamui Joreño uaido ñaitomoí.

<sup>12</sup> Cueno ñnotomoí; ia ailluena cuena ñnoñeitimaci. Cueno omoi ñnua jira, omoína enoitimaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruaídi naimaci moona, naimaci eina meinetallena, naimacina llogidoitimaci.

<sup>13</sup> Cue cominina omoi illamona, nana nairai omoína enoitimaci; iadedi cuena fañonocañedimie ja muidomo monamo jaca iite. Naimiena jil-lotaiticue.

14 Cue lluomo cacarei. Jusiñamui facaina lloraimadi jiaimie jearede rafue finollena jaie lloste. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoi cianona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

15 Jofo emodomo omoi ia, ana billanona, aneduai dine raire rillena, jofomo jaiño. Nainomo ite rana omoi diga uiño.

16 Aneduai dine raire rillena, illimo omoi ia, abido jofomo biño, omoi iniroi omoi diga uillena.

17 Naie rafuemona jillobillena, naie facaise urueside riño duere sefuite. Uruena nia jirode riñodi jia duere sefuite.

18 Eo duere sefuiñellena, Jusiñamuimo omoi jicano, rollime facaiseconi bie rafue suiñellena.

19 Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci.

20 Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

21 'Ie facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena inoño, Jiaimie raia: "Oni batine Cristo birui bairede", iena inoño.

22 Cristona abi caitadino biitimaci. Jusiñamui facaina llorainina abi caitadino jia biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

23 Ie jira omoi abina rairui. Ero, bie rafue nia suiñenia, iena omoimo jai lloticue.

### *Jesús abido ie bille rafue*

*(Mt 24.29-35, 42-44; Lc 21.25-36)*

24 'Naie duere sefuilla facaise meinocni, jitoma lligaiñoñeite. Fivui jia lligaiñoñeite.

25 Monamona ucuai ana llujite. Nana naie radi jaidisite.

26 Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

27 Cue jaienisaina cue ecimona oretaiticue. Cue fetocano diese naganomona ofitaitimaci.

28 'Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi.

29 Ie isoide. Bie rafue ico suia, cue billirui iaie illena uiñoitomoi.

30 Uanaicinona omoimo lloticue. Nana bie rafue suille facaiseconi bie nairai nia lite.

31 Mona enirue diga fuite; iadedi cue lloga uai jaca suite.

32 Cue abido billirui jaca bu uiñoñede. Jusiñamui jaienisa iena uiñoñedimaci. Jusiñamui Jitodicue; iadedi cue abido billiruina jia uiñoñedicue. Dama cue Moo iena uiñote.

33 Abina rairuicana jai. Naimie omoina canollena, Jusiñamuimo jia jicabi. Cue billirui omoi uiñoñena jira, iemo ocuiri.

34 'Iena omoi raise uiñollena, bie rafuena lloticue. Patrón jiaie eniruemo jaide. Nia jaiñenia, ie mullaiana ie jofona sedatate. Nagamie ie maijille ocuide. Jofo nasena sedadimemo naimie billemo raise ocuirillena lloste.

35 Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite.



<sup>36</sup> Ebona naimie biite. Inidimacimo naimaci baisaibi raillanona, naimaci jaca ocurilla.

<sup>37</sup> Ie isoide. Ebona biiticue. Cue abido billirui omoi uiñoña jira, iemo jaca omoi ocuri.

## 14

### *Judíuai illaicomini Jesúna gaitallena, siadua rafue*

(Mt 26.1-5; Lc 22.1, 2; Jn 11.45-53)

<sup>1</sup> Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana comecillena, naie rafue ite. Judíuai illaicomini Jesúna jifuiano gaitacadimaci. Naimiena meineiacadimaci. Iena siadua mei,

<sup>2</sup> raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaitañenamona, comini cai diga fuiritimaci. Nia sedaiticai.

### *Jesúmo riño caimare soride ra totaja rafue*

(Mt 26.6-13; Jn 12.1-8)

<sup>3</sup> Betania railla nairaímo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

<sup>4</sup> Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide.

<sup>5</sup> Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiña iese ñaitimaci.

<sup>6</sup> Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiña jeare ñaitomoi? Mare rafuena cuemo finode.

<sup>7</sup> Omoi diga dueredino jaca itimaci. Niruido o jitaia, naimacina canore-domoi; ia omoi diga jaca iñeiticue.

<sup>8</sup> Cue facaina naiñaiño finoacana diese jai finode. Nia fioidañedicue; ia cue fioidaillirui facaina naiñaiño iese finode.

<sup>9</sup> Omoimo uanaicinona lloiticue. Ninomo cue mare finoca rafuena bu lloia, naiñaiña uibiñollena, nana cominimo naiñaiño finoca rafuena lloite.

### *Judas micori raillamie Jesúna gaitataiacana rafue*

(Mt 26.14-16; Lc 22.3-6)

<sup>10</sup> Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide.

<sup>11</sup> Iena cacajano, iobidimaci.

—Iena o finoia, omo ucubena fecaiticai —llotimaci. Iemona Jesúna gaitatalliruimo Judas ocuride.

### *Jesúdi ie fioidaille rafuena llua rafue*

(Mt 26.17-29; Lc 22.7-23; Jn 13.21-30; 1 Co 11.23-26)

<sup>12</sup> Llomenico guille rafue illanona, judíuai comini toica llaudaiaia fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

<sup>13</sup> Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raza.

14 Naimie jailla jofo namamo llono: “Coco llofueraima cocona omo jicannotade: ‘¿Nimai cue guiraco? ¿Ninomo guiticue, cue llofueoicaigano diga?’ ”

15 Ie mei omicomo afebebamo ite aillue cuartona acataite. Na rarui ai diga ite. Nainomo cai guille fino.

16 Jesús llua isoi jaidiaimaiai. Jerusalémo rilla mei, naimie llua isoi baitiaimaiai. Pascua rafue guille finodiaimaiai.

17 Nairui jitoma ana itemo, ie llofueoicaigano diga, Jesús nainomo guisaide.

18 Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

19 Iena cacajanona, sunaitimaci. Damierie naimiemo jicanoside:

—¿Cuena ñaitio?

20 Uai ote:

—Omoimona damie bie platomo cue diga llomenico diga mutade.

21 Jusiñamui facaina lloaima micori cuega isoi, monamona jai billamona, fiodaiticue; iadedi cuena gaitaitimie eo duere sefuite. Naimie jeicifnegadena, cuemona mare.

22 Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

23 Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci.

24 Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie.

25 Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue.

*Jesúdi Pedro naimi ena januana llua rafue*

*(Mt 26.30-35; Lc 22.31-34; Jn 13.36-38)*

26 Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide.

27 Naimacimo llote:

—Cuena fañonocaitomoi. Jusiñamui facaina lloaima micori iena jai e cuega: “Toica llaudaiai sedaraimana meinetimaci. Naimie toinaiai uaficaida jaitimaci” cuega. Naimie micori caina cuete.

28 Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

29 Pedro uai ote:

—Nana jiaino ona fañonocaia, ona jaca fañonocaiñeiticue.

30 Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

31 Pedro dinena riire llote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

*Jesúdi Getsemanímo Jusiñamuimo jia rafue*

*(Mt 26.36-46; Lc 22.39-46)*

32 Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

<sup>33</sup> Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede.

<sup>34</sup> Naimacimo llote:

—Cue comeci sunaicaide. Niadi fioidaiticue. Benomo fiebi; ia nia iniñeno cue facaina omoi jii.

<sup>35</sup> Naimie janore bai jaillanona, eniruemo bitadate. Naimie duere sefuiñellena, Jusiñamuimo jii de:

<sup>36</sup> —Ore Moo, nana rana finoredio. Cuena llegi cacaitañeno. Cue jitailla isoi cuena finoñeno; iadedi o jitailla isoi cuena fino.

<sup>37</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo.

<sup>38</sup> Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena — llote.

<sup>39</sup> Ie mei dane jii llena jaide. Ailli naimie jii isoi, dane jii de.

<sup>40</sup> Ie llofueoicaigano dine dane billanona, naimaci uisi lliroilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede.

<sup>41</sup> Dane jii mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fioidaille facaise jai ite. Jusiñamui jitailla jira, cuena ja gaitajanona, naimiena inoñedino anamo ja iiticue.

<sup>42</sup> A naidacai. Maiña. Cue gaitaitimie jai bite.

### *Jesúna gaitalle rafue*

(Mt 26.47-56; Lc 22.47-53; Jn 18.2-11)

<sup>43</sup> Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci.

<sup>44</sup> Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

<sup>45</sup> Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

<sup>46</sup> Ie jira Jesúna gaitadimaci.

<sup>47</sup> Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaima jefona jaibonote.

<sup>48</sup> Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa.

<sup>49</sup> Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai ciegafuia suite.

<sup>50</sup> Ie facaise nana naimie llofueoicaigano naimiena faionocaillano, aisidimaci.

*Jesús jinafona conirue racaja rafue*

<sup>51</sup> Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci;

<sup>52</sup> ia ie iniroina fainonocaillanona, taimiena aiside.

*Jesúdi judíuái illaicomini dine illa rafue*

*(Mt 26.57-68; Lc 22.54, 55, 63-71; Jn 18.12-14, 19-24)*

<sup>53</sup> Jesúna gaitaja mei, Jusiñamui diga nanoca ñairaima dine naimiena uitimaci. Nana judíuái illaicomini itimaci. Nanoca ñairaini itimaci. Einamaci jiaí itimaci. Moisés micori llogacinona llofueraíni jiaí itimaci.

<sup>54</sup> Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

<sup>55</sup> Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci.

<sup>56</sup> Diga comini Jesúna llogidotimaci; ia tainona llotimaci. Daje isoi lloñedimaci.

<sup>57</sup> Damierie billanona, tainona llogiduanona, raite:

<sup>58</sup> —Bimie llwana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaianona, darui amani illanona, jiaie finoiticue. Comini iena finoñeitimaci”.

<sup>59</sup> —Iese llotimaci; ia daje isoi lloñedimaci.

<sup>60</sup> Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

<sup>61</sup> Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

<sup>62</sup> Jesús uai ote:

—Jii, naimiedicue. Monamona jaie cue billamona, imana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiaí cioitimaci.

<sup>63</sup> Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaíno naimiena llogidollena jai jitaiñedicaí.

<sup>64</sup> Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiódaillesa —llotimaci.

<sup>65</sup> Ie facaise damierie naimiena tuallaitimaci. Ie uiecona ibaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiaí ducoidimaci.

*Pedrodi Jesúna janua rafue*

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Naie facaise Pedro nairaibirimo ite. Naie nanoca ñairaima mullaíñuaimona dañaiño nainomo billanona,

<sup>67</sup> Pedro agaillana cide. Raite:

—Nazaret ie Jesús cominidio.

<sup>68</sup> Pedro iena januano, raite:

—O llwana uiñoñedicue. Iena raise cacaiñedicue.

Ie mei nase fuedo jaide. Naie facaise itava dacaiño ñaite.

<sup>69</sup> Naie mullaíño naimiena dane ciuanona, nainomo jamai itinomo llote:

—Bimiedi Jesús ie llofueoicaigano imie.

<sup>70</sup> Iena Pedro dane janote. Dallu illanona, nainomo jamai itino Pedromo llote:

—Odi Galilea imiedio. Jesús diga jaicabidío.

<sup>71</sup> Uai ote:

—Uanai cue lloñenia, Jusiñamui cuena duere finoite. Uanaicinona cue llwana naimie uiñote. Ero, omoi llogamiena uiñoñedicue.

<sup>72</sup> Ieconí itava dane ñaite. Iena cacajano, Pedro Jesús llwana uibiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitío”. Iena uibiñuamona, Pedro eo eede.

## 15

### *Pilato dine Jesús illa rafue*

(Mt 27.1, 2, 11-14; Lc 23.1-5; Jn 18.28-38)

<sup>1</sup> Jitiramo monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamaci jiai itimaci. Moisés micori llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

<sup>2</sup> Pilato naimiemo jicante:

—¿Judíuai comini illaimadio?

Jesús uai ote:

—Jii.

<sup>3</sup> Ie muidona Jusiñamui diga nanoca ñairaini Jesúsna llogidotimaci:

—Naimie diga marañede rafuena finode —llotimaci.

<sup>4</sup> Pilato dinena naimiemo jicante:

—¿Ñiese uai oñedio? Ona eo llogidotimaci.

<sup>5</sup> Jesús nia uai oñena jira, Pilato uainicaide.

### *Pilatodi Jesús fiodaillana llua rafue*

(Mt 27.15-31; Lc 23.13-25; Jn 18.38-19.16)

<sup>6</sup> Naga año pascua railla rafue facaiseconi cárcelmo itinomona Pilatodi comini jicacamiéna jamai jino orede.

<sup>7</sup> Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite.

<sup>8</sup> Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci.

<sup>9</sup> Pilato jicante:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

<sup>10</sup> Iese jicante; iadedi naimiedi Jusiñamui diga nanoca ñairaini Jesúsna uradoillana uiñote. Naimaci Jesúsna meiniacanana jiai uiñote.

<sup>11</sup> Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci.

<sup>12</sup> Iena cacajano, Pilato naimacimo jicante:

—¿Ñiese bimiena cue finuana jitaidomoi? Naimiedi omoi judíuai illaima raillamie.

<sup>13</sup> Ado llotimaci:

—¡Naimiena corai!

<sup>14</sup> Pilato dane jicante:

—¿Ñie isoide marañede rafuena finode? —Iena cacajano, ado ibi llonoidimaci:

—¡Naimiena corai!

<sup>15</sup> Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiēna coraillena orede.

<sup>16</sup> Soldaduai naimiēna gobernador jofo fo uillanona, nana soldaduai nainomo ofidimaci.

<sup>17</sup> Jiduirede iniroi naimiēmo jítadimaci. Eecuaimona niga nuiciraina naimie ifogimo jítadimaci.

<sup>18</sup> Naimiēna jifanoduanona, naimiēna uaidotimaci:

—¡Jadi, judíuai illaíma!

<sup>19</sup> Radosi diga ie ifogimo buta-butadimaci. Naimiēna tuallaítimaci. Naimie illaímana itena, naimiēna sedallena, caiñici ifodo raiedimaci.

<sup>20</sup> Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiēmo jítadimaci. Ie mei naimiēna coraillena oni uitimaci.

### *Jesúna coraia rafue*

(Mt 27.32-44; Lc 23.26-43; Jn 19.17-27)

<sup>21</sup> Jerusalémona naimaci jaillanona, jamai bitimiēmo dafaifidimaci. Naimiedi Simón. Cirene railla enirue imie. Naimie jito iaímaiaidi Alejandro iaímaiaí Rufo diga. Jerusalén onifemona naimie billanona, naimiēmo dafaifidimaci. Naimiēna Jesús uiga cruzna rocatatimaci.

<sup>22</sup> Gólgota raillanomo jaidimaci. Ifocoraína eruaila jira, iese mameciredē.

<sup>23</sup> Nainomo rillanona, ie abi isirena cacaiñellena, vinomo eriredē rana faianona, Jesúmo fecadimaci; iadedi naimie iēna jiroñede.

<sup>24</sup> Ie mei naimie cruzmo coraia mei, cruzna naidania mei, naie soldaduai naimie iniroi daní coninimo fecasite. Naie iniroi bu uille raillanona uiñollena, jifanododimaci.

<sup>25</sup> Jitoma nia fuiri daidemo, naimiēna coraidimaci.

<sup>26</sup> Cruzmo ie llogiduafuena jonetimaci. Jai cuega: “Judíuai comini Illaíma”.

<sup>27</sup> Ie mei mena firiruide iaímaiaína coraidimaci. Damie Jesús nabeimo coraica. Jiaimie Jesús jarifebeimo coraica.

<sup>28</sup> Iemona Jusiñamui facaina lloraima micori jaie cuegafue suide. Cuega: “Maraiñedino isoi naimie jai ite”.

<sup>29</sup> Naisodo jamai jaidino Jesúna mameritimaci. Mamerillamona, ifogiaína jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iēna dane fnoíticue” raisoidio.

<sup>30</sup> Ie muidona dama o abina mai jillota. Cruzmona ana bi.

<sup>31</sup> Ie facaise Jusiñamui diga nanoca ñairaini naimiēna jifanododimaci. Moisés micori llogacino llofueraíni naimiēna jiaí jifanododimaci. Raitimaci:

—Jiaie cominina jillotate; ia dama naimie abina jillotanide.

<sup>32</sup> Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iēna cai cioia, naimiēna inoíticai. — Iese naimiēna jifanododimaci. Naimie diga coraicamie iaímaiaí naimiēna jiaí jeare ñaitiaímaiaí.

### *Jesús fiodailla rafue*

(Mt 27.45-56; Lc 23.44-49; Jn 19.28-30)

<sup>33</sup> Jitoma naidai itemona, daje amani horas mona jítibicaide.

<sup>34</sup> Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iēna oni dobaíñuamona raite: “Cue Jusiñamui, cue Jusiñamui, ¿bue ñellena cuēna faínonocaidio?” raite.

<sup>35</sup> Iēna cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci.



<sup>36</sup> Naimacimona damie jarire jaillanona, fibecode ramo vinona faite. Radosimo jillillano jirrollena, naimiemo a fecade. Raite:

—Dallu sedaiticai. Elías naimiena jillotajabillena uiñoiacadicaí.

<sup>37</sup> Ie facaise ado cuirioita fodaite.

<sup>38</sup> Naie facaise Jusiñamui jofomo ie fetaca iniroife ana anaba jillacimo motodo menafe cuararide.

<sup>39</sup> Jesúsna sedallena, nainomo capitán ite. Jesúsno eruaillanona, Jesús fodaillana ciode. Raite:

—Uanai bimiedi Jusiñamui Jito.

<sup>40</sup> Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite.

<sup>41</sup> Galileamo Jesús navui illa facaise naie riñoniai naimie diga jaisoidimaci. Naimiena canoidimaci. Jerusalémo Jesús billanona, ailluena riñoniai naimie diga jiai bitimaci. Ie fodaillana jiai cioidimaci.

### *Jesús raiafomo jonia rafue*

*(Mt 27.57-61; Lc 23.50-56; Jn 19.38-42)*

<sup>42</sup> Jitoma ana itemo, sábado rille jai iairei illanona,

<sup>43</sup> Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade.

<sup>44</sup> Iena cacajano, Pilato Jesús fodaillana raise uiñoiacade. Ie fodaillana nia fidiñede. Jesúsna sedade capitána uaiduanona, naimiemo Jesús fodaillana jicanote.

<sup>45</sup> —Jesús jai fodaite —capitán railla mei, Pilato Jesús abina Josémo fecallena llote.

<sup>46</sup> José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade.

<sup>47</sup> María Magdalena, jiaie María diga, naimie raiana ciode. María José ei.

## 16

### *Jesús fodaillamona jillua rafue*

*(Mt 28.1-10; Lc 24.1-12; Jn 20.1-10)*

<sup>1</sup> Sábadoruimo jitoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade.

<sup>2</sup> Domingo jitiramo jitoma como bairedemo, Jesús raiafo dine naiñaiñuai jaide.

<sup>3</sup> Jaillanona, conañuaimo jicanote:

—¿Bu noficina caina oni ñuitalle raiafomona?

<sup>4</sup> Raiafo dine rillanona, iemo eruaillanona, nofici oni ñuitacana ciode. Naie nofici eo aillue.

<sup>5</sup> Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jitade. Naimiedi Jusiñamui jaienici. Naiñaiñuai jacinaite.

<sup>6</sup> Nainomo itimie dinena raite:

—Jacinañeno. Nazaret ie Jesúsna jenodomoí. Naimiena coraidimaci; ia fodaillamona naimie jai jillode. Bene jai iñede. Naimie jonianomo mai eroda.

<sup>7</sup> Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoimo naimie llua isoi, naimiena cioitomoí.

<sup>8</sup> Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bumo lloñede.

*Jesús María Magdalenamo bairia rafue  
(Jn 20.11-18)*

<sup>9</sup> Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede.

<sup>10</sup> Naiñaiño naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

<sup>11</sup> –Naimie jai jillode. Naimiena jai ciodicue –naimacimo naiñaiño llua mei, iena ñnoñedimaci.

*Mena llofueoicaiganomo Jesús bairia rafue  
(Lc 24.13-35)*

<sup>12</sup> Ie meinoconi Jesús mena llofueoicaiganomo bairede. Naimie eruaísoilla isoi, eruaiñede. Iaimaiaí naisomo macaria, iaimaiaímo bairede.

<sup>13</sup> Jerusalémo abido iaimaiaí rilla mei, jiaie llofueoicaiganomo iena llotiaímaiaí; ia ñnoñedimaci.

*Jesús ie once llofueoicaiganomo bairia rafue  
(Mt 28.16-20; Lc 24.36-49; Jn 20.19-23)*

<sup>14</sup> Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena cianona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote.

<sup>15</sup> Naimacimo llote:

–Nana nairaiaímo jai. Nana cominimo cue mare rafue llocana jai.

<sup>16</sup> Cuen a ñnuamona, bautizagano diese Jusiñamui mona duere sefuiñeitimaci; iadedi Jusiñamui cuena ñnoñedinona duere finoite.

<sup>17</sup> Cuen a ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci.

<sup>18</sup> Jaiona naimaci llinoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

*Jesús monamo jailla rafue  
(Lc 24.50-53)*

<sup>19</sup> Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide.

<sup>20</sup> Monamo Jesús jailla mei, ie llofueoicaigano, diga nairaiaímo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cuega rafue jai fuite. Marcodicue.

## LUCAS JESUCRISTO ENIRUEMO ILLA RAFUE CUIAFUE

### *Lucas Teófilomo cartana orede*

<sup>1-4</sup> Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciotimaci. Iena llocana jiai jaidimaci. Naimacimona bie rafue raise uifoticue. Bie rafuena fidianona, damerie iena jai cuetimaci. Bie rafuena jiai jai cacadio. Bie rafuena cue raise uifua jira, uanaicinona o raise uifollena, bie cartana jai cueticue. Iese birui cue comeci jitaide.

### *Jusiñamui jaienicí Juan Bautista micorí jeicillena llua rafue.*

<sup>5</sup> Jesucristo nia jeicifenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijiuide. Naimie aidi Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima.

<sup>6</sup> Jusiñamuimona iaimaiaí mare, nana naimie lloga uaina raise iaimaiaí inua jira.

<sup>7</sup> Naiñaiño oiniñona jira, uruenidiaimaiaí. Jiai jai uaicima iaimaiaí.

<sup>8</sup> Zacarías facai ite comini maijia facaise ia, Jusiñamui jofo dine naimie maijiaide.

<sup>9</sup> Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona dani Jusiñamui diga ñairaini naimiena fetodimaci. Iemei naimie fo jaide.

<sup>10</sup> Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci.

<sup>11</sup> Ieconí cai Nama Jusiñamui jaienicídi naie ra boano nabeimo Zacaríamo bairede.

<sup>12</sup> Naimiena ciuanona, Zacarías jacinaite.

<sup>13</sup> Jaienicí naimiemo llote:

—Zacarías, jacinaifeno. Jusiñamui o jiacinona jai cacade. Iemona o ai uruesite. Imana jocoite. Juan o jitalle naimie mamecidi.

<sup>14</sup> Iemona o comeci caimare iite. Iobitio. Ailluena comini naimie jeiciari iobitimaci.

<sup>15</sup> Jusiñamuimona naimie jamai bue isoifneitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite.

<sup>16</sup> Cai Nama Jusiñamui díbeimo ailluena Israel cominina naimie itataite.

<sup>17</sup> Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llumona, damerie, naimaci jaiagai isoi, Jusiñamuina inoitimaci. Ailluena Jusiñamui uaina jai inoñedimaci; ia damerie birui inoitimaci. Naimaci comeciái Jusiñamui díbeimo meidoitimaci. Iemona cai Nama Jesucristo bia, naimiena inoitimaci.

<sup>18</sup> Zacarías dinena jicanote:

—¿Niese o llua suillena uifoticue? Jai uaicimadicoco.

<sup>19</sup> Jusiñamui jaienicí dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo lollena.

<sup>20</sup> Ero, cue uaina o ñinoñena jira, uainitio, o jito jeicille ñinori. Jiairuido bie rafue suite.

<sup>21</sup> Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci.

<sup>22</sup> Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai lluaña uifotimaci. Naimie ñaiñeno ite.

<sup>23</sup> Jusiñamui jofomo naimie majia facaise fuilla mei, ie jofomo abido jaide.

<sup>24</sup> Digarui illanona, ie aidi urueside. Ie jira jofomo naiñaiño cinco fivui fiebide, comeciaina facajanona:

<sup>25</sup> “Cue uruesilla jira, iena nia buna lloiacañedícue. Cue Nama cuena jai duenaillana uifotícue. Navui cue urue iñena jira, meiruitícue. Jai meiruiñeitícue. Comini cue joreña jai ñaiñeitimaci”.

### *Jusiñamui jaienici Jesús jeicillena llua rafue*

<sup>26-27</sup> Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretno María ñine naimiena orede. María nia ñinide; ia jai José jicanogañaiño. Naimie usumadi David micori.

<sup>28</sup> Rillanona, naiñaiño omo llote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

<sup>29</sup> Iena cacajanona, naiñaiño jacinaita. Iena naiñaiño raise cacaiñena jira, iemo comeciaina facade.

<sup>30</sup> Gabriel ñinena llote:

—Jacinaiñeno. Jusiñamui ona duenaite.

<sup>31</sup> Birui uruesitio. Himana jocoitio. Naimie mamecina jitaitio Jesúsna.

<sup>32</sup> Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite.

<sup>33</sup> Illaimana illamona, Israel railla nairaina jaca sedaite. Naimie ifomo jiaimie jaca iñeite.

<sup>34</sup> María uai ote:

—Hima diga nia iñedícue. ¿Ñiese bie nibaille?

<sup>35</sup> Gabriel llote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiaí marenite. Naimiedi Jusiñamui Jito.

<sup>36</sup> O comini iñaiño, Elisabet, ie uacitaila facaise jiaí jai urueside. Naiñaiño jai jionaide; ia jai seis fivui naiñaiño uruesilla ite.

<sup>37</sup> Jusiñamui nana bie isoide rafuena finorede.

<sup>38</sup> María uai ote:

—Jee. Jusiñamui anamo itícue. O llucino cuemona mare.

Ie facaise Gabriel naiñaiño mona oni jaide.

### *Maríadi Elisabet ñine jailla rafue*

<sup>39</sup> Ie facaiseconi María aneduai ñine Judea railla eniruemo Zacarías illanomo raire jaide. Elisabetna cioillena, jaide.

<sup>40</sup> Zacarías jofomo rillano:

—Itio —raillanona, Elisabetna uaidote.

<sup>41</sup> Elisabet naiñaiño uaina cacajano, ieconi naiñaiño jeraimo ite urue iena jiaí uifnuamona, niraide. Ie facaise Jusiñamui Joreño anamo Elisabet jai ite.

<sup>42</sup> Iese illamona, María uruesillana uifnote. Naiñaiño ado llote:

—Jusiñamui ona eo marena canoite. O uruena marena itataite.

<sup>43</sup> Jamai bue isoidícue; ia, odi cue jilloitaraíma ei illanona, cue ñine bitio. Iena cuemo nia lloñedio;

<sup>44</sup> ia, cuena o uaiduanona, iobillamona cue jeraimo ite uruedi niraide.

45 Cai Nama omo llotataga uaina suillana o inua jira, Jusiñamui ona eo marena canoite. —Jusiñamui Joreño naiñaiño illamona, iena llote.

46 María dinena uai ote:

Caiñai Nama eo mare. Naimiemo iobillacinona fecaacadicue.

47 Naimiedi cue Jilloitaramana jira, naimieri iobidicue.

48 Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

49 Naimiedi siño. Naimiedi mareuidimie. Cue facaina eo mare rafuena finode.

50 Naimiena inotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena inotinona duenaite.

51 Diga siño rafuena finote. Abi iedotino comeciái facajacinona llucaitaite.

52 Naimiedi illaicomina oni dotaite; ia jamai bue isoidinona jamai bue isoiñedinona itataite.

53 Dueredinona eo canoite; ia duenidinomo buena fecañeite.

54 Duenailamona, cai Israel comina feitañeite.

55 Cai jaiagaimo naimie jaie llua isoi, birui caina canoite.

Abraham micorimo jaie llote: “Ona duenaiticue. O comina jaca duenaiticue”

María llote.

56 Elisabet diga davui amani naiñaiño fiebide. Ie mei ie jofomo abido jaide.

### *Zacarías jito jeicia rafue*

57 Elisabet jocularui jai ridemo, imana jocode.

58 Naiñaiño ecimo ite comini, naiñaiño comini diga, iena fidiamona, cai Nama naiñaiñoa eo duenailana uinotimaci. Naiñaiño diga iobidimaci.

59 Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci;

60 iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

61 Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

62 Jefona cacaiñena jira Zacaríamo onolli diga jicanotimaci, ie jito mamecina jitallena.

63 Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci.

64 Ieconí Zacarías jai dane ñaite. Ie jira Jusiñamuimo iobillacino fecade.

65 Nana iaimaiaí ecimo itino rajicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaioidimaci.

66 Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese llotimaci.

### *Zacarías Jusiñamuimo iobillacinona fecaja rafue*

67 Ie facaise Jusiñamui Joreño Zacaríana llotatajanona, Zacarías llote:

68 Cai Nama Jusiñamuidi mare.

Cai Israel comini dine biite, caina jilloitallena.

69 David micorí Jusiñamuina jaie sedade.

David micorí cominimona siño Jilloitaramana cai dine oretaite.

70 Ie facaina llorainido naimie jaie llua isoi, cai Jilloitaramana oretaite,

71 Taifemona, Janabamona cai jilloillena.

72-73 Cai usumatiaí micoriaimo: “Omoína duenaiticue” llote.

Cai usuma Abraham micorimo jaie llogacinona feitañede.

74-75 Taifemona cai jilloillena, cai Jilloitaramana oretaite.

Nana cai ille dinori Jusiñamuina jaciruiño sedajana jitaide.  
Naimie jitailla isoi cai illena, naimie jitaillacinona cai finollena, cai Jilloitaraimana oretaitaite.

<sup>76</sup> Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciai o raise finollena.

<sup>77</sup> Ie cominimo jeacinomona jilluacinona lloitio.

Iena naimaci ñnoia, Jusiñamui naimaci jeacinona feitaite.

<sup>78-79</sup> Jeacino anamo jai cai illa jira, jitiredinomo iticai isoidicai.

Jusiñamuina cai nia ñnoñenia, fiodaillana jaciruiticai.

Naimie caina duenaillamona, cai Jilloitaraima billena o llofuellena, ona oretaitaite.

Naimiena cai ñnoia, jitiredinomo iñeiticai; ia Jusiñamui diga cai comeciai uri iite.

<sup>80</sup> Zacarías jito sairide. Jusiñamuina ñnocana jaide. Cominimo naimie nia marefodo lloñenia, jofue iñenanomo ite.

## 2

### *Jesús jeicia rafue*

*(Mt 1.18-25)*

<sup>1-2</sup> Jesús jeicia facaise César Augusto anamo ailluena nairaiiai ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaimo illana naimie uiñollena, nana comini mameciai cuellena ocuide. Jaca bu iese jaie finoñede.

<sup>3</sup> Naimaci jaiagai illanomo mameciai cuiana ocuide.

<sup>4</sup> Ie jira José Galileamona Nazaretmona jaide. Judeamo Belémo jaide. David micori cominimo naimie jainaiaila jira, David micori illanomo jaide.

<sup>5</sup> Ie ai María diga jaide. Naiñaiño fenai jai eo aillue.

<sup>6-7</sup> Belémo iaiaiaiai rillanona, naie facaise comini jofomo inillino iñena jira, jurareta jofomo ridiaiaiaiai. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

### *Jusiñamui jaienisai toica llaudaiai sedaraini dine jailla rafue*

<sup>8</sup> Jesús jeicia facaise naie naio Belén ecimo ite pastomo damerie toica llaudaiaina sedaraini itimaci. Naimaci toinaiaina sedadimaci.

<sup>9</sup> Ieconí cai Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci.

<sup>10</sup> Jaienici llote:

—Jacinaiño. Mare rafue lloiacadicue. Nana cominina iobitallena, iena lloiacadicue.

<sup>11</sup> David micori illanomo damie como jeiciga. Jusiñamui facaina lloraini micoriai naimie billena jaie lloudimaci. Naimiedi Cristo cai Nama. Naimie omoi Jilloitaraima. Jeacinomona omoina jillotaite.

<sup>12</sup> Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue llwana uanaicinona uiñoitomoi —llote.

<sup>13</sup> Ie facaise naie jaienici dine ailluena jaienisai bitimaci. Jusiñamuimo iobillacinona fecajano rotimaci.

<sup>14</sup> Monamo Jusiñamui illanona, naimiemo iobillacinona feacaadicaí.

Cominina naimie duenaillamona, naimie diga uri iitimaci rotimaci. Ie mei abido jaidimaci.

<sup>15</sup> Monamo jaienisaí jailla mei, toica llaudaiaí sedaraini coniniri ñaitimaci:

—Belémo mai cai jailli, cai Nama caimo como lloga rafuena cai jibuisaillena.



16 Ieconi raire jaidimaci. María José diga baitimaci. Iaimaia urue jurareta ecaranomo billana cioidimaci.

17 Naimiena ciua mei, nana naimacimo jaienici lloga rafuena llotimaci.

18 Nana naie rafuena cacadinodi ieri rajicaidimaci.

19-20 Iaimaia uruena ciua mei, llaudaia sedaraini imaci toinia dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

### *Jerusalémo Jusiñamui jofomo Jesúna iaimaia uilla rafue*

21 Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

22-24 Moisés micori jaie llua isoi Jerusalémo Jesúna uitiaimaia. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jiai cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaia.

25 Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitalena, Cristo billemo ocuiride. Naie facaise Jusiñamui Joreño anamo naimie ite.

26 Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote.

27 Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode.

28 Naimaci dine jaillanona, Jesúna meniñote. Jusiñamuimo iobillacinona fecajano jide:

29 Nama, o anamo iticue.

Cuemo o lloga uai jai suilla jira, uri fioidaiticue.

30 O oretaga Jilloitaraimana jai cioidicue.

31 Naimiena oredio, nana comini jilloillena.

32 Naimiedi judiañedinona uanaicinona uiñotaite.

O cominina iobitaite jide.

33 Iena cacajamona, iaimaia jitona lloga uairi rajicaidiaimaia.

34-35 Simeón iaimaiaimo camaredicinona llote:

—Jusiñamui omoina raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeciaina facajacinona uiñotaite. Naimiemo suille rafuemonona o comeci sure iite. Cai cominimona ailluena naimiena jitaiñeitimaci. Ailluena jitaitimaci.

36 Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fioidaite.

37 Naiñaiño jai eo uaiñiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

<sup>38</sup> Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocuirilla jira, naiñaiño naimaci Jilloitaraimana nainomo itinomo llocana uite.

### *Nazaretmo abido naimaci jailla rafue*

<sup>39</sup> Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaimaia.

<sup>40</sup> Nainomo Jesús sairicana maicana jaide. Eo abina uiñote. Naimieri iobillamona, Jusiñamui naimiena canouide.

### *Jerusalémo Jusiñamui jofomo Jesús illa rafue*

<sup>41</sup> Naga año Jerusalémo pascua railla rafue dine Jesús moo iaimaia jaisoidiaimaia. Egiptomona naimaci jaiagai jillobillana comecillena, naie rafue ite.

<sup>42</sup> Naimiemo doce años illa facaise Jerusalémo iaimaia jaisoilla isoi, jaidiaimaia. Naimie doce años illa jira, Jesúna uitiaimaia.

<sup>43-44</sup> Rafue fuilla mei, abido bitiaimaia. Ailluena comini jia billa jira, Jesús billana raise uiñoñediaimaia. “Cai comini diga naimie bite” raillanona comecina facadiaimaia; ia Jesús Jerusalémo fiebide. Darui raifi billa mei, iaimaia cominimo naimiena eo jenodiaimaia.

<sup>45</sup> Baiñena jira, inia mei, Jerusalémo darui jaillanona, abido jaidiaimaia.

<sup>46</sup> Ie are Jusiñamui jofomo naimiena baitiaimaia. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jia siadote.

<sup>47</sup> Nana cacadino naimie uiñogacinori rajjicaidimaci. Naimie raise siadogacinori jia rajjicaidimaci.

<sup>48</sup> Naimiena iaimaia baia, rajjicaidiaimaia. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

<sup>49</sup> Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Ñiese bene cue illana uiñoñedomico?

<sup>50</sup> Naimie lluana raise cacaiñediaimaia.

<sup>51</sup> Iemei iaimaia diga Nazaretmo naimie abido jaide. Iaimaia uai inuanona, iaimaia anamo ite. Ie ei María nana naie rafue ie comecimo facauide.

<sup>52</sup> Naimie sairicana abina uiñocana jaide. Jusiñamui naimieri iobide. Comini dinena naimiena jia gaidimaci.

## 3

### *Jofue iñenanomo Juan Bautista micori illa rafue*

*(Mt 3.1-12; Mr 1.1-8; Jn 1.19-28)*

<sup>1-2</sup> Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisantias. Jusiñamui diga nanoca ñairaima iaimaiaidi Anás, Caifás diga.

<sup>3</sup> Jusiñamui llua jira, nana Jordán fuemo ite comini dine Juan llofuecana jaide. Llote:

—Omoï jeacinona faïnonocaida, Jusiñamui dibeimo omoï comeciaï iuai meido. Iemona Jusiñamui omoï jeacinona feitaite. Omoï comeci iuai omoï meidoia, comini iena uiñollena, mai omoï bautizallomoi.

<sup>4</sup> Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

<sup>5</sup> Nana iconi oruita.

Naga aneduai diese eniruena judai.

Neicairuai joide naisona atona fino.

Naimo itaicuai illa diese eniruena oruita, daje facai illena.

<sup>6</sup> Nana comini Jusiñamui naimacina jillotaiacanana uiñoitimaci”

cuete; ia naimaci comeciaina ñaite. Cai Namana ñnuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciã marena finuana ñaite.

<sup>7</sup> Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoï jailla jira, jaio nairai isoidomoi. ¿Ñiese jilloitomoi? Cue dine omoï billena, ¿bu omoïmo lloga?

<sup>8</sup> Omoï comeciã iuailai meido. Omoï jeacinona faïnonocai. Iemona Jusiñamui jitaillacinona fino. Mare rafuena finocana jai. Naiemona omoï comeciã iuailai meiduana uiñoiticaï. Ie mei bautizallomoi. Omoï comeciãina facañeno: “¿Bue ñellena o llua isoi finoiticaï? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifuemona jilloiticaï”. Ero, omoïmo lloiticue: Cue llua isoi omoï finoñenia, naimie riicaillifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede.

<sup>9</sup> Ero, lliñede riarã tiedomoi. Tia mei, maraiñena jira, iena jobaidomoi. Ie isoidomoi. Omoï maraiñena jira, Jusiñamui omoïna jai duere finoacade. Ie riicaillafue anamo jai itomoi. Omoï comeciã iuai omoï meidoñenia, omoïna duere finoite.

<sup>10</sup> Iena cacajanona, comini dinena naimiemo jicanotimaci:

—Cai bautizaja mei, ¿ñiese iiticaï? ¿Ñie isoide mare rafuena finoiticaï?

<sup>11</sup> Juan uai ote:

—Ailluena ñiroiredimiedi ñiroinidimie mo ñiroina feca. Guilleredimiedi guillenidimie mo guillena feca.

<sup>12</sup> Naimacina bautizallena, gobierno ucubena oraini jiaï bitimaci. Jicanotimaci:

—Llofueraïma, cai bautizaja mei, ¿ñiese iiticaï? ¿Ñie isoide mare rafuena finoiticaï?

<sup>13</sup> Uai ote:

—Gobierno facaina omoï ñbataia, cominimona gobierno llua baïfemo oñeno.

<sup>14</sup> Naimie dine billanona, soldaduai jicanotimaci:

—Cai bautizaja mei, ¿ñiese iiticaï? ¿Ñie isoide mare rafuena finoiticaï?

Uai ote:

—Cominimona rana bairoñeno. Riicinodo rana oñeno. Tainona llogiduumona, cominimona rana oñeno. Omoï ucube illa diese feiño. Ie baïfemo ucubena nicidoñeno.

<sup>15</sup> Juan llofuamona naie facaise cominidi Cristo bille mo ocuirilla jira, “Juandi ñibai Cristo” raillanona, Juanmo comeciãina facauidimaci.

<sup>16</sup> Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoina bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciai iuai omoi meidoñenia, omoina duere finoite.

<sup>17</sup> Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciai iuailai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

<sup>18</sup> Bie isoidicinodo cominimo ie mare rafuena llofueuide.

<sup>19</sup> Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade.

<sup>20</sup> Maraiñede rafuena Herodes finocana jaillamona, Juan cárcelmo jone-tade.

*Juandi Jesúna bautizaja rafue*  
(Mt 3.13-17; Mr 1.9-11)

<sup>21</sup> Ailluena cominina Juan bautizaja facaise, Jesúna jiaí bautizade. Bautizaja mei, Jesúsdi ie Moo diga ñaianona, mona bojode.

<sup>22</sup> Ieconí Jusiñamui Joreño ucugina eruaillano, naimie emodomo ana bite. Monamona Jusiñamui llote:

—Cue isiruiga jítodío. Ori iobidicue.

*Jesucristo ie usumatiaí*  
(Mt 1.1-17)

<sup>23</sup> Jesús treinta años illamona, Jesús ie majille rafue tainede. “Naimiedi José micorí jito” raillano naimiemo cominidi comeciaina facadimaci. Josédi Elí micorí jito.

<sup>24</sup> Elídi micorí Matat micorí jito. Matat micorí Leví micorí jito. Leví micorí Melqui micorí jito. Melqui micorí Jana micorí jito. Jana micorí José micorí jito.

<sup>25</sup> José micorí Matatías micorí jito. Matatías micorí Amós micorí jito. Amós micorí Nahum micorí jito. Nahum micorí Esli micorí jito. Esli micorí Nagai micorí jito.

<sup>26</sup> Nagai micorí Maat micorí jito. Maat micorí Matatías micorí jito. Matatías micorí Semei micorí jito. Semei micorí José micorí jito. José micorí Judá micorí jito.

<sup>27</sup> Judá micorí Joana micorí jito. Joana micorí Resa micorí jito. Resa micorí Zorobabel micorí jito. Zorobabel micorí Salatiel micorí jito. Salatiel micorí Neri micorí jito.

<sup>28</sup> Neri micorí Melqui micorí jito. Melqui micorí Adi micorí jito. Adi micorí Cosam micorí jito. Cosam micorí Elmodam micorí jito. Elmodam micorí Er micorí jito.

<sup>29</sup> Er micorí Josué micorí jito. Josué micorí Eliezer micorí jito. Eliezer micorí Jorim micorí jito. Jorim micorí Matat micorí jito. Matat micorí Leví micorí jito.

<sup>30</sup> Leví micorí Simeón micorí jito. Simeón micorí Judá micorí jito. Judá micorí José micorí jito. José micorí Jonam micorí jito. Jonam micorí Eliaquim micorí jito.

<sup>31</sup> Eliaquim micorí Melea micorí jito. Melea micorí Mainán micorí jito. Mainán micorí Matata micorí jito. Matata micorí Natán micorí jito. Natán micorí David micorí jito.

<sup>32</sup> David micorí Isaí micorí jito. Isaí micorí Obed micorí jito. Obed micorí Booz micorí jito. Booz micorí Salmón micorí jito. Salmón micorí Naasón micorí jito.

<sup>33</sup> Naasón micorí Aminadab micorí jito. Aminadab micorí Aram micorí jito. Aram micorí Esrom micorí jito. Esrom micorí Fares micorí jito. Fares micorí Judá micorí jito.

<sup>34</sup> Judá micorí Jacob micorí jito. Jacob micorí Isaac micorí jito. Isaac micorí Abraham micorí jito. Abraham micorí Taré micorí jito. Taré micorí Nacor micorí jito.

<sup>35</sup> Nacor micorí Serug micorí jito. Serug micorí Ragau micorí jito. Ragau micorí Peleg micorí jito. Peleg micorí Heber micorí jito. Heber micorí Sala micorí jito.

<sup>36</sup> Sala micorí Cainán micorí jito. Cainán micorí Arfaxad micorí jito. Arfaxad micorí Sem micorí jito. Sem micorí Noé micorí jito. Noé micorí Lamec micorí jito.

<sup>37</sup> Lamec micorí Matusalén micorí jito. Matusalén micorí Enoc micorí jito. Enoc micorí Jared micorí jito. Jared micorí Mahalaleel micorí jito. Mahalaleel micorí Cainán micorí jito.

<sup>38</sup> Cainán micorí Enós micorí jito. Enós micorí Set micorí jito. Set micorí Adán micorí jito. Adándi Jusiñamui comuitagamie.

## 4

### *Taife ramo Jesús faia rafue*

*(Mt 4.1-11; Mr 1.12-13)*

<sup>1</sup> Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede.

<sup>2</sup> Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite.

<sup>3</sup> Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomeniconajaita”.

<sup>4</sup> Jesús uai ote:

—Iena lloñeiticue. Jusiñamui facaina lloraíma micorí iena jaie cuega: “Jiaie rafuedi llomenico guilla baifemo faite”.

<sup>5</sup> Ie mei a ite anedumo Taife Jesúsna uillano, dallu illanona, naimiemo nana nairaiaia acatate.

<sup>6-7</sup> Llote:

—Nana bie nairaiaia cue anamo ite. Iena cue iacagamie mo itataredicue. Cueno o sedajamona, iobillacinona cuemo o fecaia, nana bie nairaiaia omo fecaiticue. Bie nairaiaia illaímana jaitio.

<sup>8</sup> Jesús uai ote:

—Dama ite. Ona sedañeiticue. Moisés micorí jaie cuega: “Cai Nama Jusiñamuina seda. Dama naimiemo iobillacinona feca”.

<sup>9</sup> Ie mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodiodena, eniruemo mai ana uai.

<sup>10-11</sup> David micorí ona jaie cuega:

Ona eenollena Jusiñamuidi ie jaienisaímo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie lloga uaina finorede; ia iena cue uiñollena, mai ana uai.

<sup>12</sup> Jesús uai ote:

—Dama ite. Ana uaiñeiticue. Ero, ie cominimo Moisés micorí jaie cueda: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

<sup>13</sup> Taife naimiena ramo faia mei, naimiemona ie jitaille dinori oni jaide.

*Galileamo Jesús ie rafue llole jillaci*

*(Mt 4.12-17; Mr 1.14-15)*

<sup>14</sup> Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride.

<sup>15</sup> Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

*Nazaretmo Jesús illa rafue*

*(Mt 13.53-58; Mr 6.1-6)*

<sup>16</sup> Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuedafuiana ado facallena, naimie a naidadate.

<sup>17</sup> Naie lloraco nama mullaímadí Isaías micorí jaie cuedafuiai jai ferinoga rabe naimiemo fecade. Iena oni suiñocaida, bie rafuena baillanona facade:

<sup>18-19</sup> Jusiñamui Joreño cuemo ite.

Dueredínomo mare rafuena llollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jecino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenailana birui uiñuana jitaide.

Naimacimo mare rafue llollena, cuena jai oretate.

<sup>20</sup> Naie rafue facaja fuillamona, cuedafuiai abido fecade. Naimacina llofueuena, dane ana raide. Nana nainomo ite comini naimiemo eo eruaidimaci.

<sup>21</sup> Iemei naimie naimacina llofue. Raite:

—Omoi como cacaja cuedafuiai omoi motomo jai suide. Cuena ñaite.

<sup>22</sup> Naimie lluaña comini cacajano, coninina raitimaci:

—Naimie fue mare. Naimie marena llofue. —Iemona rajicaillamona, coniniri raitimaci—, Naimiedi jamai José jito. ¿Ñiese naie rafue birui suide?

<sup>23</sup> Iena uiñuamona, Jesús dinena llote:

—Cue lluaña ñinoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiai finoia, naimiena ñinoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo ñinorede” comeciaina facadomoi.

<sup>24</sup> Uanaicínona omoimo lloiticue. Naimie comini nairaimo Jusiñamui facaina lloraima ia, ie comini naimie uaina feiñoiacasiñede. Iena jamaisite. Ie isoide. Cue nairaimo cue illa jira, cue uaina ñinoñedomoi.

<sup>25</sup> Jaie ie isoide. Elías facaiseconi daje amani años abimo atomonado noci deñede. Aime guitimaci. Naie facaiseconi bie eniruemo cai comini dine ailluena feciñuai itimaci; iadedi omoi jaiagai Jusiñamui uaina ñinoñedimaci.

<sup>26</sup> Jusiñamuidi Elíana cai comini dine oreñede; iadedi jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciño orede.

<sup>27</sup> Jiaie rafuena lloiticue. Eliseo micorídi Jusiñamui facaina jaie llote. Eliseo micorí facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina ñinoñena jira, Eliseo



mīcori duidinona jillotañede. Naie facaiseconi dama Naamán mīcorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñnoiacaiñedomoi —llote.

<sup>28</sup> Jesús lluana cacajano, naie ofiracomo itino eo iciritimaci.

<sup>29</sup> Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci.

<sup>30</sup> Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

*Jesúdi Janaba anamo itimie jillotaja rafue*

*(Mr 1.21-28)*

<sup>31</sup> Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuete.

<sup>32</sup> Illaíma uai isoi naimie llofuia jira, nainomo ite comini naimie llofuia-mona rajicaidimaci.

<sup>33</sup> Janaba anamo illamie nainomo ite. Jesús llofuiana cacaita, Janabadi imana ado cuirioitate:

<sup>34</sup> —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uiñoticue. Odi Jusiñamui ie Mare Fetocamiedio.

<sup>35</sup> Jesús naimiena lletade:

—Llñicai. Naimiemona oni jai. —Iena cacajanona, naimaci motomo Janaba imana ana dotade; ia naimiedi bofedaiñede. Ie mei Janaba naimiemona oni jaide.

<sup>36</sup> Iena ciuanona, nana nainomo itino rajicaidimaci. Coniniri siadotimaci: —¿Ñie isoide Jesús uai? Janabamo naimie llua mei, imamona Janabadi oni jaide.

<sup>37</sup> Jesús finoca rafue muidona, naimie mamecidi nana naie eniruemo soride.

*Jesúdi Simón Pedro jifaiña jillotaja rafue*

*(Mt 8.14-15; Mr 1.29-31)*

<sup>38</sup> Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiña jilloitallena, nainomo itino Jesúmo jicanote.

<sup>39</sup> Naiñaiño ñine Jesús jaillanona, ie uai lluanona, naie duicodi oni jaide. Ieconi naiñaiño jillode. Abi cuariñede. Naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue*

*(Mt 8.16-17; Mr 1.32-34)*

<sup>40</sup> Nairuido jitoma ana itemo, comini ailluena duidinona Jesús ñine atidimaci. Diga duicuai illanona atidimaci. Naimacina jetajamona, naimacina jillotate.

<sup>41</sup> Jananiaina jiai oni oretajano, jananiai ñinena raite:

—Odi Jusiñamui Jitodio. —Naimiena naimaci uiñua jira, Jesús naimaci ñaiana rairuide. Naimiedi Jusiñamui Jitona uiñotimaci.

*Judeamo Jesús llofuia rafue*

*(Mr 1.35-39)*

<sup>42</sup> Ie areruido jítiramo jofue ññenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci.

<sup>43</sup> Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lollena, Jusiñamui cuena orede. Oni jaiticue. Omoi diga fiebiñeiticue.

44 Ie mei Judeamo ite ofiracuaimo Jesús llocana jaide.

## 5

*Jesús muidona, naimaci ailluena lliciaina ua rafue*

*(Mt 4.18-22; Mr 1.16-20)*

1 Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci.

2 Ie facaise jorai fuemo Jesús mena sijide botena ciode. Naimaci lloijina naimaci jocua jira, naie botemo lloiji fairaini ñede.

3 Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicante. Botemo ana raita, botemona cominina llofuate.

4 Llofua mei, Simómo llote:

—Aforedinomo jai. Nainomo omoi lloijina faino.

5 Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticaí? Iadedi o llua jira, lloijina faiticue.

6 Iena naimaci faia mei, ailluena lliciaina jiatimaci. Ie jira naimaci lloiji cuaranoiacade.

7 Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade.

8 Iena ciuano, Simón Pedro Jesúsimo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeacinona finouidimiedicue.

9 Ailluena lliciaina naimaci ua jira, naimaci rajicaillamona, iena naimie llote.

10 Naimie nabaiñiaimona Zebedeo jito iaiaiaí ite. Juan diga Jacobo iaiaiaí. Simómo Jesús llote:

—Cuen a jaciruiño. Lliciaina birui ocabitomoi; iadedi cue dibeimo naimaci illena, biruimona cominina oitomoi.

11 Eniruemo sijiano, naimaci raruiaí faionocaida, Jesús diga jaidimaci.

*Jesúdi efonaitimiena jillotaja rafue*

*(Mt 8.1-4; Mr 1.40-45)*

12 Jiairuido Jesúsdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie ciuano, naimiena raise uaiduamona, ana bitadate. Llote:

—Maestro, o jitaíadedi, cuena jillotaredio.

13 Jesús ie onolli oni ñuitajanona, naimiena jetade. Raite:

—Ona jillotaiacadicue. Mai o jillo. —Ieconí jillode.

14 Jesús naimiemo llote:

—Omo suide rafue jaca bumo lloño; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamui Moisés micori jaie lloga rana feca Iemona comini o jilluana uiñoitimaci.

15 Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci.

16 Bitimaci; iadedi Jusiñamui diga ñaillena, jofue ñenanomo Jesús jaide.

*Jesúdi tsitaitimiena jillotaja rafue*

*(Mt 9.1-8; Mr 2.1-12)*

17 Jiairuido naimie llofueia, diga comini naimie illa jofomo bitimaci. Fariseuai raila comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate.

18 Ie facaise ie biramo biide tisitaitimiena Jesús dine damerie atidimaci;

19 iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biramo biide diga, comini motomo Jesús ecimo ana ñuitadimaci.

20 Iena Jesús ciuanona, tisitaitimie jilluana naimaci inuana Jesús uifnote. Tisitaitimie lloite:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

21 Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”.

22 Naimaci comechai facajacinona Jesús uifuanona, naimacimo jicanote:

—¿Bue ñellena omoi comeciaina iese facadomoi?

23 Bimie: “O jeacinona jai oni dotadicue” cue lloia, cue uai siñonana uifnoñeitomoi; ia bimie: “Mai naidacaillanona macari” cue lloia, cue uai siñonana uifnoñeitomoi.

24 Monamona jaiie cue billanona, imana jaidicue. Ie jira jeacino oni dotaja uai cuemo ite. Iena omoi uifollena, tisitaitimie lloiticue: “Mai naidacai. O bira ferianona, o jofomo mai jai”.

25 Iese naimie raillamona, tisitaitimie jillode. Iecon naimaci motomo naimie naidaide. Ie bira feriano, Jusiñamuimo iobillacino fecajano, ie jofomo jaide.

26 Nana naiena ciodino eo rajicaidimaci. Iemona Jusiñamuimo iobilacinona fecadimaci. Eo rajicaillamona, raitimaci:

—Bie isoide siño comena jaca cioiñedicaí.

### *Jesúdi Levína fetua rafue*

*(Mt 9.9-13; Mr 2.13-17)*

27 Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimie lloite:

—Cue llofuegamiena o jaillena, cue diga bi.

28 Naidacaida, Jesús diga jaillanona, ie maijana fañonocai.

29 Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci.

30 Nainomo fariseuai cominidi, Moisés micori llogacino llofueraini diga, jamai bitimaci. Jesúsna ciuanona, ie llofueoicaiganomo jicanotimaci:

—¿Bue ñelli ucube oraini diga guitomoi? Marañede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci.

31 Jesús iena cacajano, lloite:

—Ecairedino médoca jitañedimaci; iadedi duidinodi médoca jitañedimaci.

32 Jusiñamui dibeimo mareuidinona uaibiñedicue; iadedi marañedinona uaibiticue.

### *Jesúmo comini guiñenana jicanua rafue*

*(Mt 9.14-17; Mr 2.18-22)*

<sup>33</sup> Naie facaise fariseuai dinena Jesúmo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseconi guiñedícaí. Jusiñamuimo jicabidícaí. Cai jeacino facaina sunaicabitícaí. Cai einamací rafuedo Juan Bautista llofueoicaigano jaidímací. Cai llofuegano iedo jiaí jaidímací; iadedí o llofueoicaigano jaca guitímací. ¿Bue ñellena cai einamací rafuedo jaiñedímací?

<sup>34</sup> Jesús uai ote:

—Jiaíe rafuedo iena lloiticue. Coniruedí ie aína uarui ia iobilla jira, ie nabaiñiaí sunaiñedímací. Iobillamona guitímací.

<sup>35</sup> Jiaíruido jai aireiacade conirue naimací díga iñenia, naimací comeci sunaillamona, naimací jitaia, guiñenaruillaídí iite. Ie isoide. Cue comíní díga biruí cue illa jira, iocíre itímací. Ico cue jaille mei, sunaitímací. Ie muidona biruí cue llofueoicaigano guicabitímací.

<sup>36</sup> Jiaíe rafuedo iena lloiticue: Nia jocoñega comue iniroidí jacaíe iniroimo jilliñega. Jilliadí jocua mei, comue iniroi jacaíe iniroimona fo llirite. Eo fodo cuararite. Jai maraiñeno cioite.

<sup>37</sup> Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faífite. Igoi jiaí faífite.

<sup>38</sup> Como finoca vino comogomo jonelle. Iemei iena faífiñeite.

<sup>39</sup> Navuí finoca vino jirua mei: “Navuí finoca vino nia mare” raillamona, como finoca vino buna jiroacaiñede. Ie isoide. Omoi einamací rafue ifomo jiaíe rafue biruí ite. Iena omoímo llocabitícue. Iedo jaidícaí; ia omoi einamací rafuemo omoi fibilla jira, jiaíe rafuedo biruí jaiacaiñedomoi —llote.

## 6

### *Sábadoruimo Jesús llofueoicaigano majia rafue (Mt 12.1-8; Mr 2.23-28)*

<sup>1</sup> Jiaíruido sábadoruimo Jesús, ie llofueoicaigano díga, trigo illa illí motodo joide naisona jaide. Ie llofueoicaigano trigona tijiano, golluano, guicana jaidímací.

<sup>2</sup> Dajerie fariseuai iena ciuano, llotímací:

—Rairuica rana finosite. Moisés micorí rairuilla jira, sábadoruimo majinidícaí; iadedí trigona naimací tijiamona, caimona jai majidímací. Caimona jeacínona jai finodímací.

<sup>3</sup> Ie llofueoicaiganona ríduano, Jesús uai ote:

—Cuemona jeacino finoñedímací. David micorí jaie finoca rafuemo omoi comeciaí raise facañedomoi. David micorí guille iñenia, naimíe aimetaia, ie nabaiñiaí díga Jusiñamui jofomo fo jaide.

<sup>4</sup> Jusiñamuimo fecaca llomeniconona uanona, guitímací. Jamai bue isoidino naie llomeniconona guillana Jusiñamui rairuide. Daní Jusiñamui díga ñairainí iena guiredímací. David micorí iena guite; ia Jusiñamui naimacína duere finoñede.

<sup>5</sup> Monamona cue billamona, imana jaidícue. Ie jira sábadoruimo comíní finolle rafuena rairuiredícue. Nairuimo finoñelle rafuena jiaí rairuiredícue. Ie jira nairuimo cue jitailla rafuena finoredícue.

### *Jesúdi onollina idisarodimiena jillotaja rafue (Mt 12.9-14; Mr 3.1-6)*

<sup>6</sup> Jiaíe sábadoruimo judíuai ofiracomo Jesús jaillanona, llofujete. Ie facaise nainomo nabellimo idisarodimie ite.

<sup>7</sup> Moisés micorí llogacínona llofueraíni, fariseuai díga, Jesúmo eruaidímací, sábadoruimo Jesús naimíena raabaca ie segoitai. Iena Jesús finoia,

naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode.

<sup>8</sup> Naimaci comeciaina facajacinona Jesús uiñuamona, onollina idisarodimiemo llote:

—Cue ecimo naidada. —Iemei Jesús ecimo naidadate.

<sup>9</sup> Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jil-lotaiadedi, birui mare rafuena finodicue. Cuen a birui omoi meineiadedi, birui marañede rafue finodomoí. Sábadoruimo ¿nie isoide rafue finuana rairuidomoí?

<sup>10</sup> Naimacimo eruaillanona, duidimiemo llote:

—O onolli mai oni ñuita. —Iena ñuitajanona jillode.

<sup>11</sup> Nainomo itino iena ciuanona, eo iciritimaci.

—¿Niese Jesúsna nibaiticai? —naiemona coniniri siadotimaci.

*Jesúdi ie doce llofueoicaiganona fetua rafue  
(Mt 10.1-4; Mr 3.13-19)*

<sup>12</sup> Nairui aneduaimo Jesús jaide, Jusiñamui diga ñaillena. Namona naio jiiide.

<sup>13</sup> Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode.

<sup>14</sup> Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé,

<sup>15</sup> Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide.

<sup>16</sup> Judas; naimiedi Jacobo jito. Judas Iscariote micori; naimiedi Jesúsna gaitatimie.

*Jesúdi ailluena cominina llofua rafue  
(Mt 4.23-25)*

<sup>17</sup> Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiaie ite. Naimie llamo cacareillena bitimaci. Naimaci duicomona jiaie jilloiacadimaci.

<sup>18</sup> Jananiai anamo itinomona Jesús jananiaina oni orede.

<sup>19</sup> Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

*Jesús lloga rafue  
(Mt 5.1-12)*

<sup>20</sup> Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoína sedaacana rafuena omoína llofueiticue. Naimiena jitaidomoína, omoína sedaite. Comeciaina facadomoí: “Jusiñamui jitaillacinona dani finonidicai; ia Jusiñamui caina canuamona, iena finoiticai”. Naimie comini omoi illamona, naimie omoína canoite. Iemona caimare iitomoí.

<sup>21</sup> Naimie jitaillacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoí. Omoi sunaia, Jusiñamui omoína sedaite. Ailluena comini jeacino finocana jaidimaci. Iena uiñuamona, sunaitomoí. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoí.

<sup>22</sup> Cuemo omoi duia, duere sefuitomoi. Jiaie comini omoina enoitimaci. Omoina oni dotaitimaci. Omoina jeare ñaitimaci. Cuemo omoi duilla jira, omoina jamaitimaci; ia Jusiñamui omoina caimare itataite.

<sup>23</sup> Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefuia, iocire omoi jai.

<sup>24</sup> Iese iitomoi; ia Jusiñamuina jitañedino ico duere sefuitimaci. Comeciaina facadimaci: “Jusiñamuina jitañedicaí. Marena birui iticaí. Nana cai comeciái jitaillacino birui caimo ite”. Iese birui itimaci; ia Jusiñamui naimacina ico duere finoite.

<sup>25</sup> Jusiñamuimona buena birui jitañedino ico duere sefuitimaci. “Nana cai comeciái jitailla rafue caimo birui illa jira, Jusiñamuimona buena jitañedicaí” raitimaci. Iese birui itimaci; ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitañedicaí” damerie birui raitimaci. Naimaci jeacino facaina sunaiñedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci.

<sup>26</sup> Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damerie birui daje isoidimaci. Jusiñamuina iobitaiacaiñedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

*Jesúdi iba oñenana llua rafue*  
(Mt 5.38-48; 7.12)

<sup>27</sup> Jesús llote:

—Cue lluaana cacajamona, iena ñino. Finuamona omoina enoidinona isirui. Naimacina cano.

<sup>28</sup> Omoi jeare ñaitinona marena ñaino. Omoina jeare finodino facaina Jusiñamuimo omoi jii.

<sup>29</sup> Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiacania, omoimo naimie nia jicañenia, naimie jitailla iniroi baifemo naimiemo feca.

<sup>30</sup> Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno.

<sup>31</sup> Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino.

<sup>32</sup> Naimie cominina omoi illamona, nana comini daje isoi isirui. Omoina isiruitinona omoi isirua, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faiñedomoi. Naimaci isoi itomoi.

<sup>33</sup> Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faiñedomoi. Naimaci isoi itomoi.

<sup>34</sup> Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoina: “Mare”



rañeite. Marañede rafuena finoraini naimacimo rana fecadinomo rana jiaí fecadimaci. Nana cominimo rana omoi fecañenia, marañede rafuena finoraini baífemo fañnedomoi. Naimaci isoi itomoi.

<sup>35-36</sup> Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuriñeno; ia Jusiñamui omoi raise ibaite. Jusiñamui marañedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira marañedinona omoi duenai. Naimie isoi omoi illamona, marañedinodi naimie cominina omoi illana uiñoitimaci. Jusiñamuidi cominina duenaila isoi, cominina omoi jiaí duenai.

*Jesúdi jiaíe cominina mameriñenana llua rafue*

*(Mt 7.1-5)*

<sup>37</sup> Jesús llote:

–Duenailacinona nia llofueiacadicue. Jiaíe cominina mameriñeno. Jiaíe cominina omoi mameria, omoimo ite marañede rafue facaina Jusiñamui omoína duere finoite. Omoimo marañede rafuena bu finoia, iena feita. Iena omoi feitañenia, Jusiñamui omoimo ite marañede rafuena feitañeite.

<sup>38</sup> Jiaíe rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoi. Ie isoide. Jiaínomo marañede rafuena finoñeno; ia naimacina duenailamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

<sup>39</sup> Naimacina iena nia llofuiamona, naimacimo Jesús jiaíe rafuena llote:

–Cue cominina omoi illamona, bie rafuena cacarei. Unaicínodo omoi jaiñenia, uisínidimie isoi itomoi. Uisínidimie jiaíe uisínidimienaa ifonide. Ifo iade, nagamaiaí dafomo uaidiaímaiaí.

<sup>40</sup> Fueotimie ie llofueraíma baífemo uaiñede; iadedi naimie raise fueoia, ie llofueraíma isoi jaite. Raise fueollena, cue uaimo cacarei.

<sup>41</sup> Omoi ecimo itimiemo janore marañedicino illana omoi uiñoia, iemo comecina facañeno; iadedi omoimo ailluena ite marañedicinomo nano omoi comecina faca.

<sup>42</sup> Omoimo marañedicino illamona, ¿ñiese omoi ecimo itimienaa mameritomoi? Omoimo ite marañedicinomo omoi comecina facaacaiñena jira, maredinona abi caitadinodomoi. Omoi comeciaina nano raise fino. Iemei omoi ecimo itimienaa canorenitomoi. Naimie comecina raise canorenitomoi.

*Jesúdi riará llisilla lilla llua rafue*

*(Mt 7.17-20; 12.34-35)*

<sup>43</sup> Jesús nia llofueite:

–Mare riará marañede riará isoi llisiñede. Marañede riará mare riará isoi jiaí llisiñede.

<sup>44</sup> Llisillamona ñie isoide riará illana uiñoticaí. Amena ie llisilla lillamona amena marena uiñooga. Llillamona, amena marañenana jiaí uiñooga. Ecuaimona uvas railla riarana oñedicaí. Monaigimona higos railla riarana jiaí oñedicaí.

<sup>45</sup> Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Marañede comeci iticinomona marañedinie marañede rafuena finocabide.

*Jesúdi naimienaa ñnuana ñaía rafue*

*(Mt 7.24-27)*

<sup>46</sup> Jesús nia llofueite:

–Omoimona damierie cuena: “Caí Nama” raitomoi; iadedi cue llogacinona finoñedomoi.

<sup>47</sup> Diga comini cue dine bitimaci. Cue uaina cacadimaci.

48 Cue uaina #notimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifiñede. Ie isoide. Cue llwana #notimie faifiñeite.

49 Cue uaina #noñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raifiñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue llwana #noñedimie faifite —llote.

## 7

### *Jesúdi capitán mullaimana jillotaja rafue*

*(Mt 8.5-13)*

1 Ie llua fuillamona, Jesús Capernaumo jaide.

2 Nainomo romanos railla nairaimo duide illaima ite. Cien soldaduaina sedauide. Naimiedi capitán. Judíuñedimie. Ie mullaima eo duide. Niade fiodaiacade. Capitán naimiena eo gaide.

3 Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaimana jillotajabillena jitaide.

4 Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaidicaí.

5 Cai nairaina isiruite. Ie ucube diga cai ofiracona finotate.

6 Iena cacajamona, Jesús naimaci diga jaide. Capitán jofomo iairei Jesús ria, capitádi Jesús dine ie nabaiñaiana orede, Jesúmo lollena:

—Maestro, biñeno. Jamai bue cue isoilla jira, cue jofomo biñeno.

7 Jamai bue cue isoilla jira, o dine jiai jaiñedicue. O illanomona o uaido cue mullaima jilloita.

8 Jiaie illaicomini anamo iticue. Naimaci lloga uaina #noticue. Cue anamo jiaie soldaduai illanona, cue uaina #notimaci. Cue anamo cue mullaima illa jira, naimiedi cue uaina #note. O anamo naie duico illa jira, o uaina bene o lloia, cue mullaima jilloite.

9 Iena cacajano, Jesús rajicaide. Oni dobaidajano, naimie diga jaidinomo llote:

—Bie isoidimie cue uaina #notimiena jaca baiñedicue. Cai judíuai cominimona bie isoidimiena jaca iñede. Mai abido jai.

10 Capitámona bitino abido capitán jofomo rillano, mullaima jai jilluana cioidimaci.

### *Jesúdi feciño jitona jillotaja rafue*

11 Jiairuido Naín railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci.

12 Naie nairai ie nasemo naimie iaireicaia, jai fiodaitimiena comini jino atiana ciode. Naie fiodaitimiedi conirue. Ie eidi feciño. Dajede ie jitodi jai fiodaite. Ailluena Naín itino naie feciño diga jaidimaci.

13 Jesús naiñaiñaona ciuanona, naiñaiñaona duenaite. Naiñaiñaona raite:

—Mai eeñeno.

14 Fiodaitimie dine Jesús jaillanona, naimaci ieconi nidadallena, ie uiga rana jetade. Naimiena uitinodi ieconi nidadatimaci. Fiodaitimiemo Jesús llote:

—Mai a rainada.

15 Iena Jesús llua mei, naie fiodaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite.

16 Naieri nana jacinaitimaci. Jusiñamuimo iobillacinona fecadimaci. Raitimaci:

–Jusiñamui facaina lloraima cai motomo ite. Naimie uai eo siño. Naimiena Jusiñamui oretaja jira, Jusiñamui caina birui canoacana jira, iobidicai.

17 Nana Judeamo itino Jesús finoca rafuena fididimaci. Judea enirue fuemo ite nairaiadi jiai fididimaci.

*Jesús dine Juan Bautista micori ie llofueoicaiganona oretaja rafue (Mt 11.2-19)*

18 Juan Bautista micori llofueoicaiganodi nana Jesús finoca rafuena fidiano, iena naimiemo llote. Ie llofueoicaiganomona Juan micoridi menamiena uaidote.

19 Llote:

–Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuriticai?” naimiemo jicano.

20 Jesús dine iaimaiai rillano, Jesúsimo llotiaimaiai:

–Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiena o illana uiñoiacadicai. Imieñediodena, jiaimie billemo nia ocuriticai. Cocomo llono.

21 Jesús dine iaimaiai billa facaiseconi, Jesús diga isoide duicuai illanona jillotate. Jananiai anamo itinomona jananiaina oni jiai orede. Uisinidinona uisina dane ciotate.

22 Ie jira Jesús iaimaiaimo llote:

–Cue lluna cacadomico. Cue finoca rafuena ciodomico. Juan dine abido omico jaillanona, iena naimiemo llono. “Uisinidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci”. Iese naimiemo llono.

23 Jiai llono: “Ñibai nana cue rafuena raise cacaiñedio; ia cuena jaca nia inocana o jaia, caimare iitio”.

24 Iaimaiai abido jailla mei, naimie ecimo ailluena ite cominimo Jesúsdi Juan rafuena llote:

–Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide.

25 ¿Bue ñellena naimie dine jaidomoi? Mare iniroina jítadimiena cioñedomoi. Mare iniroina jítadinona omoi cioacaniadedi, illaicomini dine jaidomoi. Naimacimo ailluena ra ite.

26 Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.

27 Malaquías micori naimiena jaie cuega: “Jusiñamui raite: ‘Ero, o uicodo cue rafuena lollena, damiena oretaiticue, comini comeaiaina marecinona duiñollena’” cuega. Malaquías Juan Bautistana cuete.

28 Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

29 Naimacina navui Juan bautizaja jira, nainomo ite comini iena caca-jano, Jusiñamuimo iobillacinona fecadimaci. Gobierno ucube orainidi jiai fecadimaci;

<sup>30</sup> iadedi fariseuai iobillacinona fecañedimaci. Moisés llogacinuaina llo-fueraini jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloña jira, Juan naimacina navui bautizañede.

<sup>31</sup> Jesús llote:

—Cuena inoñedinona lloiticue: Ero, omoina ñaiticue.

<sup>32</sup> Jifanote uruiaí isoidomoi. Uruiaí jifanoiacania, naimaci nabaiñiaina uaiduanona, raitimaci: “Omoi diga jifanoiacadicaí; iadedi cai diga jifanoiacañedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaí” raitimaci.

<sup>33</sup> Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uarico isoi ite” raitimaci.

<sup>34</sup> Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”.

<sup>35</sup> Iese raitomoi; iadedi Jusiñamuina inotinodi cue finoca rafuena marenana uiñotimaci.

### *Jesús Simón jofomo illa rafue*

<sup>36</sup> Jiaruido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite.

<sup>37</sup> Jesús guitemo, daje riño fo jaide. Naiñaiñodi marañede rafuena finoraiño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga.

<sup>38</sup> Judíuai aciaita jaca guisoidimaci. Jinafo dine eilli jonesuidimaci. Fo jailano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascmona soride rana totade. Naimiena naiñaiño isiruillamona, iese naiñaiño finode.

<sup>39</sup> Iena ciuanona, Simón dama comecina facade: “Bimie Jusiñamui facaina lloraimadena, nie isoide naimiena jetade riñona niade uiñote. Naimiedi naiñaiño marañede rafuena finoraiñona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloraimañede”.

<sup>40</sup> Jesús naimie comecina facajacinona uiñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

<sup>41</sup> Jesús llote:

—Damie menamaiaimo ucubena fecade. Damiemmo quinientos diga ucubena fecade. Jiaimemo cincuenta diga ucubena fecade.

<sup>42</sup> Ie iade, naiena abido meidonidiaimaiaí. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, ¿naimieca ucubena fecadimiena eo isiruite?

<sup>43</sup> Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie. Jesús dinena raite:

—Raise cue uaina fairiotio.

<sup>44</sup> Iemei Jesúsdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocolena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote.

<sup>45</sup> Naiñaiño cue ecimo fo billanona, cue eillina diga icaiño llibanote.

<sup>46</sup> Naiñaiño cue eillimo soride rana totade.

<sup>47</sup> Naiñaiñomo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñoticaí. “Jeacino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

<sup>48</sup> Naiñaiñomo llote:

—O jeacino jai oni dotaca. Iena jai feitaticue.

<sup>49</sup> Jiaíno nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

<sup>50</sup> Jesús dinena riñomo llote:

—Cuena o ñnua jira, o jeacinomona jai jillodio. Mai uri o jaillano o i.

## 8

### *Dajerie riñoniai Jesúna canua rafue*

<sup>1</sup> Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui ñibeimo naimaci comeciai iuaina meiduana llofujete. Ie doce llofueoicaigano naimie diga jaidimaci.

<sup>2</sup> Dajerie riñoniai jiai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.

<sup>3</sup> Juana ite. Naiñaiño inidi Chuza. Herodes railla illaíma ecimo naimie maijuide. Susana ite. Jiaie riñoniai jiai itimaci. Naiñaiñuai ramona Jesúna canouidimaci.

### *Jesúdi trigona judaídímiena llua rafue*

(Mt 13.1-9; Mr 4.1-9)

<sup>4</sup> Diga nairaiamona ailluena comini Jesús dine billanona, naimacimo llote: —Jusiñamui omoína sedaacana omoi fueollena, bie rafuena lloiticue.

<sup>5</sup> Damiedi trigona judaíaide. Naimie judaíamona naisomo janore iduai juide. Comini nainomo jaillano, iena saitadimaci. Bai jailla mei, sillíñiai iena jiai guisaibite. Ie jira sicoñede.

<sup>6</sup> Nofiemo jiaie iduai juide. Sicode; iadedi jinui raise iñena jira, duide.

<sup>7</sup> Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede.

<sup>8</sup> Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ñno.

### *Jesús ie como lloga rafuena llofuia rafue*

(Mt 13.10-23; Mr 4.10-20)

<sup>9</sup> Jesúsimo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

<sup>10</sup> Uai ote:

—Jusiñamuidi omoína ie sedaacana rafuena jai uiñotade. Jiaie iena uiñoñedomoi. Jiaie cominina iena nia uiñotañede. Ie jira bie isoidicinodo

naimacimo lloticue. Cue siño finoca rafuena ciodimaci; iadedi iena naimaci ñnoñena jira, uiñoñoeno jaidimaci. Cue llofuijana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

<sup>11</sup> 'Omoína cue como lloga rafuena llofueiticue. Naie iduai di Jusiñamui uai.

<sup>12</sup> Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñnoi raillano, naimaci naiemona jilloi raillanona, Taife naimaci comeciaino cacaja uaina ñnotañede.

<sup>13</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci.

<sup>14</sup> Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci.

<sup>15</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciainona ñnocana jaidimaci. Eo lliside isoidimaci. Jusiñamui jitaila rafuena sefuiruiñoeno ñnocana jaidimaci.

*Jesús ie rafue llocana jailla lua rafue  
(Mr 4.21-25)*

<sup>16</sup> Jesús nia llote:

—Lamparín bu unia meinoconi, jiaie ra bide anamo rainañega; iadedi jofo jeraimo lligaiñoollena, nainomo bite comini raise cioillena, ie rairanomo rainaca.

<sup>17</sup> Ie isoide. Cue rafue llocana jaia, comini comeciai iticinona uiñotade. Unaicino naimaci cacajamona, damierie ñnotimaci. Damierie ñnoñedimaci.

<sup>18</sup> Cue lluomo raise cacarei. Iena omoi ñnuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi ñnoñenia, Jusiñamui naimiena faifitaite.

*Jesús dibeimo itinona ñaia rafue  
(Mt 12.46-50; Mr 3.31-35)*

<sup>19</sup> Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci.

<sup>20</sup> Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

<sup>21</sup> Jesús uai ote:

—Jusiñamui uaina cacajamona, iena ñnotino ieca cue eidi, cue amatiaidi.

*Jesúdi jorai baguana llucaitaja rafue  
(Mt 8.23-27; Mr 4.35-41)*

<sup>22</sup> Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci.

<sup>23</sup> Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

<sup>24</sup> Jesúsna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llucaitade. Ieconi aifi llucaide. Bagoñede.

<sup>25</sup> Naimacimo jicanote:



—¿Bue ñellena cuena ñnoñedomoi? —Naimiena jacinailamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

*Jesúdi Gadara railla eniruemo illa rafue*

*(Mt 8.28-34; Mr 5.1-20)*

<sup>26</sup> Ruica dibellemo ridemo, Gadara railla eniruemo sijidimaci. Galilea facaisemo ite.

<sup>27-29</sup> Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo noñe moto ifuaimo i-isoide. Ebona cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue ññenanomo Janaba naimiena jaitate. Iese suisoide.

Jesúna naimie cianona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Ñiese cuena nibaiacadio? Cuena duere finoñeno.

Iese raite, Janaba naie ñimamona oni jai oretajana Jesús llua jira.

<sup>30</sup> Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite.

<sup>31</sup> Jesúmo duere jicanoside, iraimo naimacina nia oretañellena.

<sup>32</sup> Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite.

<sup>33</sup> Ieconí ñimamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

<sup>34</sup> Iena cianona, chanchuai sedaraini naimaci nairai dine aisicana jaidimaci. Naie rafuena llocana jaidimaci.

<sup>35</sup> Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie ñiroina jai jítade. Naimie jai uaricoñede. Iena cianona, Jesúna jaciruitimaci.

<sup>36</sup> Naie rafuena ciodinodi como bitinomo naimie jilluana llotimaci.

<sup>37</sup> Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica díbeimo abido jaillena.

<sup>38</sup> Ieconí jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite.

<sup>39</sup> Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

*Jesúdi mena duide riñona jillotaja rafue*

*(Mt 9.18-26; Mr 5.21-43)*

<sup>40</sup> Ruica díbeimo Jesús abido ria, naimie abido billemo naimaci ocuirilla jira, ailluena comini naimiena feiñotimaci.

<sup>41</sup> Jairona mameciredimiedi Jesús dine bite. Naimiedi judúuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote.

42 Dañaiñode ie jisa. Doce años naiñaiñodi ite. Niadedi fiodaiacade. Ie jira Jesúmo jicanuaibite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñaijisaide.

43 Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide.

44 Jinafo dinena billanona, Jesús iniroi fueda jetade. Iemona diailladi faionocaide. Jillode.

45 Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicaí.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

46 Jesús uai ote:

—Damie cuena jetade. Cue abimona cue uai jaillamona, naimie jai jillode.

47 Jaive duidiñaiñodi Jesús naiñaiño uinuana uinote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño ieconi jilluana llote.

48 Jesús dinena naiñaiño raite:

—Ñoo, cuena o inua jira, jai jillodio. Mai jaillanona, uri o i.

49 Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fodaite. Maestrona ñaidoño.

50 Iena Jesús cacajano raite:

—O comeci jarire iño; ia cuena nia ino. Naiñaiño jilloite.

51 Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide.

52 Nana nainomo itino eecuinaidimaci. Failliñaidimaci. Jesús dinena raite:

—Omoi eeño. Cuemona naiñaiñodi fiodaiñedes. Jamai inide.

53 Jai fiodatedi: “¿Bue ñelli inide raitio?” raillanona jaisitimaci.

54 Jesús fo jailla mei, naiñaiño onollina llinocaida, raite:

—Jitaibici, mai naidacai.

55 Ieconi naiñaiño joreño abido bite. Naidacaide. Jesús llote:

—Guillena naiñaiño eca.

56 —Naiñaiño moo, ie ei diga, rajicaidiaimaia. Jesús iaimaiaimo llote:

—Bie rafuena bumo lloño.

## 9

### *Jesúdi ie llofueoicaiganona oretaja rafue*

*(Mt 10.5-15; Mr 6.7-13)*

1 Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaina oni oretallena, iena jiai iñonocaide.

2 Naimacimo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. Duidinona jillota.

3 Omoi jaia, buena uineno. Omoi abina ruidollena, jiguidana uineno. Ailluena rana omoi uinellena, bolsana uineno. Llomenicono uineno. Ucubena uineno. Guille ifo meidollena, rana uineno. Meidolle iniroina uineno.

<sup>4</sup> Naie nairaïmo omoi jaia, daacomo omoi ri. Naie nairaïmo omoi ille dinori, daacomo omoi i.

<sup>5</sup> Omoïna comini feiñoñenia, naimaci nairaïmona omoi jaia, omoi eilliaïmo ite jearacuaina oni jaidino. Nicino naimacimo illana naimaci uiñollena, omoi eilliaïna oni jaidino.

<sup>6</sup> Jesús naimacimo llua mei, jaidimaci. Jusiñamui rafuena lluanona, diga nairaïmo jaidimaci. Diga comini imaci duicomona jillotatimaci.

*Juan Bautista micori fiodailla rafue*

*(Mt 14.1-12; Mr 6.14-29)*

<sup>7</sup> Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri ñede.

<sup>8</sup> Jiaie comini raisoidimaci:

—Elías jai bairede.

Jiaïno raisoidimaci:

—Fiodaillamona Jusiñamui facaina jaie lloraima micori jai jillode.

<sup>9</sup> Jesúna fidiano, Herodes comeci uri ñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúna cioacade.

*Jesús cinco mil iñiaïna ecaja rafue*

*(Mt 14.13-21; Mr 6.30-44; Jn 6.1-14)*

<sup>10</sup> Jesús llofueoicaigano abido bia, Jesúmo naimaci finoca rafuena llotimaci. Ie mei dani ie llofueoicaigano diga Jesús Betsaida railla nairaï dine jaide;

<sup>11</sup> Iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeïmo naimaci comeciaï iuaina meiduana llofue. Duidinona jiaï jillotate.

<sup>12</sup> Jitoma ana itemo, ie doce llofueoicaigano naimie dine billanona, raitimaci:

—Jofue bene ñede. Bene jaca buedi ñede. Ianori ite nairaïaïmo, ianori ite jofuemo naimaci inillena, naimaci guille ollena, bie cominina abido oreta.

<sup>13</sup> Jesús uai ote:

—Naimacina bene eca.

Uai onaisite:

—Dani caïmo ite cinco llomenico mena lliciaï diga. Nana naimaci guillena, ¿guille cai ìballena nibaï jitaïdio?

<sup>14</sup> Cinco mil iñiaï nainomo illa jira, ailluena guille jitaillana uiñotimaci. Naimaci ainiaï, imaci uruiaï diga, jiaï itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

<sup>15</sup> Iena finodimaci.

<sup>16</sup> Naie cinco llomeniconona, naie mena lliciaï diga Jesús uanona, monamo eruailanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena.

<sup>17</sup> Nana guillanona monidimaci. Monillamona, fiebide guillena ìraïdimaci. Doce cirigaïaïmo oruitatimaci.

*Pedro Jesúna llua rafue*

*(Mt 16.13-19; Mr 8.27-29)*

<sup>18</sup> Jiaïruido Jesús ie Moomo jia facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

<sup>19</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odi Eladio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

<sup>20</sup> Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai Jilloitaramadio. Jusiñamui facaina lloraini micoriai o billena jaie llotimaci. Jusiñamui ona orede.

*Jesús ie fiodaillena llofuia rafue*

*(Mt 16.20-28; Mr 8.30-9.1)*

<sup>21</sup> Jesús naimaci como llogacino bumo llwana rairuide.

<sup>22</sup> Llote:

—Cai judiuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

<sup>23</sup> Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fodaite. Bu iese jaiacania, cue dibeimo naimie iite.

<sup>24</sup> Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite.

<sup>25</sup> Cue cominina bu jaiñenia, nibai eo duere sefuiñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite.

<sup>26</sup> Cuena bu meiruia, cue uaina bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue.

<sup>27</sup> Uanaicinona omoimo lloticue. Omoimona dajerie nia fiodaiñeitomoimo, illaimana cue bairellena cioitomo.

*Jesús abi meidocaila rafue*

*(Mt 17.1-8; Mr 9.2-8)*

<sup>28</sup> Ocho digarui illanona, Jusiñamuimo jillena, anedumo Jesús jaide. Naimie diga jaillena, Pedrona uite. Juan jiai uite. Jacobona jiai uite. Jiaie llofueoicaiganona uiñede.

<sup>29</sup> Naimie jiamona naimie abi meidocaide. Naimie iniroi naie dacaiño eo userecaide.

<sup>30</sup> Iecon menamie bairiano, Jesús diga ñaitiaimaiai. Moisés micori joreño ite. Elías jiai ite.

<sup>31</sup> Ebire bairediaimaiai. Jesús Jerusalémo fiodaille rafuena ñaitimaci.

<sup>32</sup> Ie facaiseconi Pedro ie nabaiñiai diga jai inidimaci; ia casillamona, Jesús ebirenana cioidimaci. Jesús ecimo itiaimaiaina jiai cioidimaci.

<sup>33</sup> Iaimaiai jaiacania, Pedro Jesúsomo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie. —Iese raite; ia ie ñaia rafuena raise uiñoño jamai ebena ñaite.

<sup>34</sup> Iena naimie nia llwanona, uillie billamona, naimacina ibaide. Uillie ibaibillaconi jacinaitimaci.

<sup>35</sup> Uilliemona Jusiñamui naimacimo llote:

—Bimiedi cue Jito. Naimiena fetodicue, cue jitaille rafue finollena. Naimie llwana omoi cacareillanona, iena ñno —llote.

<sup>36</sup> Jusiñamui llua mei, dama Jesúna dane cioidimaci. Jesús diga itino naimaci ciua rafuena naie facaiseconi jaca bumo lloñedimaci.

*Jesúdi Janaba anamo itimiena jillotaja rafue*

*(Mt 17.14-21; Mr 9.14-29)*

<sup>37</sup> Ie areruido anedumona ana bitimacimo, ailluena comini naimacimo dafaiñide.

<sup>38</sup> Cominimona damie ado llote:

—Maestro, cue dajede cue jito duillana jibuisaibi.

<sup>39</sup> Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede.

<sup>40</sup> Janabana oni oretallena, o llofueoicaiganomo jicannoticue; ia oretanidimaci.

<sup>41</sup> Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue? —Naie duidimie moomo llote—, O jito cue dine mai ati.

<sup>42</sup> Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade.

<sup>43</sup> Comini iena ciuanona, Jusiñamui siño uai naimiemo illari raijicaidimaci.

*Jesús ie fiodaillena dane llofuia rafue*

*(Mt 17.22-23; Mr 9.30-32)*

Naimaci nia raijicaia, Jesús ie llofueoicaiganomo llote:

<sup>44</sup> —Cue lluaña feitaño. Monamona billanona, imana jaidicue; ia Jusiñamui jitailla jira, jiaruido illaicomini cuena meineitimaci.

<sup>45</sup> Jesús lluaña raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiai meiruitimaci.

*Jesús ie llofueoicaigano moto imiena ille rafue*

*(Mt 18.1-5; Mr 9.33-37)*

<sup>46</sup> Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

<sup>47</sup> Jesús naimaci comeciái facajacinona uiñuamona, nainomo ite cominimona daje urue bai jainanocaida, naimaci motomo naimiena jonete.

<sup>48</sup> Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

*Jesúdi ie dibeimo itinona llua rafue*

*(Mr 9.38-40)*

<sup>49</sup> Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena cioidicaí. Cai diga naimie jaicabiñena jira, iena finuana rairuidicaí.

<sup>50</sup> Jesús dinena uai ote:

—Naimiena rairuiño. Cai dibeimo itimiedi cai facaisena ite. Ie jira naimie isoidinona rairuiño.

*Jesús dinena Jacobo, Juan iaímaiaí lletaja rafue*

<sup>51</sup> Monamo abido Jesús jaillirui iaírei ia, Jerusalémo jaiacanamo naimie comecina facade.

<sup>52</sup> Ie jira dajeriena uicodo oretate. Ie inillinona jenollena, Samaria railla nairaimo jaidimaci;

<sup>53</sup> iadedi Jerusalémo naimaci jailla jira, judíuaiñedinona samaritanodi gaiñena jira, Jesús llofueoicaiganona feiñoiacaiñedimaci.

<sup>54</sup> Iena fidianona, Jacobo, Juan diga, Jesúmo jicanotiiaimaiaia:  
—Nama, ¿bie comini jobaillena, monamona irai billena Jusiñamuimo coco jicanuana jitaideo?

<sup>55</sup> Iaimaiaimo eruailanona, Jesús dinena iaiaimaiaimo riire lletade:

—Dama ite. Iena jitañedicue.

<sup>56</sup> Ie mei inillena jiaie illanomo jaidimaci.

### *Jesús ie llofuegamiena damie jaillena ie rafue*

*(Mt 8.19-22)*

<sup>57</sup> Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadiecue. O llofuegamiena jaiacadiecue.

<sup>58</sup> Jesús uai ote:

—Janorede ocainaiadi joforedimaci. Silliñiaia jillainiairedimaci; iadedi jofonidiecue. Monamona billanona, imana jaidiecue; iadedi buenidiecue. Jofonidiecue. Cue diga o jaiacania, bue isoidena cuemona oñeitio. Iemo o comecina raise faca.

<sup>59</sup> Jiaimie Jesúmo llote:

—Cue llofuegamiena o jaillena, cue diga mai bi.

Naimie uai ote:

—O diga jaitiecue; ia cue moo nia fioidañena jira, o diga nia jaiñeitiecue.

<sup>60</sup> Jesús naimie dane llote:

—Dama ite. Cue diga mai bi. Cuena inoñedinodi o moona canoredimaci. Naimie fioidaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie debeimo naimaci comeciaia iuaina meiduana llocana cue diga mai o bi.

<sup>61</sup> Jiaimie Jesúmo llote:

—O llofuegamiena jaiacadiecue: iadedi cue jofomo nano jaiacadiecue, cue cominina facadollena.

<sup>62</sup> Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

## 10

### *Ie rafuena lollena, Jesús setenta digamiena oretaja rafue*

<sup>1</sup> Ie llofueganona llofuia mei, naimacimona Jesús setenta digamiena fetode. Naga naimie jaiacana nairaimo menamieriena oretate.

<sup>2</sup> Naimacimo llote:

—Diga comini ite, naimacina Jusiñamui rafuena inotallena; iadedi eo janore lloraini ite. Jusiñamuimo jicano, jiaie llorainina naimie oretallena.

<sup>3</sup> Mai jai; iadedi abi rairuicana jai. Toica llaudaiaia janallari illanomo illa isoi, omoina orediecue.

<sup>4</sup> Ucubena uñeno. Ailluena rana omoi uñellena, bolsana uñeno. Meidolle zapatona uñeno. Naisomo bu omoimo dafaifia, are ñañeno.

<sup>5</sup> Bu ie jofomo omoi ria, jofomo itinomo marena uaido.

<sup>6</sup> Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimieimo lloñeno.

<sup>7</sup> Nie nairaimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno.



<sup>8</sup> Nie nairai omoi ria, omoina naimaci feiñoia, omoi ecalle rana uaitañoeno guiño.

<sup>9</sup> Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comeciai iuaina meido”.

<sup>10</sup> Nie nairaimo omoi ria, omoina naimaci feiñoñenia, ie naiso motomo jaillanona llono:

<sup>11</sup> “Omoi naisomo cai eillimo ite jearacuai jai jaidinoticaí, marañede rafue omoimo illana omoi uiñollena. Jusiñamui omoina sedaacade; ia iena jitaiñedomoi” llono.

<sup>12</sup> Sodoma nairai jaie eo marañede. Jusiñamui iena jaie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

*Jesús ie ñnoñedinona llua rafue  
(Mt 11.20-24)*

<sup>13</sup> Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñnoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuai meiduana jiaie comini uiñotallena, ebinide iniroina jitajanona, jusefo naimaci ifogiaimo jonetimaci.

<sup>14</sup> Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci.

<sup>15</sup> Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci.

<sup>16</sup> Omoi llua naimaci cacaacania, cuena cacadimaci. Omoi llua naimaci jitaiñenia, cuena jitaiñedinomaci. Cuena jitaiñedinodi cuena ore-tagamiena jiai jitaiñedinomaci. —Jesús naie fetocanomo iese llua mei, oni jaidimaci.

*Ie setenta fetocano abido billa rafue*

<sup>17</sup> Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

<sup>18</sup> Jesús naimacimo llote:

—Monamona Taife borilla isoi jaie ana dotajana ciodicue. Iemona cue uai naimie uai baifemo faiana uiñoticue.

<sup>19</sup> Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedinomaci omoi anamo jai itataticue. Omoina niese nibaiñeitimaci;

<sup>20</sup> iadedi omoi uaina jananiai ñnua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

*Jesús ie Moo diga ñaia rafue  
(Mt 11.25-27; 13.16-17)*

<sup>21</sup> Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

<sup>22</sup> Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiena uiñotadicue. Ie muidona naimiena uiñotomoi.

23 Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

24 Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

*Jesús cai ecimo itimiena isiruillana llua rafue*

25 Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

26 Jesús uai ote:

—¿Ni ese Moisés micori llogacinuai iena raite?

27 Uai ote:

—Moisés micori jaie cuega: “O jitailla jira, o comecina facajamona, cai Nama Jusiñamuina nana o comeci jitaillamona naimiena eo isirui. O abina o isiruilla isoi, o ecimo itinona isirui”.

28 Jesús dinena raite:

—Marena cue uai otio. Iena o finoa, Jusiñamui illanomo jaca iitio.

29 Naie llofueraima Jesúmo dane jicanote:

—¿Bu cue ecimo itino?

30 Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite.

31 Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide.

32 Dallu illanona, Jusiñamui jofomo maijiraime jiai jaide. Fagamiena ciuanona, ecido jiai jaide.

33 Ja muidomo Samaria nairai imie jaide. Naie nairaina enoidomoi. Fagamiena naimie ciuanona, naimiena duenaitie. Iemona naimie canoacade.

34 Naimie dine jaillano, ie bofellañona manode. Jiai maitade. Ie burro emodomo jonecaida, naimiena uite. Inillinomo rilla mei, nainomo naimiena sedade.

35 Ie areruido ie inia jofo namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide.

36 —Naie llofueraimamo Jesús dinena jicanote— ¿Fagamie ecimo itimiedi bu?

37 Uai ote:

—Fagamiena duenaitimie.

Jesús raite:

—Jai raise uinotio. Mai jai. Ie isoi finocana o jai.

*Jesúdi Marta iañuui María jofomo illa rafue*

38 Nia macaritimacimo, comini illanomo Jesús ie llofueoicaigano diga ridimaci. Marta raillañaño ie jofomo naimiena feiñote.

39 Naiñaño euiñodi María. Jesús ecimo llaribamo María ana raide, naimie llofuiacinona cacareillena;

40 iadedi Martamo maijille eo illa jira, naiñaño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiño cano” naiñaño lono.

41 Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca.

<sup>42</sup> María iemo comecina jai facade. Naiñaiño cue llofuiana nano cacaia-cade. Ona canollena naiñaiñomo lloñeiticue.

## 11

*Jusiñamuimo Jesús jia rafue*

*(Mt 6.9-15; 7.7-11)*

<sup>1</sup> Jiairuido ie Moo diga Jesús ñaia, ie llofueganomona damie naimiemo llote:  
—Nama, jiana caina llofue, ie llofueoicaiganona Juan Bautista micori llofuia isoi.

<sup>2</sup> Jesús uai ote:

—Omoi jia, iese omoi jia:

Ore Moo, comini ori iobidesa.

O illaimana jira, nana cominina o anamo raire itata.

O jaienisa o jitaillacinona finua isoi, cominina o jitaillacinona finota.

<sup>3</sup> Nagarui guille caimo itata.

<sup>4</sup> Caina jeare jaino finoa, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

<sup>5</sup> Iena naimacina nia llofuellena, Jesús jiaie rafuena llote:

—Naióna mona moto llomenicono jicallena, o nabai dine o jaia, ado lloitio: “Nabai, daje amani llomenicono jitaidicue.

<sup>6</sup> Jiaie nabai cue jofomo como ride. Jaca cuemo buedi inede, naimiena cue ecallena”.

<sup>7</sup> Ie jofo jeraimona o nabai fairioite: “Cuen auidoño. Cue nasedi jai cue ibaica. Cue uruai jai inidimaci. Jiai inidicue. Llomenicono omo fecallena casiacañedicue”.

<sup>8</sup> Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitaile rana fecaite.

<sup>9-10</sup> Daje ra omoi faifa, iena jenodomo. Raise jenoia, iena baitomo. Damiena omoi jenoia, naimie illanomo jaidomo. Nainomo naimiena baillamona, omona feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite.

<sup>11</sup> ‘Ero, omoimona ie moomo llomenicono ie jito jicaia, noficina fecañede. Llicaiña jicaia, jaiona fecañede.

<sup>12</sup> Jigina jicaia, acaidona fecañede.

<sup>13</sup> Jeacinona finocabidomo; iadedi omoi uruaiimo mare rana fecacabillana uiñotomo. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreña itataite.

*Comini Jesúsna jeare ñaia rafue*

*(Mt 12.22-30; Mr 3.19-27)*

<sup>14</sup> Jiairuido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie iima ñainide. Janaba oni jailla mei, naimie ñaite. Ie jira comini raijicaidimaci;

<sup>15</sup> iadedi dajerie raitimaci:

—Beelzebú anamo bimie illamona, Beelzebú uaido jananiña oni orede —raitimaci. Beelzebúdi Janaba comini.

<sup>16</sup> Jaino naimiena facaciacasite. Raitimaci:

—Siño uai omo ia, Jusiñamuina siño rafuena finota.

<sup>17</sup> Naimaci comeciña Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainainidimaci. Oni jaidimaci.

<sup>18</sup> Ie isoide. Beelzebú uaido jananiaina, omoi lua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci.

<sup>19</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi.

<sup>20-22</sup> Jiaie rafuedo iena lloiticue. Ero, ie rana raise riidumona, mairidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baifemo mairidimie bia, naimiena emodofillamona, ie rana fiñede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llwana uiñotomoi.

<sup>23</sup> 'Cue dibeimo iñedimie cuena enoide. Cue dibeimo cominina itañedimiedi naie cominina cuena iñotañede.

*Janaba anamo illamie rafue  
(Mt 12.43-45)*

<sup>24</sup> Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comeciaina facade: “Navui cue anamo illamie dine abido jaiticue”.

<sup>25</sup> Abido naimie bia, naie ima comeci namanidena naimie baite.

<sup>26</sup> Iemei oni jaillanona, jiaie siete jananiaina naimie diga atide, naimaci anamo naie ima illena. Naie siete jananiaina naimie baifemo marañedimaci. Iemona naie ima eo fodo jaide. Ie isoide birui ite marañede comini. Cue rafue naimaci iñonñenia, eo fodo jaitimaci.

*Daje riño Jesús eina marena ñaia rafue*

<sup>27</sup> Cominimo Jesús llotemo, comini motomona dañaiño Jesúsimo llote:

—O ei caimare illesa. Naiñaiñomona comuidio. Naiñaiño monoi jirodio. Naiñaiño caimare illesa.

<sup>28</sup> Jesús uai ote:

—Marena llotio; ia Jusiñamui uaina naimaci cacajamona, iena iñuamona, jiaio eo caimare iitimaci.

*Dajerie Jesús siño rafuena finuana jitailla rafue  
(Mt 12.38-42; Mr 8.12)*

<sup>29</sup> Ie facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca.

<sup>30</sup> Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci.

<sup>31</sup> Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena iñonñedomoi. Omoi comeciaina icinuaina birui omoi meidoñena jira, Jusiñamui uicomo nana

comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena ñnoñedomoi?” omoina ico ñaite.

<sup>32</sup> Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena ñnoñedomoi.

*Jesús comini illa rafue  
(Mt 5.15; 6.22-23)*

<sup>33</sup> Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena.

<sup>34</sup> Omoi uisi diga rana ciodomoi. Omoi uisi maraiñenia, rana raise cioñedomoi. Ie isoide. Omoi comeci maraiñenia, maraiñedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi.

<sup>35</sup> Ie jira omoi comeciaina raise fino, cue rafuena omoi raise ñnollena.

<sup>36</sup> Nana omoi comeciai marena ia, cue rafuena ñnocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

*Jesúdi judúuai illaicominina ñaia rafue  
(Mt 23.1-36; Mr 12.38-40; Lc 20.45-47)*

<sup>37</sup> Cominina Jesús llofuia mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide.

<sup>38</sup> Naimie nia guiñenia, naimaci einamací llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraima. ¿Ñiese cai einamací llogacinodo jaiñede?”

<sup>39</sup> Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciai jearede.

<sup>40</sup> Abi uiñoñedomoi. Jusiñamui omoi abiaina omoi comeciai diga finode. Omoi finoca rafuena uiñote. Omoi comeciaina facajacinona jiai uiñote.

<sup>41</sup> Omoi comeciai marena ia, jiaie cominina canodomoi. Iemona Jusiñamuimona omoi abi jiai mare.

<sup>42</sup> Fariseuai, omoimo rafuena lloiticue. Nana omoi illimo ite ramona Jusiñamuimo janore jisa feca-fecacabidomoi; iadedi jiaie cominimo mare rafuena raise finoñedomoi. Jusiñamuina jiai raise isiruiñedomoi. Nana naie isoide rafuena omoi jiai finua.

<sup>43</sup> Comini omoiiri acarillena, ofiracomo uicomo raiacadomoi. Níne omoi macaria: “Jamai bue isoñedicai” omoi comeciaina facajamona, jiaie comini omoina uaiduana gaidomoi. Iese omoi jailla jira, Jusiñamui omoina duere finoite.

<sup>44</sup> “Bainino ite raiiafo emodomo comini uiñoñoeno macarillamona, naimaci abi jai jearede” raitomoi. Bainino ite raiiafo isoidomoi. Omoi diga jiaie cominidi omoimo ite jeacinona uiñoñoeno nabairillamona, jeacinona jiai finodimaci. Iese omoi finocana jaia, Jusiñamui omoina duere finoite.

<sup>45</sup> Naie facaise Moisés llogacinuaina llofueraimona damie Jesúmo llote:

—Iese o lloia: “Jeacono finodomoi” caina jiai llotio.

<sup>46</sup> Jesús uai ote:

—Jusiñamuimona jiai duere sefuitomoi. Omoi einamací llogacínuaído raise naimací jaillena, diga rafue comíni finuana jitaídomoi; iadedi iedo naimací raise jaillena, naimacina jaca canoñedomoi. “Jusiñamuina eo raise sedadicaí” comecina facadomoi.

<sup>47</sup> Omoi jaiagaidi Jusiñamui facaina llorainina meinetimaci. Naie lloraini micoriai raiafuaí birui marena finodomoi;

<sup>48</sup> iadedi naimací micoriai llogacínuaído omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoína duere finoite.

<sup>49</sup> Omoína Jusiñamui abi uiñuamona jai llote: “Cue rafuena lllollena, naimací dine cue facaina llorainina oretaiticue. Cue rafuena eo uiñotínona jiai oretaiticue. Dajeriena meineitimaci. Jiaínona duere finoitimaci”.

<sup>50</sup> Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite.

<sup>51</sup> Abel micori jaie ite. Ie ama naimiēna meinete. Naimie facaisemona omoi jaiagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiēna meinetimaci. Omoimona Jusiñamui birui iba oite.

<sup>52</sup> Omoi llofuiamona comíni Jusiñamui rafuena uiñoñedimaci. Jusiñamui rafuena raise uiñoñedomoi. Jiaíno iena raise uiñuana jitaíñedomoi. Iese omoi jailla jira, Jusiñamui omoína duere finoite.

<sup>53</sup> Fariseo jofomona Jesús jailla mei, fariseuai comíni icirillamona, Jesús mo diga rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci.

<sup>54</sup> Naimie raise uai oñedena, naimiēna duere finoacadimaci.

## 12

### *Jesúdi mareuidínona abi caitadínona llofui rafue*

<sup>1</sup> Ie facaiseconi eo ailluena comíni Jesús dine ofidimaci. Ailluena illa jira, conini eilliaímo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicaí” raitimaci; iadedi mareuidínona abi caitadimaci. Naimacimona abina rairui.

<sup>2</sup> Naimací birui finoca rafuena birui bainino finodimaci; ia Jusiñamui naimací comeciaí iticínona íco uiñotaite.

<sup>3</sup> Ero, cue rafuena birui anado llocana jaidomoi; ia íco marefodo iena llocana jaitomoi.

### *Jesúdi jaciruiñeno llofui rafue*

*(Mt 10.28-31)*

<sup>4</sup> Ie llofueganomo Jesús llote:

—Cue nabaiñiaídomoi. Omoína meineiacadínona jaciruiñeno. Omoi abina meineredimaci; ie iadedi omoi joreño meinenidimaci. Omoína naimací meinia, omoi joreño Jusiñamui dine jaite. Iena uiñuamona, omoi meineiacadínona jaciruiñeno.

<sup>5</sup> Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiēmo ite. Ie jira naimiēna jacirui.

<sup>6</sup> Ero, dabecuiro janorede sillina fecadomoina, eo janore íbaca. Silliñiaí eo janore raífide; iadedi Jusiñamui naimací illana uiñote.

<sup>7</sup> Ero, niga ífotirai omoímo illana Jusiñamui jiai uiñote. Naimiedi omoína sedajana jiai uiñote. Silliñiaí baífemo Jusiñamui isiruigaomoi. Omoi duere finoacadínona jaciruiñeno. Jusiñamui jitaíñenia, omoímo jaca buena suiñeite.



*Jesús naimi ena janoñenana llofuia rafue  
(Mt 10.32-33; 12.32; 10.19-20)*

<sup>8</sup> Ie llofueoicaiganomo Jesús nia llote:

—Cue rafuena omoi llumona, jiaño omoína duere finoitimaci. Cuen a birui omoi janoñenia, nana comini Jusiñamui jaienisaí uicomo íco ía, nainomo omoína janoñeticue. “Cue cominidomoi” omoína raiticue.

<sup>9</sup> Cuen a birui omoi janoía, nana comini Jusiñamui jaienisaí uicomo íco ía, nainomo omoína janoíticue. “Cue cominiñedomoi” omoína raiticue.

<sup>10</sup> Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñoña jeare ñaitimie jeacinona feitañeite.

<sup>11</sup> Cue rafuena omoi llua muidona, duere sefuitomoi. Illaicomini dine omoína llogidollena comini uia, omoi abi riidollicinomo omoi comeciaina jarire facañeno.

<sup>12</sup> Naie facaiseconi Jusiñamui Joreño omoi abi riidollicinona uiñotaite.

*Jesúdi raruiaí eo uamona abí rairuillana llofuia rafue*

<sup>13</sup> Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

<sup>14</sup> Jesús uai ote:

—Juezñedicue. Bie isoide rafue cuemo duiñede.

<sup>15</sup> Ie ecimo itinomo llote:

—Ero, rana nicidoñeno. Ailluena ra omoímo illamona, Jusiñamui illanomo riñeitomoi.

<sup>16</sup> Iena omoi raise uiñollena, jiaie rafuedo iena lloíticue. Ucuberedimiedi ie illimona ailluena rana ote.

<sup>17</sup> Ie jira comeciña facade: “Cue illimona ailluena rana oticue; iadedi ¿ninomo iena eenoíticue?”

<sup>18</sup> Birui cuemo ite eenoracona judaíticue. Ie mei aillue eenoracona finoíticue. Nainomo cue rana eenoíticue”.

<sup>19</sup> Ie comeciña facaite: “Cuemo ailluena ra jai ite. Diga años nia iíticue. Jamai iíticue. Marena guiticue. Caimare iíticue”.

<sup>20</sup> Iese comeciña facade; iadedi Jusiñamui naimiemo llote: “Abi uiñoñedio. Cue llua jira, ja naíona fiodaíto. Ie mei omo ite ra omo fiebiñeite”.

<sup>21</sup> Dama ramo ie comeciña bu facaía, Jusiñamui jitaillacinomo ie comeciña bu facañenia, faífite.

*Jesúdi Jusiñamui caí sedajana llua rafue  
(Mt 6.25-34)*

<sup>22</sup> Ie llofueoicaiganomo Jesús llote:

—Jusiñamui jitaillacinomo omoi comeciña facaía, omoi illamo omoi comeciña jarire facañeitomoi. Bue omoi guillemo jarire comeciña facañeno. Omoi jítalle iniroimo jarire comeciña facañeno.

<sup>23</sup> Jusiñamui omoína itataja muidona, guille omoímo iite. Naimie omoi abi finua muidona, iniroidi omoímo iite.

<sup>24</sup> Silliñiaímo comeciña faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baífemo omoi faía jira, naimie omoína canoite.

<sup>25</sup> Omoímona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairitarede.

<sup>26</sup> Omoi comeciaina facajamona omoi a sairíñena jira, jiaie ramo omoi comeciaina jarire finoñeno.

<sup>27</sup> Safiamo omoi comeciaina faca. ¿Niese sicodimaci? Maijiñedimaci. Iniroina tìforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

<sup>28</sup> Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi.

<sup>29</sup> Omoi comeciaina jarire icana jaiñeno. “¿Buena guiticaí?” raiñeno. Iemo comeciaina eo facañeno.

<sup>30</sup> Jusiñamuina inoñedino iemo comecina facacabidimaci. Nana omoi jitaillacinona omoi Moo Jusiñamuidi uinua jira, naimaci isoi iñeno.

<sup>31</sup> Jusiñamui jitaillacinona finocana omoi jai. Naimiemo omoi comeci facaica, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiaí iite.

*Jesúdi Jusiñamuimo comecina facaja rafue*

*(Mt 6.19-21)*

<sup>32</sup> Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamona, omoina sedaite.

<sup>33</sup> Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Firiraima nainomo jaiñede. Güreco nainomo jiaí iñede.

<sup>34</sup> Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

*Jesús ie abido billemo ocurillana llofuia rafue*

<sup>35-38</sup> Jesús nia llofuate:

—Monamona ico cue abido billemo ocuriri. Iena omoi raise cacaillena, bie rafuedo iena lloiticue. Damie ie nabai ie aí ua rafue dine naiona jaide. Ie mullaiaí naimie abido billemo ocurillana ocuide. Naimie billemo naimaci raise ocuriria, iniroina jitanona, lamparíniaí unianona, ocuritimaci. Iese naimaci ia, nasena naimie tuia, iena rare econoitimaci. Nie hora naimie abido bia, naimiena naimaci iniñeno ocuriria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uiñoñena jira, jaca ocuricana naimaci illa.

<sup>39</sup> Ero, firiraima bille facaiseconi jofo namadi uiñotena, nia caadote, ie ra faifi raillanona.

<sup>40</sup> Monamona ico abido biiticue. Omoi ocuriñena facaisemo biiticue. Ie jira cue billemo raise ocuriri.

*Jesúdi patrón ie mullaimana ie jofona sedataja llua rafue*

*(Mt 24.45-51)*

<sup>41</sup> Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

<sup>42</sup> Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiaí ecade.

<sup>43</sup> Ie mei patrón oni jaide. Jofomo abido naimie bia, ie nanoca mullaima raise maijana fidia, naimiena raise ibaite.

<sup>44</sup> Iobillamona, nana ie raruiaina sedataite;

<sup>45</sup> iadedi naie mullaïma maraiñenia, comecina facaite: “Cue patrón are biñeite. Jiaie rafuena finoitïcuc”. Ie comecina iese facaja jira, naimie anamo ite mullaïaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

<sup>46</sup> Ie ocuiriñena facaise ie patrón abido billanona, naimiena meinetaite. Ie uaina ñnoñedino isoi, duere finoite.

<sup>47</sup> Naie mullaïma ie patrón jitailla rafuena finuana uiñote; iadedi iena ñnoñede. Ie jira eo duere sefuite;

<sup>48</sup> iadedi maraiñede rafuena raise uiñoñeno jiaie mullaïma finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoïmo suiñellena, mare mullaïma isoi, Jusiñamui jitaillacino finocana omoï jai.

*Jesús muidona nana comini uri iñena rafue  
(Mt 10.34-36)*

<sup>49</sup> Jesús llote:

—Cuenta naimaci ñnollena, eniruemo comini dine biticuc. Cuenta dajerie ñnuamona, cue cominina jaitimaci. Cuenta jiaïno ñnoñenamona, cue cominina jaiñeitimaci. Iemona cominina duere finoitïcuc. Cue maijia raire fuiduana jitaïdicuc.

<sup>50</sup> Cue nia eo duere sefuiticuc. Iena raire suillena jitaïdicuc.

<sup>51</sup> Nana cominina uri itatallena eniruemo biñedicuc. Cuenta ñnoñedinodi cuenta ñnotinona enoitimaci. Enoillamona, cuenta ñnotinona duere finoitimaci.

<sup>52</sup> Cue billamona, daje jofomo itino ñese danomo iñeitimaci. Dabecuiro comini nainomo ia, menamie cue ñibeïmo iite. Daje amani cue ñibeïmo iñeite. Iese iñenia, daje amani cue ñibeïmo iite. Mena cue ñibeïmo iñeite.

<sup>53</sup> Cue lloga rafuena damierie ñnua muidona, ie moo illa ñibeïmo ie jito iñeite. Ie jito ñibeïmo ie moo iñeite. Ie ei illa ñibeïmo naiñaiño jisa iñeite. Ie jisa ñibeïmo ie ei iñeite. Ie jifaiño illa ñibeïmo ie miodi iñeite. Ie mio ñibeïmo ie jifaiño iñeite. Iese cominina uri itatañedicuc.

*Jesúdi monamo ite rana llofua rafue  
(Mt 5.25-26; 16.1-4; Mr 8.11-13)*

<sup>54</sup> Cominimo Jesús dane llote:

—Bie eniruemo afai dine uilliena omoï cioia, raicabitomoi: “Noci deiacade”. Iese omoï cïua meinomo, ua noci deide.

<sup>55</sup> Bie eniruemo beici ñinena aïfi bia: “Eo ecasiite” raicabitomoi. Iese aïfi bia, ua eo ecasite.

<sup>56</sup> Abina uiñotinona abi caitadinodomoi. Monamo eruaïllamona, rafue suillana uiñotomoi; iadedi omoï ecimo suiacalle rafuena raise uiñoñedomoi. Cue lloga rafuena raise cacaiñedomoi.

<sup>57</sup> Iemo omoï comeciaina raise facañedomoi.

<sup>58</sup> Ero, omoïna bu llogidoia, juez dine nia omoï riñenia, omoïna llogidotimie diga naie rafuena raise fino. Iena raise finoñenia, juez dine omoï ria, nainomo duere sefuitomoi. Calabozomo omoïna jonetaite.

<sup>59</sup> Nana raise ibañenia, juez llua isoi, jino jaiñeitomoi. Ie isoide. Cue rafue omoï cacajamona, naimiemona duere sefuiñellena, Jusiñamui diga omoï rafuena raise fino.

## 13

*Jesúdi comeciï iuai meïduana dana llua rafue*

1 Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

2 Jesús uai ote:

—¿Ñiese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi.

3 Iese omoi comeciaina facañeno; ia omoi comeciai iuai meiduamo comeciaina faca. Omoi comeciai iuai omoi meidoñenia, omoidi jiai faifitomoi.

4 Siloé railla tidacana navui ana goillamo, dieciocho digamie saitabidimaci. Iena fididomoi. ¿Ñiese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi.

5 Iese omoi comeciaina facañeno; ia omoi comeciai iuai meiduamo comeciaina faca. Omoi comeciai iuai omoi meidoñenia, omoidi jiai faifitomoi.

*Jesúdi ie Moo comini comeciai iuai meiduamo fecuise ocurilla llua rafue*

6 Iena comini raise uñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede.

7 Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”.

8 Ie illina sedaraima uai ote: “Dama ite. Daje año nia seda. Riarana abina caigiticue. Eniruena caimaretaiticue.

9 Jiaie año llisia, mare. Llisiñenia, iena tieticoco”. Ie isoide. Jusiñamui omoi comeciai iuai meiduamo are ocurite; ia meidoñenia, omoina duere finoite.

*Jesúdi jicaidñaiñona jillotaja rafue*

10 Jiairuido sábadoruimo judíuai ofiracomo Jesús llofuate.

11 Nainomo duidñaiñodi ite. Janaba anamo naiñaiño illa jira, naiñaiño jicaide. Atona naidainide.

12 Naiñaiñona Jesús cianona, naiñaiñomo llote:

—Ñoo, o duicomona jai jillodio.

13 —Ie mei naiñaiñona jetade. Ieconi naiñaiño atona naidadate. Ie jira Jusiñamuimo iobillacinona fecade.

14 Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijñedicaí.

15 Jesús uai ote:

—Maijñedinona abi caitadinodomoi. Sábado iruimo maijicabidomoi. Sábado iruimo omoi toiniaina imaci illanomona suiñodomoi, jinui illanomo naimaci jiruaillena. Naie isoide maijia omoimona mare.

16 Ie isoide. Bie riñodi Abraham micori comini. Omoi nairaiñaiñaiño. Dieciocho años Janaba anamo jai illamona, duere sefuide. Naiñaiñona canollena, sábado iruimo naiñaiñona Taife anamona cue jillotaia, cuemona mare.

17 Iena Jesús llumona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

*Jesúdi mostaza ido llua rafue*

*(Mt 13.31-32; Mr 4.30-32)*

18 Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>19</sup> Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo sillini ai jicaiciaina finodimaci.

*Jesús siritate rana llofuia rafue*  
(Mt 13.33)

<sup>20</sup> Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue.

<sup>21</sup> Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

*Jesúdi Jusiñamui dine rille llua rafue*  
(Mt 7.13-14, 21-23)

<sup>22</sup> Jesús diga nairaimo llofuecana jaide. Jerusalén dine jaide.

<sup>23</sup> Jesús oni jaillanona, damie naimiemo jicanote:

—Nama, ¿niga comini o uaina inoitimaci? —Jesús uai ote:

<sup>24</sup> —Monamo cue Moo dine jaille nasedi janorede isoide. Naie nasedo llicana o jai. Ailluena comini naiedo jaiacanitimaci; iadedi fo jainitimaci.

<sup>25</sup> Naie jofo nama nase ibaila mei, ¿niese fo jaitomoi? Jino naidallamona, nasena tutajanona, raitomoi: “Nama, o nase econo”. Naimie uai oite: “Omoina uiñoñedicue”.

<sup>26</sup> Dane lloitomoi: “O diga navui guiticaí. Cai illanomo llofuetio”;

<sup>27</sup> iadedi naimie uai oite: “Omoina uiñoñedicue. Cue cominiñedomoi. Jecino omoi comecimo nia illa jira, mai jai”.

<sup>28</sup> Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micoriana cioitomoi; ia omoi jino illamona, duere sefuillamona, eeditomoi.

<sup>29</sup> Diga comini Jusiñamui illanomo iitimaci. Ailluena judíuaiñedino naga nairaimona Jusiñamui illanomo biitimaci. Nainomo coninina caimare nabaitimaci.

<sup>30</sup> Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñeno cuena inocana omoi jailla.

*Jesús Jerusalémo itinomo llua rafue*  
(Mt 23.37-39)

<sup>31</sup> Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacade.

<sup>32</sup> Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite.

<sup>33</sup> Nia oni jaiticue. Ailluena Jusiñamui facaina lloraini micoriana nainomo jai fodailla isoí, Jerusalémo cue rafue jiaí raire fuite” llono.

<sup>34</sup> Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruiaí

sedaja isoi, diga icaiño cue anamo omoïna uaidoiacadïcue; iadedi omoi dinena cuena jitaïñedomoi.

<sup>35</sup> Iemona Jusiñamuidi omoi illanona jai faïnonocaide. Cue Moo dine jaiticue. Cue jailla mei, cuena cioïñeitomoi. Ico cue abïdo bia, comïni cuena lloïtimaci: “Jusiñamui oretagamie eo mare. Naimïedi cai Nama” lloïtimaci.

## 14

### *Jesúdi abïna siridïmiëna jillotaja rafue*

<sup>1</sup> Jiaïruido sábadoruïmo Jesúdi fariseo imïe jofomo guisaide. Naïe fariseo imïedi illaïcomïni. Nainomo itïno Jesúmo eo eruaidïmaci.

<sup>2</sup> Guille facaise naïe jofomo duidïmie bite. Naimïe abïna siridïmie.

<sup>3</sup> Nainomo itïnomona damïeredi fariseuai comïni. Moisés mïcori llogacïnuaina llofueraini jiaï itïmaci. Naimacïmo Jesús jïcanote:

—Sábadoruïmo comena cue jillotaïa, ¿omoïmona jeacïno finodïcue? ¿Nïese Moisés mïcori llogacïnuai iena llote?

<sup>4</sup> Uaina oñedïmaci. Ie jira Jesús duidïmie onollïna llinuamona, naimïena jillotate. Ie mei naimïena jino orede.

<sup>5</sup> Nainomo itïnomo llote:

—Sábadoruïmo maïjicabidomoi. Sábadoruïmo omoi jurareta pozomo uaidena, iena jillotallena, nairuïmo iena ari otomoi. Omoïmona naïe isoïde maïjïa mare. Bimïena cue jillotaja jira, ¿nïese cuena jeare ñaïtomoi?

<sup>6</sup> Iena cacajanona, uainicaidïmaci.

### *Jesúdi guïllena uaidoganona llua rafue*

<sup>7</sup> Jesúdi naimaci guisaïbillana ciode. Jiaïno baïfemo illena, jofo nama abïmo nana raïacadïmaci. Iena ciuamona, naimacïmo Jesús rafuena llofuite:

<sup>8</sup> —Rafue dine guïllena omoïna bu uaidoïa, jofo nama abïmo raïñeno, omoi baïfemo itïmie bi raïllano.

<sup>9</sup> Jofo nama abïmo omoi raïa, omoi baïfemo itïmie bia, jofo nama omoïmo lloite: “Bimïemo omoi raïllana feca”. Meïdaïllanona, oni raïnadaitomoi.

<sup>10</sup> Ie jira rafue dine omoïna uaidoïa, naïe jofomo omoi ria, oni raï. Ie mei jofo nama jitaïa, omoïmo lloite: “Cue abïmo raï”. Ie mei nana naïe itïno omoi iobïllana cioïtimaci.

<sup>11</sup> Ie isoïde. Jusiñamuidi jiaïmie afemo iacadïmiëna jiaïmie afemo iñenana itataite. Jusiñamuidi jiaïmie afemo iacaiñedïmiëna jiaïmie afemo itataite.

<sup>12</sup> Naimïena uaidotïmiëmo Jesús llote:

—Guille rafuena o finoïa, naga icaiño o nabaiñaïna uaidoñeno. Naga icaiño o comïnïna uaidoñeno. Naga icaiño o ecïmo itïno ucuberedïnona uaidoñeno. Naimacïna o uaidotïona, jiaïruido guïllena ona uaidoitïmaci, naïe ïba o ollena;

<sup>13</sup> ïa rafuena o finoïa, dueredïnona uaido. Ñuja-ñujacaida macarïtïnona uaido. Uisïnidïnona uaido.

<sup>14</sup> Naimacïmona ïba ïco o oñenamona, Jusiñamui ona caïmare itataite. Jiaïruido fïodaïllamona mareuidïno jilloïa, monamo Jusiñamui ona ïbaite.

### *Jesúdi aïlluena guïlle fïnoca rafuena llua rafue*

<sup>15</sup> Jesús abïmo itïnomona Jesús lluana damïe cacajano, raite:

—Monamo Jusiñamui illanomo itïmïedi marena iïte.

<sup>16</sup> Jesús uai ote:

—Iena omoi raise uïñollena bie rafuena lloïticue. Damïe aïllue rafuena fïnode. Aïlluena comïnïna uaidote.

<sup>17</sup> Rafue illaruïmo ïe mullaïmana orede, comïnïna dane uaidollena. Raite: “Mai bi. Nana guïlle fïnuadi jai fuite”;



<sup>18</sup> ia biacaiñedimaci. Dame lote: “Eniruena como ibadicue. Iena jibuisaiacaducue. O rafuemo jaiñeiticue. Ie jira cue joreñaona iciñeitiōsa”.

<sup>19</sup> Jiaimie lote: “Diez diga juraretana como ibadicue. Naimacina jibuisaiacaducue. O rafuemo jaiñeiticue. Ie jira cue joreñaona iciñeitiōsa”.

<sup>20</sup> Jiaimie lote: “Riño como oticue. Ie jira o rafuemo jaiñeiticue”.

<sup>21</sup> Ie nama dine naie mullaïma abido jaide. Comini biacaiñenana lote. Iena cacajano, rafue namadi icirite. Ie mullaïmamo lote: “Cai nairai naisona jai. Dueredinona uaido. Ñuja-ñujacaida jaidinona uaido. Uisididnona uaido”.

<sup>22</sup> Ie mei naie mullaïma jaide. Abido naimie bia, ie namamo lote: “O lluana finodicue. Ailluena comini jai bitimaci. O jofomo illino nia ite”.

<sup>23</sup> Rafue namadi uai ote: “Naisomo itinona bene atillena, cue jofona oruitallena, cai nairaimona jino jai.

<sup>24</sup> Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitañedino nainomo ico iñeitimaci.

### *Jesúdi naimie llofueganona jaiacadino rafue*

<sup>25</sup> Naie facaise ailluena comini Jesús diga jai jaisoidimaci. Naimacimo lote:

<sup>26</sup> —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiái baifemo isiruilla. Cuena ie amatiai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide.

<sup>27</sup> Cue llofuegamiena bu jaillamona, duere sefuicana jaite. Nibai naiemona fodaite. Bu iese jaiacaiñenia, cue llofuegamiena naimie raise jainide.

<sup>28</sup> 'Ero, jiaie rafuedo iena lloiticue. Jofona bu finoacania, ie ucubena bailla diese uiñollena: “¿Ñiga raifite?” comecina nano facade.

<sup>29</sup> Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci.

<sup>30</sup> Raitimaci: “Ie jofu finua tainede; iadedi fuidonide”.

<sup>31</sup> 'Ero, jiaie rafuedo iena lloiticue. Illaïma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Ñiese emodofiticue?” Comecina facaja mei: “Emodofiteiticue” naimie comecina facajia,

<sup>32</sup> nia are naimie bacauai ia, daguelli uicodo orede, ie fairiconi diga ñaïllena. Raite: “Jobairiacaiñedicue; ia o diga bie rafuena raise finoacaducue”.

<sup>33</sup> Biemo comecina omoi faca. Ie raruiaïmo bu comecina eo facaïa, cue llofuegamiena jainide.

<sup>34</sup> 'Sal mare; iadedi ie caïmano jai iñenia, ¿dane ñiese nibaïamona caïmarenite?

<sup>35</sup> Jai marañede. Eniruemo jonegadena, jiaï marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena ñino.

## 15

### *Jesúdi naimiena ñnotinomona dame faïfillana jitañena rafue*

*(Mt 18.10-14)*

<sup>1</sup> Naimaci bisoilla isoi ie rafuena cacaïllena, diga gobierno ucubena oraini Jesús dine ofidimaci. Jusiñamui llogacnona raise jaiñedino jiaï ofidimaci.

<sup>2</sup> Iena ciuano, fariseuai cominidi, Moisés micori llogacnuaina llofueraïni diga, Jesús joreñaona ñaitimaci:

—Bimie marañedicnona finorainina feiñote. Naimaci diga jiaï guite.

<sup>3</sup> Naimaci ñaiana uñuanona, Jesús naimacimo bie rafuena llote:

<sup>4</sup> —Omoimona damiemo cien toica llaudaiaia níbai ite. Naimacimona daje feiraite. Ie noventa y nueve llaudaiaia fainonocaida, iena jenuaite, ie baille ñinori.

<sup>5</sup> Baillanona, ie fecanicomo rocanocaida, iobicana biite.

<sup>6</sup> Jofomo naimie ria, ie nabaiñaia uaidoite. Ie ecimo itinona jia uaiduana, raite: “Cue diga iobi. Cue feiraite llaudana jai baiticue”.

<sup>7</sup> Ie isoide. Cue rafuena cue llamona, damie ie comeci jeacinona fainonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

### *Jesúdi faifide ucubena bailla llua rafue*

<sup>8</sup> Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaia faifa, lamparín unianona, ie jofona gallaite. Eo jenoite, ucube ie baille ñinori.

<sup>9</sup> Iena naiñaia baia, ie nabaiñaia uaidoite. Ie ecimo itinona jia uaiduana, raite: “Cue diga iobi. Cue faifide ucubena jai baiticue”.

<sup>10</sup> Ie isoide. Cue rafuena cue llamona, damie ie comeci jeacinona fainonocaillamona, ie comeci iuai meiduamona, Jusiñamui jaienisa eo iobitimaci.

### *Jesúdi damie ie moo fainonocailla llua rafue*

<sup>11</sup> Jesús llote:

—Jiaie rafuena omoimo lloiticue. Damiemo mena jito ite.

<sup>12</sup> Ie moomo jamamie llote: “Moo, o fiodailla mei, o raruaimona janore feiñoiticue. O fiodaillana sedaacaiñedicue. O raruaia cue facaina birui jitaidicue. Cuemo ine”. Ie jira ie moo naimiemo fecade.

<sup>13</sup> Ie mei nano nie ñinori illamona, nana ie raruaia iraianona, jiaie eniruemo jaide. Nainomo ie ucube jamai buruemo faiaide.

<sup>14</sup> Nana naimie ucube fuidua facaise, naie eniruemo guille iñede. Aime guitimaci. Naimie jia aime guite.

<sup>15</sup> Ie jira nainomo ite patrón ñine majiaide. Naie patrón ie chanchuaina sedallena naimiena orede.

<sup>16</sup> Naimiena jaca buna ecarainina jira, chanchuai guillemona guiacade.

<sup>17</sup> Iese naimie duere sefuilla jira, ja muidomo abina uñocaillamona, comecina facade: “Cue moo jofomo nana naimie mullaia raise guitimaci. Guille fiebicabite; iadedi bene aimeri fiodaicue.

<sup>18</sup> Cue moo ñine abido ja jaiticue. Naimiemo lloiticue: Jusiñamuimo jeacinona finodicue. Omo jeare jia finodicue.

<sup>19</sup> Odi: ‘Cue jito’ cuena raiño. O mullaia illa isoi, cuena abido feiño”.

<sup>20</sup> Ie facaise ie moo ñine jai jaide. Nia aare naimie ia, ie moo naimiena cide. Ie jitona duenaillanona, naimie ñine aiside. Naimiena caimadote. Jia llibanote.

<sup>21</sup> Ie jito naimiemo llote: “Moo, Jusiñamuimo jeacinona finodicue. Omo jeacino jia finodicue. Odi: ‘Cue jito’ cuena raiño”.

<sup>22</sup> Ie moo iena cacajano, ie mullaiaimo llote: “Cue jitona naimie eruaillena, eo mare ñinoina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jia ati.

<sup>23</sup> Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoitica.

<sup>24</sup> Navui cuemona cue jito fiodaite isoide. Cajе cuemo dane abido rilla. Navui cuemona naimiedi faifide; iadedi birui naimiena dane ciodicue". Naimie llua isoi, rafuena finodimaci.

<sup>25</sup> Naie facaise nano doforamie illimo ite. Jofomo abido naimie bia, comini iraisillana cacade.

<sup>26</sup> Daje mullaimana uaiduanona, naie rafuena jicanote.

<sup>27</sup> Naie mullaima uai ote: "O ama abido jai bite. O ama ramo jiriñeno abido billa jira, o moo ie janoreta farediretana jai fatatate".

<sup>28</sup> Iena cacajano, icirite. Fo jaiacaiñede. Ie jira ie moo jino bite. Naimiena fo uaidote.

<sup>29</sup> Ie moomo llote: "Ero, diga años o diga maijidicue. O uaina jaca ñnoticue; iadedi cue nabaiñiai diga, rafuena cue finollena, chivo cuemo jaca fecañedio.

<sup>30</sup> O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio".

<sup>31</sup> Ie moo uai ote: "Moo, nagarui cue diga itio. Nana cue radi oienite.

<sup>32</sup> Cuemona o ama navui fiodaite isoide; iadedi naimiena dane ciodicue. Naimie navui faifide raiticue; iadedi cajе cuemo dane abido rilla. Cue iobillanona rafuena finodicue". Bie rafuemona omoi fueollena, iena jai lloticue —Jesús llote.

## 16

### *Jesúdi patrón ie mullaima finoca rafuena llua rafue*

<sup>1</sup> Ie llofueoicaiganomo Jesús jiaie rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedañenana fidide.

<sup>2</sup> Naimiena uaiduanona, naimiemo jicanote: "¿Maraiñede o finoca rafuena ñiese fididicue? Omo ite cuentas cioacadicue. Cuemo ati. Cue diga jai maijiñeitio".

<sup>3</sup> Iena cacajano, naie mullaima começina facade: "¿Ñiese ñibaiticue? Cue nama cuena jai dotaacade. Maijiana ocuinidicue. Jiaie cominimona ucube jamai jicajana meiruiticue.

<sup>4</sup> Cue finuana jai uiñoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue".

<sup>5</sup> Ie jira naimacina uaidote. Damiemo jicanote: "¿Cue patrómo niga debedio?"

<sup>6</sup> Uai ote: "Cien bidones raifi aceitunamona oga aceitena debedicue". Naie mullaima raite: "O rabemo jarire ja cueno: cincuenta bidones".

<sup>7</sup> Jiaimiemo jicanote: "¿Niga debedio?" Uai ote: "Cien digagai trigo raifi debedicue". Naie mullaima dinena raite: "O rabemo ochentana cueno".

<sup>8</sup> Iena fidiano, naie mullaimamo ie patrón raite: "Jiairuido marena o illemo o começina raise facadio. Eo abina uiñotimedio" raite. Ero, Jusiñamuina ñnoñedinodi naimiena ñnotino baifemo ra fecajana baitadimaci.

<sup>9</sup> Naiemona omoi fueollena, omoimo lloiticue. Omoimo ite ra diga dueredinona cano. Iemona omoi nabaiñaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoina marena ñaitimaci.

<sup>10</sup> Janore ra omoimo illamona, Jusiñamui facaina birui omoi raise maijiia, ailluena ra omoimo itedena, Jusiñamui facaina jiai raise maijitomoi. Janore ra omoimo illamona, maraiñede rafuena birui omoi finoia, ailluena ra omoimo itedena, maraiñede rafue nia jiai finoitomoi.

<sup>11</sup> Omoimo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomoi.

12 Omoi anamo ite ra diga Jusiñamui facaina omoi raise maijiñenia, Jusiñamui ie rafue omoimo itatañeite.

13 Mena patrones diga daruido buna jaca maijinide. Mena diga bu maijiacania, damiena jiaimie baifemo gaité. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo comecina omoi eo facaia, Jusiñamui jitaillacinomo comecina raise facañeitomoi.

*Jesúdi fariseuai comini diga dane ñaia rafue*

14 Jesús llofuiana fariseuai comini cacajano, ucubena eo gaia jira, naimie uaina jamaidimaci.

15 Naimacimo Jesús llote:

—Omoi finoca rafuemoná comini omoína: “Mare” raillana jitaidomoi; iadedi Jusiñamui omoi comeciaí marañenana uiñote. Iese omoi illana Jusiñamui gaiñede.

16 Jusiñamui facaina lloraini micoriai ciegafuiaimona Jusiñamui rafuena cacacabidomoi. Moisés micori ciegafuiaimona iena jiaí cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui díbeimo omoi comeciaí iuaina meiduana cacadomoi. Iena jiaí llocabitícue. Iena ailluena ñnuamona, Jusiñamui díbeimo birui duere iacadimaci.

17 Mona enirue diga nia ia, nana Jusiñamui llogacínuaí suicana jaite.

*Jesús ima ie aina dotaja rafuena llofua rafue*

*(Mt 19.1-12; Mr 10.1-12)*

18 Jesús llote:

—Naga aina dotadimiedi, jiaíñaiño ollena, jeacínona jai finode. Dota-cañaiño na bu oia, jeacínona jai finode.

*Jesúdi ucuberedimie iaímaiaí Lázaro ie rafuena llua rafue*

19 Jesús jiaíe rafuena llote:

—Cue llogacínona omoi raise uiñollena, bie rafue lloitícue. Ucuberedimie ite. Eo mare ñiroina jítade. Eo caimare raise guicabite.

20 Naimie nasemo Lázaro raillamie jamai bíide. Naimiedi dueredimie. Efonaitimie.

21 Naimiedi ucuberedimie guiga allamona guiacade; ia guiñede. Jiconiaídi naimie efociaína mecabite.

22 Ie mei naimie fiodaíte. Jusiñamui cominina naimie illamona, Jusiñamui jaíenisaí naimie joreño monamo Abraham micori joreño illanomo uitimaci. Ucuberedimie jiaí fiodaíte. Comini naimiena raitimaci.

23 Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreño na aarena cíode. Naimie ecimo Lázaro micori ie joreño na jiaí cíode.

24 Abraham joreño na uaidote: “Cue moo Abraham, cuena duenai. Lázarona cue díne oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo llogacínuaí cacadícue”.

25 Abraham joreñodi uai ote: “Moo, o illa dínorí naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio.

26 O díne jainidicaí. O enefebetuemo itio. Cai enefebetuemo jiaí iticaí. Caimona omoi díne bu jaiñellena, omoimona cai díne bu bíñellena, iese ite”.

27 Ucuberedimie micori joreño dínená uai ote: “Cue moo jofomo Lázarona oreta.

28 Cuemo cinco amatiaí ite. Naimacimo riire llollena, bie iraimo naimaci riñellena, naimiena oreta”.

<sup>29</sup> Abraham joreñodi uai ote: “Naimacimo Moisés micori cuezafuiai ite. Jusiñamui facaina jaie lloraini micoriai cuezafuiai jiai ite. Iemo naimaci comeciaina facallesa”.

<sup>30</sup> Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena ñnoitimaci. Naimaci comeciainuiai meidoitimaci”.

<sup>31</sup> Abraham joreñodi uai ote: “Moisés micori cuezafuiai, Jusiñamui facaina jaie lloraini micoriai cuezafuiai naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

## 17

### *Jesúdi jeacinona finoñenana llofuia rafue* (Mt 18.6-7, 21-22; Mr 9.42)

<sup>1</sup> Ie llofueoicaiganomo Jesús llote:

—Diga ramo omoi faicana uitinomo riitomo. Omoi ramo faitimie duere sefuite. Jusiñamui omoi ramo faitimiena duere finoite.

<sup>2</sup> Como creyentena jaidimiena ramo bu faia, naimie cimaiomo aillue nofici maianona, joraimo corobaillena naimiena dotacadena, mare.

<sup>3</sup> Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita.

<sup>4</sup> Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

### *Jesúdi naimiena ñnuana llua rafue*

<sup>5</sup> Ie doce llofueoicaigano Jesúmo llote:

—Ona ñnoticai; ia caina o uaina eo ñnota.

<sup>6</sup> Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

### *Jesúdi ie facaina llofueoicaigano maijia llua rafue*

<sup>7</sup> Ie llofueoicaiganomo Jesús llote:

—Bie rafuemona omoi fueollena, iena lloiticue. Illimo ie mullaïma maijiamona, ie toinïai sedajamona jofomo abido naimie ria, ie patrón naimiemo lloñeite: “Mai nano guisaïbi”;

<sup>8</sup> Iadedi naimiemo lloite: “Cueïena guillena nano fino. Cuen eca. Ie mei guitio”.

<sup>9</sup> Naie mullaïma ocuica rana finua muidona, mullaïmana naimie illa jira, ie mullaïmamo patródi iobillacinona fecañeite.

<sup>10</sup> Ie isoide. Nana cue llua omoi finodomoina, dani omoi maijadi, cue cominina omoi illa jira, cuemona iobillacinona feiñoñeitomoi.

### *Jesúdi diez efonaitinona jillotaja rafue*

<sup>11</sup> Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite.

<sup>12</sup> Nairai dine naimie riacania, diez efonaitinodi naimiemo dafaïfidimaci. Eno oni naidaidimaci.

<sup>13</sup> Naimiena ado uaidotimaci:

—Jesús, Maestro, caina duenai. Caina ja jillota.

<sup>14</sup> Naimacina Jesús cïuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci.

15 Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade.

16 Naimiemo iobillacinona jiai fecallena, Jesús uicomo ana bitadate. Naimiedi judíuñedimie. Samaritano imie.

17 Jesús llote:

—Diez digamiedomoi. Omoína jai jillotaticue. ¿Ninomo jiaínodi nueve digamie itimaci?

18 ¿Niese Jusiñamuimo iobillacinona fecaacaiñedimaci? Dama bimie fecade. Naimiedi judío imieñedimie.

19 Jesús naimiemo llote:

—A naidada. Mai jai. Cuen a o ñnua jira, jai jillodio.

*Jesúdi Jusiñamui ie cominina sedajana llofuia rafue  
(Mt 24.23-28, 36-41)*

20 Naie facaise fariseuai comini Jesúsomo jicanotimaci:

—¿Niruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoína sedallena uiñoñeitomoi.

21 Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui díbeimo damierie illamona, Jusiñamui omoi motomo jai illana uiñoitomoi.

22 Ie llofueoicaiganomo llote:

—Jiairuido duere sefuillamona cue diga janore jisa iacanitomoi; iadedi iese nia iñeitomoi.

23 Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena ñnoñeno.

24 Mona borillamona mona jillacidi usere cide. Ie isoide. Cue abido bia, nana comini iena uiñoitimaci.

25 Birui iese nia suiñeite. Nano duere sefuiticue. Birui ite comini cuena jiai feiñoñeitimaci.

26 Abido cue billirui iaírei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci.

27 Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

28 Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijuidimaci. Jofona finouidimaci. Naimaci isoilla isoi icana jaidimaci.

29 Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci.

30 Ie isoide. Abido cue billiruimo comini iitimaci. Cue bia, ebena biiticue.

31 Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena.

32 Iemona fueollena, Lot ai micori rafuemo comeciaina faca. Naiñaiño ie raruiaimo daño comeciaina facajamona, na ie abi diga faifide.



<sup>33</sup> Dama ie raruiamo ie comecina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comecina bu facaia, monamo cue diga jaca iite.

<sup>34</sup> Cue bille facaise menamie daje cuartomo iniano iitiaimaia. Damie jaite. Jiamie fiebite.

<sup>35</sup> Mena riño danomo doberillanona iitiaiñuai. Dañaiño jaite. Jiañaiño fiebite.

<sup>36</sup> Menamie illimo maijiano iitiaimaia. Damie jaite. Jiamie fiebite.

<sup>37</sup> Ie llofueoicaigano jicanotimaci:

—¿Ñine jaitimaci?

Uai ote:

—Urujaisa rifaide ramo ofillana uiñua isoi, nana cuena inotino cue abido billena uiñoitimaci. Cuemo duillamona, cue diga jaitimaci.

## 18

### *Jesúdi feciñona llua rafue*

<sup>1</sup> Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño.

<sup>2</sup> Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jia jaciruiñede.

<sup>3</sup> Nainomo naimie dine daje feciño jai-jaicabillanona, raite: “Cuen a duere finodimimona cuena cano”.

<sup>4</sup> Naimie dinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñedicue. Cominina jia isiruiñedicue;

<sup>5</sup> ia naiñaiño cuemo sefuire bi-bina jira, naiñaiño canoiticue, cue rairaiñellena”.

<sup>6</sup> Jesús llote:

—Maraiñede juez llua cacadomoi. Ja muidomo naiñaiño canode.

<sup>7</sup> Ero, biemo omoi comeciaina faca. Jusiñamui naie juez isoñede. Nagarui Jusiñamuimo naimaci jicaia, ¿ñiese naimie ie fetocanona canoñeite? Jaca canoite.

<sup>8</sup> Raire fairiuanona, naimacina raie canoite; iadedi abido cue bia, ¿ñiga cuena inotino itimaci? Niba ailluena cuena inoñeitimaci.

### *Jesúdi Jusiñamuimo menamie jia llua rafue*

<sup>9</sup> “Mareuidica” dajerie railla jira, “Jiaie comini baifemo faitica” dajerie railla jira naimacimo Jesús bie rafuena llote:

<sup>10</sup> —Jusiñamui jofomo, nainomo jillena, menamie jaidiaimaia. Damie fariseo imie. Jiamie gobierno ucubena oraíma.

<sup>11</sup> Fariseo imie naidadacaida, dama anado jide: “Jusiñamui, jiaie comini isoñedicue. Fidimaci. Maraiñedimaci. Naimaci aiñede riño diga itimaci. Cue ecimo ite ucubena oraíma isoi iñedicue.

<sup>12</sup> Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide.

<sup>13</sup> Gobierno ucubena oraíma eneno naidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jecinona finoramadicue. Cuen duenai. Macaibaite” jide.

<sup>14</sup> Jusiñamuidi jiamie afemo iacadimiena jiamie afemo iñenana itataite. Jusiñamuidi jiamie afemo iacaiñedimiena jiamie afemo itataite. Ie jira gobierno ucubena oraíma ie jofomo Jusiñamuimona jai marebicaillanona jaide; ia fariseo imie iese jaiñede.

*Jesúdi naimie dine uruiai billana jitailla rafue*  
(Mt 19.13-15; Mr 10.13-16)

<sup>15</sup> Naie facaise Jesús dine comini naimaci eisaiana atisite. Ie onolli naimacimo naimie joniana jitaidimaci. “Naimacina raise cano” ie Moomo lollena jitaidimaci. Iena cuanona, ie llofueoicaigano cominina Jesús dine billana rairuidimaci;

<sup>16</sup> iadedi Jesúsdi eisaiana uaiduano raite:

—Uruiai cue dine billesa. Naimacina rairuiñeno. Cuen a bie isoi ñnotinodi Jusiñamui cominidimaci.

<sup>17</sup> Bie uruiai abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

*Ucuberedimie Jesús diga ñaia rafue*  
(Mt 19.16-30; Mr 10.17-31)

<sup>18</sup> Ie facaise illaicominimona damie Jesúsmo jicante:

—Maestro, odi mareuidimedio. Jusiñamui diga ico monamo cue jaca illena, ¿nie isoide rana finoiticue?

<sup>19</sup> Jesús uai ote:

—¿Bue ñellena cuena: “Mareuidimedio” raitio? Dama damie mareuidimiena. Naimiedi Jusiñamui. Naimiemo jicano.

<sup>20</sup> Moisés micori llogacinuaina ñnocana jai. Jaie cuete: “O añede riño diga iñeno. Comena meineño. Rana fiñeno. Jaiimiena o llogidoia, tainona lloño. O moo uaina ñno. O ei uaina ñno”.

<sup>21</sup> Uai ote:

—Cue uruena illa facaisemona nana bie llogacinuaina ñnoticue.

<sup>22</sup> Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuen a o ñnuamona, monamo ico jaca iitio. Cue llofueoicaiganona o illena, mai cue diga bi.

<sup>23</sup> Jesús llua naimie cacajano, sunaicaide. Naimiemo eo ailluena ra illa jira, iena fecaacaiñede.

<sup>24</sup> Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite.

<sup>25</sup> Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

<sup>26</sup> Jesús llua cacadino jicante:

—¿Jemona buca jillobiti?

<sup>27</sup> Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro raite:

—Ero, o llua isoi cai jofuena fainonocaida, o diga jaisoidicai.

<sup>29</sup> Uai ote:

—Uanaicnona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia,

<sup>30</sup> Jusiñamuimona ailluena ibana birui feiñoite. Monamo ico jiai jaca iite.

*Jesúdi ie fiodaillena dane llua rafue*  
(Mt 20.17-19; Mr 10.32-34)

<sup>31</sup> Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jaie cuetimaci. Nana naie rafue ja suite.

<sup>32</sup> Judíuainēdinomo judíuai illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci.

<sup>33</sup> Cuena faitimaci. Cuena meineitimaci; ia darui amani illanona, cue fiodaillamona jilloitícue.

<sup>34</sup> Naimie lluana raise cacaiñedimaci. Naimacina iena Jesús nia raise llofueñena jira, iena raise uiñoñedimaci.

*Jesúdi uisínidimiena jillotaja rafue  
(Mt 20.29-34; Mr 10.46-52)*

<sup>35</sup> Jericó railla nairaimo ie llofueoicaigano diga Jesús riacademo, uisínidimie naiso fuemo raillana ciode. Ucubena jamai jica-jicade.

<sup>36</sup> Ailluena comini Jesús diga jaillana naimie cacajano, naie cominimo nie isoide rafue illana jicanote.

<sup>37</sup> Uai otimaci:

—Nazaret ie Jesús como bene bite.

<sup>38</sup> Ie jira naimie cuirioide:

—David micorí Jitona o illamona, cuena duenai. Cuena cano.

<sup>39</sup> Uicodo jaidino naimiena lletade, naimiena llucaitallena; iadedi naimie eo cuirioide:

—David micorí Jitona o illamona, cuena duenai.

<sup>40</sup> Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

<sup>41</sup> —¿Niese ona cue nibaiana jitaideo?

Uai ote:

—Maestro, cioacadícue.

<sup>42</sup> Jesús raite:

—Mai eroda. Cuena o ñnua jira, jai jillodio.

<sup>43</sup> Ieconí naimie uisídi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiaí fecadimaci.

## 19

*Jesús Zaqueo diga illa rafue*

<sup>1</sup> Jericómo Jesús rillanona, nainomo macaritemo,

<sup>2</sup> naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede.

<sup>3</sup> Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide.

<sup>4</sup> Ie jira uicodo aisícana jaide, amenamo a jaillena, naimiena cioillena.

<sup>5</sup> Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaitícue.

<sup>6</sup> Ie jira raire ana bite. Ie jofomo Jesúsna iocire feiñote.

<sup>7</sup> Iena jiaíe comini ciuanona, Jesús joreñona jeare ñaianona raitimaci:

—Mariñedicinona finoraíma jofomo naimie jaide.

<sup>8</sup> Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruaína dueredinomo biruimona fecaitícue. Bu-mona navui cue fiíia, cuatro diga ra abido iitícue.

<sup>9</sup> Jesús uai ote:

—Iese o llua jira, o comini diga Jusiñamuina jai o ñnuana uiñotícaí. —Jamai bitinomo llote:

—Zaqueodi Abraham micorí jito; ia Jusiñamuina navui ñnoñede.

<sup>10</sup> Naimie isoidino jillobitallena, biticue. Monamona billanona, imana jaie jaidicue. Jusiñamuina inoñedinona jenuaibidicue, naimacina jillobitallena.

*Illaima ie mullaiaimo ucubena fecaja rafue*

<sup>11</sup> Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”.

<sup>12</sup> Iena naimaci raise uiñollena, Jesús bie rafue naimacimo llote:

– Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade.

<sup>13</sup> Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide.

<sup>14</sup> Ie comini naimiena enoidimaci. Jiañona nanoca illaima dine oretajano, raitimaci: “Bimie caina sedajana jitaiñedicaí”; ia nanoca illaima dinena naimaci llwana jaca cacaiñede. Ie jira naie nanoca illaima naie illaima jitomo ie uaina ite.

<sup>15</sup> Ie uaina feiñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote.

<sup>16</sup> Nano bitimie raite: “Nama, o cuemo dabe fecadio. Dabedemona jai cuemo ite diez digabe”.

<sup>17</sup> Naie illaima naimiemo llote: “Eo marena maijidio. Mare mullaimadio. Janore ra raise o sedaja jira, ona diez nairaiaina sedataiticue”.

<sup>18</sup> Ie mei jiaie mullaima billanona, raite: “Nama, o cuemo fecaca dabedemona jai cuemo ite cinco digabe”.

<sup>19</sup> Illaima llote: “Ona cinco nairaiaina sedataiticue”.

<sup>20</sup> Ie mei jiaie mullaima bite. Raite: “Nama, jadi, o cuemo iga o ucube. Iniroimo tilliano, iena eenoticue.

<sup>21</sup> Ona cue jaciruillano, odi eo rimiena jira, iena jamai eenoticue. Jiaie cominimona ie rana bairocabidio. O maijiñena ramona ocabitio”.

<sup>22</sup> Illaima dinena raite: “Eo marañede mullaimadio. Cuen a o llua isoi, ona duere finoiticue. Cue rimienana uiñotio. Jiaie comini ie rana cue bai ruana uiñotio. Cue maijiñena motomo ra cue uana uiñotio; ia buena maijiñedio.

<sup>23</sup> ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baifemo feiñoticue”.

<sup>24</sup> Nainomo itinomo llote: “Naie ucube naimiemon a bai ruano, diez digabe itimiemo feca”.

<sup>25</sup> Uai otimaci: “Naimiemo ailluena ucube jai ite. ¿Bue ñellena dane jiaie fecaitio?”

<sup>26</sup> Illaima dinena uai ote: “Ailluena raredimie jiaie rana feiñoite; iadedi janore raredimie ie rana faifite.

<sup>27</sup> Cuen a enoidinona bene ati. Naimacina cue sedajana jitaiñedimaci. Naimacina meine”.

Jesús nia llote:

– Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

*Jesús Jerusalémo jailla rafue*

*(Mt 21.1-11; Mr 11.1-11; Jn 12.12-19)*

<sup>28</sup> Naie rafuena llofuia mei, Jerusalén dine comini uicodo ie llofueoicaigano diga Jesús jaide.

29 Jerusalén iaireicaidemo, mena nairaimo riacade. Betfagémo railla nairaimo ride. Betania nainomo jiai ite. Olivos railla anedumo naga nairai iaimaiai ite. Ie llofueoicaiganomona mena orede.

30 Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati.

31 Omicomo: “¿Bue ñellena iena suiñodomico?” bu jicanoia, lloño: “Coco Nama iena jitaide”.

32 Naimie llua isoi jaidiaimaiai. Naimie llua isoi burritona baitiaimaiai.

33 Ie facaise ie naniai iaimaiaimo jicanote:

—¿Bue ñellena cai burritona suiñodomico?

34 Uai otiaimaiai:

—Coco Nama iena jitaide.

35 Ie mei Jesúmo iena atidiaimaiai. Burrito emodomo iniroina jobianona, ie emodomo Jesúdi rainadate.

36 Jesús iese jaidemo, naimiena iobitallena, illaima isoi naimie jaillena, comini imaci iniroi diga, naiso motomo jobedimaci.

37 Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci.

38 Raitimaci:

—¡Cai Illaima billa! ¡Jusiñamui mamecido bitimiemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

39 Naie cominimona dajerie fariseuai raitimaci:

—Maestro, o diga jaidinona llicaillena, naimacina lleta.

40 Uai ote:

—Naimaci llicai, biso fuemo ite noficidi cuena marena ñaite.

41 Jerusalémo Jesús iairei ria, iena ciuano, eede.

42 Raite:

—Jerusalén itino, Jusiñamui diga omoi uri illena jai biticue. Omoina naimie cominina itataiacadicue; iadedi iena jitañedomoi. Iena jitaidomoidena, ico duere sefuiñeitomoi.

43 Jiairuido omoi bacauai jobaimena finuanona, omoina cirinoitimaci. Omoi ecido llaitimaci.

44 Omoina meineitimaci. Omoi uruiaina meineitimaci. Omoi illanona judaítimaci. Jusiñamui omoi motomo birui illana omoi uiñoñena jira, iese omoimo suite.

*Jesúdi Jusiñamui jofomona damieriena dotaja rafue*

*(Mt 21.12-17; Mr 11.15-19; Jn 2.13-22)*

45 Jerusalémo Jesús rilla mei, Jusiñamui jofomo jaide. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecaudimaci. Iena ciuanona, naimacina jino orede.

46 Raite:

—Ie facaina lloraíma micori Jusiñamui llogacino jaie cuega: “Cue jofo ite nainomo cuemo comini jaiñena” cuega. Ero, ailluena omoi ibataja jira, naimie jofona firiruidino jofona omoi finoca.

47 Jusiñamui jofomo nagarui Jesús llofuate. Judíuai illaicominidi Jesúna meineiacadimaci;

48 iadedi niese nibañedimaci, nana comini naimie llofuiana eo jitailla jira.

## 20

*Jesúdi ie siño uaina llua rafue*  
(Mt 21.23-27; Mr 11.27-33)

<sup>1</sup> Jusiñamui jofomo Jesúdi cominina llofujete. Jusiñamui rafuena llofujete. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona,

<sup>2</sup> jìcanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

<sup>3</sup> Jesús dinena uai ote:

—Omoimo nano jìcanoiticue.

<sup>4</sup> Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

<sup>5</sup> Dani coniniri iena siaduanona raitimaci:

—“Jusiñamui” cai fairioia, caimo jìcanoite: “¿Bue ñellena naimie micorina ñinoñedomoi? ¿Bue ñellena naimie micori llua isoi bautizañedomoi?”

<sup>6</sup> “Comini” cai fairioia, bene itino caina meineitimaci, Juan micoridi Jusiñamui facaina lloraima naimaci railla jira.

<sup>7</sup> Ie jira Jesús uai otimaci:

—Uiñoñedicaí.

<sup>8</sup> Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi marañede majiraini rafuena llua rafue*  
(Mt 21.33-44; Mr 12.1-11)

<sup>9</sup> Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaínomo fecade, iena sedallena. Ie mei jiaie eniruemo are illena jaide.

<sup>10</sup> Uvas jai einalla facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecañeno abido oredimaci.

<sup>11</sup> Ie mei patrón jiaie mullaimana orede. Naimiema fatimaci. Jeare finodimaci. Uvas naimiemo fecañeno abido oredimaci.

<sup>12</sup> Naie patrón jiaimiena orede. Naimiema eo bofedaitajanona jino dotadimaci.

<sup>13</sup> Iemei patrón comecina facade: “¿Niese nibaiticue? Cue isiruiga jitona oretaiticue. Naimiema nibai jaciruitimaci. Naimie uaina ñnoitimaci”.

<sup>14</sup> Riaraiaina sedaraini naimiema ciuanona, coniniri ñaitimaci: “Bimiamo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” ñaitimaci.

<sup>15</sup> Naimiema jino dotajanona, naimiema meinetimaci. Iena fidia mei, ¿niese naie patrón nibaiite?

<sup>16</sup> Naimie biite, naie sedarainina meinellena. Ie mei jiaínona ie illina sedataite.

Naie rafuena cacadino raitimaci:

—Bie isoide rafue suillana jitañedicaí.

<sup>17</sup> Naimacimo Jesús eruaillano, llote:

—Naie illi sedaraini isidomoi. Jusiñamui facaina lloraima micori omoína jiaie cuete. Ie ciegafuena raise facañedomoi. Naimie micori cueda:

Jofo finoraini jitañena nofici nana naie jofomo ite nofici baifemo jai uaide.

cueda. Jusiñamui cominina damerie jaillana naimie micori cuete. Jusiñamui oretagamiena damerie jitañenamona, naimie cominina jaiñeitimaci; iadedi



Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

<sup>18</sup> Naie noficina nia ñaiticue. Noficimo bu eicaitaia, bofedaite; ia naie nofici bumona ana uaia, naimiena saitaite. Ie isoide. Cue llwana omoi jamaia, duere sefuitomoi. Iena omoi inoñenia, ja muidomo faifitomoi —llote.

*Jesúmo gobiernomo ucubena fecajana jicanua rafue*

(Mt 21.45-46; 22.14-22; Mr 12.12-17)

<sup>19</sup> Jesús como lloga rafuedo naimacina ñaiana uiñotimaci. Ie jira naie facaiseconi judíuaí illaicomini naimiena gaitacadimaci; iadedi cominina jaciruitimaci.

<sup>20</sup> Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci.

<sup>21</sup> Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio.

<sup>22</sup> Omo rafuena jicanoiacadicaí. Dama Jusiñamuina sedadicaí; iadedi romanos railla nairaí anamo birui cai illa jira, ¿naimaci illaíma Césarmo ucubena cai fecajana rairuidio? Caímo llono —lloimaci.

<sup>23</sup> Naimiena naimaci jifuiana uiñuanona, Jesús dinena uai ote:

<sup>24</sup> —Ucube cuemo acata. ¿Bu ie joreño nainomo ite? ¿Bumona jainaiaide bie cuega radi?

Uai otimaci:

—César.

<sup>25</sup> Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

<sup>26</sup> Jesúsdi uai raise ua jira naimie lluaamona jeare rafuena uiñoñedimaci, naimiena llogidollena. Naimie lluari rajicaillamona, llicaidimaci.

*Jesús dine saduceuaí railla comini billa rafue*

(Mt 22.23-33; Mr 12.18-27)

<sup>27</sup> Naie facaise dajerie saduceuaí railla comini naimie dine bitimaci. “Fiodaillamona jaca buna jilloñeite” raisoidimaci.

<sup>28</sup> Jesúmo llotimaci:

—Maestro, cai facaina Moisés micori jaie cuega: “Fima fiodailla meinomoni, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

<sup>29</sup> Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla.

<sup>30-31</sup> Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide.

<sup>32</sup> Ja muidomo naie riño jiaí fiodaite.

<sup>33</sup> Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —lloimaci.

<sup>34</sup> Jesús uai ote:

—Birui aina otomoi. Inina otomoi;

<sup>35</sup> iadedi fiodaillamona, Jusiñamui diga jaca itino jillua mei, ainitimaci. Ininitimaci;

<sup>36</sup> ia Jusiñamui jaienisaí isoi illanona, dane fiodaiñeitimaci.

<sup>37</sup> Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

<sup>38</sup> Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jai jillotaite. Naimiemo naimaci duillamona, naimaci abiai diga jilluanona, naimie diga jaca iitimaci –llote.

<sup>39</sup> Iena cacajano, Moisés micori llogacinuaina llofuerainimona dajerie raite:

—Maestro, raise llotio.

<sup>40</sup> Ie facaise naimiemo nie isoide rafuena dane jicanuana jaciruitimaci.

*Jesús dinena fariseuai cominimo jicanua rafue*

*(Mt 22.41-46; Mr 12.35-37)*

<sup>41</sup> Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci?

<sup>42</sup> Salmos railla cuezafuiaimo David micori jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

<sup>43</sup> Ona ñnoñedino o anamo itataiticue”.

<sup>44</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

*Jesúdi judíuai illaicominiña ñaia rafue*

*(Mt 23.1-36; Mr 12.38-40; Lc 11.37-54)*

<sup>45</sup> Nana comini cacajano, ie llofueganomo Jesús llote:

<sup>46</sup> —Moisés micori llogacinuaina llofuerainimona abina rairui. Illaicominiña naimaci itimacidena, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedina itimacidena, comini naimacina uaiduana gaidimaci. Comini naimaciri acarillena, ofiracomo uicomo raiacadimaci. Rafue ia, naimaci jamai bue isoñedina comecina facajanona, rafue nama ecimo raiacadimaci.

<sup>47</sup> Feciñuaimona rana ocabillanona, naiñaiñuaina duere finodimaci. Naimiena eo sedadimacidena, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

## 21

*Jesúdi Jusiñamui jofomo duerede feciño ucube fecajana ciua rafue*

*(Mr 12.41-44)*

<sup>1</sup> Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode.

<sup>2</sup> Eo duerede feciño menaruñu joniana jiai ciode.

<sup>3</sup> Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete.

<sup>4</sup> Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoimo ite ucubena jai jonete. Janore jonete; ia Jusiñamuimona naiñaiñodi jiaino baifemo jonete.

*Jesúdi Jerusalémo ite Jusiñamui jofo judaiana llua rafue*

*(Mt 24.1-28; Mr 13.1-23)*

5 Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici diga finoca. Eo mare ra nainomo jiaí ite.

6 Jesús llote:

—Birui bie rana ciodomoi; iadedi íco jiaíruido nana bie jofomo ite noficiái oni judaísite.

7 Jícanotímaci:

—Jusiñamui jofo judaísillana omo jícanoíacadícai. ¿Níruido iena suite? Nana o lloga rafue suillena, ¿nie isoide rafue nano suite? Iena caímo llono.

8 Uai ote:

—Omoína bie rafuena bu jífueñellena, omoi abína rairui. Ailluena comíni cue mamecido billanona: “Cristodícue” raitímaci. “Cristo jai bairede” raitímaci. Naimaci díbeímo íñeno.

9 Jobaímíai illena fidíitómoi; iadedi jacíruiñeno. Iese suite; iadedi abído nia bíñeítícue.

10 Daje nairai jiaíe nairai diga jobairite. Daje gobierno jiaíe gobierno diga jobairite.

11 Eo aillena ñuisañuai suite. Diga illanomo comíndi aime guitímaci. Duicuai eo iite. Monamo comíni diga jacírede rana cíoitímaci.

12 Bie isoide rafue nia suiñenia, cuena íñoñedíno omoína llogídoítímaci. Omoína gaitatajanona, omoína duere fínoítímaci. Naimaci ofíracomo omoína uitímaci. Cárcelmo omoína jonetímaci. Cuemo omoi duilla jira, omoi duere sefuillena, illaícomíni díne omoína uitímaci.

13 Naie facaiseconi cue rafuena naimacímoo lloítómoi.

14 Omoi abína omoi ríidoía, omoi lluaña uicodo jarire íñeno.

15 Omoi raise llollena, omoína canoítícue. Uíñoracínona omoímoo ítícue. Iemona omoi díbeímo íñedíno o uaina uaitanímaci.

16 Cuena ínotómoi; ía ailluena cuena íñoñeítímaci. Cuemo omoi duilla jira, omoína enoítímaci. Iemona dajerie mootíai, dajerie eítíai, dajerie amatíai, dajerie nabaiñíai omoína llogídoítímaci. Omoímoo dajeríena meíneítímaci.

17 Cue comínina omoi íllamona, nana nairai omoína enoítímaci; iadedi cuena fáinonocaiñedímíe ía muidomo monamo íaca íite. Naimíena jíllotaitícue.

18 Omoi ílle dínorí Jusiñamui omoína raise sedaíte.

19 Duere omoi sefuía, cuena fáinonocaiñeno íai. Ía muidomo monamo íaca íítómoi.

20 Jerusalén fuedo ruicabene ícaífona soldaduai ía, íe judaílle facaiseconi íaireí íite.

21 Naíemona omoi jíllobíllena, duere omoi sefuiñellena, Judeamo omoi íllamona, aneduai díne aísí. Jerusalémo omoi ía, naíemona oni jíno omoi íai. Jíno omoi ía, Jerusalémo omoi íaiñeno.

22 Íe facaína lloraíní mícoríaí cüegafuíai suíllanona, naíe facaiseconi naimíena íñoñedínomona Jusiñamui íbana oíte.

23 Naíe rafuemona jíllobíllena, naíe facaise uruesíde ríño duere sefuite. Uruena nia jírode ríñodí íai duere sefuite. Naíe facaise comíni duere sefuitímaci. Llegí cacaitímaci.

24 Lloebí diga meíneícana uitímaci. Jiaíe nairai díne naimacína ía-íadoítímaci. Judíuaiñedíno sedalle facaise dínorí, naimaci anamo Jerusalémo ítíno íítímaci.

*Jesús abído íe bílle rafue*

*(Mt 24.29-35, 42-44; Mr 13.24-37)*

25 Jesús nia llofueíte:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comeciai eo jarire iitimaci.

<sup>26</sup> Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioidaitimaci isoi iitimaci.

<sup>27</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue.

<sup>28</sup> Bie isoide rafue suia, omoina cue jilloitajabillirui iairei illa jira, cue billirumo raise ocuiri.

<sup>29</sup> Iena omoi raise uiñollena, bie rafuena omoimo lloiticue. Higuera raila riaramo omoi comeciaina faca. Nana amenamo comeciaina faca.

<sup>30</sup> Bie eniruemo amena firuillamona, fiemona raire illana uiñotomoi.

<sup>31</sup> Ie isoide. Bie rafue ico suia, Jusiñamui ie cominina raire sedajana uiñoitomoi.

<sup>32</sup> Uanaicinona omoimo lloiticue. Nana bie rafue suille facaiseconi bie nairai nia iite.

<sup>33</sup> Mona fuite. Enirue jiai fuite; iadedi cue lloga uai jaca suite.

<sup>34</sup> Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuena inoñedinona duere finollena, ebena abido biiticue.

<sup>35</sup> Cue bia, illaimana cue illamona, nana cominimo juez isoi lloiticue.

<sup>36</sup> Ie jira nagarui abi rairuicana jai. Naie duere sefuille facaise omoi jilloillena, Jusiñamuimo jii. Ja muidomo monamo cue diga jaca iitomoi —lote.

<sup>37</sup> Jusiñamui jofomo Jesús nagarui llofueuide. Naiona Olivos raila anedumo, nainomo inillena, jaisoide.

<sup>38</sup> Nagarui jitiramo naimiena cacareillena, Jusiñamui jofomo comini bisoidimaci.

## 22

*Judúuai illacomini Jesúna gaitallena siadua rafue*  
(Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Naie facaise pascua raila rafue iairei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite.

<sup>2</sup> Judúuai illacomini Jesúna meineiacadimaci; iadedi cominina jaciruillanona, naimiena nia meineñedimaci.

<sup>3</sup> Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie.

<sup>4</sup> Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide.

<sup>5</sup> Jobillanona, naimiemo ucubena feaacadimaci.

<sup>6</sup> Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

*Jesúdi ie fiodaille rafuena llua rafue*  
(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Llomenico guille rafue illanona, judúuai comini toica llauda fauillarui ride.

<sup>8</sup> Jesúdi Pedro iaiaiaia Juan diga oretajano, raite:

—Cai rafue guille uicodo finollesa omico jai.

<sup>9</sup> Naimiemo jicanotiaiaiaia:

—¿Ninomo naiena coco finuana jitaidio?

10 Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raza.

11 Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono.

12 Ie mei omicomio afebebamo ite aillue cuartona acataite. Na raruia diga ite. Nainomo cai guille fino.

13 Jaidiaimaia. Naimie llua isoi baitiaimaia. Pascua rafue guille finodiaimaia.

14 Guille facaiseconi ia, Jesús ie llofueoicaigano diga nainomo guisaide.

15 Mesamo guitimacimo, ie llofueoicaiganomo llote:

—Nia cue fioldañenia, omoi diga bie rafue guillena eo jitaidecue.

16 Ie cominina cue Moo ico sedalle facaise ia, nana bie rafue fuite.

17 Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro.

18 Omoina bene dane iese caimare nabaiñeiticue. Cue Moo sedajanomo omoi diga ico cue ia, nainomo omoina dane iese caimare marena nabaiticue. —Iena jirodimaci.

19 Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioldaiticue. Cue abimo omoi comequina facajano, iena guiño.

20 Naimaci guilla fuilla mei, jiroracomo vino diga dane oruitajanona, naimacina jirotrate. Raite:

—Cue fiollaillamona, dama cue diaillamona, jeacino anamona jilloitomo. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

21 Jesús llote:

—Ero, cuena gatataitimie cai diga guite.

22 Monamona billanona iimana jaidicue. Jusiñamui jitailla isoi jai jaiocaidicue; iadedi Jusiñamuimona cuena gatataitimie eo duere sefuite.

23 Iemei: “¿Nimie Jesúsna gatatalle?” dani coniniri siadoside.

### *Naimaci moto imiēna bu ille rafue*

24 Ie facaise coniniri siaduana raitimaci:

—¿Cai moto imiēna bu ille?

25 Iena cacajanona, Jesús raite:

—Naimaci jitailla ra finollena, judíuaiñedino illaiaiaidi naimaci anamo itinona ocuicabide. “Cai anamo itinona canocabidicai” raitimaci;

26 iadedi omoimo iese iñede. Omoi moto itimie omoi moto imieñedimiena jailla. Omoimona bu imiēna iacania, omoi mullaimana naimie jaicabillasa. Omoimona bu imiēna iacania, omoina naimie canocana jaicabillasa.

27 Ero, jiaie rafuedo iena lloiticue. Naimiēna ecallena, naimiēna canollena, patrón anamo ie mullaiaititmaci. Naimaci baifemo patrón illamona, naimacina canollena, ie mullaiaifacaina maijiñede. Cue anamo itomoi; ia omoina canollena, omoi mullaia isoi iticue.

28 Birui duere cue sefuidicuemo, cuena fañonocaiñedomoi.

29 Cue Moo cuena illaimana jai itatate. Omoina fetodicue,

30 jiairuido cue illaia illa facaiseconi cue ecimo omoi caimare marena iocire illena. Nainomo omoi judíuai doce nairaiaina sedaitomoi.

*Jesúdi Pedro naimiēna januana llua rafue*  
(Mt 26.31-35; Mr 14.27-31; Jn 13.36-38)

<sup>31</sup> Jesús llote:

—Simón Pedro, ero, Taifedi Jusiñamuimo ona jicanote, o ramo faillena;

<sup>32</sup> iadedi ori jai jidicue, cuena nia ñnocana o jaillena. Ico cuena raise o ñnoñena mei, cue dibeimo o comeci iuai dane o meidoia, iemona jiaie creyentiaie comeciaina ocuiñotaitio.

<sup>33</sup> Pedro uai ote:

—Nama, cárcelmo o ia, nainomo jiaie iiticue. O fiodaia, jiaie fiodaiticue. Ona fañonocaiñeiticue.

<sup>34</sup> Jesús uai ote:

—Pedro, jitiñamo itava nia ñaiñenia, dacaiño amani cuena janoitio.

*Jesús fiodailla facaise iaie rei illa rafue*

<sup>35</sup> Ie llofueoicaiganomo Jesús llote:

—Omoimo ite rafuena uiñoiacadicue. Cue rafue llollena, navui omoina oredicue. “Ucubena uiñoeno, bolsa uiñoeno, meidolle zapatos uiñoeno” omoimo lloticue. Naie facaiseconi omoie, ¿bue rana jitaídomoie?

Uai otimaci:

—Cai buena jitaíñedicai.

<sup>36</sup> Jesús raite:

—Biruimona omoie duere sefuitomoie. Ie jira abina rairuicana jai. Birui ucube omoimo ia, ñine omoie jaia, iena uiño. Bolsa bumo ia, iena uiño. Abina ridollena, omoimo lloebi ñenia, janore ñiroina feca, lloebi ollena.

<sup>37</sup> Cuena jaie ciegafuiaie ja suite. Isaías micorí cuena jaie cuela: “Maraiñede rafue finoraíma isoi naimie duere sefuite”.

<sup>38</sup> Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

*Jesúdi Getsemanímo Jusiñamuimo jia rafue*  
(Mt 26.36-46; Mr 14.32-42)

<sup>39</sup> Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide.

<sup>40</sup> Nainomo ria, naimacimo llote:

—Taife omoina ramo fai raillano, iena omoie ñnoñellena, Jusiñamuimo jii — llote.

<sup>41</sup> Naimie janorede nofici bai faia uaila ñinori bai jaide. Caiñici ifodo ana raia, Jusiñamuimo jide:

<sup>42</sup> —Ore Moo, o jitaia, cue duere sefuillamona cuena jillota. Cue jitailla isoi cuena ñnoñeno; iadedi o jitailla isoi cuena fino.

<sup>43</sup> Naimie comecina ocuiñotallena, ie facaiseconi monamona Jusiñamui jaienicie bite.

<sup>44</sup> Jesús comeci jarire illamona, naimie rioci faitemo, difai ñiruena eniruemo uaide.

<sup>45</sup> Jia mei, ie llofueoicaigano ñine abido bite. Ocosinaillamona, jai inidimaci.

<sup>46</sup> Naimacimo jicanote:

—¿Bue ñellena inidomoie? Mai casi. Taife ramo omoina fai raillano, iena omoie ñnoñellena, Jusiñamuimo jii.

*Jesúna gaitalle rafue*  
(Mt 26.47-56; Mr 14.43-50; Jn 18.2-11)



<sup>47</sup> Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite.

<sup>48</sup> Jesús raite:

—Judas, cuena llibanuanona, cuena gaitataiacadio.

<sup>49</sup> Ie llofueoicaigano naie rafuena jai ciodimaci. Jicanotimaci:

—Nama, ¿cai atica lloebi diga ona ridoitica?

<sup>50</sup> Ie facaise naimacimona damiedi Jusiñamui diga nanoca ñairaima ie mullaïma ie nabei jefona jaïbonote.

<sup>51</sup> Jesús dinena raite:

—Dama ite. —Ie jefona naimie jetajamona, naimiena jillotote.

<sup>52</sup> Diga illaïcomini Judas diga Jesús dine bitimaci. Naimacimo Jesús llote:

—Fïiriraïmadicuenta cuena omoi gaitajaïbilla. Omoi lloebina atïdomoi. Omoi butaralluna jiaï atïdomoi.

<sup>53</sup> Nagarui Jusiñamui jofomo omoi motomo llofuecabitïcue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

*Pedroï Jesúna janua rafue*

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

<sup>55</sup> Nairaïbirï motomo irai bonua mei, ana raidimaci. Pedro naimaci diga jiaï raide.

<sup>56</sup> Nainomo ite mullaïñodi irai bouamona, Pedromo eruaïllano raite:

—Bimiedi Jesús diga jaisoidimie.

<sup>57</sup> Pedro abi janote:

—Naimiena uiñoñedicue.

<sup>58</sup> Dallu illanona, jiaïmie Pedrona ciuanona llote:

—Jesús ie llofueoicaigano imïedio.

Pedro dinena uai ote:

—Imieñedicue.

<sup>59</sup> Daje hora illanona, jiaïmie raite:

—Bimie galileo imïena jira, bimiedi Jesús diga ua jaisoidimie.

<sup>60</sup> Pedro dinena raite:

—O llwana uiñoñedicue. —Ieconï naimie ñaitemo, ïitava ñaite.

<sup>61</sup> Jesús dobaidacaida, Pedromo erodacaide. Iemei Pedro Jesús llwana uibiñote. Jesús naimïemo jaive llote: “ïitava nia ñaiñenia, dacaiño amani cuena janoitio”.

<sup>62</sup> Pedro jino jaïllanona, eo sunaïllamona, eo eede.

*Jesúna jïfanodua rafue*

*(Mt 26.67-68; Mr 14.65)*

<sup>63</sup> Ie facaise Jesúna gaitadïno naimiena jïfanododimaci. Naimiena jiaï fatimaci.

<sup>64</sup> Ie uisina maïtimaci. Llotimaci:

—Siño jitodiosa, ¿bu o faja? caïmo llono.

<sup>65</sup> Iese jïfanodocana uitimaci.

*Jesúdi judïuai illaïcomini dine illa rafue*

*(Mt 26.59-66; Mr 14.55-64; Jn 18.19-24)*

<sup>66</sup> Monaidemo judïuai illaïcomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiena gaitadïno Jesúna uitimaci. Naie illaïcomini dinena raitimaci:

- 67 —Ua Cristodiona, iena caimo llono.  
 Jesús uai ote:  
 —Omoimo iena cue lloia, inoñeitomoi.  
 68 Buena omoimo cue jicanoia, cue uaina oñeitomoi.  
 69 Monamona jaie billanona, imana jaidicue. Cuen a omoi meiniamona, illaïma isoi Jusiñamui ecimo raire iiticue.  
 70 Nana jicanotimaci:  
 —“¿Jusiñamui Jitodicue” raitio?  
 Uai ote:  
 —Raise cacadomoi. Imiedicue.  
 71 Iena cacajano, raitimaci:  
 —Naimie llua jai cacadicaï. Jiaie comini naimiena llogiduana jai jitañedicaï. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

## 23

### *Pilato ðine Jesús illa rafue*

(Mt 27.1-2, 11-14; Mr 15.1-5; Jn 18.28-38)

- 1 Judíuai illaïcomini naidacaïllanona, Pilato ðine Jesúsna uitimaci.  
 2 Naimiena llogidotimaci:  
 —Cai cominimo marañedifuenalote. Gobiernomo ucubena cai fecajana rairuide. Naimie jiaï raite: “Cristodicue. Illaïmadicue”.  
 3 Pilato ðinena naimiemo jicanote:  
 —¿Judíuai comini illaïmadio?  
 Uai ote:  
 —Jiï, judíuai illaïmadicue.  
 4 Jusiñamui ðiga nanoca ñairainimo Pilato llote. Nainomo bite cominimo jiaï llote:  
 —Ñicinodi naimiemo iñede.  
 5 Uai otimaci:  
 —Gobierno joreño comini comeciaï jeare feidocana naimie uite. Nana Judeamo uite. Galileamona tainede. Bene jai caimo ride.

### *Herodes ðine Jesús illa rafue*

- 6 Iena cacajano, naimie llogidotinomo Pilato jicanote:  
 —¿Naimiedi Galilea imie?  
 7 —Jiï —raitimaci. Galilea enirue illaïma Herodes. Naie facaiseconi Jerusalémo naimie illa jira, naimie ðine Pilatodi Jesúsna orede.  
 8 Jesúsna Herodes ciuanona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiaï cioacade.  
 9 Jesúsno ie finoca rafuena are jicanote; iadedi Jesús ðinena uaina oñede.  
 10 Ie facaiseconi judíuai illaïcomini Jesúsna raire llogidotimaci.  
 11 Herodes ie soldaduai ðiga naimiena eo jeare ñaitimaci. Illaïma jitauga iniroina jitatatimaci. Ie mei Pilato ðine naimiena abido orede.  
 12 Iemona nairuido Herodes Pilato ðiga nabairite. Jiaie conimana enoidiaïmaïaï.

### *Pilatodi Jesús fiodaïllana llua rafue*

(Mt 27.15-26; Mr 15.6-15; Jn 18.39-19.16)

- 13 Pilatodi judíuai illaïcominina, nainomo ite comini ðiga, uaidote.  
 14 Raite:  
 —Bimie cue ðine atïdomoi. Raitomoi: “Comini comeciaï feidocana naimie uite”. Naimiemo jai jicanoticue; ia naimiemo ñicinodi iñede.

15 Herodes cue dine naimiena como abido orede. “Naimiemo nicinodi iñede” jiai raite. Naimiena cue meinellena, naimie jaca nicinona finoñede.

16 Ie jira naimiena cue sechedotajanona, naimiena oni oretaiticue.

17 Naie rafue facaiseconi naga año cárcelmona damiena jino jamai oretaiticue.

18 Pilato lluana cacajano, nana comini ado cuiiriidimaci:

—¡Naimiena oni uiño, naimiena meinellena! ¡Barrabás cárcelmona jino oreta!

19 Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite.

20 Jesúna naimie jamai oretaiacana jira, comini diga Pilato dane ñaite;

21 iadedi cuiiriidimaci:

—¡Naimiena corai! ¡Naimiena meine!

22 Pilato dane jicante:

—¿Ñie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

23 Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite.

24 Naimaci jitailla isoi Pilato fairiote. Jesúna meinellena llote.

25 Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

### *Jesúna coraia rafue*

*(Mt 27.32-44; Mr 15.21-32; Jn 19.17-27)*

26 Jesúna soldaduai oni uitemo, Simón raillamie diga dafafidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaoicaida sonotate.

27 Ailluena comini Jesúna racadimaci. Ailluena riñoniai eo eecana jaisite.

28 Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiñaiñuai, cue facaina eeño; iadedi omoi facaina mai omoi ee. Omoi uruiai facaina mai omoi ee.

29 Ero, jiairuido duere sefuillemona comini raitimaci: “Oiniñuai jiaie riñoniai baifemo duere sefuiñena jira, marena itimaci”.

30 Jusiñamui riicaillafuemona jilloiacanamona, comini jiai raitimaci: “Ane-duai caimo jaicorillana jitaidicai”.

31 Marañede rafuena finoñedicue; iadedi jai duere sefuidicue, Marañede rafuena finodimaci. Ie jira cue baifemo eo duere sefuitimaci.

32 Naie iaimaiaina meinellena, mena marañede imana jiai uitimaci. Gobierno llogacinona inoñediaimaiai.

33 Hfocoraina eruailla illanomo naimaci ria, Jesúna coraidimaci. Naie marañede iaimaiaina jiai coraidimaci. Dame Jesús nabeimo. Jiaimie Jesús jarifebeimo.

34 Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanos soldaduai facasite.

35 Ailluena comini eruidimaci. Judúuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Ñiese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

<sup>36</sup> Soldaduai naimiena jiai jifanododimaci. Ie abi isirena cacaiñellena, naimiemo vino fecajanona,

<sup>37</sup> raitimaci:

—Judíuai illaimadiodena, fiodaillamona dama o abina jillota. —Naie vino Jesús jiroñede.

<sup>38</sup> Jesús ifogi afeconi rabricimo Pilato cuetatate: “Bimiedi judíuai comini illaima”.

<sup>39</sup> Jesús diga coraica iaimaiaimona damie naimiena taigode:

—Jusiñamuimona bitiodena, nia fiodaiñenamona dama o abina jillota. Cona jiai jillota.

<sup>40</sup> Jiaimiedi naimiena lletade:

—¿Bue ñellena bimiena taigodio? ¿Ñiese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Ñiese Jusiñamui uicomo o illena jaciruiñedio?

<sup>41</sup> Maraiñede rafuena coco finua jira, duere sefuidicoco; iadedi bimie maraiñede rafuena finoñede.

<sup>42</sup> Iemei Jesús mo llote:

—Illaimana o illa facaise cuena comeci.

<sup>43</sup> Jesús uai ote:

—Uanaicino lloticue. Birui cue diga cue Moo illanomo iitio.

### *Jesús fiodailla rafue*

*(Mt 27.45-56; Mr 15.33-41; Jn 19.28-30)*

<sup>44</sup> Jitoma naidai jai itemo, daje amani horas mona jitibicaide.

<sup>45</sup> Jitoma raise lligaiñoñede. Jusiñamui jofo ie fetaca iniroife ana anaba jillacimo metodo menafe cuararide.

<sup>46</sup> Jesús ado llote:

—Ore Moo, cue joreña feiño. —Ie mei naimie jai fiodaite.

<sup>47</sup> Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

<sup>48</sup> Ailluena comini Jesús fiodaillana cioidimaci. Ie mei eo sunaillamona, jogobemo fairuanona, jofomo abido jaidimaci.

<sup>49</sup> Jesús nabaiñiai bie rafuena aarena cioidimaci. Galileamona bite riñoniai bie rafuena aarena jiai cioidimaci.

### *Jesús raiafomo jonia rafue*

*(Mt 27.57-61; Mr 15.42-47; Jn 19.38-42)*

<sup>50-52</sup> Pilato dine José raillamie jaide, Jesús abina jicallena. Naimiedi illaicomini. Maremie. ñnogamie. Jesúsna meiniana jitaiñede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride.

<sup>53</sup> Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiñenafomo jonete.

<sup>54</sup> Nairui viernes. Sábadorui rille jai iairei illa jira, Jesús abina raiafomo raire jonete.

<sup>55</sup> Galileamona navui bite riñoniai racadimaci. Raiafona cioidimaci. Naimie abi finuana cioidimaci.

<sup>56</sup> Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

## 24

*Jesús fiodaillamona jillua rafue*  
(Mt 28.1-10; Mr 16.1-8; Jn 20.1-10)

<sup>1</sup> Domingo jítiramo monaidemo, naie riñoniai raiafomo jaidimaci, iñaiñuai finoca soride rana uillena.

<sup>2</sup> Raiafo ibaila nofici oni joillana cioidimaci.

<sup>3</sup> Fo jaidemo, Jesús abina cioiñedimaci.

<sup>4</sup> Uainicaidimaci. Ieconí menamie naiñaiñuai ecimo bairediaimaiaí. Iaimaiaí iniroi eo quenirede.

<sup>5</sup> Iaimaiaína jacinaillamona, ifogi ana jítadacaidimaci. Naie iaimaiaí dinena jicanote:

—¿Bue ñellena fiodaitimie illanomo cajedimiena jenodomoí?

<sup>6</sup> Galileamo navui naimie omoimo llogacinona comeciñedomoí.

<sup>7</sup> Naimie raite: “Monamona billanona, imana jaidicue. Jusiñamui jitailla jira, maraiñede rafue finoraini anamo iiticue. Cuená coraitimaci. Darui amani illanona, fiodaillamona jilloiticue” raite.

<sup>8</sup> Iemona ie llogacinona jai comecitimaci.

<sup>9</sup> Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiaí llotimaci.

<sup>10</sup> Naie riñoniaimona María Magdalena ite. Juana ite. María ite. Naiñaiñodi Jacobo ei.

<sup>11</sup> Naie riñoniaídi iena llotimaci; iadedi ie rafuena cacadinodi iena iñoñedimaci.

—Jamai fuena ñaitomoí —raitimaci.

<sup>12</sup> Iena cacajano, Pedro aisicana raiafomo jaide. Nainomo ria, ana jítadacaida, fo erodate. Useroi joillana ciode. Iemo ie comecina facajano, jofomo abido jaide.

*Mena llofueoicaiganomo Jesús bairia rafue*  
(Mr 16.12-13)

<sup>13</sup> Jesús jilluarui mena llofuega iaimaiaí Emaús railla nairaímo jaidiaimaiaí. Jerusalémona nibaí once kilómetros ite.

<sup>14</sup> Nana Jesúmo suide rafuena ñaiano jaidiaimaiaí.

<sup>15</sup> Iaimaiaí ñaianona, Jesús iaimaiaí diga dafaífillanona, iaimaiaí diga jaide.

<sup>16</sup> Jusiñamuidi iaimaiaína naimiena uiñotañena jira, naimiena uiñoñediaimaiaí.

<sup>17</sup> Iaimaiaímo Jesús jicanote:

—¿Buena ñaitomíco? —Ieconí naidadatiaimaiaí. Sunaitiaimaiaí.

<sup>18</sup> Naie iaimaiaímona damiedi Cleofas. Naimie uai ote:

—¿Ñiese Jerusalémo birui suide rafuena uiñoñedio? Nibaí como ridio. Nana jiaí comini iena uiñotimaci.

<sup>19</sup> Uai ote:

—¿Ñie isoide rafue suide?

Uai otiaimaiaí:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofue. Jusiñamuimona naimiedi maremie. Cominimona naimie maremie;

<sup>20</sup> iadedi cai illaícomini naimiena gaitatatimaci. Naimiena cruzmo coraitatimaci.

<sup>21</sup> Jusiñamui naimie cai dine orecamiemo comecina facadicoco. Naimie cai illaimana illemo ocuridicoco; ia naimie jai fiodaite. Naimie fiodaillamona darui amani jai ite.

22 Cai cominimona dajerie riñoniaibirui caina jacinaitadimaci. Jitiramo Jesús raiafomo jaidimaci;

23 iadedi naimie abina cioiñedimaci. Abido naimaci bia: “Jusiñamui jaienisaia ciodicaí” raitimaci. Naie jaienisaí naimacimo llote: “Naimiedi caje”.

24 Iemei caimona dajerie raiafomo jaidimaci. Riñoniaí llua isoi ciodimaci. Jesús abina cioiñedimaci.

25 Jesús dinena uai ote:

—Abi uiñoñedomico. Nana Jusiñamui facaina lloraini micoriaí cuegafuiaina inoiacaiñedomico.

26 Cristo duere sefullena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

27 Iemei Jesús iaímaiaina llofuate. Moisés micori cuegafuiaina llofuate. Jusiñamui facaina lloraini micoriaí cuegafuiaina jiaí llofuate. Nana Cristona cuegafuiaina llofuate.

28 Emaús dine iaírei naimaci ria, Jesús nia jaiacademo,

29 naimiena caididiaímaiaí. Raitiaímaiaí:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaímaiaí diga fiebillena fo jaide.

30 Nailli guitimacimo, llomenicono Jesús llinuano, Jusiñamuimo iobil-lacinona fecade. Iena tairuano, iaímaiaímo fecade.

31 Jusiñamui jitailla jira, ieconi Jesúsna uiñotiaímaiaí. Iemei iaímaiaímona naimiena jai cioicaiñena.

32 Daimaiaí ñaitiaímaiaí:

—Coco diga naimie ñaia, coco comeci caimare ite.

33 Naie dacaíño Jerusalémo abido jaidiaímaiaí. Jesús llofueoicaigano naimaci nabaiñaí diga danomo illana baitiaímaiaí.

34 Iaímaiaímo llotimaci:

—Cai Nama fiodaillamona jai jillode. Simón Pedromo jai bairede.

35 Ie mei naísona iaímaiaí jailla rafuena llotiaímaiaí:

—Cai guiticaímo, naimiena uiñoticoco —llotiaímaiaí.

### *Jesús ie llofueoicaigano bairia rafue*

*(Mt 28.16-20; Mr 16.14-18; Jn 20.19-23)*

36 “Jesúna ciodicoco” llotiaímaiaímo, ie llofueoicaigano motomo Jesús bairede. Llote:

—Jai biticue. Uri omoi i.

37 Naimiena ciuamona, jacinaitimaci. “Joreña ciodicaí” comeciaina faca-janona, jiaí jaciruitimaci.

38 Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana inoñedomoi?

39 Cue onollimo eruai. Cue eillimo eruai. Jesúsicue. Cuena jeta, raise uiñollena. Cuemo llicisi ite. Cuemo illaici ite. Jamai joreño isoiñedicue.

40 Iena llua mei, coraíafona naimaci cioillena, ie onolli ie eilli diga acatate.

41 Iobiacadimaci; iadedi nia raise inoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

42 Naimiemo janorede jai ruica lliciaina fecadimaci.

43 Iena feiñuanona, rite. Iena ciodimaci.

44 Naimacimo llote:

—Navui omoi diga cue ia, diga rafue omoiimo lloticue. Moisés micori cuena cuete. Jusiñamui facaina lloraini micoriaí cuena cuetimaci. Jusiñamui jitailla jira, iena jai suide.



<sup>45</sup> Naie facaiseconi naimacina naie cuegafuiaina raise uiñotade.

<sup>46</sup> Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite.

<sup>47</sup> Naimie muidona comeciai iuai meiduamona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloiticue. Cue rafuena llollena, Jerusalémo taineitomoí.

<sup>48</sup> Bie rafuena ciodomoi. Iena lloitomoi.

<sup>49</sup> Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi llollena, naimie Joreño omoi comeciaina ocuiñotaite.

*Jesús monamo jailla rafue*

*(Mr 16.19-20)*

<sup>50</sup> Betania railla nairai dine Jesús naimacina ifode. Marecinona naimacimo llote.

—Jusiñamui omoína raise marena canoite —llote.

<sup>51</sup> Iena naimacimo lluanona, monamo jaide.

<sup>52</sup> Jerusalémo eo caimare abido jaidimaci.

<sup>53</sup> Jusiñamui iobillacino fecajano, Jusiñamui jofomo nagarui itimaci. Mai. Macaibaite. Lucadicue.

## JUAN JESUCRISTO ENIRUEMO ILLA RAFUE CUIAFUE

### *Jesucristo rafue iese tainede*

<sup>1</sup> Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui.

<sup>2</sup> Jusiñamui diga jaca nano ite.

<sup>3</sup> Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede.

<sup>4</sup> Naimie muidona iticai. Naimiena cai ñnuamona, jaca iiticai. Lligaiñora diga rana cai ciua isoi, caina Jusiñamuina uiñotade.

<sup>5</sup> Naimiena ñnoñedino jitiredinomo itimaci isoidimaci. Naimaci comeciari jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

<sup>6-7</sup> Naimaci comeciaina lligaiñotimiena lollena, Juan micori llucinodo Jusiñamuina nana comini ñnollena, Jusiñamuidi Juan Bautista raillamie micorina oretate.

<sup>8</sup> Juan naie lligaiñoñedimie; iadedi Juan naimiena lluaibite.

<sup>9</sup> Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote.

<sup>10</sup> Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci.

<sup>11</sup> Ie nairai illanomo naimie ride; iadedi nana cai nairai naimiena feiñoñedimaci.

<sup>12</sup> Damierie naimiena feiñotimaci. Naimiena ñnotimaci. Ie uaido naimiedi naimacina Jusiñamui uruiaina itatate.

<sup>13</sup> Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

<sup>14</sup> Iemo caina Jusiñamuina uiñotallena, Jusiñamui Jito comena jaide. Naie fa-caise cai comini motomo naimie ite. Cai cominina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai.

<sup>15</sup> Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

<sup>16</sup> Jesucristo caina eo duenaillamona, birui caina eo canocabide.

<sup>17</sup> Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñoticai. Naimiemona uanaicinona jai raise cacadicai.

<sup>18</sup> Jaca buna Jusiñamuina cioiñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

### *Juan Bautista micoridi Jesúsna llua rafue*

*(Mt 3.11-12; Mr 1.7-8; Lc 3.15-17)*

<sup>19</sup> Jerusalémona Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillamie mo ocuridicai. Cristo raillamie billemo ocuridicai. ¿Odi naimedio? —raillanona jicanotimaci.

20 Naimie dinena janoñede; ia:

—Imieñedicue —raite.

21 Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraíma ico billena jaie llote. ¿Odi naimiedío?

Juan dinena raite:

—Ieñedicue.

22 Dane jicanotimaci:

—¿Budío? Caimo llono, cai oretatinomo cai lollena. ¿Niese naimacimo ona lloiticai?

23 Juan dinena raite:

—Jofue iñenanomo ado llotimedicue. Isaías micori jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

24 Juan dine bitinodi fariseuai comini.

25 Nia jicanoiacadimaci:

—Odi cai Jilloitaraímañenia, o Elíañenia, o Moisés micori llotimieñenia, ¿bue ñellena cominina bautizadio? ¿Nie isoide uai omo ite? ¿Ninomona o uaina otío?

26 Juan dinena uai ote:

—Cominina bautizadicue; iadedi omoi motomo omoi uiñoñegamie jai ite.

27 Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiena canonidicue.

28 Naie rafuedi Betábaramo suide. Jordán railla ille ruicafebeimo ite. Nainomo Juan bautizauide.

### *Juan micori Jesúna dane llua rafue*

29 Ie areruido Juan micoridi Jesús naimie dine billana ciuano, naimiena raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite.

30 Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoíñede. Cue nia jeiciñenia, naimiedi jaca ite”.

31 Cue dine naimie nia biñenia, naimiedi cai Jilloitaraímana uiñoñedicue; iadedi cominina bautizallena bene iticue, cai cominimo naimiena lollena.

32 Juan jiai llote:

—Monamona ucugi isoi Jusiñamui Joreño ana billana cidicue. Jesúmo baite.

33 Naimiedi cai Jilloitaraímana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitío. Cue Joreño baillamiedi cue Joreño omoimo fecaite”.

34 Naie rafuena cidicue. Iemona naimiedi Jusiñamui Jitonana lloticue.

### *Jesús ie fetocaga comini ie rafue*

35 Ie areruido Juan micori llofueoicaiganomona menamie Juan micori diga ia,

36 Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

37 Juan micori diga itiaímaiaí nainya cacajano, Jesúna racadiaímaiaí.

38 Jinafo dine erodajanona, Jesús iaímaiaína ciode. Iaimaiaímo jicanote:

—¿Buena jitaídomico?

Iaimaiaí dinena uai otiaímaiaí:

—Rabbí, ¿ní o jofó? ¿Ninomo itio? —uai otiaímaiaí. Rabbí oni dobaiñuamona: “Llofueraíma raillamie”.

39 Jesús nai iaímaiaí uaina ote:

—Mai. Cue diga bi, omico uiñollena. —Ie jira jaidiaímaiaí. Jesús illanona ciodiaímaiaí. Jitoma nia a illa jira, nairuido naimie diga fiebidiaímaiaí. Jitirecaídemo oni jaidiaímaiaí.

40-41 Naie iaímaiaímona damie Andréna mamecíredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai comína Jilloitaraímana baiticue. Cristo raillamiena baiticue.

42 Ie mei Jesús dine naimiena uite. Jesús naimiena eo eruaíllanona, raite:

—Birui o mamecídi Simón. Juan ie jitodio. Biruimona Cefana jiaí mamecírenitio —raite. Oni dobaiñuacídi Pedro.

### *Jesús menamie uaidua raufe*

43 Ie areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillena, mai cue diga bi.

44 Felipedi Betsaida nairai imie. Andrés iaímaiaí Pedro diga daje nairai iaímaiaí.

45 Jesús naimiemo llua mei, Felipedi Natanaelna oni jenuaide. Higuera railla riará anamo naimiena baillanona, raite:

—Moisés micorí jaie cuegamiena jai baiticue. Jusiñamui lloraini micoriaídi naimiena jaie jiaí cuetimaci. Naimiedi Jesús. Nazaret imie. Ie moodi José.

46 Natanael naie nairáina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

47 Jesúsmona iaímaiaí iaíre ia, Jesús dinena llote:

—Ero, buna jifueñegamie billa. Nanoca Israel imie bite.

48 Natanael dinena uai ote:

—¿Bu cuena llogao? ¿Ñiese cuena uiñotio?

Jesús uai ote:

—Felipe ona ailli nia baiñenia, higuera railla riará anamo o illana jai uiñotícue.

49 Jacinaíllamona, Natanael dane uai ote:

—Maestro, odi Jusiñamui Jitodio. Cai comíni illaímadío.

50 Jesús dinena uai ote:

—Amena anamo o illana cue uiñua jira, cuena ñinotio. Diga siño rafuena ciojítio. Bie rafue baiñemo finuana ciojítio.

51 Jusiñamui mona billanona, ñimana jaidícue. Uanaicino omo llotícue. Mona ecorillana o cioia, Jusiñamui jaienisaí cue dine billena cioítio. Cuumona abido jaillena jiaí cioítio.

## 2

### *Jinuimona Jesús vino finua rafue*

1 Menarui illanona, Galileamo Canámo ñima ie aí uarafue ite. Rafue nama uaidua jira, nainomo Jesús ei jaide.

2 Jesús jiaí uaidoga. Ie llofueoicaiganodícaí jiaí uaidogacaí.

3 Vino cueíllamona, Jesús ei Jesúsmona llote:

—Vino jai iñede.

<sup>4</sup> Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

<sup>5</sup> Iemei ie eidi rafue nama mullaiaimo llote:

—Naimie omoimo lluaña fino.

<sup>6</sup> Jinui nainomo eenollena, nainomo seis noficimona finoca llerodana raisoide. Naiemona jinuina ouidimaci. Marena illena, cai einamací llua isoi, jofomo naimaci ria, naimaci abiaína llereuidimaci. Naga lleroda nibai cinco latas totaca.

<sup>7</sup> Mullaiaimo Jesús llote:

—Naie llerodaína jinui diga oruita. —Pozomona jinui atiano, naie llerodamo toidimaci.

Iena finua mei,

<sup>8</sup> Jesús naimacimo llote:

—Llerodamona janore jisa uanona, rafue nama dine uiño.

<sup>9</sup> Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaí uiñotimaci. Jirua mei, ai otimie uaiduano,

<sup>10</sup> raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

<sup>11</sup> Galileamo Canámo Jesúsdi siño rafuena nano finode. Iemona caína ie uai siñoña uiñotade. Ie muidona naimie siño Jitonana ñnoticaí.

<sup>12</sup> Rafue fuilla mei, Capernaumo Jesús ie ei diga, ie amatiaí diga, ie llofueoicaiganodicaí diga jaide. Nano nigarui nainomo iticaí.

*Jusiñamui jofomona Jesúsdi rana fecarainina dotaja rafue*

*(Mt 21.12-13; Mr 11.15-18; Lc 19.45-46)*

<sup>13</sup> Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite.

<sup>14</sup> Rillano, Jusiñamui jofomo diga rana fecarainina cide. Ucube ollena, nainomo juraretaiaí, toica llaudaiaí, ucugiaí fecauidimaci. Ucubena meidorainidi jiaí itimaci.

<sup>15</sup> Naimaci ocainiaí diga naimaci jino jiullena, rao Jesús uanona, iena lleride. Naimaci ucubena judaíde. Mesaína oni caitade.

<sup>16</sup> Ucugiaína fecarainimo llote:

—Omoi ucugiaína jino uiño. Cue Moo jofomo ra feca-fecajana jitañedicue —llote.

<sup>17</sup> Iemo Jusiñamuina lloraini micoriaí cuezafuiaína jai comeciticaí. Iese jaie cuela: “O jofona cue riiduamona, jiaíno cuena meinetaitimaci”.

<sup>18</sup> Nainomo ite judíuaí illaicomini dinena raitimaci:

—¿Ñie isoide uaido naimacina jino oredio? Siño rafuena fino, siño uai omo illana cai uiñollena.

<sup>19</sup> Jesús uai ote:

—Bicono judaí. Darui amani maijiamona iena dane nillana fuidoiticaí.

<sup>20</sup> Dane raitimaci:

—Cuarentiséis años bicomos maijidimaci, iena finollena. ¿Ñiese iena darui amani illanona, iena dane nillana fuidoitio?

<sup>21</sup> Iese raitimaci; ia Jesúsdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite.

<sup>22</sup> Jesús fiodaillamona naimie jillua mei, ie llofueoicaiganodicaí bie llucacinona comeciticaí. Ie jira naie cuezafuena ñnoticaí. Jesús llucacinona jiaí ñnoticaí.

*Jesúdi comini comeciámo iticino lluaña jitañena rafue*

<sup>23</sup> Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina ñnotimaci. Coniniri raitimaci:

—Naimiedi cai Jilloitaraíma.

<sup>24</sup> —Naganomo comeciána naimaci facaja jira, naie cominina naimie uiñuamona, Jesús naimaci motomo iacaiñede.

<sup>25</sup> Naimaci comeciámo iticinuaina naimie eo raise uiñua jira, comini rafuena naimiemo bu lluaña jitañede.

### 3

*Nicodemo Jesús diga ñaia rafue*

<sup>1-2</sup> Judíuai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

<sup>3</sup> Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeicñenia, Jusiñamui ie cominina sedajanomo jaca initio.

<sup>4</sup> Nicodemo abido jicanote:

—¿Ñiese eimie ie ei jeraimo dane iite? ¿Ñiese dane comonori jeicñite?

<sup>5</sup> Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeicñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite.

<sup>6</sup> Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica.

<sup>7</sup> Omo dane lloticue: Comonori jeicia. Ieri rajicaiñeno.

<sup>8</sup> Iena o raise cacaillena, jiaie rafuedo iena lloticue. Aifidi ie jitailla dine sairide. Iena cacadio; iadedi ninena billana uiñoñedio. Ñine jaillana jiaí uiñoñedio. Ie isoide. Ñiese Jusiñamui Joreño cominina comuitajana jiaí uiñoñedio.

<sup>9</sup> Nicodemo dane jicanote:

—¿Ñiese biedi dane iite? Raise cacaiñedicue.

<sup>10</sup> Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio.

<sup>11</sup> Uanaicinona omo lloticue. Abi uiñuamona omo lloticue. Cue ciua rafuena lloticue; iadedi cue lluaña ñnoñedio.

<sup>12</sup> Bene ite rafuena cue lloia, iena ñnoñediota, monamo ite rafuena cue lloia, iena jiaí raise ñnoñeitio.

<sup>13</sup> Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue.

<sup>14</sup> Monamona biticue; ia amenamo fiodaiticue. Jofue iñenanomo Moisés micori jaio joreño amenamo jaie cuinade. Jaioniaí añillamona comini fiodaiñellena iena cuinade. Comini ie isoi jilloillena, ie isoi cuena coraitimaci.

<sup>15</sup> Cue fiodaillamona bu cue uaina ñnoia, monamo jaca iite.

*Jusiñamuidi cominina eo isiruilla rafue*

<sup>16</sup> Jusiñamuidi cominina eo isiruilla jira, comini dine ie damiede Jitona orede. Ie Jitona naimaci ñnollena, naimiena orede. Naimiena ñnuamona, monamo jaca iitimaci. Jiaí faifñeitimaci.



17 Naimacina duere finotallena ie Jitona oreñede; iadedi naimaci jeacinomona jilloillena, naimiena orede.

18 Jusiñamuidi Jesús uaina ñnotinona jaca duere finoñeite; iadedi ie dajede Jitona uaina naimaci ñnoñena jira, Jusiñamui duere finollicino anamo jai itimaci.

19 Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuabite; iadedi naimaci comeciaino jiti redinomo iacana jira, jearede rafue naimaci finua muidona, naimiena jitaiñedimaci. Ie jira Jusiñamui naimacimo duere finollicinona anamo jai itimaci.

20 Naimie finoca rafue bai raillano, naga jeacino finoraïma ie comeci lligaiñuana jitaiñede;

21 ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

### *Juan micoridi Jesúsna dane ñaia rafue*

22 Digarui illanona, Jesús ie llofueoicaiganodicaï diga, Judea railla eniruemo macaricana jaidicaï. Nainomo diga irui fiebidicaï. Llofuiamona ñnotinona bautizacana uiticaï.

23-24 Nia cárcelmo iñenia, ailluena jinui nainomo illa jira, Enón railla nairaimo bautizajonomo Juan micoridi jiaï ite. Salim railla nairai iaïrei ite.

25 Naie facaise Juan micoridi llofueoicaigano judíuaï imie diga bautizajana siadotimaci.

26 Ie muidona Juan micoridi dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

27 Juan uai ote:

—Jusiñamui ie uai fecañedena, Jusiñamui facaina buna jaca buena finonide.

28 Cue lluana navui cacadomoi. Lloticue: “Cai comini Jilloitaraïmañedicue. Cristoñedicue. Naimie billena cue lollena, Jusiñamuidi naimie uicomo cuena orede”.

29 Jiaïe rafuedo iena lloiticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiaï iobide. Ie isoide. Comini cue dine navui biñoidimaci. Birui Jesúsno jaioidimaci. Naimiemo jai duidimaci. Iena cue cacajamona, ieri iobidicue.

30 Comini naimie uai siñona uiñuana jitaïdicue. Comini cue jamai bue isoidimiena uiñuana jiaï jitaïdicue.

31 Jamai comedicue. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite.

32 Ie Moo illanomo ciua rafuena llote. Ie Moo illanomo cacaja rafue jiaï llote; iadedi eo janore comini naimiena ñnotimaci.

33 Naimiena ñnotimiedi Jusiñamui uanaicinona lluana raise uiñote.

34 Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite.

35 Jusiñamuidi ie Jitona isiruute. Ie jira naga rafue naimiemo fecade.

36 Bu Jusiñamui Jitona ñnoia, Jusiñamui illanomo jaca iite; iadedi bu naimiena ñnoñenia, Jusiñamui illanomo jaca iñeite. Jusiñamui ricaillafue anamo jai ite.

## 4

### *Galileamo Jesús jailla rafue*

1-2 Naie facaise ailluena comini Jesúmona fueotimaci. Iemei naimie dibeido bautizadimaci. Naimacina naimie bautizallena, janore comini Juan dine jaide. Jesúdi bautizañede. Dani ie llofueoicaiganodicaí bautizadicaí. Fariseuaí bie rafuena fidiano, iena Jesús uñua jira,

<sup>3</sup> Judeamona Galileamo Jesús caí diga dane abido jaide.

*Samaria iñaiño diga Jesús ñaia rafue*

<sup>4</sup> Galileamo jaillena, Jesúdi Samaria railla enirue dibeido jaiacade.

<sup>5</sup> Samario caí ria, Sicar railla nairaimo iairei rillano, daje pozomo ridicaí. Naie pozodi Jacob micori jaie finoca. Jacob micori naie pozo illano ie jito José micorimo jaie fecade.

<sup>6</sup> Jitoma naidai itemo, naie pozo fuemo caí rillano, Jesús ana raide. Are macarillanona, jafaici ote.

<sup>7-8</sup> Jesús pozomo fiebicailla meinona, Sicarmo jaidicaí, guille ollena. Caí jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirollesa.

<sup>9</sup> Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuina jicadio? — Naiñaiño iese raite, judíuaí Samaria comini diga ñairainina jira.

<sup>10</sup> Jesús dinena dane uai ote:

—Jusiñamui omo feacaacalle ra uñotiodena, o diga ñaitimiena uñotiona, cuemo jaca itataite jinuina cuemo jicadio. Iemei omo iena fecadicue.

<sup>11</sup> Naiñaiño uai ote:

—¿Ñiese bie pozomona jinuina oitio? Eo ana ite. ¿Ñinomona jaca itataite jinuina oitio?

<sup>12</sup> Caí usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruiaí micoriaí jiaí naiemona jirodimaci. Ie ocainaíajajemona jiaí jirodimaci. Caí usuma micori baifemo faiñedio —raite.

<sup>13</sup> Jesús uai ote:

—Nagamiaí bie jinui jirua mei, dane jiroacanite;

<sup>14</sup> iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

<sup>15</sup> Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

<sup>16</sup> Jesús dinena uai ote:

—O jofomo mai jai. O ini diga abido bene bi.

<sup>17</sup> Naiñaiño uai ote:

—Inidicue.

Jesús dinena uai ote:

—Uanai llotio. Ua inidio.

<sup>18</sup> Cinco diga inina jai faicaidio. Birui o diga itimiedi jiaí o iniñede. Ua-naicinona ua llotio.

<sup>19</sup> Iemona abina uñocaillamona, naiñaiño dinena uai ote:

—Odi Jusiñamui ie lloraimadio. Iena uñoticue.

<sup>20</sup> Caí jaiagai bai bene ite anedumo Jusiñamuina sedaudimaci. Ie jira nainomo Jusiñamuina nia sedadicaí; iadedi omoi judíuaí dinena raitomoi: “Jerusalémo Jusiñamuina caí sedauilla”.

<sup>21</sup> Jesús dinena dane uai ote:

—Cueno ñno. Jiairuido bai bene ite anedumo caí Moona sedañeitomoi. Jerusalémo naimiena jiaí sedañeitomoi.

<sup>22</sup> Raise uifnoñeno Jusiñamuina biruido sedadomoi; iadedi cai nairaimona cai Jilloitaraïma illa jira, naimïena raise uifnuana sedadïcai.

<sup>23</sup> Jïairuido, ua birui, cominidi: “¿Ninomo Jusiñamuina sedaitïcai?” raillamo comeciaina facañeitïmaci. Naimaci comeciï jitaillamona, naimaci illanomo Jusiñamuina ua sedaitïmaci. Naie isoide comini naimïena sedajana Jusiñamui jitaide.

<sup>24</sup> Jusiñamui comeñede. Naimiedi jafaici. Omoi comeciï jitaillamona naimïena omoi sedajana jitaide.

<sup>25</sup> Riño uai ote:

—Cai Jilloitaraïma billena uifnotïcue. Naimiedi Cristo. Naimïe bia, nana bie isoide rafuena caina raise uifnotaite.

<sup>26</sup> Jesús raite:

—Naimïedicue.

<sup>27</sup> Ieconï abido ridïcai. Riño diga Jesús ñaia jira, rajicaidïcai; iadedi: “¿Buena naiñaiño jitaide?” raillano jïcanoñedicai. “¿Buena ñaitomïco?” raillano jïajïcanoñedicai.

<sup>28</sup> Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominïmo llote:

<sup>29</sup> —Ailli pozo fuemo cue jaca cïoiraininamïe diga dafafidïcue. Nana cue finouiga rafue ðiese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraïma. Naimiedi nibai Cristo.

<sup>30</sup> Ie jira Jesús ðine ailluena comini bitïmaci.

<sup>31</sup> Naie riño ie nairai ðine jailla mei, abido cai ðine nia riñenia, Jesúsna raitïcai:

—Maestro, mai guiño.

<sup>32</sup> Naimïe uai ote:

—Cuemo guille illana uifnoñedomoi.

<sup>33</sup> Coniniri siadotïcai:

—Jai nibai bu ecajibiga.

<sup>34</sup> Jesús uai ote:

—Jusiñamui cuena oretate. Naimïe jitailla rafuena finocana jaidïcue. Naimïe rafuena cue llamona, jai guitïcue isoidïcue.

<sup>35</sup> Comecina facadomoi: “Jusiñamui uaina nia lloñeitïcai. Ico iena lloitïcai”. Ie isoide. Illïmo riara nia llisïñenia, comeciaina facadomoi: “Riara einaillena, naga amaga fivui fiebite. Naie facaise majjitïcai”. Omoïmo llotïcue: Omoi ecimo eruai. Riara jai einaito isoide. Naimacïmo Jusiñamui rafue llollena, iena naimaci ñnollena, ailluena comini jai itïmaci.

<sup>36</sup> Naie llisillamo majjitïmiedi ie ucubena feiñoite. Ie isoide. Jusiñamui rafuena damïerie llocabillamona, comini iena cacadïmaci. Jïaino billamona, iena dane cacajamona, iena ñnotïmaci. Naie mare rafue lloraini ibana feiñoitïmaci. Jusiñamui ðibeïmo naimaci dajena majjia jira, dajena iobitïmaci.

<sup>37</sup> Cai comini iena raicabitïmaci: “Damïe iduaina rite; ia jïaimïe llisillana ote”.

<sup>38</sup> Ie isoide. Omoïna oredïcue, comini cue ðibeïmo itatallena. Naimacïmo cue uaina nano lloñedomoi; iadedi nano jïaino naimacïmo cue uaina llotïmaci. Ie jira nana omoi llofuiamona cue uaina ñnotïmaci.

<sup>39</sup> Samaria iñaiño llamona, naiñaiño nairaimona ailluena comini Jesúsna ñnotïmaci. “Naimiedi nana cue finoca rafuena cuemo llote” naimacïmo naiñaiño llote. “Naimiedi cai Jilloitaraïma” raillanona Jesúsna ñnotïmaci.

<sup>40</sup> Jesús ðine naimaci rillanona, naimaci diga naimïe fiebillena, Jesúsno jïcanotïmaci. Ie jira Jesús menarui naimaci ðinomo fiebide.

<sup>41</sup> Naimïe llofuiamona, jïaie ailluena comini naimïena ñnotïmaci.

<sup>42</sup> Riño mo llotïmaci:

—Daño o llumona, navui #notica; iadedi naimie uaina cai cacajamona, birui raise #notica. Naimiedi comini ua Jilloitaraima.

<sup>43</sup> Menarui illanona, nainomona Galileamo Jesús cai diga jaide.

<sup>44</sup> Caimo llote:

—Jusiñamuina lloraimadi ie nairai illanomo ia, naie comini naimie llumo cacarefiacaiñedimaci;

<sup>45</sup> iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci ciua jira, naimiena caimare feiñotimaci.

*Jesúdi illaicomini jitona jillotaja rafue*

<sup>46</sup> Galileamo Jesús cai diga macaria, dane Canámo ridica. Nainomo jinuimona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga maijuide.

<sup>47</sup> Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodiacana jira, ie jitona jillotalena Jesúmo duere jicanote.

<sup>48</sup> Jesús naimiemo llote:

—Siño rafuena omoi cioñenia, cuena #noñedomoi.

<sup>49</sup> Uai ote:

—Maestro, cue diga bi, cue jito fiodiañellesa.

<sup>50</sup> Jesús uai ote:

—Mai jai. O jito jai fiodiañeite —llote. Naie ima Jesús uaina #nuano, ie jofomo abido jaide.

<sup>51</sup> Naisona naimie jaidemo, ie mullaiai diga afeedo beici dafaifide. Llotimaci:

—O jito jai jillode.

<sup>52</sup> Ie jira naimie jicanote:

—¿Nino jitoma itemo, jillode?

Uai otimaci:

—Navui are jitoma oni lluai caidemo, abi cuarilladi fañonocaide.

<sup>53</sup> Ie comecina facade: “Navui are naie facaise Jesús cuemo llote: ‘O jito jai jillode’”. Ie mullaiai lluaa cacajamona, naimiedi Jesúdi cai Jilloitaraimana inote. Nana naimie jofomo itino jiai #notimaci.

<sup>54</sup> Judeamona Galileamo Jesús abido billano, siño rafuena iese jai finode.

## 5

*Joraibimo tsitaitimie jillua rafue*

<sup>1</sup> Digarui illa mei, cai judíuai rafue iacana jira, Jerusalémo Jesús abido jaide.

<sup>2</sup> Jerusalémo toica llaudaijai jaisoilla nase facaimo joraibi ite. Cai judíuai uaimona nai joraibi mamecidi Betesda. Naie jorai fuedo ite cinco jifocotiai.

<sup>3</sup> Nainomo diga duidino biidimaci: uisnidimaci, ñuja-ñujacaidino, tsitaitino. Jinuina begollena sedadimaci.

<sup>4</sup> Feide isoidemona dacaiño Jusiñamui jaienicidi jinuina begotalena bite. Iemei nai jinuimo nano jaidimie ie duicomona jillode.

<sup>5</sup> Duidino motomo tsitaitimie ite. Treintiocho años duide.

<sup>6</sup> Naimiena ciuano, naimie are duillana uiñuamona, Jesús naimiemo jicanote:

—¿Jilloiacadio?

<sup>7</sup> Duidimie uai ote:

—Ji; iadedi jinuina begoia, jaca buna iñede cue canoitena. Ie jira jiaimiedi cue uicodo jinuimo jaide. Ie jirari nia jilloñedicue.

<sup>8</sup> Jesús uai ote:

—Mai naidacai. O bira ferinocaida macari.

<sup>9</sup> Iecon naimie jillode. Ie bira ferianona oni jai macarite.

*Sábadoruimo duidimie jilloitajana siadua rafue*

Sábadoruimo, judíuai jafaici ouillarumo, naimie jillode.

<sup>10</sup> Ie jira judíuai illaicomínidi jillodimie mo llotote:

—Birui sábado. O bira abinocaida o uilla jira, Moisés micori rairuica rana jai finodio. Sábado mo maijinidicai. Birui jafaici uaruimo jaca buena jetanidicai.

<sup>11</sup> Naimie uai ote:

—Cuena jilloitatimie cuemo llotote: “O bira mai ferinocaida macari”.

<sup>12</sup> Judíuai dinena jicanote:

—¿Bu iena omo llotote? —Naimie uiñoñena jira, uai oñede.

<sup>13</sup> Jesúsdi comini motomo itabilla jira, ailluena comini illa jira, jai jillodimie ie jilloitatimienena uiñoñede.

<sup>14</sup> Ie meinoconi dallu illanona, Jusiñamui jofomo Jesús dinena naimienena baite. Llotote:

—Jai jillodio. Abido dane eo duere o sefuisa, dane jeacinona finoñeno.

<sup>15</sup> Ie mei judíuai illaicomínimo jillodimie lluaide. Llotote:

—Jesús raillamie cuena jillotate.

<sup>16</sup> Sábadoruimo Jesús bie rafuena finua jira, judíuai illaicomínidi naimienena duere finoacasite.

<sup>17</sup> Jesúsdi abina riduano llotote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llotote.

<sup>18</sup> Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicomini naimie meinellena eo jitaidimaci.

*Jesús ie Moo isoi finua rafue*

<sup>19</sup> Naimacimo Jesús llotote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue.

<sup>20</sup> Cue Moo cuena isiruillanona, nana ie finoca rafuena cuena jai uiñotade. Naimie Jitona cue illa jira, bie imana cue jilloitaja baifemo jiaie siño rafuena finoiticue, omoi rajicaillena.

<sup>21</sup> Fiodaitinona jilloitallena, cue Moomo ie uai ite. Naie uai cuemo jiaie ite.

<sup>22</sup> Cue Moo juez isoi naimie ñnoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga.

<sup>23</sup> Omoi dine naimie cuena oretate. Naimiedi omoi cuena iobitajana jitaide, naimienena omoi iobitaja isoi. Cuena omoi iobitañenia, cue Moona jiaie iobitañedomoi.

<sup>24</sup> Uanaicinona lloticue. Cue uaina bu cacacia, cuena oretatimienena bu ñnoia, monamo jaca iite. Jearede rafue naimie finua facaina duere sefuiñeite. Faifñeite; ia monamo Jusiñamui diga jaca iite.

<sup>25</sup> Uanaicino lloticue. Jusiñamui Jitodicue. Ua birui cuena ñnoñedino cue uaina cacareitimaci. Cuena cacajamona, cuena ñnuamona, jaca iitimaci.

<sup>26</sup> Cominina jaca itatallena, cue Moomo uai ite. Comini jaca itatallena, cuemo ie uai jiaie iga.

<sup>27</sup> Cuena ñnoñedinomo juez isoi cue llollena, naimiemmo cue duillamona, ie uai cuemo jiaie iga.

<sup>28</sup> Ieri rajicaiñeno. Jiairuido nana jai fiodaitino diese cue lluaana caicitimaci.

29 Fiodaillamona naimaci abiai jilloitimaci. Ie mei cue jitaillacinona finodino jaca illena lloiticue. Cue jitaillacinona finoñedino diese duere sefuillena lloiticue.

30 Naimacimo cuena oretatimie jitailla isoi lloiticue. Dama cue comecimo ite rafuena cue lloñena jira, bie llucacino di uanaicino.

*Jusiñamui ie Jito uaina comini ñnoñena rafue*

31-32 Jesús nia llote:

—Dama cue abina cue lloiadedi, bu cuena jaca ñnoñede; iadedi Jusiñamui cue facaina jiai llote. Naimie llucacino uanaicino. Iena uiñoticue.

33 Naimiena cacareillena, Juan Bautista micori dine cominina navui oretatomo. Abido naimaci bia, naimaci cacaja rafuena omoimo lollena, naimacina oretatomo. Juan llucacino di uanaicino.

34 Naimie micori cue rafuena llouide; iadedi naimie micori llogacino mo omo comeci eo facajana birui jitañedicue. Cuena omo ñnollena, naimie mamecina jai llinoticue.

35 Lamparín raise lligaiña isoi, ie rafuedo Juan micori omo comeciaino iticinona raise uiñotade. Dallu ieri iobidomo.

36 Cue finoca rafue Juan micori finoca rafue baifemo faite. Cue siño finoca rafuena ñaiticue. Cuena naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomo.

37 Cue finoca rafue muidona cuena uiñotomo; iadedi naimie llwana jaca cacaiñedomo. Naimiena jiai jaca cioñedomo.

38 Cuena omo ñnoñena jira, naimie uaina feiñoñedomo.

39 Jusiñamui dine omo rillena, Jusiñamui facaina lloraini micoriai ciegafuiaina facacabidomo. Naifuiaidi cuena ñaite;

40 iadedi Jusiñamui dine omo rillena, cue uaina ñnoiacañedomo.

41 Cuemo iobillacinona omo fecallena sedañedicue.

42 Jusiñamuina isiruiñedomo. Iena uiñoticue.

43 Cue Moo mamecido cue billanona, cuena feiñoñedomo; iadedi dama ie mamecido jaiimie bia, naimiena feiñoñotomo.

44 Jaca ñnoiacañedomo. Iobillacino coninimo fecadomo; iadedi ua Jusiñamuidi omoina “Mare” raillana jitañedomo.

45 “Cue Moomo omo marañede finoca rafuena lloiticue” raillanomo comeciaina facaño. Moisés micori ciegafuiaimo omo llogiduafue jai ite. Moisés micori ciegafuia muidona Jusiñamui dine omo jaca illemo ocuridomo.

46 Moisés micori ciegafuiaina ñnotomoina, cuena naimie micori cuia jira, cuena jiai ñnoitomo.

47 Naimie ciegafuiaina ñnoñedomo. Ie jira cuena jiai ñnoñeitomo —llote.

## 6

*Jesús cinco llomenicomona ailluena cominina ecaja rafue*

*(Mt 14.13-21; Mr 6.30-44; Lc 9.10-17)*

1 Jiairuido Galilea railla jorai ie ruica dibeimo Jesús ie llofueoicaiganodica diga jaide. Naie joraidi jiai Tiberiana mameciredo.

2 Duidinona naimie jillotauillana naimaci cuia jira, ailluena comini naimiena racadimaci.

3-4 Naie facaiseconi pascua railla rafuedi jai iaie ite. Jesús cai diga anedumo a jaillanona, dinomo ana raide.

5 Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomenicono oitica?



<sup>6</sup> Naimiena facacillena, iena jıcanote; iadedı Jesús ie finolle rana jai uiñote.

<sup>7</sup> Felipe uai ote:

—Janore naimaci guillena, doscientos digarui ie maijia ucube diese llomenico otıcaina, baiñede.

<sup>8</sup> Naie facaise caımona damie iena cacade. Naimiedi Simón Pedro ama. Andréna mameciredede. Naimie raite:

<sup>9</sup> —Cinco cebadamona finoca jenide llomenico daje uruemo bene ite. Mena lliciaı jiaı naimiemo ite; ia ¿niese nibaitıcaı? Baiñeite.

<sup>10</sup> Jesús caımo llote:

—Cominımo llono, ana imaci raıllasa.

Ie jira raitire illanomo ana raıdımacı. Cinco mil iñıaı itımacı.

<sup>11</sup> Llomenicono Jesús ua meinoconi, Jusiñamuımo iobillacınona fecajano, Jusiñamuımo jııde. Iemeı cominımo caına naie llomenicono fecatate. Cominı jıtaiılla dıerise lliciaı daje isoı fecatate.

<sup>12</sup> Naimaci monillamona, caımo Jesús llote:

—Buena jaca faıfiñellena, fiebide guille danomo irai.

<sup>13</sup> Ie jira iena iradıcaı. Naie cinco llomenicomona, cominı guıgamona fiebidemona, doce cirıgaıaımo oruitıcaı.

<sup>14</sup> Jesús finoca rafuena naie cominıdı cıuanona, llotımacı:

—Jusiñamui facaina lloraıni micoriaıdı caı Jilloitaraıma ıco billena jai llotımacı. Bimiedi naimie.

<sup>15</sup> Naimaci illaımana naimie illena, naimiena gaıtaacadımacı. Iena naimie uiñua jira, iena naimie jıtaıñena jira, aneduımo naimie oni jaide.

#### *Capernaumo Jesús abıdo jaılla rafue*

*(Mt 14.22-27; Mr 6.45-52)*

<sup>16</sup> Jıtoma ana itemo, jai navuidemo, ie llofueoıcaıganodıcaı joraımo jaidıcaı.

<sup>17</sup> Caı botemo caı jaıllano, ruıca Capernaumo jaiacadıcaı; iadedı Jesús nıa bıñede. Jesúna sedadıcaımo, naimie bıñena jirari, jai jıtırena facaiseconi jai jaidıcaı.

<sup>18</sup> Riıre aıfi illa jira, joraı eo bagode.

<sup>19</sup> Nıbaı cinco, nıbaı seis kilómetro jaidıcaımo, damie caı dıne jınui emodo billana cıodıcaı. Bote dıne naimie billana cıuanona, jacınaitıcaı.

<sup>20</sup> Jesús caımo llote:

—Jesúdıcuesa. Jacınaiñeno.

<sup>21</sup> Iena cacajanona, botemo naimiena a billana jıtadıcaı. Ieconi ruıca dıne caı jaiacananomo ridıcaı.

#### *Cominı Jesúna jenua rafue*

<sup>22-24</sup> Caı jaılla meı, daje bote nairuido illa jira, jınaıfomo fiebidıno Jesús caı dıga jaiñenana uiñotımacı. Caı Nama ie Moomo iobillacınona fecajanomo, cominımo guille fecajanomo, Tiberiamona dajerie botes naie facaise iaıre bite. Monaidemo, Jesúna naimaci cıoiñena jira, caı jıaı iñena jira, naie botıaıdo Capernaumo Jesúna jenollena, jaidımacı.

#### *Jesús: “Llomenicodıcue” raılla rafue*

<sup>25</sup> Ruıca dıne Jesúna cominı baıllanona, jıcanotımacı:

—¿Nıruıdo bene ridıo?

<sup>26</sup> Jesús uai ote:

—Navui are omoına cue ecaıamona, iemona omoı monillamona, cuena jenodomoı. Siño rafuena cue fınuana cıodomoı; iadedı cuena nıa iñoñedomoı.

<sup>27</sup> Guille raıre cueıcabıde. Cueıruıde ramo comeıaına eo facañeno. Cueıruıñede ramo comeıaına eo faca. Jusiñamui dıga omoı jaca illemo

comeciaina eo faca. Cue Moo Jusiñamui, ñimana cue jaillena, cuena oretate. Ie uai cuemo illanona, cue uaina omoi ñnuamona, Jusiñamui diga jaca iitomoí.

<sup>28</sup> Jicanotimaci:

—Ñia Jusiñamui ñibeimo iticaina, ¿ñie isoidifue finodicaina mare?

<sup>29</sup> Jesús uai ote:

—Naimie oretagamie uaina omoi ñnuana jitaide.

<sup>30</sup> Naimaci ñinena dane jicanotimaci:

—¿Ñie isoide rafuena finoitio? iena cai ciuano, o uaina cai ñnollesa.

<sup>31</sup> Cai jaiagai jofue ññenanomo Jusiñamuimona bite guilla ra guisoidimaci. Moisés micorí iena jaie cuega: “Jusiñamuimona bite guiga ra naimacimo nagarui fecauide”. Iemo jiai birui ocuridicai. Naie isoide siño rafuena o finuana jiai cioacadicai —llotimaci.

<sup>32</sup> Jesús uai ote:

—Uanai lloticue. Moisés micorí naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoimo jai fecaacade.

<sup>33</sup> Jusiñamui fecaacalle llomenico monamona jai bite. Comini iena guillamona, jaca iitimaci.

<sup>34</sup> Llotimaci:

—Nagarui caimo bie isoide llomeniconona feca.

<sup>35</sup> Jesús uai ote:

—Llomenico guillamona iticai. Omoi llomenico isoidicue. Cuena ñnuamona, monamo jaca iitomoí. Cuena ñnotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comecai jitaillacino naimacimo jaca illena ñaite—.

<sup>36</sup> Cuena ciodomoí; iadedi cuena ñnoñedomoí.

<sup>37</sup> Nana cue ñibeimo cue Moo itatallinodi cuena ñnoitimaci. Cuemona naimacina jaca oni dotañeiticue.

<sup>38</sup> Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue.

<sup>39</sup> Cuena oretatimiedi cue ñibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaina cue jilloitajana jiai jitaide.

<sup>40</sup> Jusiñamui Jitona cue illana bu ñnoia, cuena bu ñnoia, monamo jaca iite. Jusiñamui llolliruimo fiodaillamona naimie abina jillotaiticue. Iese cue Moo jitaide.

<sup>41</sup> Jesúsdi: “Monamona bite llomenicodicue” railla jira, judíuai illaicomini ñaimie uaina jamaillano ñnosñede.

<sup>42</sup> Raitimaci:

—Bimiedi Jesús. José jito. Ie moona uiñoticaí. Ie eina jiai uiñoticaí. ¿Ñiese naimiedi: “Monamona biticue” raite?

<sup>43</sup> Jesúsdi uai ote:

—Iese omoi naiñeno.

<sup>44</sup> Naimiena cue Moo ñnotañenia, bu cuena ñnonide. Cuena bu ñnoñenia, Jusiñamui llolliruimo fiodaillamona naimie abina jillotaiticue.

<sup>45</sup> Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai ñnoite.

<sup>46</sup> Buna cue Moona jaca cioñede. Naimiemona cue billamona, dama cue ciua.

<sup>47</sup> Uanaicinona lloticue. Cue uaina ñnotimie monamo jaca iite.

<sup>48</sup> Jesús dane llote:

—Llomenico guillamona iticai. Omoi llomenico isoidicue. Cuen a ñnuamona, monamo jaca iitomoi.

<sup>49</sup> Jofue ñnenanomo omoi jaiagai Jusiñamuimona bite rana guisoidimaci; iadedi fiodaitimaci.

<sup>50</sup> Birui jiaie guille ra ite. Monamona ite. Iena bu guia, monamo jaca iite.

<sup>51</sup> Bie llomenicodi cue. Monamo cominina jaca itatallena, monamona biticue. Bu bie isoide llomeniconona guia, jaca iite. Bie llomenicodi cue abi. Comini facaina fiodaiticue.

<sup>52</sup> Iena cacajano, judíuai illaicomini coniniri naiena siadotimaci. Raitimaci:

—¿Ñiese bimie abina riiticaí?

<sup>53</sup> Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca ññeitomoi.

<sup>54</sup> Bu cue abina riia, bu cue diruena riia, cue Moo diga jaca iite. Fiodaillamona naimie abi iirairuimo jillotaiticue.

<sup>55</sup> Cue abidi ua rille. Cue diruedi ua rille.

<sup>56</sup> Bu cue abina riia, bu cue diruena riia, cuena nabaide. Naimiena jiai nabaidicue.

<sup>57</sup> Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite.

<sup>58</sup> Bie isoide guille ra monamona jai bite. Omoi jaiagai jai guiga ra isoñede. Jai fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini ñnuamona, Jusiñamui diga naimaci jaca illena ñaite.

<sup>59</sup> Capernaumo judíuai ofiracomo Jesús biena llote.

*Jesús diga jaisoidino naimie llua siadua rafue*

<sup>60</sup> Jesús diga jaisoidino naimie llua cacajano, coniniri siadotimaci:

—Bie llua eo irirede. Bu iena cacaiñede.

<sup>61</sup> Jesúsdi naimaci iese siaduana uiñote. Ie jira llote:

—Cue llua raise ññoñedomoi.

<sup>62</sup> Jusiñamuimona ñmana jaillena jai biticue. Monamo abido ico cue jaillena cioitomoina, iena jiai nibai raise ññoñeitomoi.

<sup>63</sup> Cai joreño caimo illamona, iticai. Dani cai abi diga ññedicaí. Ie isoide. Cue llogacino Jusiñamuimo duide. Iena omoi ñnuamona, jaca iitomoi;

<sup>64</sup> ia omoimona nana ññoñedomoi —llote. Nano dofoconimona Jesúsdi naimiena ññoñedinona uiñote. Naimiena gaitataitimienna jiai uiñote.

<sup>65</sup> Jesús dane llote:

—Ie jira omoimo lloticue: Cue Moo jitaiñenia, cuena jaca bu ñnonide.

<sup>66</sup> Iena cacajano, Jesús diga jaisoidinomona, diga comini naimiena fainonocaidimaci.

<sup>67</sup> Ie jira ie doce llofueoicaiganodicaímo Jesús jicanote:

—¿Jiai cuena fainonocaida, abido jaitomoi?

<sup>68</sup> Simón Pedro uai ote:

—Nama, o diga cai jaiñenia, ¿bu diga jaiticaí? Jusiñamuimo cai rillena, o isoi jillotaraima ññede. Jaiñiemo jaca itatajaracínodi ññede.

<sup>69</sup> O llua jai ñnoticaí. Jusiñamui mare Jitodio. Iena uiñoticaí.

<sup>70</sup> Jesús dane uai ote:

—Doce digamie fetocaomoi; iadedi omoimona damie Taifemo jainaiáide —llote.

<sup>71</sup> Caimona Judas Iscariote micorina ñaite. Judas micori Jesúsna gaitataiacadimie.

## 7

*Jesús amatiaí naimiena ñnoñena rafue*

<sup>1</sup> Jiairuido Galileamo ite nairaiamo Jesús macarite. Judíuai illaicomini naimiena meineiaca naira, Judeamo jaiñede.

<sup>2</sup> Jifocotiaiaí railla rafue iaire ite. Judíuai ie rafue.

<sup>3</sup> Ie jira Jesús amatiaí naimiemo llote:

—O diga jaicabidino o finua rafuena raise cioillena, beno fainonocaida, Judeamo jai.

<sup>4</sup> Bu ie mameci are soriacania, bainino maijiraínina. Ie isoide. Siño rafuena o finoa, ailluena comini illa motomo iena fino.

<sup>5</sup> Jesús amatiaí naimiena ñnoñena jira, iese raite.

<sup>6</sup> Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai.

<sup>7</sup> Comini omoína enoiñedimaci. Naimaci finoca jearede rafuena cue llua jira, cuena jaca enoidimaci.

<sup>8</sup> Jerusalémo rafuemo jai. Cue jaillirui nia riñena jira, nia jaiñeiticue.

<sup>9</sup> —Iese llvano, Galileamo naimie fiebide.

<sup>10</sup> Naimie amatiaí rafuemo jailla mei, Jesúsdi naimaci jinafona dama bainino jaide.

<sup>11</sup> Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

<sup>12</sup> Nainomo ailluena comini itimaci. Comini illa motomo naimiena anado siadoside. Jiaíno dinena: “Naimiedi mare” raitimaci. Jiaíno dinena: “Naimiedi cominina jifuate” raitimaci.

<sup>13</sup> Judíuai illaicomínina iciana comini jaciruillanona, anado siadoside. Jesúsna marefodo buna ñaiñede.

*Sábadoruimo Jesús maijia raufe*

<sup>14</sup> Jifocotiaiaí railla rafue atuedo fuitemo, Jesús Jusiñamui jofomo jaillano, llofuate.

<sup>15</sup> Illaicomini naimie llofuiamona rajicaidimaci:

—¿Niese naimie abi uiñote? Eo rafuena uiñotimimona jaca fueoñede — raitimaci.

<sup>16</sup> Jesús uai ote:

—Dama cuemona oñega cue llofuiacinodi. Cuena oretatimie ie.

<sup>17</sup> Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuimona cue uana uiñoite. Dama cue comecimona cue oñenana jiai uiñoite.

<sup>18</sup> Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanaí llote. Maraiñedicinona fiñoñede.

<sup>19</sup> Moisés micori Jusiñamui uaina jaie llote; iadedi birui naie llogacinuaina nia raise ñnoñedomoi. Iena raise ñnotomoidena, cuena niade meineiacañedomoi.

<sup>20</sup> Comini dinena uai ote:

—Nibai uairitaidio. ¿Bu ona meineiacade?

<sup>21</sup> Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoí.

<sup>22</sup> Sábadoruimo jiai maijicabidomoi. Moisés micori isaiaí abiaí diana omoimo jaie llote; iadedi naimie micori naiena nano lloñede. Naimie micori usumatiaí naiena nano llotimaci. Sábadoruimo isana abi dellirui ia, detomoi.

<sup>23</sup> Moisés micori llogacinona inollena, sábadoruimo isaiaina detomoi. Sábadoruimo imana raise jillotaticuemo, ¿bue ñellena cue diga iciritomoi?

<sup>24</sup> Cominimo jamai eruaillanona, naimacina jeare ñañeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

### *Jesúna comini siadua rafue*

<sup>25</sup> Ie jira Jerusalémo itino coniniri siadotimaci:

—Illaicomini bimiena meineiacadimaci;

<sup>26</sup> iadedi beno marefodo naimie llofuede. Jaca buena lloñedimaci. Illaicomini: “Bimiedi cai Jilloitaraima” raillano nibai comeciaina facadimaci.

<sup>27</sup> Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budi naimie billanona uiñoñeite —siadotimaci.

<sup>28</sup> Ie jira Jesús Jusiñamui jofomo naimie llofuiano llote:

—Cuena uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi.

<sup>29</sup> Naimiemona cue billa jira, naimiena uiñoticue. Cuena oretate —llote.

<sup>30</sup> Ie jira illaicomini Jesúna gaitacadimaci; iadedi naimie fiodable facaise nia riñena jira, buna naimiena gaitañede.

<sup>31</sup> Nairui ailluena comini naimie uaina inotimaci. Raitimaci:

—Cai Jilloitaraima bia, ¿ñiese naimiedi bimie baifemo jiaie rafuena finoite?

### *Jesúna gaitaiacana rafue*

<sup>32</sup> Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede.

<sup>33</sup> Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue.

<sup>34</sup> Cuena jenoitomoi; iadedi cuena baiñeitomoi. Cue dine binitomoi.

<sup>35</sup> Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judúaiñedinona llofuellena, jiaie eniruemo cai comini dine nibai jaite.

<sup>36</sup> ¿Ñiese naimie raite: “Cuena jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

### *Jesúdi Jusiñamui Joreña ñaia rafue*

<sup>37</sup> Jifocotiaiai railla rafue fuillaruimo, ua rafue ie nairuimo, Jusiñamui jofomo itinomo Jesús ado llote:

—Bu jiroacania, cue dine bi.

<sup>38</sup> Jusiñamui facaina lloraini micoriai jaie cuega: “Naimiena inotimie comecimo jaca itatate jinui isoi iite, torafomona jinui tonooilla isoi”.

<sup>39</sup> Jesúdi iese llote; ia Jusiñamui Joreña ñaite. Jusúna inotinomo Jusiñamuidi ie Joreña ico illena ñaite. Jesús nia fioldañena jira, iena nia iñega.

### *Comini Jesúna dane siadua rafue*

<sup>40</sup> Jesús lluana comini cacajano, raitimaci:

—Jsiñamui facaina lloraini micoriai Jusiñamui facaina lloraíma ico billena jaie llotimaci. “Cristo nia baireñena, naimie biite” llotimaci. Bimiedi naimie.

<sup>41</sup> Jiaíno raitimaci:

—Naimiedi cai Jilloitaraíma. Naimiedi Cristo.

Jiaíno raitimaci:

—Cai Jilloitaraíma Galileamona biñeite.

<sup>42</sup> Jusiñamui facaina lloraima micori cueba: “Cai Jilloitaraimadi David micori jito. Belémo David micori illanomo jeicille”.

<sup>43</sup> Ie jira daje isoi naimiemo comeciaina facañedimaci.

<sup>44</sup> Jiaíno naimiema gaitaacadimaci; iadedi buna naimiema jetañede.

*Judíuai illaicomini Jesúna ñnoñena rafue*

<sup>45</sup> Ie mei policías naimaci illaicomini dine abido jaidimaci. Fariseuai dinena jicannotimaci:

—¿Bue ñellena Jesúna atiñedomoi?

<sup>46</sup> Policías dinena uai ote:

—Naimie llofuia isoi jaca buna llofueñede. Iena jacinallanona, naimiema atiñedicaí.

<sup>47</sup> Fariseuai dane llotimaci:

—Cominina jifua isoi, omoína jiaí jifue.

<sup>48</sup> Cai illaicomini dinena naimiema jaca ñnoñedicaí. Moisés micori llogacinodo raise jaidicaí;

<sup>49</sup> ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

<sup>50</sup> Naie illaicominimona Nicodemo raillamie ite. Naimie naiona Jesús dine navui jaide. Fariseo imie.

<sup>51</sup> Jesúna riiduanona, naimie llote:

—Cai einamací llocabitimaci: “Bu duere cai finoacania, nano naimie llamo cacarefiticaí. Jearede rafue naimie finuana cacareillano, naimiema duere finoiticaí”. Iena cai cacaiñenia, naimiema duere finoñeiticaí.

<sup>52</sup> Nicodemomo llotimaci:

—Galileamona bitino isoi ñaitio. Naimie llofuegamiena nibaí jai jaiacadio. Jai euegafuiana raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaina Jilloitaraimañedimie.

<sup>53</sup> Ie meinoconi damierie imaci jofomo jaidimaci.

## 8

*Ie iniñede ñima diga riñodi rafuetaila ie rafue*

<sup>1</sup> Naie facaise Jesúsdi Olivos railla anedumo jaide.

<sup>2</sup> Ie areruido jítiramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofue.

<sup>3</sup> Naie facaise Moisés micori llogacinona llofuerañimona dajerie bitimaci. Fariseuañimona dajerie jiaí bitimaci. Daje riño atidimaci. Ie iniñede ñima diga naiñaiñona jai eiatimaci. Comini illa uicomo atiano,

<sup>4</sup> Jesúmo llotimaci:

—Llofuerañima, biñaiño ie iniñede ñima diga eiaticaí.

<sup>5</sup> Moisés micori jaie cueba: “Bie isoidiñaiñodi nofici diga fairinoga, meinelena”. ¿Ñiese naiñaiñona o raitio?

<sup>6</sup> Naimiema facacillena, naimie raise uai oñenia, naimiema llogidollena, iese jicannotimaci. Iena cacajano, Jesús ana jítadacaida, eniruemo ie onocai diga cuete.

<sup>7</sup> Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiñomo nano noficina fairino.

<sup>8</sup> Dane ana jítadacaida, eniruemo dane cuete.

<sup>9</sup> Naimie lluaña cacajano, dajerie jino jaidimaci. Nano eo einamacídi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena.



10 Eruaillano naiñaiño mo jicanote:

—¿Ni nai o llogidotino?

11 Naiñaiño uai ote:

—Jaca iñedimaci. Cuen a jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoño.

*Jesúdi comini comeciai lligaiñua rafue*

12 Jesúdi cominina dane llofuanona, raite:

—Jeacino oni jaillena, comini comeciaina lligaiñoticue. Cuen a ñnotimie jiti redinomo jaca iñeite. Jeacino anamo jai iñedimie Jusiñamui diga ico jaca iite.

13 Fariseuai dinena uai otimaci:

—Dama o abina ñaitio. Ie jirari uanaicinona lloñedio.

14 Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi.

15 Abi raise uiñoño cuena jeare ñaitomoi. Iese omoina ñaiñedicue;

16 iadedi omoina cue ñaia, uanaicinona lloticue. Dama cue uaina omoina lloñedicue. Cuen a oretatimie omoina jiai llote.

17 Moisés micori iena jiai jaie cueda: “Menamie daje isoi lloia, naie iaimaiai llucacnodi omoi ñnua” cueda.

18 Cue facaina lloñena, menamie jai ite. Cue facaina lloticue. Cue Moo cue facaina jiai llote.

19 Fariseuai dinena jicanote:

—¿Ni o moo?

Jesús uai ote:

—Cuen a uiñoñedomoi. Cue Moona jiai uiñoñedomoi. Cuen a uiñotomoina, cue Moona jiai uiñotomoi.

20 Jusiñamui jofomo ucube eenoracomo bicinona siadotimaci. Jesús fiodable facaise ña riñena jira, jaca buna naimiena gaitañede.

*Jesúna comini ñnoñenia, naie jeacino diga fiodable rafue*

21 Naimacimo Jesús dane llote:

—Ico oni jaiticue. Cuen a jenoitomoi; iadedi cuena baiñeitomoi. Na omoimo jeacino ña itemo, fiodaitomoi. Cue jaillinomo jainitomoi.

22 Ie jira judíuai illaicomini dinena iena siadotimaci:

—Dama ie abina meineite.

“Cue jaillinomo jainitomoi” Jesús raila jira, iese siadotimaci.

23 Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie ñibeimo iñedomoi; ia naimie ñibeimo iticue.

24 Cue Jusiñamui Jitonana omoi ñnoñena jira, na omoi jeacino diga fiodaitomoi.

25 Jicanoside:

—¿Budío?

Jesús uai ote:

—Nano omoi motomo cue illamona bumiedicuen a omoina raicabiticue.

26 Diga rafue omoimo lloiacadicue. Marañede rafuena omoi finuana omoimo ña lloiacadicue; iadedi omoimo cuena oretatimie uaina dama lloticue. Nai uaidi uanaicino —llote.

27 Naimiedi ie Moo Jusiñamuina llote; iadedi cacaiñedimaci.

28 Ie jira Jesús llote:

—Cuenta omoi meinia mei, bumiedicuenta uifnoitomoi. Cue uaido dama lloñedicue; iadedi cue Moo cue llofuia uaido llocabiticue.

<sup>29</sup> Cuenta oretatimie cue diga ite. Naimie jitaile rafuena cue finua jira, cuenta fainonocaiñede.

<sup>30</sup> Iese Jesús llotemo, diga illaicomini naimie uaina como inoiacadimaci.

*Comini Taife anamo illa rafue*

<sup>31</sup> Jesúsdi naimie uaina como inoiacadinomo llote:

—Cue llwana inocana omoi jaia, cue ua cominidomoi.

<sup>32</sup> Uanaicinona uifnoitomoi. Ie mei jiaimie anamo dane ifneitomoi.

<sup>33</sup> Uai otimaci:

—Abraham micori ie uruiaidicai. Jiaimie anamo jaca ifnedicai. ¿Bue ñellena llotio: “Jiaimie anamo ifneitomoi”?

<sup>34</sup> Jesúsdi uai ote:

—Uanai lloticue. Jeacino finocabidomoi. Naga jeacino finoraíma ie jeacino anamo jai ite. Omoi jeacino anamo omoi illana ñaiticue.

<sup>35</sup> Jiaie rafuedo iena lloticue. Ie patrón anamo itimie mo ie patrón rafuedi duiñede; iadedi naie patrón jitomo ie rafuedi duide.

<sup>36</sup> Ie isoide. Jusiñamui Jitona cue illamona, naimie rafuemo duidicue. Ie jira omoi mo cue lloia, omoi jeacino anamo ua ifneitomoi.

<sup>37</sup> Abraham micori ie uruiaidomoi. Iena uifnoticue; iadedi cue llwana omoi raise inoñena jira, cuenta meineiacadomoi.

<sup>38</sup> Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

<sup>39</sup> Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiaifnedomoi. Ie jira Abraham micori finoca rafue isoi finoñedomoi.

<sup>40</sup> Uanai cue llua jira, cuenta meineiacadomoi; iadedi Abraham micori iese finoacaiñede. Cue llucino Jusiñamuimona oticue.

<sup>41</sup> Jusiñamui uruiaí finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaifnedicai. Cai Moodi Jusiñamui.

<sup>42</sup> Jesús dane llote:

—Jusiñamuidi omoi moodena, cuenta isiruitomoi, naimiemona cue billa jira. Cue jitailla jira, biñedicue; iadedi cuenta oretate.

<sup>43</sup> ¿Bue ñellena cue llwana cacaiñedomoi? Cacareirainidomoi.

<sup>44</sup> Omoi moodi Taifena jira, cue llwana inoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucinodi comuicabide. Naimie isoidomoi.

<sup>45</sup> Uanai cue llua jira, cuenta inoñedomoi.

<sup>46</sup> ¿Nie isoide jeacino finodicue? Cuemo llono. Uanai cue llia, ¿bue ñellena cuenta inoñedomoi?

<sup>47</sup> Jusiñamuina mooredimiedi Jusiñamui uaina cacade. Jusiñamui uruiaifnedomoi. Ie jira cue llwana cacaiñedomoi.

<sup>48</sup> Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

<sup>49</sup> Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi.

<sup>50</sup> Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi ñnoñenia, cuemo iobillacinona omoi fecañenia, cue Moo omoina duere finoite;

<sup>51</sup> ia bu cue llwana ua ñnoia, jaca ua fioidañeite.

<sup>52</sup> Naie illaicomini dinena uai otimaci:

—Janaba illamiediona jai uiñoticaí. Abraham micori jaie fioidaite. Jusiñamuina lloraini micoriai jiai jaie fioidaitimaci; iadedi: “Bu cue llwana ñnoiadedi, fioidañeite” raitio.

<sup>53</sup> Cai usuma Abraham micori baifemo fañedio. Jusiñamuina lloraini micoriai baifemo fañedio. ¿Bumiediota?

<sup>54</sup> Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi;

<sup>55</sup> iadedi naimiena uiñoñedomoi. Naimiena uiñoticue. “Naimiena uiñoñedicue” cue raia, omoi isoi taino lloticue. Naimiena uiñoticue. Naimiena jiai ñnoticue.

<sup>56</sup> Omoi usuma Abraham micori eniruemo cue ico billena jaie uiñote. Iena uiñuamona, naimie iobide.

<sup>57</sup> Illaicomini dinena uai otimaci:

—Odi cincuenta años nia iñedio. ¿Ñiese Abraham micorina ciodio?

<sup>58</sup> Jesúsdi uai ote:

—Abraham micori nia iñena facaiseconi jaca iticue.

<sup>59</sup> Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

## 9

### *Jesús uisidimiena jillotaja rafue*

<sup>1</sup> Jiaíruido ie llofueoicaiganodicaí diga Jesús macaria, uisidimiena ciode. Iese nanomona jaca naimiedi jeiciga.

<sup>2</sup> Jesúsdi jicanoticaí:

—Llofueraíma, ¿bue ñellena naimiedi iese jeiciga? ¿Ñie isoide ra ie moo jetajamona, naimie iese jeiciga? ¿Ñie isoide ra ie ei jetajamona, naimie iese jeiciga? Caimo llono.

<sup>3</sup> Jesúsdi uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai siñonana comini uiñollena, iese jeiciga.

<sup>4</sup> Nia userena jira, cuena oretatimie ie jitailla rafuena finoacadicaí. Raíre jitiñenite. Ie mei bu jaca mañinite.

<sup>5</sup> Eniruemo cue nia ia, comini comeciaina lligañoticue. —Iese Jesús llote; iadedi jiaie rafuena ñaite. Naimie nia fioidañenia, Jusiñamui rafuena llocana naimie jaillana ñaite. Ie fioidaillirui jai iaíre iacanana ñaite. Comeciaina lligañuana llote, jeacino oni jaillena.

<sup>6</sup> Iena llwanona eniruena tuajano, enirue idiaí finuanona, uisidimie uisina naie enirue diga riginote.

<sup>7</sup> Raite:

—Siloé railla joraíbimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciodigo, abido bite.

<sup>8</sup> Billa mei, naimie ecimo itino, jiai naimiena ciocabidino diga, naimie jillwana coniniri siadotimaci:

—¿Buuta naimiedi? Bene ucube jicallena raicabidimie isoide.

<sup>9</sup> Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodicue.

<sup>10</sup> Naimiemo jicanotimaci:

—¿Niese jai birui ciodio?

<sup>11</sup> Uai ote:

—Jesús raillamie enirue idiai finuano, cue uisina riginote. Cuemo llote: “Siloé railla joraibimo noisai”. Ie jira noisaidicue. Jai ciodicue.

<sup>12</sup> Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

*Comini uisinidimie jai jilluana siadua rafue*

<sup>13</sup> Navui uisinidimie jai jillua mei, fariseuai dine comini naimiena uitimaci.

<sup>14</sup> Sábadoruimo Jesúdi naimiena jillotaja jira,

<sup>15</sup> fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

<sup>16</sup> Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijde isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisinidimiena jillotate? —Ie jira daje isoi comeciaina facañedimaci.

<sup>17</sup> Ie jira navui uisinidimiemmo dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraíma.

<sup>18</sup> Naimie moo, naimie ei iaímaíammo nia jicanoñenia, judíuai illaícomini nai íima jaca cioíñenano ínosíñede. Ie jira iaímaíaina uaiduanona,

<sup>19</sup> jicanotimaci:

—¿Bimiedi omico jito? ¿Naimie jaca uisínino jeiciga?

<sup>20</sup> Uai otiaímaíai:

—Jii, bimie coco jito. Jaca uisínino jeiciga. Iena uiñoticoco.

<sup>21</sup> Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaímaíai.

<sup>22</sup> Bie rafue nia suiñenia, judíuai illaícomini navui llotimaci: “Jesúdi cai jilloitaráima bu lloia, cai ofiracomo naimiena fo billana rairuitícaí”. Iena jacíruíllanona,

<sup>23</sup> llotiaímaíai: “Naimie jai eimiesa. Naimiemo jicano”.

<sup>24</sup> Ie jira illaícomini dane naimiena uaiduano, llotimaci:

—Jusiñamuimo iobillacinona feca. Jesúmo fecaño. Naimie jearede rafuena finouidimiena uiñoticai.

<sup>25</sup> Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

26 Jícanotimaci:

—¿Níesede ra díga finuamona odi uisina ciodio? ¿Níese ona jillotate?

27 Uai ote:

—Omoímo jai llotícue; iadedi cacaiacaiñedomoi. ¿Bue ñellena omoímo dane llotícue? ¿Ie llofueganona jaiacadomoi?

28 Riire uai otimaci:

—Naimíe íe llofuegamíedio. Caidi Moisés micorí íe llofueganodícaí.

29 Jusiñamui Moisés micorímo jaie llwana uíñotícaí; iadedi bimíena uíñoñedícaí. Naimíe nívena billana jíai uíñoñedícaí.

30 Nai íima uai ote:

—Jadí, naimíe nívena billana uíñoñedomoi; iadedi cuena jillotate.

31 Jusiñamuidi jearede rafuena finodíno ñaía uaina cacarefíñede. Naie isodíno síño rafuena finoñenana uíñotícaí; iadedi Jusiñamuidi naimíena sedadímíe ñaía uaina cacade. Íe jítailla rafuena finodímíe ñaía uaina cacade. Naie isodíno síño rafuena finuana uíñotícaí.

32 Enírué finua facaisemona jaca buna uísínino jeicígamiéna jilloítañede.

33 Jesúsdi Jusiñamuimona bíñedímíedena, jaca buena finonide.

34 Uai otimaci:

—Jamái caí nairái ímíedio. ¿Níese caína llofueítio?

Íe jíra naimací ofíracomona naimíena jíno dotadímací.

### *Jesús uisínidímíe díga ñaía rafue*

35 Uisínidímíena jíno dotajana fidíana, Jesús naimíena jenode. Baillano, jícanote:

—¿Omoí comínina jíllotaráimana íñotío?

36 Uai ote:

—¿Bumái naimíe? Cuemo llono, naimíena cue íñollesa.

37 Jesús uai ote:

—Naimíena ciodio. O díga ñaíte. Cue.

38 Caiñíci ífodo rainadajanona, íobíllacínona fecallena, uai ote:

—Nama, jai o uaina íñotícue.

39 Jesús uai ote:

—Uisínidíno cíotallena, eníruemo bitícue. Jai uisina cíodíno uisina cíotañellena bitícue. —Íese Jesús raíte; ía naimací comecíaina ñaíte. Jesús “Jai maraíñedícaí” raítínona jíllotajáíbíte. Jesús “Jai maredícaí” raítínomo íte jeacíno naimací uíñollena bíte.

40 Naimíe ecímo íte faríseuái íena cacajano, jícanotímací:

—¿Uisínídomoi caína raítío?

41 Jesús uai ote:

—Uisínidíno ísoi ítomóina, omoímo íte jeacíno omoí muidonañede; ía “Jai cíodícaí” omoí raílla jíra, omoímo íte jeacíno omoí muidona.

Íese raíte; ía naimací comecíaina ñaíte. Jeacíno naimacímó íllana naimací uíñoíacaiñena jíra, íese ñaíte. Naimací jeacíno oní dotajana jítaíñedímací.

## 10

### *Toíca llaudaíai sedaráima rafue*

1-2 Jesús dane llofúete:

—Cue rafuena omoí raíse uíñollena, toíca llaudaíaina ñaítícue. Llaudaíai jíno uícabílla ísoi, llaígafomó nasedo fo jaídímíedi naie llaudaíai sedaráima; ía jínofebeí dívena bítímíedi fíríríaima.

3 Llaígafó llaudaíai sedaráima fo jaíllena, nase sedaráimadí nase econote. Llaudaíai naimíe uaina uíñotímací. Ímací mamecíaido uaiduamona, llaígafomona jíno bítímací.

4 Nana ie llaudaiaia jino bia, naimacina ifode. Naimie uaina uiñuanona, naimiena racadimaci.

5 Naimaci uiñoñegamiena racañedimaci; iadedi naimie uaina naimaci uiñoñena jira, naimiemonona oni aisidimaci.

6 Bie isoidicinona Jesús llofujete; iadedi naie comini iena cacañedimaci.

7 Ie jira Jesús dane llofujete:

—Llaigafu ie nase isoidicue.

8 Damierie firirainina bitimaci. Ie jira llaudaiaia naimaci uaina cacañedimaci. —Iese Jesús llofujete; ia naimiena inotinona ñaite. Naimiena abi caitadinona ñaite. Naimie inotino naimiena abi caitadino llogacinomo cacarefiñena ñaite.

9 Nia llofujete:

—Llaigafu isoidicue. Bu cue nasedo fo bia, jilloite. Llaudaiaia isoi fo biite. Jino jaite. Mare guille baite isoite. —Iese llofujete; ia naimiena inotino marena illana ñaite. Naimiemonona naimaci jitailla rafuena uana ñaite.

10 Nia llofujete:

—Llaudaiaia fillena, meinellena, faifillena, firiraima bite; iadedi cominina jaca raise itatallena, biticue.

11 Llaudaiaia marena sedaraimadicue. Mare sedaraimadi ie toinaia facaina riduanona ie abina faifite.

12 Janallari bia, llaudaiaia naimie ieñena jira, jamai maijidimiedi, llaudaiaia fainonocaillano, ecimona aiside. Llaudaiaia janallari gaitaacanamona, llaudaiaia tuudimaci.

13 Jamai ucube oiacanano, isiruiñenano, jamai maijidimie aiside.

14 Iese inedicue. Mare sedaraimadicue. Cue llaudaiaia uiñoticue.

15 Cue Moo diga conimana coco uiñua isoi, naimaci cuena jiaia uiñotimaci. Cue llaudaiaia facaina fiodaiticue. —Iese Jesús llofujete; ia naimiena inotinona ñaite. Jamai maijidimie isoi naimacina sedañede. Naimacina raise ridote. Naimaci facaina jiaia fiodaiacade.

16 Nia llofujete:

—Jiaie llaigafomo jiaie llaudaiaia cuemo ite. Naimacina jiaia atiacadicue. Cue uaina cacaitimaci. Ie mei danomo nana cue llaudaiaia iitimaci. Naimacina dama sedaiticue. —Iese Jesús llofujete; ia jiaie nairaimo naimiena inotinona ñaite. Dajena naimacina sedajana ñaite.

### *Jesús fiodaille rafue*

17 Jesús nia llofujete:

—Cue jai fiodaiacanamona, cue Moo cuena isiruite. Fiodaillamona dane jilloiticue.

18 Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

19 Jesús iese llofuaia jira, judíuaia illaicomini di daje isoi comeciaina facañedimaci.

20 Jiaiodi:

—Naimiemo Janaba illamie —raitimaci—. Uairico. Naimiena cacareia-cañedicaia —raitimaci.

21 Jiaino raitimaci:

—Bie isoidicinona Janaba illamie llofueñede. Janaba illamie uisnidimiena jillotanide.

### *Jesús ie Moo diga daje isoi comeci lloilla rafue*

22 Rollime facaise Jerusalémo Jesús ite. Naie facaiseconi Jusiñamui jofo ie finua comeci rafue ite.

23 Salomón micori finotaga jofo abi ibirimo Jesús macarite.



<sup>24</sup> Naie facaise judíuai illaicomini naimie dine bitimaci. Jicanotimaci:  
—¿Niruido caimo ona lloitio? Odi cai Jilloitaraímania, caimo marefodo llono.

<sup>25</sup> Jesús uai ote:  
—Omoimo jai lloticue; iadedi inoñedomoi. Cue Moo mamecido cue finoca rafuemonu cuena uiñotomoi.

<sup>26</sup> Cue toica llaudaíaimo omoi jainaiñena jira, cuena inoñedomoi.

<sup>27</sup> Cue toica llaudaíai cue uaina cacadimaci. Naimacina uiñoticue. Cuena racadimaci.

<sup>28</sup> Naimaci jaca itataticue. Jaca abina faifiñeitimaci. Cue anamona jaca budi naimacina bairoñeite.

<sup>29</sup> Cue Moo naimacina cuemo fecade. Naimacidi jaino baifemo faitimaci. Naimiemona jaca budi naimacina baironide.

<sup>30</sup> Cue Moo diga daje isoi comecina lloidicoco. —Iese llote; ia naimiena inotinona ñaite. Naie illaicomini naimiemo jainaiñena jira, naimiena inoñedimaci. Iena Jesús ñaite.

<sup>31</sup> Jesús llofuiana cacajano, naie illaicomini noficina llinotimaci, naimiena meinellena.

<sup>32</sup> Iena ciuanona, Jesús llote:  
—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

<sup>33</sup> Uai otimaci:  
—Mare rafuena o finua muidona, ona meineñeiticai. Jamai imadio. “Jusiñamuidicue” o railla jira, ona meineiticai. Jusiñamui Joreñona jai jeare ñaitio.

<sup>34-36</sup> Jesús dinena uai ote:  
—Jaie cuezafuiaina jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuillaidomoi”. Jusiñamui ie uaina cacadinomo jaie iese lloide, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi.

<sup>37</sup> Cue Moo isoi cue finoñena, cuena inoñeno;

<sup>38</sup> iadedi cuena omoi inoiacaiñena, cue Moo isoi cue finoia, naie rafuena ino. Iemei cue Moomo cue jainaiñallana uiñoitomoi. Cuemo cue Moo jainaiñallana jai uiñoitomoi.

<sup>39</sup> Iena cacajano, naimiena dane gaitaacadimaci; iadedi naimacimona jillode.

<sup>40</sup> Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide.

<sup>41</sup> Ailluena comini Jesús dine bitimaci. Coninina raitimaci:  
—Juan micori siño rafuena finoñede; iadedi nana Juan micori Jesúsna llucinodi uanaicino.

<sup>42</sup> Nainomo ailluena cominidi Jesús naimaci Jilloitaraímana inotimaci.

## 11

### *Betaniamo Jesús abido jailla rafue*

<sup>1</sup> Naie facaise Betaniamo Lázaro raillamiedi duide. Naimie miriñodi Marta, María íaiñuai.

<sup>2</sup> Naie Mariadi jairuido Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote.

<sup>3</sup> Naie íaiñuai Jesús dine uaina orediaíñuai, naimie billena. Naimie jibuisaíbillena llotatíaiñuai:

—Nama, o isiruigamie duide —llotatíaiñuai.

<sup>4</sup> Jesús naie rafuena fidiano, llote:  
 –Jamai fiodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

<sup>5</sup> Jesúsdi Lázarona isiruite. Ie miriño iaiñuaina jiai isiruite;

<sup>6</sup> iadedi Lázaroz duillana Jesús fidiano, naimie dine jaiñede. Naimie illanomo menarui nia fiebide.

<sup>7</sup> Ie mei ie llofueoicaiganodicaïmo llote:

–Judeamo abido dane mai cai jailli.

<sup>8</sup> Uai oticai:

–Llofueraïma, judíuái illaïcomini birui noficina ona fairinoiacadimaci. ¿Niese naimaci dine dane jaitio?

<sup>9</sup> Uai ote:

–Nagarui userede. Userenia bu macaria, raise ciua jira, eicaitaiñede;

<sup>10</sup> iadedi bu naiona macaria, raise cioiñena jira, eicaitaide. –Iese llofujete; ia naimie rafuedo jaillena ñaite. Raite:

–Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

<sup>11</sup> Dane llote:

–Lázaro jai inide; iadedi naimiena casitallena, jaiticue.

<sup>12</sup> Uai oticai:

–Nama, naimie jamai inia, nia dama casite.

<sup>13</sup> Naimie jafaici uanona iniamo comeciaina facadicaï; iadedi Jesús naiena lloñede. Lázaro fiodaillana ñaite.

<sup>14</sup> Ie jira Jesús caïmo marefodo llote:

–Naimie jai fiodaite.

<sup>15</sup> Nainomo cue iñena jira, cue siño uai omoi inollena, omoi facaina iobidicue. Naimie dine mai cai jailli.

<sup>16</sup> Caïmona Tomás caïmo llote:

–Maïña. Naimie diga fiodaisaiticai –llote. Tomás mameci jiaicidi Dídimoz. Naimiedi gorasa.

### *Jesús Marta diga ñaia rafue*

<sup>17</sup> Betaniamoz cai ria, Lázaro raiafomoz jai nagaamagarui illana fididicaï.

<sup>18</sup> Jerusalémona Betaniamoz tres kilómetros dinori illa jira,

<sup>19</sup> diga judíuái illaïcomini eedollena, Marta iaiñuái María dine bitimaci.

<sup>20</sup> Jesús billana Marta fidiano, cai dine naisomoz bite; iadedi jofomoz María fiebide.

<sup>21</sup> Jesúsomoz Marta llote:

–Nama, o bene itiona, cue ñio fiodaïñede;

<sup>22</sup> iadedi Jusiñamuimoz buena o jicaia, naimie iena finoite. Iena uiñoticue.

<sup>23</sup> Jesús dinena uai ote:

–O ñio abido jilloite.

<sup>24</sup> Naiñaiño uai ote:

–Nana comini jilloilliruimoz naimie jiai jilloite. Iena uiñoticue.

<sup>25</sup> Jesús uai ote:

–Fiodaillamonaz comini abiaïna Jilloitaraimadicue. Jusiñamui diga jaca illena, cominina itataraimadicue. Bu cuena inuanona, fiodaïadedi, iemona ñico jilloite.

<sup>26</sup> Cuena inotimienaz Jusiñamui illanomoz jaca illena itataiticue. ¿Iena inotio?

<sup>27</sup> Naiñaiño uai ote:

–Jii, Nama; odi cai jilloitaraimadio. Odi Jusiñamui Jitodio. Jusiñamui dinena o billamoz jaie ocuiridicaï.

28 Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

29 Iena cacajano, raire cai dine María bite.

30 Marta diga ie ñaianomo Betania ecimo Jesús nia ite.

31 Jesús dine María nia jaiñenia, judíuai illaicomini María nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci.

32 María Jesús dine rillano, naimiena duenailano, caiñici ifodo rainadacaida, llote:

—Nama, bene itiona, niadedi cue iiodi fioidañede.

*Jesús Lázarona jillotaja rafue*

33 María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite.

34 Jicanote:

—¿Ninomo Lázarona raitomoi?

Uai otimaci:

—Nama, mai jibuisaibi.

35 Lázarona duenailanona, Jesús eede.

36 Iena ciuanona, judíuai illaicomini dinena llotimaci:

—Ero. Naimiena eo isiruite.

37 Jiaino raitimaci:

—Navui uisnidimiena jillotate. ¿Bue ñellena bimiena jilloitañede, naimie nia fioidañenia?

38 Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica.

39 Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

40 Jesús uai ote:

—Cuenta o inoia, Jusiñamui uai siñonana uiñoitio.

41 Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue.

42 Jaca cuenta cacadio. Iena uiñoticue; iadedi cue diga bene itino illa muidona, iese ado lloticue. Cuenta o oretajana naimaci inollena, o diga ado ñaiticue.

43 Ie mei eo ado llote:

—Lázaro, jino bi.

44 Nai fioidaitimie nia naimie abi nana ferinua ra diga jino bite. Jesús cominimo llote:

—Naimie abi ferinua oni suiño. —Ie jira suiñodimaci.

45 Ie muidona María diga bitinomona ailluena comini Jesúsna inotimaci. Naimie finoca rafuena ciuanona, inotimaci.

*Jesúsna meinellena, illaicomini comeciaina facaja rafue*

*(Mt 26.1-5; Mr 14.1-2; Lc 22.1-2)*

46 Jesúsna inoñedinomona damierie Jesús finoca rafuena fariseuai dine lluidimaci.

47 Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide.

<sup>48</sup> Naimiena niese cai nibaiñenia, nana comini naimiena inoitimaci. Nana comini naimie dibeimo jaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicaí.

<sup>49</sup> Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi.

<sup>50</sup> Iese cai nairaimo suiñellena, damie cai nairai facaina fiodaitena, mare. Iena nibai nia raise uiñoñedomoi.

<sup>51</sup> Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

<sup>52</sup> Cai comini facaina dama fiodaiñede; iadedi nana Jusiñamuina inoitinona facaina fiodaite. Diga nairaimo itimaci; iadedi naimiemo dajena nana naimaci duillena, naimie fiodaite.

<sup>53</sup> Caifás llua naimaci cacajamona, judíuai illaicomini comeciaina nia facadimaci, naimiena meinellena.

<sup>54</sup> Ie jira Jesús judíuai illaicomini illa motodo marefodo macariñede. Jofue iñena dofodo jaidicaí. Efraín railla nairai dine ridicaí. Nainomo diga irui iticaí.

<sup>55</sup> Pascua railla rafue iaire iacana jira, ailluena comini Jerusalémo naimaci nairaimomona jaidimaci. Rafue nia taineñenia, naimacimo ite rafue oni jaillena, cai einamací lua isoi finodimaci.

<sup>56-57</sup> Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini lua jira, nibai jai biñeite. Illaicomini llua fidiáno, naimie biñeite.

## 12

### *Betaniamo Lázaro jofomo Jesús guilla rafue*

*(Mt 26.6-13; Mr 14.3-9)*

<sup>1</sup> Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaronna fiodaillamona navui jillotate.

<sup>2</sup> Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaídi jiai motomo guiticaí.

<sup>3</sup> Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofo jeraidí soride.

<sup>4</sup> Caímona Judas Iscariote micorína mameciredimie ite. Jesúsna gaitataitimie. Llote:

<sup>5</sup> —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote.

<sup>6</sup> Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

<sup>7</sup> Jesús uai ote:

—Dama ite. Bie soride ra naiñaiño jai eenoga cue fiodaillirui iena.

<sup>8</sup> Dueredino omoi diga jaca iitimaci; iadedi omoi diga jaca iñeiticue.

### *Ailluena comini Lázaronna ciua rafue*

<sup>9</sup> Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaron a Jesús jillotaja jira, Jesúsna dama cioiacaiñedimaci; iadedi Lázaron a jiai cioiacadimaci.

<sup>10</sup> Ie jira Jusiñamui diga nanoca ñairainidi Lázaron a jiai meinellemo comeciaina facadimaci.

<sup>11</sup> Lázaro muidona ailluena judíuai illaicomini naimaci illa dibeifainonocaida, Jesúsna ñinotimaci.

*Jerusalémo illaíma isoi, Jesús marena jailla rafue*

*(Mt 21.1-11; Mr 11.1-11; Lc 19.28-40)*

<sup>12</sup> Pascua railla rafue illa jira, ailluena comini Jerusalémo itimaci. Egip-tomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron a Jesús navui jilloitajana diga comini cioidimaci. Iena llocana uitimaci. Ie jira ailluena comini Jesús dine jaidimaci.

<sup>13</sup> Raforona uanona, naimiena feiñollena, naimie uicomo jaidimaci. Ado cuiriisite:

—¡Cai jilloitaraíma billa! ¡Jusiñamui mamecido bitimie eo mare! ¡Cai Illaíma eo mare! —cuiirisite.

<sup>14</sup> Jesúsdi ailli baiga burrito emododo jaide. Jusiñamui facaina lloraíma micori jaie llua isoi jaide. Jaie llote:

<sup>15</sup> “Jerusalén imaci, jacinaíñeno. O Illaíma burrito emododo biíte”.

<sup>16</sup> Naie facaise bie rafuemo comeciaina facañedicai; iadedi Jesús jillua mei, bie rafuena comeciticai.

<sup>17-18</sup> Lázaron a Jesús jillotaja jira, ailluena comini Jesús dine jaidimaci.

<sup>19</sup> Iena ciuano, fariseuai coniniri ñaitimaci:

—Jaca buena birui finoñedicai. Ailluena comini Jesús dibeimo jai jaidimaci.

*Judíuaiñedino Jesúsna cioiacana rafue*

<sup>20</sup> Judíuaiñedino Jusiñamuina sedallena, pascua railla rafuemo jiai bitimaci.

<sup>21</sup> Naie facaise cai dine bitimaci. Felipedí Galilea ie Betsaida nairai imiena jira, Felipe dine bitimaci. Felipemo llotimaci:

—Jesúsna cioiacadicaí.

<sup>22</sup> Felipe iena Andrémo llote. Ie mei Jesúsno lluaidiaímaiaí.

<sup>23</sup> Jesús uai ote:

—Monamona biticue; ia jai cue fiodaille facaise ride. Comini cue uaidi siñonana uiñua facaise jai ride.

<sup>24</sup> Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci.

<sup>25</sup> Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite.

<sup>26</sup> Cuen bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodi naimiena caimare itataite.

<sup>27</sup> Cue comeci jai rucaicuerite; iadedi, ¿niese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue:

<sup>28</sup> “Moo, cominina o uai siñonana uiñota”.

Ieconí monamona Jusiñamui llote:

—Jai iena finodicue. Dane iena finoiticue.

<sup>29</sup> Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienicí llote.

<sup>30</sup> Jesús uai ote:

—Cue facaina naie lluana cacaiñedomoi; iadedi omoi facaina iena cacadomoi.

<sup>31</sup> Cuená uinoñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite.

<sup>32</sup> Cruzmo cue fiodaia, naimacina jilloitallena, ailluena cominina cue dibeimo itataitícue.

<sup>33</sup> —Naimie fiodaillana naimaci uinoñellena, iese llote.

<sup>34</sup> Naie comini uai otimaci:

—Jusiñamui facaina lloraini micoriai jaie cuega: “Cai Jilloitaraíma jaca fiodaiñeite”. ¿Niese raitio: “Jusiñamuimona bitícue; ia fiodaitícue”?

<sup>35</sup> Jesús dane uai ote:

—Cue llofuia dinori omoi comeciaina nia lligaiñotícue. Cue lluomo cacarei. Omoi diga cue nia ia, cue llofuíamo cacarei. Jitiredemo bu macaria, nai illana raise uinoñede. Ie isoide. Jeacino anamo itinodi jitiredinomo itimaci isoidimaci. Uanaicinona uinoñedimaci.

<sup>36</sup> Jeacino anamona omoi jilloillena, cue llofuia uaido omoi comeciaina birui lligaiñotícue. Cue uaina ñino, cue cominina omoi jaillena.

Bie llua mei, Jesús oni jaillano, naimacimona reirite.

#### *Comini Jesús uaina ñinoñena rafue*

<sup>37</sup> Jesús diga siño rafuena finode; iadedi ailluena comini: “Naimiedi cai Jilloitaraíma” raillana nia ñinosiñede.

<sup>38</sup> Iemona Isaías micori jaie cuegafuiai suide. Naimie jaie cuega: Jusiñamui, cai lluacinona cacadimaci.

O siño uaido o finoca rafuena jiai ciodimaci; iadedi ñinoñedimaci.

<sup>39-40</sup> Isaías micori dane cuega:

Naimaci ciori raillano, Jusiñamui naimacina uisinidino isoi itatate.

Naimaci comeciainona abina uinoi raillano, naimaci comeciaina feitate.

Naimiena ñinoi raillano, iese naimacina jai itatate.

Ie jira jai ñnonidimaci.

<sup>41</sup> Jusiñamui ie ebirede rafuena naimie ciuamona, Isaías micori iena llote. Isaías micori Jesúna llote.

<sup>42</sup> Isaías micori iese llote; iadedi ailluena judíuai illaicomini Jesús uaina ñnotimaci. Fariseuaina jaciruillanona, iena janotimaci. Naimaci ofira-comona naimacina jino dotajana jaciruitimaci.

<sup>43</sup> Comini naimacina iobitajana naimaci eo jitailla jira, dotajana jitañedimaci. Jusiñamuimo ite iobillacinona raise oiacañedimaci.

#### *Jesús ie Moona ñaia rafue*

<sup>44</sup> Naie facaise Jesús eo ado llote:

—Cuená ñnotimie cuena oretatimiena jiai jai ñnote.

<sup>45</sup> Cuená ciodimie cuena oretatimiena jiai ciodo isoide.

<sup>46</sup> Comini comeciaina lligaiñollena bitícue. Ie muidona naga cuena ñnotimie jitiredinomo jai ññede. Jeacino anamo jai ññede.

<sup>47</sup> Cue uaina cacajano ñnoñedimie mo juez isoi birui lloñedícue. Cominina duere finollena, biñedícue; iadedi naimaci jeacinomona naimacina jilloital-lena bitícue;

<sup>48</sup> ia cuena bu ñnoñenia, cue uaina naimie ñnoñenia, ja muidona faifite. Cue uaina naimie ñnoñellemona, nana naimiena ñnoñedino janafefilliruimo Jusiñamui naimiena ico duere finoite. Cuená jitañedimie, cue uaina jitañedimie comini janafefilliruimo janafefite.



<sup>49</sup> Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido lloticue.

<sup>50</sup> Cue Moo lloga uaidi naimie dibeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

## 13

### *Jesúdi ie llofueoicaigano eilliaina jocua rafue*

<sup>1</sup> Pascua railla rafue riacana areruido ia, Jesús ie Moo dine abido jaia-canana uiñote. Naimaci diga naimie nia ia, ie cominina jaca eo isiruite.

<sup>2</sup> Jesúna gaitatallena, naie facaise Taifedi Judas Iscariote micori comecina feidote. Judas micori Simón jito.

<sup>3</sup> Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote.

<sup>4</sup> Nairuido Jesús cai diga guite. Guilla meinoconi, Jesús a naidacaida ie abimo ite iniroina duiñode. Abi dora diga ie moillina ferinote.

<sup>5</sup> Janorede nogomo jinuina totaja mei, cai eilliaina jocode. Safenaillena, ie dora diga dote.

<sup>6</sup> Simón Pedro dine naimie ria, Pedro jicanote:

—Nama, ¿cue eillina jiai jocoitio?

<sup>7</sup> Jesús uai ote:

—Cue finoca rafuena birui uiñoñedio; iadedi jiairuido uiñoitio.

<sup>8</sup> Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

<sup>9</sup> Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

<sup>10</sup> Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

<sup>11</sup> Naimiena gaitataiacadimiena naimie uiñua jira, iese llote.

<sup>12</sup> Cai eilliaina jocua mei, ie iniroi dane jítaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi.

<sup>13</sup> Cuena “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue.

<sup>14</sup> Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaina jai jocodicue. Omoi jamai bue isoidinomona, omoi eilliaina danirie jocua.

<sup>15</sup> Cuemona fueo. Abi iedoñoeno cue isoi omoi jai. Cue afemo iñedomoi.

<sup>16</sup> Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno.

<sup>17</sup> Bicino omoi uiñuamona, iese omoi finoa, caimare iitomoi.

<sup>18</sup> Nana omoina iese ñaiñedicue. Nana cue fetocanona uiñoticue. David micori jaie llote: “Cue diga gutinomona damie cuena enoidimie ite”.

<sup>19</sup> Bie nia suiñenia, iena jai lloticue. Iena cuemo suilla mei, David micori llogacino raise inoitomoi.

<sup>20</sup> Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

*Jesúdi ie gaitataitimiēna llua rafue*  
(Mt 26.20-25; Mr 14.17-21; Lc 22.21-23)

- <sup>21</sup> Jesús iese llua mei, ie comeci sunaite. Llote:  
—Uanai lloticue. Omoimona damie cuena gaitataite.
- <sup>22</sup> Caimona ¿nimie naimiēna gaitataite? raillanona, comecina facajano, coninimo eroridicai.
- <sup>23</sup> Cuena Jesús eo gaia jira, Jesús abimo iticue.
- <sup>24</sup> Cuena uaiduanona, Pedro cuemo llote:  
—“¿Bu ona gaitataite?” Jesús mo jicano.
- <sup>25</sup> Ie jira Jesús mo jicanoticue:  
—Nama, ¿bu ona gaitataite?
- <sup>26</sup> Jesús uai ote:  
—Bie llomeniconona mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.
- <sup>27</sup> Llomeniconona guilla meinoconi, Taife anamo Judas micori illamona, Taife naimie comecina feidote. Jesús naimiemo llote:  
—O finoacaga rana raire fino.
- <sup>28</sup> Jesús Judas micorimo llua naise uiñoñedicai.
- <sup>29</sup> Judas micori ucubena sedaja jira, jiaino comecina facade: “ ‘Cai jitaile guille ibarisaí’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”.
- <sup>30</sup> Guilla mei, Judas micori jino jaide. Naie facaise jai jitrefficai.

*Jesús ie fiódaillena ñaia rafue*

- <sup>31</sup> Judas micori jailla mei, Jesús llote:  
—Jusiñamuimona billanona, imana jaidicue; ia cue fiódaille facaise jai ride. Cue fiódaillemona cominidi Jusiñamui uai siñonana uiñoitimaci.
- <sup>32</sup> Iemona Jusiñamui uai siñonana comini uiñoia, Jusiñamuidi cominina cue siño Jitona jiai uiñotaite. Iese ja finoite.
- <sup>33</sup> Cue comini, dallu omoí diga bene iticue. Jaiticue. Cue diga iacanitomoí. Judíuai illaicominimo navui cue llua isoi, omoímo ja lloiticue. Cue jaillinomo nia jaiñeitomoí.
- <sup>34</sup> Ie jira jiaie rafuena omoímo ja lloiticue. Omoína cue isiruilla isoi, coninina omoí isirui.
- <sup>35</sup> Coninina omoí isiruillamona, jiaie cominidi cue cominidomoina uiñoitimaci.

*Pedro Jesús diga ñaia rafue*  
(Mt 26.31-35; Mr 14.27-31; Lc 22.31-34)

- <sup>36</sup> Naie facaise Pedro naimiemo jicanote:  
—Nama, ¿nine jaitio?  
Jesús uai ote:  
—Cue jaillinomo cue diga ja jaiñeitio. Jiairuido jaitio.
- <sup>37</sup> Pedro uai ote:  
—Nama, ¿bue ñellena ja jaiñeticue? O jitaia, o facaina ja fiódaiticue.
- <sup>38</sup> Jesús dinena uai ote:  
—Cue facaina fiódaiacadio. Uanai omo lloticue. Nia monaiñenia, itava nia ñaiñenia, dacaiño amani cuena janoitiosa.

## 14

*Jesús ie Moo dinomo rille rafue*

- <sup>1</sup> Jesús ie llofueoicaiganodicaina nia llofue:  
—Rucaicueriño urí i. Jusiñamuina ñnocana jai. Cuena jiai ñnocana jai.

<sup>2</sup> Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue.

<sup>3</sup> Fuiduanona, dane abido biiticue. Omoina cue dine uillena, cue dine omoi illena, biiticue.

<sup>4</sup> Cue jaillinona birui uiñotomoi. Nainomo omoi rillena jiai uiñotomoi.

<sup>5</sup> Tomás uai ote:

—Nama, o jaillinona uiñoñedicaí. ¿Niese nainomo riiticaí?

<sup>6</sup> Jesús uai ote:

—Omoi naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena ñno.

<sup>7</sup> Cuena uiñotomoina, cue Moona jiai uiñotomoi. Biruidemona naimiena uiñoitomoi. Naimiena jai ciodomoi.

<sup>8</sup> Felipe uai ote:

—Nama, o Moona caimo acata. Iemo jai macaibaite.

<sup>9</sup> Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciotimie cue Moona jiai jai ciode isoide. ¿Niese llotio: “O Moona caimo acata”? Cue Moona jai ciotio isoidio.

<sup>10</sup> Cue Moo diga daajedicoco. Iena nia ñnoñedio. Cue llua di cue Moo uai. Cue llua di cue comeci iuaiñede. Cue motodo naimie maijide.

<sup>11</sup> Cue Moo diga daajedicocona ñno. Cue uaina omoi ñnoñenia, siño rafuena cue finua jira, cuena ñno.

### *Jesús ie Moo Joreña llua rafue*

<sup>12</sup> Jesús nia llofue:

—Uanai lloticue. Cuena omoi ñnoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua baifemo finoitomoi.

<sup>13</sup> Cue Moo uai siñonana omoi uiñollena, buena cue dibeido cue Moomo omoi jicaia, nana iena finoiticue.

<sup>14</sup> Cue dibeido omoi jicaia, iena finoiticue.

<sup>15</sup> Cuena omoi isiruia, cue llogacinuaina ñnoitomoi.

<sup>16</sup> Ie Joreño omoimo fecallena cue Moomo jiiiticue. Naie Joreñodi omoina canoite. Omoi diga jaca iite.

<sup>17</sup> Uanaicinona llocabite. Naimiena naimaci uiñoñena jira, cuena ñnoñedino naimiena feiñonidimaci; iadedi naimie omoi diga illa jira, naimiena uiñotomoi. Omoi diga jaca iite.

<sup>18</sup> Omoina fañonocaiñeiticue; ia dane biiticue.

<sup>19</sup> Nano nigarui illanona, cuena ñnoñedino cuena nia ciotimaci. Ie mei cuena cioiñeitimaci; iadedi fiodaillamona cue jillua mei, cuena nia ciotomoi. Cue jaca illa jira, jiai jaca iitomoi.

<sup>20</sup> Fiodaillamona cue jillua mei, cue Moomo cue duillana raise uiñoitomoi. Cuemo omoi duillana jiai raise uiñoitomoi. Omoimo cue duillana jiai raise uiñoitomoi.

<sup>21</sup> Cue llogacinuaina omoi isiruia, cuena isiruitomoi. Ie jira cue Moodi omoina jiai isiruite. Omoina jiai isiruiticue. Omoina cuena uiñotaiticue.

<sup>22</sup> Iscariotena mameciñede Judas naimiemo jicanote:

—Nama, ¿bue ñellena dani caina ona uiñotaitio; iadedi jiaie cominina ona uiñotañeitio?

<sup>23</sup> Jesús uai ote:

—Cuenta isiruitinona cue rafuena uñotadícue. Bu cuenta isiruia, cue llogacínuaína ñnoite. Cue Moo naimiena isiruite. Iemona naimiena nabaiticoco.

<sup>24</sup> Bu cuenta isiruiñenia, cue llogacínuaína ñnoñede. Cue llogacínodí cuejeñede. Cue Moo ie. Naimie cuenta oretate.

<sup>25</sup> Omoi díga nia cue illamona, bie llogacínuaí omoímo jai llotícue.

<sup>26</sup> Cue Moodí omoína canollena, naga rafuena omoína llofuellena, cue facaina ie Joreñona omoímo oretate. Omoína nana omoímo llogacínuaína comecitaite.

<sup>27</sup> Cue Moo díne jaitícue; iadedí omoí comeciaina uri itataitícue. Cuenta ñnoñedíno omoí comeciaina iese itatanidímací. Jarire iñeno. Jacíruiñeno.

<sup>28</sup> Aillí cue lluaña cacadomoi: “Cue Moo díne jaitícue; iadedí dane biitícue”. Cue Moo díne cue jailla jira, cuenta omoí isiruia, cueri iobitomoi. Cue Moo cue afemo ite.

<sup>29</sup> Bie rafue cuemo nia suiñenia, uicodo omoímo iena jai llotícue. Naie suia, cuenta fañonocaiñeno omoí jaillena jitaídícue.

<sup>30</sup> Omoi díga are nia ñaiñeitícue. Cuenta ñnoñedíno anamo itímie cuenta jai duere finoacade. Taifena ñaitícue. Naimie anamo iñedícue;

<sup>31</sup> iadedí cue Moona cue isiruillana cuenta ñnoñedíno uñollena, cue Moo cuemo llua isoi, finoitícue. Mai caí jaillí.

## 15

### *Uvas railla riará ie rafue*

<sup>1</sup> Jesús nia llofujete:

—Cue díbeimo marena omoí illena omoí raise uñollena, jiaie rafuedo iena llofueitícue. Uvas railla ua riaradícue. Cue Moodí uvas railla riará sedaraima.

<sup>2</sup> Cue amena igailaídomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide.

<sup>3</sup> Cue llogacínuaído jaillamona, jai jaigaica isoidomoi. Iemona omoí comeciái jai jeanide.

<sup>4</sup> Cuenta nabai. Ona jiaí nabaitícue. Naie amenamo jai duiñena jira, daje díbegaise jaitaca igaidí jai llisiñede. Ie isoide. Cuenta omoí nabaicabiñenia, llisiñede igai isoidomoi. Ie jira cuenta nabai.

<sup>5</sup> Uvas railla riaradícue. Cue amena igailaídomoi. Cuemo omoí duiadedí, omoímo cue duiadedí, eo lliside isoidomoi; iadedí cuemo omoí duiñenia, jaca llisiñede isoidomoi. Cuemo omoí duiñenia, cue jitailla isoi mare rafuena jaca finoñeitomoi.

<sup>6</sup> Jai duide igailaí safenaila mei, maraiñena jira, jobaillena, danomo ofitaticái. Cuemo duiñedímie jai duide igai isoide. Jusiñamuimona duere sefuite.

<sup>7</sup> Cuenta omoí nabaia, cue uaina omoí feitañenia, omoí jitailla rana jica. Ie mei feiñoítomoi.

<sup>8</sup> Eo lliside omoí isoia, cue Moo iobide. Iese omoí ia, ua cue comínidomoi. — Iese Jesús llofujete; ia naimie díbeimo naimací raise illena ñaite. Mare rafuena naimací finocana jaillena ñaite.

<sup>9</sup> Nia llofujete:

—Cuenta cue Moo isiruilla isoi, omoína isiruitícue. Cuenta nabaicabi.

<sup>10</sup> Cue Moo llogacínuaína cue ñnuamona, naimie isiruillacino anamo itícue. Cue Moo llogacínuaína omoí ñnuamona, cue isiruillacino anamo itomoi.

<sup>11</sup> Cue isoi omoí comeciái eo caimarellena, bicínuaí omoímo llotícue.

<sup>12</sup> Dane bie rafuena llotícue. Omoína cue isiruilla isoi, conínina omoí isirui.

<sup>13</sup> Naimaci o isiruillamona, o nabaiñiaia facaina o fiodaia, naimacina eo ua isiruitio.

<sup>14</sup> Cue llogacinuaina omoi ñnoia, cuena nabaidomoi.

<sup>15</sup> Omoina “Cue mullaiaidomoi” jaca raiñedicue; iadedi omoina “Cue nabaiñiaidomoi” birui raiticue. Mullaiaia imaci patrón finoca rafuena uiñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi.

<sup>16</sup> Cuena fetoñedomoi; iadedi omoina fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo fecaite.

<sup>17</sup> Coninina omoi isiruillena jai lloticue.

### *Comini Jesúsna enoilla rafue*

<sup>18</sup> Jesús nia llofujete:

—Cuena ñnoñedino omoina enoia, nano cuena jai enoidimaci. Iena uiñotomoi. Omoina nia enoiñenia, cuena jai enoidimaci.

<sup>19</sup> Naimacimo jainaiaidomoina, omoina isiruitimaci; iadedi naimacimo omoi jainaiaañena jira, omoina cue fetua jira, omoina enoidimaci.

<sup>20</sup> Omoimo jai lloticue. Illaia duere sefuia, naimie anamo itino jiaia duere sefuidimaci. Ie isoide. Cuena comini duere finua isoi, omoina jiaia duere finoitimaci. Cue llofuiacinona naimaci ñnua isoi, omoi llofuiacino jiaia ñnoitimaci.

<sup>21</sup> Cuena oretatimien naimaci uiñoñena jira, cue muidona iese finoitimaci.

<sup>22</sup> Naimacimo ite jeacinona naimacimo lloñedicuena, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona.

<sup>23</sup> Cuena enoidimiedi cue Moona jiaia enoide.

<sup>24</sup> Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedimaci. Cue siño finoca rafuena jai cioidimaci. Ie jira cuena enoidimaci. Cue Moona jiaia enoidimaci.

<sup>25</sup> Naimacina David micori jaie llote: “Naimacimo buena finoñedicue; ia cuena enoidimaci”. Naie ciegafuiaia jai suide.

<sup>26</sup> ‘Cue Moo ie Joreño omoimo oretaitaite. Ie Joreño omoina canoite. Omoina uanaicinona uiñotaite.

<sup>27</sup> Cue nano lluaruimona cue diga omoi illa jira, cue facaisena jiaia raise lloitomoi.

## 16

### *Juduaia illaicomini Jesús llofueoicaiganona duere finua rafue*

<sup>1</sup> Jesús nia llofujete:

—Danomo abido omoi jaiñellena, cue uaina omoi fañonocaiñellena, bicinuai omoimo ja lloticue.

<sup>2</sup> Omoi ofracomona illaicomini omoina dotaitimaci. Jiairuido omoina meiniamona: “Jai Jusiñamuina marena sedadicaia”, comeciaina facaitimaci.

<sup>3</sup> Cuena naimaci ñnoñena jira, cue Moona jiaia naimaci ñnoñena jira, iena finoitimaci.

<sup>4</sup> Bie rafue omoimo sua, naie facaise cue llua omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

### *Jesús Jusiñamui Joreña llua rafue*

<sup>5</sup> Jesús nia llofujete:

—Cuenta oretatimie dine ja jaiticue; iadedi omoimona buna: “¿Ñine jaitio?”  
cuemo jaca nia jicanoñede.

<sup>6</sup> Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi.

<sup>7</sup> Uanai lloticue. Cue jaia, mare. Cue jaiñenia, omoina canoraïma omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraïma.

<sup>8</sup> Naimie bia, cuenta ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiai uiñotaite.

<sup>9</sup> Cuenta naimaci ñnoñenia, naimacina naimacimo jeacino nia illana uiñotaite.

<sup>10</sup> Cue Moo dine abido cue jaillinona, cuenta cioiñeitimaci; ia iemona Jusiñamui Joreño cue uaina siñonana uiñotaite.

<sup>11</sup> Fiodaillamona jilloiticue. Iemona cuenta ñnoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite.

<sup>12</sup> Diga rafue omoimo nia lloiacadicue; iadedi jai rairaiñaidomoi.

<sup>13</sup> Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacino llofueite. Jiairuido sulle rafuena llofueite.

<sup>14</sup> Omoina cue rafuena uiñotaite. Ie jira cuenta iobitaite. Nana cue Moomo ite uaidi cueje.

<sup>15</sup> Ie jira bie rafuena lloticue. Jusiñamui Joreño omoina cue rafuena raise uiñotaite.

### *Sunaillamona caïmare illa rafue*

<sup>16</sup> Jesús nia llofueite:

—Dallu illanona cuenta cioiñeitomoi. Ie mei dallu illanona, cuenta dane cioitomoi.

<sup>17</sup> Ie llofueoicaiganodicaïmona damierie dani coninimo jicanodosite:

—¿Ñiese caïmo llote: “Dallu illanona, cuenta cioiñeitomoi. Ie mei dallu illanona, cuenta dane cioitomoi. Cue Moo dine jaiticue”?

<sup>18</sup> ¿Buena caïmo llote? Raise cacaiñedicai.

<sup>19</sup> Cai jicanuana Jesús uiñuanona, naimie jicanote:

—¿Cue llua raise uiñoiacadomoi?

<sup>20</sup> Cuemo sulle rafue sua, eo eitomoi; iadedi cuenta ñnoñedino eo iobitimaci. Sunaitomoi; iadedi jiairuido caïmare iitomoi.

<sup>21</sup> Jiaie uaido iena lloticue. Riño jocoacania, naiñaiño jigico isirede. Joca mei, naiñaiño urue jeicïamona, isirenadi feibicaide. Iemona jai iobide.

<sup>22</sup> Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuenta cioitomoi. Ie mei caïmare iitomoi. Iemona omoina buna sure itatañeite.

<sup>23</sup> Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite.

<sup>24</sup> Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caïmare illena.

### *Jiairuido Jesús marefodo llua rafue*

<sup>25</sup> Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moomo marefodo lloticue.



<sup>26</sup> Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi.

<sup>27</sup> Omoina naimie isiruillamona, omoimo fecajite. Cuena omoi isiruilla jira, cue Moomona cue billana omoi inua jira, cue Moo omoina isiruite.

<sup>28</sup> Cue Moomona eniruemo biticue. Naimie dine abido jaiticue.

<sup>29</sup> Lloticai:

—Jai marefodo caimo llotio. O uaina meidocana jai uiñedio.

<sup>30</sup> Nana rafuena o uiñuana uiñotikai. Cai comeciaino iticinona o uiñuamona, caina raise uiñotio. Iemona Jusiñamuimona o billana jai inotikai.

<sup>31</sup> Jesús uai ote:

—Cuena jai inotomoi.

<sup>32</sup> Jiairuido, ua birui, oni tuuitomoi. Nagamiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite.

<sup>33</sup> Cuena omoi inuano, omoi uri illena, omoimo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

## 17

### *Jesús ie Moo diga ñaia rafue*

<sup>1</sup> Jesús bicinona llua mei, monamo eruaillano, jide:

—Moo, cue fiodaiacanarui jai ride. Cue uai siñonana uiñota. Iemei o uai siñonana jiai uiñotaiticue.

<sup>2</sup> Nana comini afemo cuena jai itatatio. Fimana cue jaillamona, nana comini afemo cuena jai itatatio. Comini comeciai iuaina o meidotajamona, cue fiodaillamona, ailluena comini o diga jaca iitimaci.

<sup>3</sup> Ona nanoca Jusiñamuina uiñoitimaci. Jai cuena o oretajana jiai uiñoitimaci.

<sup>4</sup> Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue.

<sup>5</sup> Ore Moo, enirue nia iñena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa.

<sup>6</sup> Comini comeciai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena inocana jaidimaci.

<sup>7</sup> Nana cuemo ite rafue omona feiñotitcue. Iena jai uiñotimaci.

<sup>8</sup> Nana cuemo o llogacinuaina naimacimo jai lloticue. Jai inotimaci. Omona cue billana jiai jai inotimaci. Cuena o oretajana jiai inotimaci.

<sup>9</sup> Naimaci facaina birui jidicue. Naimacina cuena inotadio. Ie jira omo jai duidimaci. Ona inoñedino facaina birui jifñedicue.

<sup>10</sup> Nana o dibeimo itinodi cueje. Nana cue dibeimo itinodi oie. Nana naimaciri iobidicue.

<sup>11</sup> Bene eniruemo fiebitimaci. Eniruemona monamo jaiticue. O dine abido jaiticue. Ore Moo, jeacino naimaci fino raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita.

<sup>12</sup> Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui lloraime micori ciegafuia suillena, naimie ua faifite.

<sup>13</sup> O dine ja jaiticue. Cue isoi naimaci comeciai eo caimare illena, naimacimo ailluena rafuena jai lloticue.

<sup>14</sup> O llogacinuaina jai lloticue. Ona inoñedinomo naimaci jainaiñena jira, ona inoñedino naimacina enoidimaci. Ona inoñedinomo jiai jainaiñedicue.

15 Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue.

16 Ona ñnoñedinomo jainaiñedinomaci. Ona ñnoñedinomo jiai jainaiñedicue.

17 O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciaino raise itata.

18 Bene cuena o oretaja isoi, ona ñnoñedino dine naimacina oretaticue.

19 Uanaicinona naimaci uiñuamona, naimaci comeciaino marebicaillena, cuena ñnotino facaina fiodiacadicue.

20 Bimacina birui dane jñedicue; iadedi bimaci cue rafuena ico lloia, jiaie comini cuena ñnoitimaci. Cuena ico ñnoitino facaina birui jiai jñidicue.

21 Daajedicoco. Coco illa isoi, naimaci comeciaina daje isoi lloillena, nana naimaci facaina jñidicue. Daje isoi comeciaino lloillamona, cuena nia ñnoñedinodi ñnoitimaci. Iemona cuena o oretajana ñnoitimaci.

22 Cuemo o iga uaidi ebirede. Naimaci comeciaino lloillena, naimacimo o uai jai cue iga.

23 Naimaciri dajedicai. O diga daajedicoco. Naimaci comeciaino daje isoi lloillana jitaidicue. Iemona cuena ñnoñedino bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci.

24 Ore Moo, naimaci cue dine illena jitaidicue. Enirue nia iñenia, illaima isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaidicue.

25 Ore Moo, mareuidimedio. Jiaie comini ona uiñoñedinomaci; iadedi ona uiñoticue. Cue llofueoicaiganodi o cuena oretajana jai uiñoitimaci.

26 Naimacimo ona jai lloticue. O cuena isiruilla isoi coninina naimaci isiruillena, naimacimo nia lloticue —jñide.

## 18

### *Jusúna gaitalle rafue*

(Mt 26.47-58; Mr 14.43-54; Lc 22.47-54)

1 Jia mei, Jesús ie llofueoicaiganodicaí diga, Cedrón railla iconi enefebeimo ruica aceituna railla riaraiñiñanomo naiona jaide.

2 Jesús cai diga nainomo jaisoilla jira, Judas micori naie illanona jiai uiñote. Jesúsna gaitatallena nainomo Judas jaide.

3 Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduaiñi lamparíñairi bitimaci. Reinaiñiri jiai bitimaci. Sidaniñiri jiai bitimaci. Judas naimacina ifode.

4 Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomoí?

5-6 Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaillamona, abido ñajillamona, eniruemo uaidimaci. Jesúsna gaitatallena, Judas micori naimaci diga ite.

7 Jesús dane jicanote:

—¿Buna jenodomoí?

Uai otimaci:

—Nazaret ie Jesús.

8 Jesús uai ote:

—Omoimo jai lloticue: “Imiedicue”. Cuena omoi jenoia, cue diga itino oni jaillena rairuiño.

<sup>9</sup> Naimie ie Moomo como lloga uai suillena, iese llote. Iese ie Moomo como llote: “Cuena o ñnotaganomona jaca buna faifiñedicue”.

<sup>10</sup> Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaïma jefona jaïbonote. Naie mullaïma mamecidi Malco.

<sup>11</sup> Iena ciuanona, Jesús Pedromo llote:

—O lloebina eeno. Cue Moo jitailla isoi, fioidaiticue.

<sup>12</sup> Ie mei soldaduai, imaci capitán diga, judíuai imaci policías diga, Jesúsna gaitajano, naimiena maïtimaci.

<sup>13</sup> Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima.

<sup>14</sup> Navui Caifás judíuai illaïcominimo llote: “Damie nana cai comini facaina fioidaitena, mare”.

*Pedro Jesúsna nano janua rafue*

*(Mt 26.69, 70; Mr 14.66-68; Lc 22.55-57)*

<sup>15</sup> Simón Pedro Jesús jinafo racade. Jiai racadicue. Cuena Jusiñamui diga nanoca ñairaima uiñua jira, ie nairaïbirimo Jesús diga jaidicue;

<sup>16</sup> iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraïño jicanoticue.

<sup>17</sup> Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

<sup>18</sup> Rosirena jira, naie jofo mullaïai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

*Jesús Anás dine illa rafue*

*(Mt 26.59-66; Mr 14.55-64; Lc 22.66-71)*

<sup>19</sup> Ie facaise Anás Jesúsno ie llofueoicaiganodicaina jicanote. Ie llofuiacinuaina jiai jicanote.

<sup>20</sup> Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue.

<sup>21</sup> ¿Bue ñellena birui cuemo jicanotio? Cuena cacadinomo iena jicano. Cue llofuiana uiñotimaci.

<sup>22</sup> Iese Jesús llua jira, daje policia naimie uiecona butade. Jesúsno jicanote:

—¿Bue ñellena iese uai otio?

<sup>23</sup> Jesús dinena naie uai ote:

—Naimie uai jeare oticuenta, cuemo llono. Jeare oñedicuemo, ¿bue ñellena cuena butadio?

<sup>24</sup> Jesús uai oñede. Iemei Anásdi Caifás jofomo Jesús maïanona orede.

*Pedro Jesúsna dane janua rafue*

*(Mt 26.71-75; Mr 14.69-72; Lc 22.58-62)*

<sup>25</sup> Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

<sup>26</sup> Naie facaise daje mullaïma Pedromo llote:

—Aceitunas railla riaraiïa illanomo ona cioidicue —llote. Jesúsna soldaduai gaitaja facaiseconi Pedro naie mullaïma ie come jefona ailli jaïbonote, soldaduai Jesúsna gaitaja ie daacaiño.

27 Pedro dane janote. Ieconi itava ñaite.

*Jesús Pilato ñine illa rafue*

*(Mt 27.1-2, 11-14; Mr 15.1-5; Lc 23.1-5)*

28 Ie mei Caifás jofomona gobernador jofomo Jesúna jítiramo uitimaci. Naie facaise gobernadori Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledi guiñega.

29 Ie jira Pilato jino bite. Naimacimo jicánote:

—¿Ñie isoide rafue muidona llogidotomoi?

30 Uai otimaci:

—Bimie marañede rafue finoñedena, o ñine naimiena atañedicaí.

31 Pilato llote:

—Naimiena uiño. Omoi einamaci llogacínuaído naimiena duere fino.

Uai otimaci:

—Come meinellena caimona rairuidomoi. Naimie coraiana jítaidicaí — llotimaci.

32 Navui Jesúsdi: “Cuená cruzmo coraitimaci” llote. Naie llucino jai suisaide.

33 Pilato fo abido jaillano, Jesúna uaiduano, naimiemo llote:

—Judíuai illaíma raillamiedio.

34 Jesús ñinena jicánote:

—¿O comecina dama iese facajano llotio? Iese comecina o facañenia, jiaimie omo lloga.

35 Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui ñiga nanoca ñairaini cuemo jiai fecadimaci. ¿Ñie isoide marañede rafuena finodio?

36 Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicedena, cue comini cue facaina fuiridimaci.

37 Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lllena, jeicigacue. Nana uanaicinona jítaidino cue lluaana cacadimaci.

38 Pilatodi Jesús uaina uaitajamona, raite:

—¿Ñie uai naidi uaina?

Ie mei dane jino billano, cominimo llote:

—Jaca nicino naimiemo ñede.

*Jesúna coraiacana rafue*

*(Mt 27.15-31; Mr 15.6-20; Lc 23.13-25)*

39 Pilato ñia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jítaia, omoi illaíma raillamiena marena oretaiticue.

40 Comini ñinena cuiriidimaci:

—Dama ite. Bimiena jítaiñedicaí. Barrabásna cárcelmona marena jino oreta.

—Iese cuiriidimaci. Barrabásdi firiraima.

## 19

1 Ie mei Pilato Jesúna oni uillanona, naimiena sechedotade.

2 Jífanodosillena, soldaduai eecuaimona finoca nuiciraina naimie ifogimo jítadimaci. Jiduirede ñiroina jítatajano raitimaci:

- 3 –Judíuái illaímadío. –Iemei ie uiecona bucoídimaci.
- 4 Pilato dane jino billano, raite:  
–Naimie omoi dine jino ja biite. Naimiemo nicinodí iñede –raite.
- 5 Ie facaise Jesús jino bite. Eecuaímona finoca nuiciraina jítaca. Jiduirede iniroina jítaca. Pilato naimacimo llote:  
–Jadi, naimie.
- 6 Jusiñamui díga nanoca ñairainidi, jiaie illaícomini díga, naimiena ciuano, cuiiriidimaci:  
–Naimiena corai.  
Pilato llote:  
–Naimiemo nicinodí iñede; ia oni uillanona, naimiena omoi corai.
- 7 Uai otímaci:  
–Moisés micorí jaie cuega: “Bu Jusiñamuina jeare ñaianona, fiodailla”. “Jusiñamui Jitodícue” naimie railla jira, naimie fiodailla. Naimie Jusiñamui Jitona abina caitadímie. Caimona naimiedi maraiñede rafue jai finode.
- 8 “Naimiedi Jusiñamui Jito” comini raillana Pilato cacajano, eo jacinaite.
- 9 Jesúna dane fo uite. Jesúsdi Jusiñamui Jitona naimie raise uiñollena, Jesúsno jicanote:  
–¿Ninena bitío?  
Jesús uai oñede.
- 10 Ie jira Pilato dane jicanote:  
–¿Bue ñellena cue uaina oiacaiñedio? Uai cuemo ite, o marena oretallena. Uai cuemo ite, ona coraitallena.
- 11 Jesús uai ote:  
–O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baífemo jeacino finodimaci.
- 12 Ie facaimona Pilato Jesús marena jino oretaiacade; iadedí judíuái illaícomini dinena cuiiriisite:  
–Bimie o jino marena oretaia, cai nanoca illaíma ie nabaiñedio. “Illaímadícue” Jesús lluamona, cai nanoca illaíma díbeimo naimiedi iñede. Cai nanoca illaímadí César.
- 13 Comini lluana cacajano, Pilato Jesúna jino atíde. Ie cominimo llora-nomo raide. Naie illano nofinina mameciredede. Judíuái uaido Gabatana mameciredede.
- 14 Pascua rafue guilla finoraruimo jitoma naidai illanona, Pilato dinena llote:  
–Jadi, omoi illaíma.
- 15 Iemona cominidí cuiiriisite:  
–¡Naimie oni uillanona, naimiena meine! ¡Naimiena corai!  
Pilato jicanote:  
–¿Bue ñellena omoi illaímana coraitícue?  
Jusiñamui díga nanoca ñairaini uai otímaci:  
–Cai illaímadí César. Jiaie illaímadí caimo iñede. Jaca dalláimade cai illaímadí.
- 16 Ie mei Pilato naimacimo naimiena fecade, coraillena.
- Jesúna coraiacana rafue*  
(Mt 27.32-56; Mr 15.21-41; Lc 23.26-49)  
Pilato llua jira, Jesúna uitímaci coraillena.
- 17 Jesúsdi ie cruzna rocaoicaida sonode. Ifocoraina eruaila mameciredede illanomo jaidímaci. Judíuái uaido naie illano Gólgotana mameciredede.
- 18 Nainomo naimiena coraidímaci. Naimie abímo menamie coraica. Damie Jesús nabeimo. Jiaimie jarifebeimo.

<sup>19</sup> Cruzmo jonellena, Pilato rabicimo cuetatate: “Nazaret ie Jesús. Judíuai Illaíma”.

<sup>20</sup> Judíuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena ciódimaci.

<sup>21</sup> Iena ciuamona, naie rabicina meidollena, Jusiñamui diga nanoca ñairaini Pilatomo llotimaci:

—“Judíuai Illaíma” raillano jai cuetatatio. Iena meiduana jitaídicaí. Bimie dinena raisoide: “Judíuai Illaímadicue” raillanona, o cuetatajana jitaídicaí

<sup>22</sup> Pilato uai ote:

—Jai cuetataticue. Jiaie rabicimo dane cuetatañeíticue.

<sup>23</sup> Jesúsna coraia mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi.

<sup>24</sup> Ie jira dani coniniri ñaitimaci:

—Bie camisa cuaranoñeíticaí, dani cai fecallena. Mai. Conima jabomaiticaí, iena ollena. —Iese finuano Jusiñamuina lloraíma micori cuegafuaí suide. Jai cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

<sup>25</sup> Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite.

<sup>26</sup> Jesús ie eina ciode. Cuena naiñaiño ecimo jiai ciode. Cuena eo gaide. Ie jira ie eimo llote:

—Jadi, o jito isoi itimie anamo iitio.

<sup>27</sup> Cuemo llote:

—Jadi, o ei isoidiñaiño anamo iitio.

Naie dacaiño naiñaiño cue jofomo uillanona, naiñaiño sedadicue.

<sup>28</sup> Ie mei Jesús nana rafue jai fuillana uiñuano, llote:

—Jiroacadicue. —Iese lluanona, Jusiñamuina lloraíma micori jai cuegafuaí jai suide.

<sup>29</sup> Nainomo llerojimo vino ite. Radosimo fibecode rana joniano, vinomo faite. Iemei Jesúsno fecade jaronollena.

<sup>30</sup> Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

### *Jesús sida diga ducia rafue*

<sup>31</sup> Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaína uellullena naimiemo jicanuaidimaci. Sábado rafue ie nairui nia illanona, sábadorui jai raire taineacana jira, coraicano cruzmo sábadoruimo illana jitaíñedimaci.

<sup>32</sup> Soldaduai jaillano, Jesús ecimo coraica iaímaiaí idaiaína uellude.

<sup>33</sup> Jesús dine billano, naimie jai fiodaillana ciódimaci. Ie jira naimie idaiaína uelluñedimaci;

<sup>34</sup> iadedi daje soldado Jesús ciraigiconi sida diga ducide. Naifo diaide. Naifomona jinui jiai bite.

<sup>35</sup> Nana iena ciódicue. Uanai lloticue. Omoi ñnollena, iena lloticue.

<sup>36</sup> Soldaduai iese finuamona, jai cuegafuaí jai suide. Jai Jesúsna cuega: “Naimie illaicina tainoñeítimaci”.

<sup>37</sup> Jiai jai cuega: “Judíuai dinena naimaci ducitagamiemo ico eruaitimaci”.

### *Nofici ifomo Jesús raia rafue*

*(Mt 27.57-61; Mr 15.42-47; Lc 23.50-56)*

<sup>38</sup> Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairaí imie. Pilato fairiote. Ie



jira José Jesús abi ana uanona, iena oni uite. Judíuai illaicomínina naimie jaciruillanona, Jesúsna bainino ñnote.

<sup>39</sup> Nicodemo jiaí bite. Siorede rana atíde. Mirra áloe díga jai tamiano atíde. Nibaí treinta kilos atíde. Naimiedi Jesús dine naíona navui bite.

<sup>40</sup> José, Nicodemo díga, Jesús abina useroina ferinotíaimaiaí. Naimaci comíní finouilla isoi, naie siorede radi ñiroimo jonega.

<sup>41</sup> Amenaiaí iaíre illanomo Jesúsdi coraíca. Nainomo nofici ie raíafodi ite. Nia buna naifomo raíñenafo.

<sup>42</sup> Naífo iaíre illa jira, sábadorui jai riacana jira, jiaíe raíafó jenollena abi juanina jira, nainomo naimíena jonetiáimaiaí. Nofici díga raíafó raise íbailla mei, jofomo jaidíaimaiaí.

## 20

### *Fiodaillamona, Jesús jillua rafue*

*(Mt 28.1-10; Mr 16.1-8; Lc 24.1-12)*

<sup>1</sup> Domingo jítiramo nia monañenia, raíafomo María Magdalena jaide. Raíafó íbailla nofici oni joillana cíode. Jesús abina cíoiñede.

<sup>2</sup> Ie jira aisícana Pedrona jenuaide. Cuená jiaí jenuaide. Baillano, llote:  
—Cai illaicomíní cai Nama abina raíafomona otímaci. Naimíena jonianona uíñoñedicue.

<sup>3</sup> Ie mei raíafomo jaidícoco.

<sup>4</sup> Aisícana jaidícoco; iadedí riire cue aisícana jailla jira, nano ridícue.

<sup>5</sup> Ana bitadacáida, fo erodatícuemo, useroi joillana cíodicue; iadedí fo jaiñedicue.

<sup>6</sup> Ie mei Simón Pedro rillano, fo jaide. Useroi joillana jiaí cíode.

<sup>7</sup> Ie ífogímo ferínoga ñiroi eneno illana cíode. Raise nacuana cíode.

<sup>8</sup> Iemei jiaí fo jaidícue. ñiroina cíuamona, Jesús jai jilluana ñnotícue.

<sup>9</sup> Jaíe cuezafuíaí llote: “Fiodaillamona jilloíte”. Naie cuezafuíaína como raise ñnotícoco.

<sup>10</sup> Ie mei jofomo jaidícoco.

### *María Magdalenamo Jesús bairia rafue*

*(Mr 16.9-11)*

<sup>11</sup> Raíafomo abído billano, coco jailla mei, nainomo María fiebide. Eede. Ana bitadacáida, fo erodatemo,

<sup>12</sup> Jusiñamuimona mena jaíenici jai billana cíode. Userede ñiroi jítadíaímaiaí. Jesúsna navui jonianomo ana raídíaímaiaí. Damíe ífogi díbeimo raide. Jiaímíe eillí díbeimo raide.

<sup>13</sup> Naiñaiño mo jícanotíaimaiaí:

—¿Bue ñellena eedío?

Naiñaiño uai ote:

—Cue Namana bu oni uillanona, naimíena jonianona jai uíñoñedicue.

<sup>14</sup> Naie facaíse jinafo díne erocáillanona, Jesúsna cíode; iadedí naimíena uíñoñede.

<sup>15</sup> Naiñaiño comecína facade; “Naimiedi bie illano sedaraíma”. Jesús naiñaiño mo jícanote:

—¿Bue ñellena eedío? ¿Bu jenodío?

Naiñaiño uai ote:

—Jesúsna o uía, naimíe jonianona cuemo llono. Ie mei naimíena oni uitícue.

<sup>16</sup> Jesús dímena uai ote:

—¡María!

Naimíe díne naiñaiño como raise dobaícaide. Judíuai uaido llote:

—¡Raboní! —Naie uai oni dobaíñuamona: “Llofueraíma”.

17 Jesús uai ote:

—Cuenta llinnoñeno cuenta faica. Cuenta dñe nia a jaiñedicue. Cuenta amatai dñe mai jaillanona, cuenta rafuena lluai. Cuenta Moo dñe jaiticue. Naimiedi cuenta Jusiñamui. Naimie jiai omoi Moo. Jiai omoi Jusiñamui.

18 Ie jira María Magdalena Jesús llofueoicaiganodicaimo lluaibite:

—Cai Namana jai ciodicue. —Iemei caimo naimie naiñaiño mo lluaana llote.

*Jesús ie llofueoicaiganomo bairia rafue*

*(Mt 28.16-20; Mr 16.14-18; Lc 24.36-49)*

19 Domingo naio Jesús llofueoicaiganodica jofomo ofidica. Judíuai illaicominina cai jaciruillanona, nasiai nana cai ibaica. Nase econoñeno ieconi Jesús cai motomo billanona, caina uaiduano, llote:

—Uri omoi i.

20 Ie onollina acatate. Ie ciraigina jiai acatate. Cai Namana jai cai ciuari eo iobidica.

21 Jesús dane llote:

—Uri omoi i. Cuenta Moo cuenta oretaja isoi cuenta rafuena llollena, omoina oretaiticue.

22 Ie facaise caina firaiñuanona, raite:

—Jusiñamui Joreñona omoi feiñuana jitaidicue.

23 “O jeacina jai dotade” bumo omoi lloia, Jusiñamui jai dotaca. “O jeacina nia dotañede” bumo omoi lloia, Jusiñamui nia dotañega.

24 Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa.

25 Naimiemo llotica:

—Cai Namana ailli ciodica.

Tomás uai ote:

—Clavo ifona naimie onolli jeraimo cuenta cioñenia, naie ifona cuenta jetañenia, naimie ciraigi ifona cuenta jetañenia, ñnoñeiticue.

*Jesús ie llofueoicaiganomo dane bairia rafue*

26 Ocho digarui illanona, Jesús llofueoicaiganodica dane ofillano, Tomás cai diga ite. Nana nasiai ibaica; iadedi nase econoñeno ieconi Jesús cai motomo dane fo billano, uaiduano, llote:

—Uri omoi i.

27 Iemei Tomás mo llote:

—Eroda cuenta onollimo. Naifo jeta. Ciraigi ifona jiai jeta. ñnoñeno jaiño. Mai ñno.

28 Tomás uai ote:

—Cuenta Namadio. Cuenta Jusiñamuidio.

29 Jesús dane uai ote:

—Cuenta o ciua jira, cuenta ñnotio; iadedi cuenta cioñedino cuenta ñnoia, jiai caimare iitimaci.

30 Jesús diga siño rafuena finode. Iena ciodica. Nana naie rafuena bie rabenicomo cueñedicue;

31 iadedi dajerie cueticue. Jesúsdi cai jilloitaraimana omoi ñnollena, iena cueticue. Naimiedi Jusiñamui Jitona omoi ñnollena, iena jiai cueticue. Naimiena omoi ñnuano, naimie diga jaca iitomo.

## 21

*Jesús ie llofueoicaiganomo ane bairia rafue*

1 Diga irui illanona, Tiberiana mameciredede jorai fuemo Jesús ie llofueoicaiganodicaimo dane bairede.

<sup>2</sup> Nainomo diese iticai: Simón Pedro, Tomás, Natanael, cue ama Jacobo, cue, jiaie iaímaiaí. Tomás mameci jiaicidi Dídimó. Natanael Galilea ie Caná nairai imie.

<sup>3</sup> Simón Pedro caimo llote:

—Lloiji faiaitícue.

Naimie uai oticai:

—O diga jaiticai. —Iese raillano, botemo jaidicai. Namona naió lloijina faiticai; ia jaca buena oñedicai.

<sup>4</sup> Monaiacademo, Jesús jorai fuemo bite; iadedi naimiena uiñoñedicai.

<sup>5</sup> Jesús caimo jicánote:

—Caimaci, ¿nie diese lliciaína jai otomoi?

Uai oticai:

—Jaca oñedicai.

<sup>6</sup> Naimie dane uai ote:

—Omoi bote nabei dine omoi lloijina faino.

Ie jira faiticai. Ailluena lliciaí naiemo jilla jira, a aiñonidicai.

<sup>7</sup> Iena ciuamona, Pedromo llotícue:

—Cai motomo cai Namadi ite.

Pedro iena cacajano, naimie taimiena jira, ie iniroi jitade. Jesús dine naimie raíre rillena, joraímo daiade;

<sup>8</sup> iadedi botedo biticai. Enírué iaíre illa jira, na lliciaímo sonocana, lloijina atidicai. Nibai cien metros oni ite.

<sup>9</sup> Jorai fuemo cai ría, cocimona bonoca iraina cidicai. Lliciaí iraimo ruica jai ite. Llomenico jiaí ite.

<sup>10</sup> Jesús caimo llote:

—Omoi oga lliciaímona janore atí.

<sup>11</sup> Ie jira Simón Pedro botemo jaillano, lloijina linuanona, eníruemo ari sonode. Ciento cincuenta y tres jemíerie jitaticai. Ailluena ite; iadedi lloiji cuarariñede.

<sup>12</sup> Jesús llote:

—Mai guisaíbi. —Jesúna cai uiñua jira: “¿Budío?” jaca buna raiñena.

<sup>13</sup> Jesúsdi llomenico diga lliciaína caina ecade.

<sup>14</sup> Fiodaillamona jillua facaisemona dacaiño amani caimo Jesús jai abina bairetate.

### *Jesús Pedro diga ñaia rafue*

<sup>15</sup> Guilla mei, Jesús Simón Pedromo llote:

—Simón, odi Juan jitodio. —Jiaí jicánote— ¿Nana o nabaiñaí baífemo cuena isiruitío?

Simón uai ote:

—Jíi, Nama, ona cue isiruillana uiñotío.

Jesús uai ote:

—Toíca llaudaíai uruiaína omoi raise sedaja isoi, cuena ñnotinona raise seda. Naimacína cue rafuena raise llofue.

<sup>16</sup> Dane llote:

—Simón, odi Juan jitodio. —Dane jicánote— ¿Cuena isiruitío?

Simón uai ote:

—Jíi, Nama, ona cue isiruillana uiñotío.

Jesús dinena uai ote:

—Toíca llaudaíai uruiaína omoi raise sedaja isoi, cuena ñnotinona seda.

<sup>17</sup> Dane jicánote:

—Simón, ¿cuena isiruitío? —Jesús naimiemo dane jicanua jira, “Jesús cue uaina ñnoñede” raillanona, Pedro comeci sunaite.

Uai ote:

—Nama, naga rafuena uiñotío. Ona cue isiruillana uiñotío.

Jesús uai ote:

—Toica llaudaia uruiaina omoi raise sedaja isoi, cuena #notinona seda.

<sup>18</sup> Daje rafue omo nia lloticue. O nia conirue facai o iniroi dama jitadio. Ie mei o jitaillanomo jaidio. O uaciroma facaiseconi o onolli oni ñuitaitio. Ie mei jiaimie o iniroi ona jitajano, o jitañenanomo ona uite. Cue llua #nocana o jai.

<sup>19</sup> Fiodaillena Pedro uñollena, uicodo Jesús iese llote. Cristo llua isoi, Cristo rafue muidona, illaicomini Pedrona jiaruido meinetimaci. Naimie fiodaillanona, Jusiñamuina iobitade.

*Jesús ie gaia llofueoicaigamiemo llua rafue*

<sup>20</sup> Pedro diga Jesús nia ñaia facaise, Pedro dobaicaillanona, cuena ciode. Iaimaia jinafona racadicue. Jesús gaiaimedie. Navui cai guia, Jesús nia fodañenia, Jesús abimo cue ia, Jesúmo jicanoticue: “¿Bu gaitatallio?”

<sup>21</sup> “Cuena #notinona seda” Pedromo Jesús llua mei, Pedro dobaicaillanona, cuena ciuano, Jesúmo jicanote:

—Nama, ¿niese naimie fodaite?

<sup>22</sup> Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llua #nocana o jai.

<sup>23</sup> Ie jira creyentia naie llua fidiario cuena raitimaci:

—Naimie fodañeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

<sup>24</sup> Nana rafuena ciuano lloticue. Iena cueticue. Uanaicinuaina cueticue.

<sup>25</sup> Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

## JESUCRISTO ORETAGANODI NAIMIË RAFUE LLOCANA UILLA RAFUE

### *Jesús Jusiñamui Joreño billena llua rafue*

<sup>1</sup> Teofilo, o dine, ¿nigacino? ¿Ñie isoidio? Omo jiaie rabe birui dane oretaiacadícue. Lucadícue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiaí cueticue.

<sup>2</sup> Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci.

<sup>3</sup> Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui díbeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

<sup>4</sup> Naimaci diga Jesús guilla facaise, naimie Jerusalémona naimaci oni jailana rairuide. Raite:

—Cue Moo ie Joreño omoimo fecallena, omoimo jai llotícue. Naiena omoi feiñollena, Jerusalémo nia fiebi.

<sup>5</sup> Naimie rafuena comini ñnuamona, Juan Bautista micorí jinui diga bautizade; iadedi cue rafuena omoi ñnuamona, nano nigarui illanona, cue Moo ie Joreñona feiñoitomoí —raite.

### *Monamo Jesús jailla rafue*

<sup>6</sup> Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micorí cai usumatiaí micoriaí jaie sedaja isoi?

<sup>7</sup> Naimie uai ote:

—Naie rafue suille facaiseconi jaca uiñoñeitomoí. Naimie siñona illamona, dama cue Moo naie rafue suilliruina uiñote;

<sup>8</sup> Iadedi cue Moo ie Joreñona omoi feiñua mei, siño uai omoimo iite. Ie jira Jerusalémo cuena lloítomoí. Judeamo, Samariamo, ua nana eniruemo ite nairaimo lloítomoí —raite.

<sup>9</sup> Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede.

<sup>10</sup> Monamo nia eruidemo, ieconi naimaci dine Jusiñamui jaienici, mena ñima bairia isoi, bairediaímaiaí. Naie iaímaiaí ñiroi userede.

<sup>11</sup> Raitiaímaiaí:

—Galileo imaci, ¿bue ñellena monamo eruidomoí? Omoi motomona Jesús monamo jaillana jai ciódomoí. Naimie jai jailla isoi, dane abido íco biite —raitiaímaiaí.

### *Matiana fetua rafue*

<sup>12</sup> Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micorí lloga dinori macaritimaci.

<sup>13</sup> Rillano imaci quartomo jaidimaci. A díbebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo.

Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diése nainomo itimaci.

<sup>14</sup> Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

<sup>15</sup> Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

<sup>16</sup> —Amatiai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacimodi cuega. Iena uiñoticaí. Judas micorina uiñoticaí. Naimie Jesúsna gaitadinona ifode.

<sup>17</sup> Naimiedi da cai llofueoicaigano imie. Cai diga maijuiide.

<sup>18</sup> Ie maraiñeno finoca rafuemonu ucubena feiñua mei, ie comeci iuaina meiduanona, naie ucubena oni judaíde. Judíuai illaicomini naie ucube diga eniruenta ibadimaci. Nainomo Judas micori ie cimao cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide.

<sup>19</sup> Nana Jerusalémo itino iena fididimaci. Ie jira cai uaido naie enirue mameciredede Acéldama. Oni dobaiñuamona dirue toillanie.

<sup>20</sup> Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimieimo iite.

Iese cuega.

<sup>21-22</sup> Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaisemona, Jesús monamo caimona jaillarui facaiseconi, naimaci cai diga jiai itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

<sup>23</sup> Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías.

<sup>24</sup> Ie mei Jusiñamuimo jiidimaci:

—Nama, nana comini imaci comeciaina uiñotio. ¿Ñie imana jitaídio? Caina uiñota.

<sup>25</sup> Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijiana jai fainonocaide —jiidimaci.

<sup>26</sup> Ie jira conima jabomasíde, uiñollena bu ille. Matíamo baite. Iemei jiaie once diga oretagano isoi naimie ite.

## 2

### *Cristo oretagano Jusiñamui Joreño feiñua rafue*

<sup>1</sup> Pentecostés railla rafue irui ria, nana creyentiaí diése danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite.

<sup>2</sup> Danomo ia, ebena illacimomona monamona riire aifi billa isoi buena cacadimaci. Nana jofomo itino naiena jiai cacadimaci.

<sup>3</sup> Iena naimacimomo bairede. Iena cioidimaci. Irai boua isoi eruaíde. Nana naimacimomo baite.

<sup>4</sup> Iese Jusiñamui Joreño feiñotimaci. Nana naimaci comeciaina namatade. Iemei diga nairai uailaído ñaitimaci, Jusiñamui Joreño naimacina ñaitatajamona. Naimaci ñaia uailaina uiñoñedimaci.



<sup>5</sup> Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiaimona bitimaci.

<sup>6</sup> Creyentiaí ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci.

<sup>7</sup> Eo raijcaidimaci. Coninimo jicanotimaci:

—¿Buta ñaite? Nana Galileos imaci.

<sup>8</sup> ¿Ñiese naimacina cacadicaí? Cai uaido dajerie ñaiana cacadicaí —raitimaci.

<sup>9</sup> Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci,

<sup>10</sup> Frigia imaci, Panflia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritino jiaí itimaci.

<sup>11</sup> Judíuái itimaci. Judíuáiñedino jiaí itimaci. Judíuái isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci.

<sup>12</sup> Nana eo raijcaidimaci. Daniríe jicanododimaci:

—¿Bue ite?

<sup>13</sup> Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

<sup>14</sup> Ie facaise ie once nabaiñiaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue.

<sup>15</sup> Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina.

<sup>16</sup> Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide.

<sup>17</sup> Llote:

Jusiñamui caimo llote: “Jiairuido bie rafue suite.

Cue Joreñona diga cominimo fecajiticue.

Iedo omoi uruiaí cue lluaña lloitimaci.

Iemona omoi coniruiaina nicairitaiticue.

Iemona omoi einamacina jiaí nicairitaiticue.

<sup>18</sup> Ua nana cuena sedadinomo cue Joreñona fecajiticue.

Naimaci cue lluaña lloitimaci.

<sup>19</sup> Monamo eo jacirede rafuena ico suiñotaiticue.

Eniruemo eo jacirede rafuena ico jiaí suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

<sup>20</sup> Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

<sup>21</sup> iadedi birui cuemo bu jicaia, ie jeacinomona naimiena jillotaiticue”  
Jusiñamui llote.

Ie Joreño caimo birui illamona, Joel micori llogacino jai suide.

<sup>22</sup> Caimaci, bie uaina omoi cacarei. Nazaret ie Jesúsna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi.

<sup>23</sup> Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúsna coraitatomoí. Jusiñamuina ñnoñedinona naimiena meinetadomoi;

<sup>24</sup> iadedi fiodaillamona naimiena Jusiñamui jillotajano, legi ie cacajamona naimie jillobide. Naimie fiodaite; iadedi fiodaillamona nainomo iñoñede.

<sup>25</sup> David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

<sup>26</sup> Ie jira cue comeci caimare ite. Eo iobidicue.

Cue marena illemo jai jiai ocuridicue,

<sup>27</sup> raiafomo cue joreña naimie fainonocaiñena jira,

ie mare Jito abi rifaillana naimie jitaiñena jira.

<sup>28</sup> Naimie cuena jilloitallena uiñoticue.

Cue diga naimie illa jira, cue comeci caimare iite.

<sup>29</sup> 'Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticaí.

<sup>30</sup> Ie ia David micori Jusiñamui rafuena llote. Naimie micoridi Jusiñamui naimiemo uanaicinona lluaña uiñote. Jaie Jusiñamui naimiemo llote: "O uruiaimona damie illaimana illanona, ie cominina sedajite" llote.

<sup>31</sup> Cristona ñaite. David micori nia suiñede rafuena llote. Naimie micori Cristo jilloillena llote: "Raiafo Jusiñamui fiodaillanomo Cristo Joreño fainonocaiñeite. Cristo abi rifañeite" llote.

<sup>32</sup> Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticaí.

<sup>33</sup> Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi.

<sup>34</sup> Naimie abi monamo jaiñena jira, David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: "Cue ecimo ana rai.

<sup>35</sup> Ona ñinoñedinona o anamo itataiticue" raite. David micori llua isoi, birui jai suide.

<sup>36</sup> Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaídicue.

<sup>37</sup> Pedro lluaña cacajano, naimaci comeciáimo riire baite. Pedromo iena jicannotimaci. Ie nabaiñaímo jiai jicannotimaci:

—Caimaci, o lluaña jai cacadicaí. ¿Bue finoiticaí?

<sup>38</sup> Pedro uai ote:

—Omoi comeciái iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreña jiai feiñoitomoi.

<sup>39</sup> Omoimo ie Joreño fecallena navui llote. Omoi uruiaímo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

<sup>40</sup> Diga uai naimacimo Pedro llote. Raite:

—Ailluena comini maraiñede rafuena birui finocana jaidimaci. Fafitimaci. Naimaci isoi jaiñeno; iadedi cue lluaña omoi cacajamona, iena ñno.

<sup>41</sup> Diga comini ie lloga uaina feiñuano, bautizadimaci. Nairuido nibai tres mil comini creyentiana jaidimaci.

<sup>42</sup> Cristo oretagano llofuiana fueouidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

### *Cristona ñnotino illa rafue*

<sup>43</sup> Cristo oretaganodi diga siño rafuena finuamona, nana comini jacinaitimaci.

<sup>44</sup> Nana creyentiaí damacina itimaci. Naimaci raruiaí coninimo fe-cauidimaci.

<sup>45</sup> Dueredino ia, naimacina canollena, raruiaíredino naimaci raruiaína vendedimaci. Iemei naie ucube dueredinomo fecadimaci.

<sup>46</sup> Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiaí sedavidimaci. Nainomo danomo guillanona, Jesús fiodaillana comeciuidimaci. Caimare imaci comeciaí illamona, caidiñeno guisoidimaci.

<sup>47</sup> Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaína jaidimaci.

### 3

#### *Jusiñamui jofomo Pedro llucino*

<sup>1</sup> Jusiñamui jofomo jiaí facaise Pedro iaímaiaí Juan díga jaide. Jitoma ana ia, comini jiiuidimaci.

<sup>2</sup> Iaímaiaí jaillanomo jiaíe comini tisitaitimiena atiana ciodiaímaiaí. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainavidimaci. Nainomo naimiena rainavidimaci, fo jaidinomona ucube jica-jicallena.

<sup>3</sup> Iaímaiaí fo jaiacania, ucube jicallena, ie onolli ñuitade.

<sup>4</sup> Iaímaiaí naimiemo eruaillano, Pedro raite:

—Cocomo eruai.

<sup>5</sup> Ie jira iaímaiaímo eruaide. Ra feiñoitena, ocianona sedade.

<sup>6</sup> Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

<sup>7</sup> Pedro naimie onollido llinuano, a naidanete. Ieconí naimie eillidi jillode. Ie taisicoñuai jiaí jillode.

<sup>8</sup> Daiacaillanona naidacaide. Macarillanona, iaímaiaí díga fo jaide. Jusiñamuimo iobillacinona fecajano, daiacaillanona macarite.

<sup>9</sup> Nana comini naimie macarillana cioidimaci. Naimie iobillacinona fecajana jiaí cacadimaci.

<sup>10</sup> Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajicaidimaci.

<sup>11</sup> Naimiedi Pedro iaímaiaí Juan díga nia llinuano, naimaci díne Salomón micorí finotaga jofo abi ibirimo comini aisidimaci. Rajicaidimaci.

<sup>12</sup> Iena ciuano, Pedro naimacina raite:

—Caimaci, ¿bue ñellena biemo rajicaidomoi? ¿Bue ñellena caimo iese eruaidomoi? “Daímaiaí iaímaiaí uaido naimiena jilloitate” raillanona cocomo eruaidomoi.

<sup>13</sup> Iena finoñedicoco; iadedi Jusiñamui iena finuano, ie Jito Jesúna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi.

<sup>14</sup> Mareuidimiena jitaíñedomoi; iadedi come fatimiena cárcelmona jino bil-lana jitaídomoi. Barrabás raillamiena jitaídomoi.

<sup>15</sup> Jusiñamui díbeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco.

<sup>16</sup> Tisitaitimie jilluana jai ciodomoi. Naimiena uiñotomoi. Jesúna naimie ñnua jira, Jesús naimiena maritate. Naimiena raise jillotate. Iena jai ciodomoi.

17 'Caimaci, ero, omoi finoca rafuena abina uiñoñoeno finodomoí. Omoi illaicomini jiai daje isoi finodimaci.

18 Jaie Jusiñamuidi ie facaina llorainina jiairuido suille rafuena llotatate. Naimacina Cristo legi cacajana llotatate. Birui naie llogacino suide.

19 Omoi comeciái iuailái meido. Jusiñamui díbeimo omoi comeciaina meido. Iemei Jusiñamui omoi jeacinona dotaite. Iena jaca feitaite.

20 Omoi uri illa facaise illena, Jusiñamui omoi díga illena, iena fino. Jusiñamui Jesucristona omoi díne dane oretallena, iena fino. Naimiedi omoi Jilloitaraíma.

21 Jusiñamui facaina lloraini micoriai jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriai uaido buena llote.

22 Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetote. Nana naimie omoímo llwana cacarei.

23 Bie lloraimana bu cacarefiñenia, Jusiñamui naimiena duere finoite. Iemona faífite”.

24 Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci buena llotimaci.

25 Jusiñamuidi cai usumatiai micoriaímo rafuena llote; ia bie rafue birui omoímo jiai duide. Jusiñamui Abraham micorímo jaie llote: “Nana cominidi o uruiai muidona caimare itimaci”.

26 Ie rafue suiñollena, Jusiñamui ie Jitona omoi díne navui orede. Omoi caimare illena, nano omoi marañedicinona fañonocaitallena, omoi díne naimiena nano jai oretate.

## 4

### *Cristo oretagamaiai llaicomini motomo illa rafue*

1 Comini díga Pedro iaímaiai Juan díga ñaia facaise, Jusiñamui díga ñairainidi naie iaímaiai díne bitimaci. Jusiñamui jofona sedaraini illaíma díga, saduceuai railla comini díga jiai bitimaci.

2 Fiodaillamona Jesús jai jilluana llofuetiaímaiai. Cominina iaímaiai llofuia jira, naie iaímaiai díga iciritimaci.

3 Iaímaiaína gaitajanona, jai navuilla jira, cárcelmo jonetimaci, ie jítiramo naie rafuena siadollena.

4 Iese suide; ia Pedro llogacinona cacadinomona ailluena comini naiena innotimaci. Cinco mil dígamie creyentiaína jai itimaci.

5 Icoiti Jerusalémo nana judíuai illaicomini siadollena ofidimaci.

6 Anás jiai bite. Naimiedi Jusiñamui díga nanoca ñairaíma. Caifás bite. Juan bite. Alejandro jiai bite. Nana Jusiñamui díga nanoca ñairaíma cominidi ofidimaci.

7 Naimaci motomo Pedro iaímaiai Juan díga atianona, iaímaiaímo jicanotimaci:

—¿Bu uai díga buena finodomíco?

8 Jusiñamui Joreño nana Pedro comecímo namatajano, Pedro naimacímo llote:

—Illaicomini, bie rafuena omoímo lloiticue.

9 Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi.

10 Jesucristo uai díga jillode. Omoi buena uiñuana, ua nana judíuai comini buena uiñuana jitaidicue. Jesucristodi Nazaret imie. Naimiena jai coraídomoi; ia Jusiñamui naimiena jai jillotate. Ie jira omoi uicomo Jesús muidona tsitaitimie jai benoconi naidaillana cidomoi.

11 Omoï jofó finoraini isoidomoi. Omoï jítaiñede noficidi jiaie nofici baifemo jai jaide. Jesúdi naie nofici isoide. Naimie rafuena omoï jítaiñena jira, naimiena meinetomoi.

12 Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede –llote.

13 Jaciruiñeno marefodo llofuetiaimaia. Nainomo itino iena cacajano, comecina facadimaci: “Abina uiñoñediaimaia. Jamai bue isoidiaimaia”. Ie jira rajicaidimaci; iadedi Jesús llofueoicaigaiaimaiaina illana uiñotimaci.

14 Jilloitagamie iaimaia diga naidallana cioidimaci. Ie jira naimaci uai iñede.

15 Naie rafuena siadollena, naie illaicomini iaimaiaina bai oredimaci.

16 Coninimo jicanotimaci:

–¿Niese naie iaimaiaina nibaitica? Nana Jerusalémo itino iaimaia siño rafuena finuana jai fididimaci. Iena janonidica.

17 Jiaie comini iena fidi raillano, Jesús rafuena iaimaia llofuiana rairuitica.

18 Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci.

19 Pedro iaimaia Juan diga naimaci uai ote:

–Ie rafuena coco lollena Jusiñamui jitaide. Omoï uaina coco ñnoia, Jusiñamui jitailla rafuena finoñeticoco. Cocomo llono. ¿Bu uaina ñnoiticoco? ¿Jusiñamui? ¿Omoï? Cocomo iese llono.

20 Daimaia coco ciua rafuena lloticoco. Daimaia coco cacaja rafuena lloticoco –raite.

21 Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira.

22 Jai jillodimie mo cuarenta años baifemo ite. Siño uaido naimie jillua jira, comini iobidimaci.

### *Naimacina Jusiñamui canollena, naimiemo jüacino*

23 Iaimaia jino jailla mei, iaimaia nabaiñia dine jaidiaimaia. Illaicomini iaimaiaimo llua llotiaimaia.

24 Naimaci iena cacajano, Jusiñamuimo damie llua isoi jüdimaci:

–Ore Moo, mona finodio. Eniruena finodio. Monailaina finodio. Nana naiemo ite rana jia finodio.

25 Cai usuma David micorina raise uiñotica. Naimiedi ona sedadimie. Naimiena bie rafuena o Joreño jai llotatajamona, naimie llote:

¿Bue ñellena Jusiñamui diga judúaiñedino iciritimaci?

¿Bue ñellena Jusiñamuimo comini tainomo comeciaina facadimaci?

26 Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jia iñedimaci

llote.

27 Naie rafue birui bene suide. Bie nairaimo Herodedi, Poncio Pilato diga, judúaiñedino diga, judúai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci.

28 Naimaci ofillamona, nana o jítaille rafuedi, o jai lloga rafue diga, jai suide.

29 Nama naimaci jaciruitajacinona jai uiñotio. Cai comeciaina ocuiñota, o rafuena jacitaiñeno cai lollesa.

30 Duidinona jilloita. O mare Jito Jesús uaido caina siño rafuena finota – jüdimaci.

<sup>31</sup> Jusiñamuimo jiiacino fuilla meinoconi, naimaci ofiracodi jaidisite. Jusiñamui Joreño nagamiai comecimo namatade. Iemona Jusiñamui uai jacitaiñeno llocana jaidimaci.

### *Creyentiai damacina illa rafue*

<sup>32</sup> Nana creyentiai damacina itimaci. Naimacimo rarui ia, dajena naimacimo duide.

<sup>33</sup> Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

<sup>34</sup> Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona,

<sup>35</sup> Cristo oretaganomo fecadimaci. Ie mei dueredinomo imaci jitailla isoi fecauidimaci.

<sup>36</sup> Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie.

<sup>37</sup> Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

## 5

### *Ananías micori ie ai micori diga Jusiñamuina jifuia rafue*

<sup>1</sup> Naie facaise Ananías ie ai diga iaiaiaia eniruena jiai fecade. Ie ai mamecidi Safira.

<sup>2</sup> Naie iba naimiemo dabei fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona.

<sup>3</sup> Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreñomo taino llotio, dabei ucube omo fiebilla jira.

<sup>4</sup> Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiñeno facadio? Cominimo taino llotio. Jusiñamuimo tainona jiai llotio.

<sup>5</sup> Ananías bie uaina cacajano ieconi fodaillamona oni caide. Nana iena ciolino eo jacinaitimaci.

<sup>6</sup> Iemei nainomo ite conirueniai naimiena feridimaci. Jino uillano, raiafomo jonetimaci.

<sup>7</sup> Naie rafue daje amani horas illanona, naimie ai ie inimo suide rafuena uiñoñoeno bite.

<sup>8</sup> Pedro naiñaiño jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

<sup>9</sup> Pedro jicanote:

—¿Bue ñellena Jusiñamui Joreño jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

<sup>10</sup> Naimie ecimo ieconi naiñaiño fodaillamona, oni caide. Conirueniai fo billano, naiñaiño fodaillana ciolimaci. Jino uillano, ie ini abimo dafomo jonetimaci.

<sup>11</sup> Iena fidiamona, nana creyentiai eo jacinaitimaci. Nana bie rafuena fididinodi jiai eo jacinaitimaci.



*Cristo oretagano ailluena siño rafuena finodimaci*

<sup>12</sup> Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jof abí ibirimo ofisoidimaci.

<sup>13</sup> Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

<sup>14</sup> Jaciruitimaci; iadedi creyentiaina ailluena comini jaidimaci. Ailluena iñiaí, ailluena riñoniaí, diese creyentiaina jaidimaci.

<sup>15</sup> Imaci biramo duidinona jonecaida, naisomo atidimaci. Pedro nainomo macarillano, o llotia naimie joreño naimacimo ibaillamona, “Jillobiticaí” raillano, atidimaci.

<sup>16</sup> Jerusalémo ie fuemo ite nairaiaimona comini biadedi, duidinona jiaí atidimaci. Janaba anamo ite cominina jiaí atidimaci. Nana jillodimaci. Ie isoi Cristo oretagano siño rafuena finoudimaci.

*Cristo oretagano duere sefuilla rafue*

<sup>17</sup> Cristo oretagano finoca rafueri Jusiñamui diga nanoca ñairaíma eo uradoide. Nana naimie díbeimo itino jiaí eo uradoidimaci. Saduceuaí railla cominimo duidimaci.

<sup>18</sup> Eo uradoillamona, Cristo oretaganona gaitajano, cárcelmo jonetimaci.

<sup>19</sup> Naiona Jusiñamui jaienicidi cárcel nasena econote. Cristo oretagano jino atiano, naimacina raite:

<sup>20</sup> —Jusiñamui jofomo mai abido jai. Cominimo Jusiñamui dine naimaci ille rafuena lloño.

<sup>21</sup> Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaíma, ie comini diga billano, danomo ofillena illaicominina uaidote. Cárcelmo policiaíaina oretate, Cristo oretaganona atillena.

<sup>22</sup> Cárcelmo jaidemo, naimacina cioiñedimaci. Abido billanona, llotimaci:

<sup>23</sup> —Cárcel ie nase jaca ibaicana ciodicaí. Raise llaveca. Nase fuemo jaca soldaduaí itimaci; iadedi econoticaímo, jaca buna cioiñedicaí.

<sup>24</sup> Jusiñamui jofona nanoca sedaraíma, Jusiñamui diga ñairaíni diga, bie llua ana cacajano, uainicaidimaci. Comecina facadimaci: “¿Nie isoide rafue naimacimo jai suide?”

<sup>25</sup> Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

<sup>26</sup> Iena cacajano, Jusiñamui jofona nanoca sedaraíma ie policías diga jibuisaide. Cristo oretaganona atide. Fecuisse atide, comini dinena policiaíaina noficiaído fairinoi raillano.

<sup>27</sup> Naimacina atiano, illaicominini motomo jonetimaci. Iemei Jusiñamui diga nanoca ñairaíma naimacimo llote:

<sup>28</sup> —Omoímo Jesús rafuena llofuiana rairuidicaí; iadedi nana Jerusalén cominina jai llofuetomoi. Iese omoí llofuecabilia, “Cai illaicominini Jesúsna meinetimaci” llotomoi.

<sup>29</sup> Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoí llua baífemo Jusiñamuina ñnoiacadicaí.

<sup>30</sup> Cai usumatiaí micoriaí Jusiñamuina sedauidimaci. Naie Jusiñamuidi Jesúsna jai jillotate. Jesúsna meinellena, cruzmo coraidomoi; ia Jesúsna omoí meinia meí,

<sup>31</sup> Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judíuai comini comeciai iuai meidollena, naimaci jeacinuai dotallena, iese naimiena itatate.

<sup>32</sup> Bie rafuena llofuecabiticai. Jusiñamui Joreño uaido iena jiai llofueticai. Jusiñamuina inotino Jusiñamuidi ie Joreña jai fecade —raite.

<sup>33</sup> Iena cacajano, illaicomini eo iciritimaci. Cristo oretaganona meinea-cadimaci;

<sup>34</sup> ia ieconi illaicomini motomo damie naidaide. Naimie mameci Gamaliel. Moisés micori llogacina uiuicaide. Nana cominidi naimie uaina inotimaci. Cristo oretaganona dallu bai oni oretajanona, naimie llote:

<sup>35</sup> —Caimaci, omoi bie cominimo omoi finolle rafuemo comeciaina raise faca.

<sup>36</sup> Jai Teudas micori illaimana jaiacade. “Jai uaina baitimedicue” raillano, naimie dibeimo cuatrocientos iñiai jaidimaci. Iemei naimie fodaite. Naimie micori dibeimo itinodi oni tuusite. Jai naie rafuedi jaca ieconi duide.

<sup>37</sup> Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jai comini naimie dibeimo illena fuemo faite. Naimie jiai fodaite. Naimie micori dibeimo itino oni tuusite.

<sup>38</sup> Ie jira ja omoimo lloiticue: Bie cominina faionocai. Jamai cominimona naimaci llogacino iade, jamai cominimona naimaci finuacino iade, ieconi duide.

<sup>39</sup> Jusiñamuimona bie rafue ia, jaca niese nibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llua feiñuano,

<sup>40</sup> Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci;

<sup>41</sup> iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoña jira, jiai caimare itimaci.

<sup>42</sup> Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

## 6

### *Creyentiaina canollena, siete digamie diáconuaina illena, fetua rafue*

<sup>1</sup> Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoí nagarui rana feiñoña jira, jeare ñaitimaci.

<sup>2</sup> Ie jira naie doce oretaganodi creyentiaí danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai faionocaiadedi, marañede. Ra jamai cai fecaiadedi, jiai marañede.

<sup>3</sup> Ie jira, amatiaí, omoimona siete digamiena fetu. Inoganona fetu. Jusiñamui Joreño nana comecimo namatadinona fetu. Eo abi uinotinona fetu. Ie isoide iñiaina fetu. Bie ra fecarainina majjaitimaci.

<sup>4</sup> Ie mei cai abi juarenite, Jusiñamuimo cai jillena, Jusiñamui uaina cai llofuellena.

<sup>5</sup> Nana cominidi:

—Jee —raitimaci. Esteban micorina fetodimaci. Naimie Jusiñamuina eo inote. Jusiñamui Joreño nana naimie comecimo namatade. Jiai fetodimaci:

Felipe, Prócoro, Nicanor, Timón, Parmenas, Nicolás. Nicoládi Antioquía nairai imiē. Judíuai comini isoi naimiedi Jusiñamuina ñnote.

<sup>6</sup> Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

<sup>7</sup> Naie facaise Jusiñamui uaidi cominido uñnotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

### *Esteban micori ie rafue*

<sup>8</sup> Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide.

<sup>9</sup> Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci;

<sup>10</sup> iadedi naimaci uaitalle uaidi ñede. Naimacimo Esteban uai isoidiuidi ñede. Jusiñamuimona ie uaina ua jira, Esteban abina uñuano ñaite.

<sup>11</sup> Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

<sup>12</sup> Iese llumona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci.

<sup>13</sup> Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite.

<sup>14</sup> Naimiedi Jesús bie jofona judaillena llote. Moisés micori caimo llogafuiai fañonocaillena jiai llote. Iena cacadicaí.

<sup>15</sup> Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

## 7

### *Esteban micori abi rídua rafue*

<sup>1</sup> Jusiñamui diga nanoca ñairaima Esteban micorimo jicanote:

—¿Ua ie isoi naimaci llucino ite?

<sup>2</sup> Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiēna jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano

<sup>3</sup> llote: “O eniruemona mai jai. O cominimona mai jai. Omo cue acatalle eniruemo jaitio”.

<sup>4</sup> Ie jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate.

<sup>5</sup> Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham micori uruenide.

<sup>6</sup> Jusiñamui jiaí llote: “O uruiaí jiaíe comini eniruemo jaianitímaci. Egiptomo jaianitímaci. Naimacina duere finoitímaci. Cuatrocientos años llegí cacajitímaci.

<sup>7</sup> Naimacina maijitaite nairaina duere finoiticue. Ie mei o uruiaí naie eniruemona biitímaci. Bie illanomo cuemo iobillacinona fecajitímaci” llote.

<sup>8</sup> Ie cominina naimaci jaillena, Jusiñamui Abraham micorímo isaíai diese abina diana llote. Ie facaise Abraham micorí Isaac micorína comuitate. Ie jeiciamona ocho digarui illamona, Abraham micorí naimie micorína dete. Isaac micorí Jacob micorína comuitate. Jacob micorí doce uruiaína comuitate. Naimaci micoríaimona cai doce diga nairai comuidímaci.

<sup>9</sup> 'Caimaci, José micorína Jacob micorí uruiaí micoríai uradoillamona, Egipto cominimo naimiena fecadímaci;

<sup>10</sup> iadedi Jusiñamui naimiena eo sedade. Ie llegí ie cacajamona naimiena jillotate. Naimiemo uiñoracinona fecade. Ie jira Faraón micorí naimiena jiaí gaíde. Faraón micorídi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiaí sedatate.

<sup>11</sup> Naie facaiseconi nana Egipto comini aime guitímaci. Canaámo Jacob micorí illanona, nana nainomo itino diga aime jiaí guite. Eo duere sefuidímaci. Cai usumatíai micoríai naimaci illanomo guillena baiñedímaci.

<sup>12</sup> Egiptomo guille illana Jacob micorí fidiano, guille ollena, nano facaise ie uruiaí micorína nainomo oretate.

<sup>13</sup> Ie mei José ie amatíaina naimiena uiñotade. Faraón di José comini illana fidide.

<sup>14</sup> Ie jira José di ie moona uaidote. Nana ie cominina uaidote. Setenta y cinco digamie ite.

<sup>15</sup> Ie jira Egiptomo Jacob micorí jaide. Nainomo fiodaite. Ie uruiaí micoríai nainomo jiaí fiodaitímaci.

<sup>16</sup> Siquem railla nairai illanomo naimaci comini naimaci micoríaina uillano, nofici ie raiafomo jonetímaci. Siquemmo Abraham micorí naifona Emmor uruiaí micoríaimona jaie ibade.

<sup>17</sup> 'Caimaci, Jusiñamui Abraham micorímo lloga rafue suille iaírei illa facaiseconi, Egiptomo cai cominídi eo jebuidímaci. Abraham micorímo: “Egiptomona o uruiaí biitímaci” Jusiñamui jaie llote.

<sup>18</sup> Naie facaise jiaíe illaíma Egiptona sedade. José micorína uiñoñede.

<sup>19</sup> Ie jira cai cominina jifuiano maijitauide. Uruiaí fiodaillena, naimacina imaci uruiaína faínonocaitate.

<sup>20</sup> Ie facaiseconi Moisés micorí jeiciga. Jusiñamuimona naimie micorí eo ebire eruaíde. Ie moo jofomo daje amani fívuí ite.

<sup>21</sup> Ie mei naimiedi faínonocaiga. Faraón jisa micorídi naimie micorína uanona, naiñaiño jito isoi naimie micorína uiuicaide.

<sup>22</sup> Naimie micorí nana Egipto comini uiñuacinona fueote. Illaíma uai isoi naimie uaidi ite. Eo abina uiñotimie.

<sup>23</sup> 'Caimaci, naimie micorí cuarenta años illa facai, ie comini dine ie jaillemono ie comecina facade. Naimie cominídi cai judíuai comini.

<sup>24</sup> Egipto imiemona damie llegí cacajana ciuano, naimiena riidote. Riiduanona, Moisés micorídi Egipto imiena meinete.

<sup>25</sup> Moisés micorí comecina facade: “Cue muidona Egiptomona Jusiñamuídi cue cominina oretaitate”. “Cue comini buena uiñotímaci” raillanona comecina facade; ie iadedi iena uiñoñedímaci.

<sup>26</sup> Ie arediruido Moisés micorídi mena come iaímaiaí fuirillana ciode. Iaímaiaína marena itataiacade. Raite: “¿Bue ñellena o come diga fuiridomíco? ¿Bue ñellena o come diga fuiridomíco?”

<sup>27</sup> Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caimo ona llotatate juez isoi?”

<sup>28</sup> ¿Na are Egipto imie o meinia isoi cuena jiai meineiacadio?”

<sup>29</sup> Iena cacajano, come fajana naimie llinua jira, jacinaillanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

<sup>30</sup> 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede.

<sup>31</sup> Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote:

<sup>32</sup> “O usumatiai imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abi docaide. Jaciruillanona, erodañede.

<sup>33</sup> Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidaillanodi eo mareno.

<sup>34</sup> Egiptomo cue comini legi cacajana raise ciodicue. Naimaci duere sefullana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote;

<sup>35</sup> iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate.

<sup>36</sup> Egiptomona Moisés naimacina atide. Egiptomo nia ia, diga siño rafuena finode. Jiairede monaillai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

<sup>37</sup> 'Caimaci, Moisés micoridi cai judíuai cominimo llote: “Omoimona Jusiñamuidi damiena ie rafue lloraimana ico oretaite, naimie cuena oretaja isoi”.

<sup>38</sup> Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoriai diga naie jaienici facaina Moisés ñaite. Caimo fecallena, naimiedi cominina itatate uaina feiñote;

<sup>39</sup> iadedi cai usumatiai micoriai naimiena ñnoiacañedimaci. Naimiena jitaiñedimaci. Egiptomo abido jaillamo naimaci comeciiai facadimaci.

<sup>40</sup> Ie jira comini dinena Aarón micorimo llotimaci: “Egipto eniruemonona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide jiraraina fino, Egiptomo abido caina ifollena”.

<sup>41</sup> Iemo jurareta urue joreñona finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci.

<sup>42</sup> Ie jira Jusiñamui naimacimona oni jaillanona, naimacina fañonocaide. Iemona jitomana sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraíma ie rabenicomo buena jaie iese cueda: Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

<sup>43</sup> iadedi cuemo omoi comeciaina facañeno Moloc railla jiraraina sedadomoi. Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

cueda. Naie facaise cai usumatiai micoriai Jusiñamuina jitaiñedimaci.

<sup>44</sup> 'Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo



daje jofa aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga.

<sup>45</sup> Josué diga bie eniruemo naimaci billa facaise, cai usumatiai micoriai naicon aatidimaci. Bie enirue jiaie nairaiaimo jainaiade; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi.

<sup>46</sup> Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicante:

<sup>47</sup> ia Salomón micoridi jofona Jusiñamui iena finode;

<sup>48</sup> iadedi Jusiñamuidi ima finoca jofomo i-ine. Jusiñamui facaina lloraima micoridi Jusiñamuina iese cuete:

<sup>49-50</sup> Cai Nama raite: “Monamo cue illamona, nana comini cue anamo itimaci. Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitañedicue” raite.

<sup>51</sup> 'Ero, omoi comeciai jaiarede. Omoi comeci inoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiai micoriai isoi itomoi.

<sup>52</sup> Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatomoi. Naimiena jai meinetomoi. Jesúna ñaiticue.

<sup>53</sup> Jusiñamui jaieniciaimona Moisés micori llogacinona feiñotomoi; iadedi iena inoñedomoi.

### *Judíuai Esteban micorina meinia rafue*

<sup>54</sup> Esteban llofuiana naimaci cacajano, eo iciritimaci. Icirillamona, isiduai muru-muru raite.

<sup>55</sup> Jusiñamui Joreño nana Esteban micori comecimo namatajamona, monamo eruailano, naimiedi Jusiñamui ebirenana cide. Naimiedi Jusiñamui nabeimo Jesús naidailana cide.

<sup>56</sup> Raite:

—Mona ecuaillana ciodicue. Jusiñamui Jito Jusiñamui nabeimo naidailana ciodicue.

<sup>57</sup> Esteban lluaana cacajano, jefa oroisite. Eo cuiriillano, naimie dine aisicaidimaci.

<sup>58</sup> Jerusalémana naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside.

<sup>59</sup> Estebana nofici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

<sup>60</sup> Ieconicaiñici ifodo rainadacaida ado jide:

—Naimaci bie jeacino finua muidona, ibana oñeno.

Iese naimie jia mei, fiodaite.

## 8

### *Saulo creyentiaina duere finua rafue*

<sup>1-2</sup> Saulo dinena Esteban meiniana jia jitaide. Cristo rafuena eo inotinomona damerie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jainodi Samaria railla eniruemo jaidimaci; iadedi Cristo ortagano nine jaiñedimaci.



<sup>3</sup> Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

*Felipe Samariumo illa rafue*

<sup>4</sup> Tuficaida jaidino naga illanomo Jesús rafuena llocana uitimaci.

<sup>5</sup> Samariumo Felipedi daje nairaimo jaide. Nainomo Cristo rafuena llofueuide.

<sup>6</sup> Ailluena cominidi Felipe llofuiana eo raise feiñotimaci, naimie siño rafuena finua jira.

<sup>7</sup> Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena tisitaitinona jillotate. Ailluena ñujañujacaidinona jiai jillotate.

<sup>8</sup> Ie jira naie nairaimo ite comini eo iobidimaci.

<sup>9</sup> Naie nairaimo Simóna mameciredimie ite. Naimie siño rafuena finouide. Iemona Samaria cominina rajjicaitate. Naimie raite:

—Siñomiedicue.

<sup>10</sup> Nana comini naimiena inotimaci. Abina uiñoñedino inotimaci. Abina uiñotino jiai inotimaci. Raitimaci:

—Naimie uaidi Jusiñamui ie. Naimiedi siño jito —raitimaci.

<sup>11</sup> Iese naimacina are jifuate. Naimaci rajjicailla jira, naimaci naimiena cacadimaci.

<sup>12</sup> Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llote. Naimaci Felipe llofuiana inotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

<sup>13</sup> —Jiai inoticue —Simóndi raite. Naimie bautizaja mei, Felipe diga jaiocaide. Felipedi diga siño rafuena finua jira, Simón naiena ciuano, rajjicaide.

<sup>14</sup> Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaiaiaia Juan diga, batine oredimaci.

<sup>15</sup> Iaiaiaia rillano, naimaci Jusiñamui Joreña feiñollena Jusiñamuimo jiidiaiaiaia,

<sup>16</sup> naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci.

<sup>17</sup> Ieconia iaiaiaia onolli naimacimo joniano, Jusiñamui Joreña feiñotimaci.

<sup>18</sup> Naimaci Jusiñamui Joreño feiñuana Simóndi ciuano, ucubena iaiaiaiaimo fecaacade.

<sup>19</sup> Raite:

—Cuemo omico uaina ine, bumo cue onollina cue joniamona, naimie Jusiñamui Joreña feiñollena.

<sup>20</sup> Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena jamai fecade.

<sup>21</sup> Bie rafuedi omo duiñede. Jusiñamuimona o comeci nia maraiñede.

<sup>22</sup> O comeci iuai meido. Naimie o comecimo ite maraiñede facajacinuaina oni dotallena, cai Namamo jica.

<sup>23</sup> Omo ailluena maraiñedicino illana uiñoticue. O comeci eo uradoide. Maraiñedinona o comecimo namaredio.

<sup>24</sup> Simón uai ote:

—O llua cuemo suiñellena, o Nama diga cue facaina ñaino.

<sup>25</sup> Cristo rafuena iaiaiaia llua mei, Jerusalémo abido bitiaiaiaia. Abido billano, Samariumo diga comini illanuaimo Jesús ie mare rafuena llocana bitiaiaiaia.

*Etiopía imie creyentena jailla rafue*

<sup>26</sup> Naie facaise Jusiñamui jaienisaïmona damie Felipemo llote:

—Beicido joide naïdo mai jai. Jerusalémona Gazamo joide naisona jai —llote. Naie naiso jofue iñenanodo joide.

<sup>27</sup> Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade.

<sup>28</sup> Naimie jai abido jaillano, ie carretamo raïta, Isaías micori cuela rabenicono ado facade.

<sup>29</sup> Jusiñamui Joreño Felipemo llote:

—Naimie ðine iaïrei jai. Carreta ðine jai.

<sup>30</sup> Naimie ðine Felipedi aisicana jaillanona, rabe ado facajana cacade. Felipe ðinena naimiemo jïcanote:

—¿O facaca rabenicono uiñotio?

<sup>31</sup> Naimie uai ote:

—¿Ñiese uiñoiticue, bu cuena canoñenia?

Felipemo jïcanote, naimie diga a jaillano danomo raïllena.

<sup>32</sup> Naimie facaca cuela fue iese raite:

Toïca llauda fallena uilla isoi, naimiena uitimaci.

Toïca llauda itirai garedino ðine eeñena isoi, naimie ñaiñede.

Ie abina riidollena, uaina oñede.

<sup>33</sup> Maraiñede rafuena naimie finoñede; ia naimiena duere finodimaci.

Naimie uruiai iñededï, ¿bu naimie rafuena lloite?

Meinia meinoconi, naimie jai iñede.

<sup>34</sup> Etiopía imie Felipemo jïcanote:

—¿Bie lloraïma bu iena llote? ¿Dama naimie iena llote? ¿Jiaïmiena iena llote? Cuemo llono.

<sup>35</sup> Iemei Felipedi bie cuela fue amona naimiemo Jesús ie mare rafuena llote.

<sup>36</sup> Naisona jaidiaïmaïmo, jinui illanomo ridiaïmaïai. Etiopía imie ðinena raite:

—Ero, bie jinui itemo, ¿bue ñe cuedi bautizañellicue?

<sup>37</sup> Felipe uai ote:

—O comecïmona o ñnoïa, cuemono mare.

Naimie uai ote:

—Jesucristodi Jusiñamui Jitonana ñnoticue.

<sup>38</sup> Naimie ie carreta jorodate. Iemei jinui ðine jaidiaïmaïai. Felipedi naimiena bautizade.

<sup>39</sup> Jinuïmona iaïmaïai bia, Jusiñamui Joreño Felipena oni uite. Etiopía imie Felipena dane cioïñede; iadedi Etiopía imie iobicana jaide.

<sup>40</sup> Jusiñamui Joreño Azotomo Felipena uite. Cesarea ðine naimie jaillanona, naga nairaïmo Jesús ie mare rafuena llocana uite. Ie mei Cesareamo ride.

## 9

*Saulo creyentena jailla rafue*

(Hch 22.6-16; 26.12-18)

<sup>1</sup> Naie facaise Saulo cai Nama Cristona ñnotinona eo duere finoacade. Icirillamona, naimacina meineiade. Ie jira Jusiñamui diga nanoca ñairaïma ðine jaide.

<sup>2</sup> Judíuai comini naie ñairaïma anamo illamona, creyentiaïna duere finollena, Saulo cartana naimiemo jïcajaide. Damascómo ite judíuai ofiracuïmo dajerie cartana uiacade. Naie ofiracuï sedaraini naimie canollena jitaide. Jesucristona ñnotinona naimie baïa, naimacina gaitajano,

Jerusalémo atillena, naimiena canollena, cartana jitaide. Hiñiai baia, riñoniai baia, naimacina Jerusalémo atiacade.

<sup>3</sup> Cartana ua mei, naimie jaillano, Damascomo iaire ia, ieconi monamona damie naimie abina quetiñote.

<sup>4</sup> Eniruemo naimie ana uaillano, monamona damie naimiemo llwana cacade:

—Saulo, Saulo, ¿bue ñellena cuena duere finodio?

<sup>5</sup> Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, ricaiillamona raise maiga jurareta suiñoacana isoi. Ie isoidio. Ricaiillamona, cuena duere finoacadio.

<sup>6</sup> Naidacai. Damascomo mai jai. Nainomo o finolle rafue omo lloiticue.

<sup>7</sup> Saulo diga jaidinodi ñaiñeno naidaidimaci. Naie uaina cacadimaci; iadedi buna cioiñedimaci.

<sup>8</sup> Ieconi Saulo naidacaide. Ie uisi ecoricaiillamona, erodatemo, jai buena cioiñede. Ie onollina llinocaida, naimiena Damascomo uitimaci.

<sup>9</sup> Darui amani cioiñede. Jusiñamui comequina facajamona, guiñede. Jiai jiroñede.

<sup>10</sup> Damascomo Ananiana mameciredimie ite. Naimiedi creyente. Inienamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

<sup>11</sup> Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicomo Tarso ie Saulona jicano. Naimie cuemo jai jide.

<sup>12</sup> Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

<sup>13</sup> Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona inotonomo finode.

<sup>14</sup> Jusiñamui diga nanoca ñairaima uai naimiemo ite, nana bene ite creyentiana gaitallena.

<sup>15</sup> Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena.

<sup>16</sup> Cuena naimie jai inua muidona, naimie nie isoi legi cacajite. Naimiemo iena lloiticue.

<sup>17</sup> Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o começimo namatallena.

<sup>18</sup> Ieconi Saulo uisimona lliciai ico isoide ra uaide. Dane ciuana, naidaide. Ie mei jai bautizaga.

<sup>19</sup> Ie mei jai guite. Dane maide. Diga irui Damascomo ite creyentiai diga naimie ite.

### *Damascomo Saulo illa rafue*

<sup>20</sup> Judíuai ofiracomo naimie jaillanona, Jesús ie rafuena llofuede. “Jesúdi Jusiñamui Jito” raillanona llofuede.

<sup>21</sup> Nana naimiena cacadinodi raijicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús dibeimo jai ite.

<sup>22</sup> Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofua jira, judíuai dinena iena uaitanidimaci.

<sup>23</sup> Digarui illa mei, judíuai comeciaina facadimaci, naimiena meinellena.

<sup>24</sup> Naimie aisi raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano,

<sup>25</sup> naiona creyentiai naimiena oni uitimaci. Naimie jillobillena, llaigafu jinofebeimo cirigaimo rainajanona, naimiena ana ñuitadimaci.

### *Jerusalémo Saulo illa rafue*

<sup>26</sup> Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñnoñedimaci.

<sup>27</sup> Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo llua jiai llote. Damascomo naimie ia, Jesúsna jacitaiñeno llofuiana jiai llote.

<sup>28</sup> Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide.

<sup>29</sup> Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci.

<sup>30</sup> Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

<sup>31</sup> Judeamo, Galileamo, Samariamo nana creyentiai uri itimaci. Cai Namana ñnocana jaidimaci. Cai Namana jaciruiocaída jaidimaci. Jusiñamui Joreño naimaci comeciaina eo ocuiñotade. Ailluena comini creyentiaina jaidimaci.

### *Eneas jillua rafue*

<sup>32</sup> Naie facaise diga illanuaimo Pedro macarite. Lidamo ite creyentiai dine ride.

<sup>33</sup> Nainomo damie bairamo baidena cide. Naimiedi Eneas. Ocho años tsitaillamona bide.

<sup>34</sup> Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O baira ferí. —Iecon naimiedi naidadate.

<sup>35</sup> Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

### *Fiodaillamona Dorcas jillua rafue*

<sup>36</sup> Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide.

<sup>37</sup> Naie facaise naiñaiño duicotaide. Ie mei fiodaite. Naimaci einamací finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñoona jonetimaci.

<sup>38</sup> Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaina llotatimaci:

—Buena sedaño cai dine raire bi.

<sup>39</sup> Ie jira Pedro naidacaida, naie iaimaiai diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga iniroina naimiemo acatatimaci.

<sup>40</sup> Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raíta, Jusiñamuimo jüide. Abido dobaicaida, naiñaiño erodate. Raite:

—Tabita, mai rainaicaí.

Ieconí naiñaiño uisi oni erodate. Pedrona ciuano, a rainadate.

<sup>41</sup> Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí diga, uaidote, naiñaiño jai cajenana naimaci cioillena.

<sup>42</sup> Nana Jopemo ite comini naie rafuena fididimaci. Ie jira ailluena comini caí Namana innotimaci.

<sup>43</sup> Jopemo Pedro diga irui Simón jofomo ite. Simóndi ocaina igoina cuidoraíma.

## 10

### *Cornelio comeci iuai meidua rafue*

<sup>1</sup> Cornelio raillamiedi Cesareamo ite. Naimiedi capitán. Italiamona bite soldaduai naimie anamo itimaci.

<sup>2</sup> Naimiedi Jusiñamui llogacinodo jaide. Nana ie comini diga Jusiñamuina innote. Judíuai cominimo ailluena rana jamai fecauide. Jusiñamuimo jüuide.

<sup>3</sup> Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienici di uaidote:

—Cornelio.

<sup>4</sup> Naimiena Cornelio jaciruoicaida eruaide. Jicanote:

—Nama, ¿buena jitaídió?

Naimie uai ote:

—Jusiñamui o jüacinuaina jai cacade. Jusiñamuidi duerede cominina o canuana jiaí feitañede.

<sup>5</sup> Mai, Jopemo damerie o mullaiaímona oreta, Simón raillamiena atillena. Naimie jiaie mamecidi Pedro.

<sup>6</sup> Naimiedi igoi cuidoraíma jofomo ite. Naie cuidoraíma mamecidi Simón. Monaillai fuemo naimie jofo ite.

<sup>7</sup> Jusiñamui jaienici jailla mei, Cornelioidi ie mullaiaímona mena uaidote. Naimie anamo ite soldaduaímona damie jiaí uaidote. Naie soldadodi Jusiñamuina jiaí innote.

<sup>8</sup> Nana naimiemo Jusiñamui jaienici lluana naimacimo llua mei, Jopemo oretate.

<sup>9</sup> Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jüillena.

<sup>10</sup> Naimie aimetaite. Guiacade. Guillena comini finodemo, naimiemo nicairilla isoi ite.

<sup>11</sup> Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite.

<sup>12</sup> Naiemo jiaíforie eruaide ocainaiaí ite. Diga eniruemo jorode ranai ite. Diga nuicinai jiaí ite. Nana Moisés micori fimaidoga rille radi ite.

<sup>13</sup> Naimiedi monamona damie lluana cacade:

—Pedro, naidacaida, fajano, biena rino.

<sup>14</sup> Pedro uai ote:

—Nama, dama ite. Moisés micori fimaidoga rille rana jaca riñedicue.

<sup>15</sup> Monamona damie lluana dane cacade:

—Jusiñamui jai fimaidoñede. Ie jira iese lloñeno.

<sup>16</sup> Dacaiño amani iese suide. Ie mei naie radi monamo abido jaide.

<sup>17</sup> Pedro ie comecina facade: “¿Niese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride.

<sup>18</sup> Simón Pedrona naie jofomo illana jicanotimaci.

19 Pedro ie nicañrillana isoidemo comecina facajano, Jusiñamui Joreño naimiemo llote:

—Ero, daje amani ñima ona jenode.

20 Naidacaida, ana jai. Naimaci diga buena sedaño mai jai. O ñine naimacina oredicue.

21 Pedroñi comini ñine ana jaide. Raite:

—Omoñ jenocamedicue. ¿Bue ñiañbitomoi billa?

22 Uai otimaci:

—Cornelio raillamie anamo iticai. Cornelio mo Jusiñamui jaiñicai birui llote: “Pedro ñine damieriena oreta, naimiena o jofomo atillena. Jusiñamui rafuena raise cacaillena, naimiena atí” llote. Cornelioñi capitán. Naimiedi mareuidimie. Jusiñamuina ñnotimie. Nana judíuai comini ñinena naimiedi mareuidimie.

23 Iena Pedro cacajano, naimie jofomo ñillena naimacina fo uaidote. Ie are naimaci diga jaide. Damierie Jopemo ite creyentiañ naimie diga jiañ jaidimaci.

24 Ie are Cesaremo ridimaci. Cornelio naimaci billemo ocuride. Nana ie cominina jai uaidote. Ie nabaiñiañ jiañ jai uaidote.

25 Pedro fo jaia, Cornelio ñinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena.

26 Pedroñi naimiena a naidanete. Raite:

—Mai a naidada. Cue jiañ jamai ñimadicue.

27 Naimie diga ñaño fo jaidiañmaiañ. Ailluena comini ofillana cide.

28 Naimacimo llote:

—Moisés micorñi judío imie judíuñedimie nabairillana rairuide. Iena uiñotomoi. Judíuñedimie jofomo illana jiañ rairuide. Ie areruido Jusiñamui nicañrilla isoidifuenta cuemo acatate. Iemona jai fueoticue. Jiañ nairañ diga cue nabairillena, Jusiñamuimona marenana jai uiñoticue. Jusiñamui omoña cue jearuillana jai jitañede.

29 Ie jira buena sedaño biticue, cuena o uaidua jira. ¿Bue ñellena cuena uaidotomoi? Cuemo llono.

30 Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconñi Jusiñamui jaiñicai cuemo bairedede. Naimie ñiroñi quenirede.

31 Cuena raite: “Jusiñamui o jñana cacade. Naimiedi dueredede cominina o canuana feitañede.

32 Ie jira Jopemo damieriena oreta, Simón Pedrona uaidollena. Jiañ Simón jofomo ite. Simónñi igoñi cuidorañma. Ie jofo monaillai fuemo ite”.

33 Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiañ ite. Cai Nama nana omo lluana cacareillena, bene iticai.

### *Cornelio mo Pedro llua rafue*

34 Pedro uai ote:

—Jusiñamui nana comini naimie ñnuana jitaillana jai uiñoticue.

35 Naga nairañmona Jusiñamuidi cominina jai jitaide. Bu naimiena ñnoia, bu mare rafuedo jaia, Jusiñamui naimiena jai jitaide.

36 Cai judíuai cominimo Jesucristo lluamona, Jusiñamui ñibeimo cai illena jai uiñoticañ. Iemona Jusiñamui diga cai uri illana jai jiañ uiñoticañ. Jesúñi nana cai Nama. Bie rafuena navui janore fididomoi.

37 Nana Judeamo bie rafue llocana jai jaide. Juan micorñi bautizajana llua mei, Galileamo Jesús naimie llofuiana tañede.

38 Jusiñamuidi ie Joreñoña Jesúmo fecade. Jesúñi Nazaret imie. Naimiemo ie uaina jiañ fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate.



<sup>39</sup> Judíuái eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci;

<sup>40</sup> iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciotimaci. Cajedimiena ciotimaci. Jiaí ciodicai.

<sup>41</sup> Nana comini naimiena cioñedimaci; iadedi Jusiñamui fetocano diese naimiena ciotimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uñua jira, Jusiñamui caina fetode, naie rafuena llollena.

<sup>42</sup> Cominimo bie rafuena lluaana caimo llote. Jusiñamui Jesúna jai fetode, naimiena ñnoñedinona duere finollena. Nia fiodañedinona duere finoite. Jai fiodaitinona jiaí duere finoite. Ie jira Jesús rafuena llocana jaidicai.

<sup>43</sup> Jesús muidona naga naimiena ñnotimie ie marañedicinodi Jusiñamui dotalle. Iena nana Jusiñamui facaina lloraini micoriai jaie llotimaci.

### *Judíuáiñedino Jusiñamui Joreño feñua rafue*

<sup>44</sup> Pedro biena nia llofueia, Jusiñamui Joreño nana bie rafuena cacadinomo bite.

<sup>45</sup> Iena ciuanona, Pedro diga bite creyentiaí rajjicaidimaci. Naimacidi judíuái comini. Judíuáiñede cominimo Jusiñamui ie Joreño jai fecaja jira, rajjicaidimaci.

<sup>46</sup> Jusiñamui Joreño naimacimo illamona, judíuáiñedinodi jiaie nairai uailaido ñaitimaci. Naie ñaia uailaina uiñoñedimaci. Jusiñamuimo iobil-lacinona jai fecadimaci. Pedro diga bitino iena cacajano, rajjicaidimaci. Iemei Pedro raite:

<sup>47</sup> —Cai feñua isoi, Jusiñamui Joreño jiaí feñotomoi. Omoi bautizallena jaca budi rairuiñeite.

<sup>48</sup> Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

## 11

### *Jerusalémo Pedroí naimiemo jai suide rafuena llote*

<sup>1</sup> Judeamo ite Cristo oretagano, jiaie creyentiaí diga, judíuáiñede comini Jusiñamui uaina feñuana fididimaci.

<sup>2</sup> Pedro Jerusalémo abido ria, judíuái comini naimiena icidimaci.

<sup>3</sup> Jicanotimaci:

—¿Bue ñellena judíuáiñedino jofomo jaidio? ¿Bue ñellena naimaci diga guitio?

<sup>4</sup> Pedro uai uanona, naimacimo naie rafuena nagacinuaina llote:

<sup>5</sup> —Jopemo navui cue ia, Jusiñamuimo cue jiaí, nicaírilla isoi iticue. Aillue sábana isoi ana billana cioticue. Monamona ana lloride, ie muiduai maiga diga. Cuemo ana ride.

<sup>6</sup> Nainomo eruaidicuemo, diga rana cioticue: ocainaiaina, eniruemo jorocana jaidinona, nuicinaiaina. Iena cioticue.

<sup>7</sup> Monamona damie cuemo lluaana cacadicue. Raite: “Pedro, naidacail-lanona, fajanona, rino”.

<sup>8</sup> Naie uai oticue: “Nama, dama ite. Moisés micori fimaidoga rille rana jaca riñedicue”.

<sup>9</sup> Monamona dane cuemo llote: “Jusiñamui iena jai fimaidoñede. Ie jira iese lloño”.

<sup>10</sup> Dacaiño amani iese suide. Ie mei monamo nana abido dane jaide.

<sup>11</sup> Ieconí daje amani ñima cai illa jofomo ridimaci. Cesaremona cue ñine damie naimacina orede.

<sup>12</sup> Jusiñamui Joreñodi naimaci diga buena sedañoeno cue jaillena cuemo llote. Cue diga seis creyentiai jiai jaidimaci. Cuen a uaidotimie jofomo jaidicai.

<sup>13</sup> Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienici naimiemo llote: “Jopemo cominina oreta, Simón Pedrona atillena.

<sup>14</sup> O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote.

<sup>15</sup> Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite.

<sup>16</sup> Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreña birui feiñoitomoi”.

<sup>17</sup> Cai Nama Jesucristona cai inuamona, Jusiñamuidi ie Joreña caimo navui fecade. Naimacimo daje isoi birui fecademo, ¿niese Jusiñamui dibeimo iñeiticue?

<sup>18</sup> Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuaiñede comini comeciai iuai meid-uana jai jitaide. Naimie dibeimo naimaci illana jai jitaide. Ie jira naimieri iobidicai.

### *Antioquíamo ite creyentiai illa rafue*

<sup>19</sup> Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci;

<sup>20</sup> iadedi tuficaidinomona jiaño Chipremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci.

<sup>21</sup> Cristo uai naimacimo illamona, ailluena comini inotimaci. Cai Nama dibeimo jaidimaci.

<sup>22</sup> Jerusalémo ite creyentiai iena fidiano, Antioquíamo Bernabéna oretatimaci.

<sup>23</sup> Naimie ria, naimaci marena illamona, naimiedi Jusiñamui naimacina dueruillana uñote. Ie jira iobide. Imaci comeciai ocuiñocana inocana jaillana naimacimo llote.

<sup>24</sup> Naimiedi maremie Jusiñamui Joreño nana naimie comecimo namatadimie. Jusiñamuina eo inotimie. Naie facaise ailluena comini creyentiaina jaidimaci.

<sup>25</sup> Ie mei Tarsomo Bernabé Saulona jenuaide. Naimiena baillanona, Antioquíamo naimiena uite.

<sup>26</sup> Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

<sup>27</sup> Iemei Jerusalémona Antioquíamo damierie Jusiñamui rafuena lloraini bitimaci.

<sup>28</sup> Naimacimona Agabo raillamie ite. Jusiñamui Joreñodi naimiena llotatate: —Nana comini ico aime guitimaci. —Claudio illaimana illa facaiseconi iese jai suide.

<sup>29</sup> Ie jira Antioquíamo ite creyentiaidi, Judeamo ite creyentiaimo, ucubena oretaiacadimaci.

<sup>30</sup> Nagamiai imacimo illa dierise ucubena oredimaci. Creyentiaina llofueraimo Bernabé diga, iaimaiai Saulo diga, naie ucubena oredimaci.

## 12

### *Herodes Agripadi creyentiaina duere finua rafue*

<sup>1</sup> Naie facaise Herodes railla illaimadi creyentiaimona damieriena gaitatate, naimacina duere finollena.

<sup>2</sup> Lloebi diga Jacobo cimaiona jaitatate. Jacobodi Juan ama.

<sup>3</sup> Ieri judíuai illaicomini iobidimaci. Iena uiñuamona, Herodes Pedrona jiai gaitatate.

<sup>4</sup> Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaína orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacaide.

<sup>5</sup> Ie jira Pedro cárcelmo fiebide; iadedi creyentiai naimie facaina eo jiidimaci.

<sup>6</sup> Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci.

<sup>7</sup> Ieconí cai Nama ie jaienici di cárcelmo bairede. Cárcelmo lligaiñote. Naimiena casitallena, jaienici Pedro ciragina jetade. Raite:

—Raie naidacai.

Ie mei naimie onollimo ite lloedí oni uaide.

<sup>8</sup> Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

<sup>9</sup> Naie jaienici jinafona Pedro jino jaide. Pedrodi naie jaienici naimiemo finoca rafuena uiñoñede.

—Nicaírilla isoi comecina facadicue —raite.

<sup>10</sup> Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaiai. Daje calle jaillanona, jaienici naimiena faínonocaide.

<sup>11</sup> Iemona Pedro naimiemo suide rafuena jai uiñoacaide. Raite:

—Cue Nama ie jaienicina uanai oretate. Herodemonona cuena jillobitade. Judíuai illaicomini cue meinellena cue sedajamona cuena jillobitade.

<sup>12</sup> Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci.

<sup>13</sup> Rillanona calle fuemo ite nasena tute. Daje mullaño bite. Naiñaño mamecidi Rode.

<sup>14</sup> Naimie uaiduamona, naiñaño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote.

<sup>15</sup> Raitimaci:

—Odi uairico isoidiosa.

Naiñañodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

<sup>16</sup> Pedro nasena nia tua jira, nasena econuaibitimaci. Econuamona naimiena naimaci cuamona, rajicaidimaci.

<sup>17</sup> Fo jaillano, Pedro ie onolli jaidide, naimaci llicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiamo iena jiai llono.

Ie mei Pedro jino jaillano, jainomo jaide.

<sup>18</sup> Monaidemo, Pedro nainomo iñena jira, soldaduai rajicaillanona, siadotimaci.

19 Herodes iena fidiano, naimiena jenotate. Naimiena baiñena, soldaduaimo jıcanote. Baiñena jira, naimacına meinellena llote. Iemei Judea-mona Cesareamo Herodedi jaide.

### *Herodes micori fiodailla rafue*

20 Naie facaise Herodedi Tiro railla nairai dıga, Sidón railla nairai dıga, eo icırıte. Naimaci uri ille rafuena siadollena, naimie dıne bitımacı. Herodes ecımo maijıdımıedi Blasto. Blasto dıga naie comınıdı nabairite, naimaci dıbeımo naimie illena. Herodes enıruemona naimaci guille billa jira, uri illena naimıemo jıcanote.

21 Naie comınına Herodes feıñollena, ie ebırede inıroına jıtade. Naimacına feıñollena, ie rairabıcımo raıde. Iemona raıta, rafuena are llote.

22 Iena cacajano, comını ado cuiriidımaci:

—Jamai imadı ñaiñena. ¡Jusiñamui ñaıa!

23 “Jusiñamuiñedıcue” naimie raiñena jira, ieconi cai Nama jaienici naimiena iracotaitate. Jusiñamuımo iobıllacıno naimie fecañena jira, aıai naimiena aıte. Iemona naimıedi fiodaıte.

24 Naie facaiseconi Jusiñamui uai llocana jaide. Aılluena comını iena inotımacı.

25 Iaımaıai uıga ucube illanona, Bernabé, Saulo dıga, Jerusalémona Antioquíamo abıdo bitııaımaıai. Juan Marcos jıai atıdııaımaıai.

## 13

### *Bernabéna, iaımaıai Saulo dıga, fetua rafue*

1 Antioquíamo creyentıai motomo Jusiñamui facaina lloraıni itımacı. Llofueraıni jıai itımacı: Bernabé, Simón. Simóndı jıaıe mamecı Negro. Lucio ite. Naimıedi Cirene imıe. Manaén ite. Naimıedi Herodes ie amana mamede. Herodedi Galilea railla enıruıe gobernador. Saulo jıai ite.

2 Naimaci Jusiñamuına sedajamona, guiñenaruıllai ia, Jusiñamui Joreño naimacımo llote:

—Bernabé iaımaıai Saulo dıga fetu, cuejena. Cue rafuena iaımaıai llollena, iaımaıaina jai fetodıcue.

3 Jusiñamuımo naimaci jııa meı, Jusiñamui iaımaıaina fetuana naimaci uıñuamona, naimaci onollı iaımaıaımo jonıa meı, iaımaıaina naimacımona onı oretatımacı.

### *Pablo, iaımaıai Bernabé dıga, Chipremo illa rafue*

4 Iaımaıaina Jusiñamui Joreño oretaja jira, Seleucıamo jaidııaımaıai. Nainomona botedo Chipremo jaidııaımaıai. Chipredı uıası.

5 Chipremo rıa, Salaminamo judıuaı ofıracuımo Jusiñamui uaina llofuetııaımaıai. Juan Marcos iaımaıai dıga jıai jaide.

6 Nana naie uıasımo jaıllanona, Pafos railla nairımo rıdımacı. Nainomo Barjesúna mamecıredımıena baitımacı. Naimie judıo imıe. Naimıedi aıma. Naimıedi dıga sıño rafuena fınorıma. “Jusiñamui rafuena llotıcue” raıte; iadedı taıno lloraıma.

7 Gobernador dıga maijıuide. Gobernadorı Sergio Paulo. Gobernadorı abına uıñotımıe. Jusiñamui uaina cacaacana jira, naimie Bernabé iaımaıai Saulo dıga uaidote.

8 Barjesús ie jıaıe mamecıdı Elimas. Naie iaımaıai llofuıana uaitate. Gobernador inuana jıtaiñede.

9 Saulodı jıaıe mamecı Pablo. Pablo dınena naimiena eo eruıaıllano, Jusiñamui Joreño nana Pablo comecımo namatajamona,

10 naimıemo llote:

—¡Eo jifueraimadio! ¡Eo marañedio! ¡Taife dibeimo itio! Nana mare rafue dibeimo iñedio. Cai Nama ie mare uanaicinona dobairaidodio.

<sup>11</sup> Cai Nama ie uaido ona ja iracotaitaiticue. Nano nigarui useredinona cioiñeitio.

Ieconí naimie cioiñede. Comínina jenuaide, ie onollido llinocaida ie uillena.

<sup>12</sup> Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaita.

### *Jesús rafuena llocana jaidiaimaia*

<sup>13</sup> Pafomona botedo Pablo ie nabaiñiaí diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaina fainonocaida, Jerusalémo abido jaide.

<sup>14</sup> Pergemona Antioquíamo jaidiaimaiaí. Pisidia railla eniruemo Antioquía ite. Sábadoruimo judíuai ofiracomo jaillano, ana raidiaimaiaí.

<sup>15</sup> Moisés micorí cuegafuena facaja mei, Jusiñamui facaina llorainí micoríai cuegafuena facaja mei, judíuai ofiraco sedadino iaimaiaimo llotimaci:

—Caimaci, comínimo fue omico lloiacania, mai llono.

<sup>16</sup> Pablo nidadajano, ie onollina jaidide, comíní llicaillena. Raite:

—Jusiñamuina sedallena bene itomoi. Omoimona damerie judíuidomoi. Jiaíno judíuaiñedomoi; iadedi judíuai isoi Jusiñamuina sedadomoi. Cue lluomo mai cacarei.

<sup>17</sup> Iemona omoi fueollena, cai jaiagai rafuena lloiticue. Cai judíuai comíní Jusiñamuina birui sedadicaí. Naimiedi cai jaiagaina jaie fetode. Egiptomona naimaci ia, naimacina eo jebuitate. Nainomona ie siño uai diga naimacina atide.

<sup>18</sup> Jofue iñenanomo cuarenta años naimacina canode.

<sup>19</sup> Canaán eniruemo siete nairaina cuenode. Cai jaiagaimo, naimaci uruiaí diga, naie eniruena fecade, naimaci iena.

<sup>20</sup> Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micorí illa facaise juecesna jai jitañedimaci. Samuel micorídi Jusiñamui facaina lloraíma.

<sup>21</sup> Illaímana naimaci jitailla jira, Jusiñamui Saúl micorína fetode. Naimiedi Cis micorí jito. Naimie micorí nairaidi Benjamín. Cuarenta años Saúl micorí cai usumatiaí micoríaina sedade.

<sup>22</sup> Naimie ifo meidollena, naimaci illaímana illena, Jusiñamui David micorína fetode. Naimiedi Isaí micorí jito. Jusiñamui naimie micorína llote: “Bimie eo cue comecido jaidimie. Nana cue jitaille rafuena finoite”.

<sup>23</sup> Jusiñamui llua isoi, David micorí uruiaimona Jesúsdi cai judíuai comíní Jilloitaraimana jaide.

<sup>24</sup> Jesús nia llofueñenia, Juan Bautista micorí llofueuide. Juan micorí cai comínimo llouide: “Omoi jeacinona fainonocaida, Jusiñamui dibeimo omoi comeciaí iuailaí meido. Iena omoi meidoia, comíní iena uiñotallena, mai omoi bautizallomoi”.

<sup>25</sup> Juan micorí ie llofuia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoiñedicue. Jamai fue isoidicue. Jamai fue cue isoilla jira, naimiena cue canuana uiñoñedicue”.

<sup>26</sup> Caimaci, cai eirue jito Abraham micorimona comuidicaí. Jusiñamuina birui sedadicaí. Ie jira cai jeacinomona naimie jilloitalle rafue caimo duide. Jesúsna ñaiticue.

<sup>27</sup> Jerusalémo itinodi, cai illaicomíní diga, Jesúsna jaie meinetimaci. Naga sábado Jusiñamui facaina llorainí micoríai cuegafuiaína facadimaci; iadedi



iena raise cacaiñedimaci. Jesúna naimaci meiniamona, Jusiñamui lloraini micoriai ciegafuiaina jai suitatimaci.

<sup>28</sup> Jesús maraiñede rafuena finoñede; iadedi naimiena meinetimaci. Pilatomo jicanotimaci, naimiena meinellena.

<sup>29</sup> Nana Jusiñamui facaina lloraini micoriai ciegafuiaina suilla mei, cruzmona naimie ana uano, nofici ie raiafomo naimiena jonetimaci;

<sup>30</sup> iadedi fiodaillamona Jusiñamui naimiena jillotate.

<sup>31</sup> Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci.

<sup>32</sup> Jusiñamui cai jaiagaimo jaie lloga rafue jai suide. Iena omoimo ja lloiticoco.

<sup>33</sup> Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona jilloitaraimana itataticue’ ”.

<sup>34</sup> Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacinona omoi facaina jaca finojiticue”.

<sup>35</sup> David micori jiaie salmomo iena cuete: “O mareuidimie jaca rifaillana jitañedio” raite.

<sup>36</sup> Jusiñamui David micorina ñaiñede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide;

<sup>37</sup> iadedi Jusiñamui Jito abidi ie isoi rifaiñede.

<sup>38</sup> ‘Caïmaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi maraiñedicinomona omoina jillotañede;

<sup>39</sup> iadedi Jesúna birui omoi ñnoia, omoi jeacino anamona jilloitomo.

<sup>40</sup> Abina omoi rairui, Jusiñamui facaina lloraini micoriai jaie ciegafuiai omoimo sui raillano. Jaie cuetimaci:

<sup>41</sup> Ero, Jusiñamui uaina jamaidomoi. Ieri rajicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúna birui omoi mai ñno.

<sup>42</sup> Ie mei Pablo llicaiide. Iaimaiaï jino jaidemo, comini iaïmaiaïmo jicanotimaci, jiaie sábadoruimo bie rafuena naimacimo dane llollena.

<sup>43</sup> Comini jino jailla mei, ailluena comini Pablo, iaïmaiaï Bernabé diga, ñaicana jaidimaci. Judíuai iese jaidimaci. Judíuaiñedino iese jiai jaidimaci. Naie judíuaiñedinodi judíuai isoi Jusiñamuina ñnotimaci. Pablo, iaïmaiaï Bernabé diga, ñaicana jaillanona, naimacimo llotiaïmaiaï:

—Jusiñamui omoina duenailana omoi jai uñua jira, Jesús rafuena mai omoi ñno.

<sup>44</sup> Jiaie sábadoruimo ailluena comini ofidimaci, Jusiñamui uaina cacareillena.

<sup>45</sup> Ailluena cominina ciuano, judíuai comini dinena eo uradoidimaci. Pablo joreñona ñaitimaci. Naimie llofuiacinuaina uaitatimaci;

<sup>46</sup> iadedi Pablo, iaïmaiaï Bernabé diga, jacitaiñeno llofuetiaïmaiaï:

—Omoimo Jusiñamui uaina nano lloiacadicoco. Iena jitañedomoi. Jusiñamui diga omoi jaca illena jitañedomoi. Ie jira judíuaiñedino dine jaiticoco.

<sup>47</sup> Iese Jusiñamui jaie llote:

Judíuaiñedinomo ona oretaiticue, naimacimo cue rafue llollena,

naga eniruemo ite cominimo jeacinomona jilluana llollena.

<sup>48</sup> Iena cacajano, judíuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci.



<sup>49</sup> Nana bie eniruemo cai Nama Jesús uaina llocana jaide;

<sup>50</sup> iadedi judúuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci;

<sup>51</sup> iadedi jioracuai iaimaiai eillimona jaidinotiaimaiai, naimacimo ite jeacinuaina naimaci uiñollena. Ie mei Iconio railla nairaimo jaidiaimaiai;

<sup>52</sup> iadedi Antioquíamo ite creyentiai eo iocire itimaci. Jusiñamui Joreño nana naimaci comecimo namatade.

## 14

### *Iconiomo Pablo, iaimaiai Bernabé diga, illa rafue*

<sup>1</sup> Iconiomo judúuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judúuai cominimona ailluena innotimaci. Judúuaiñede cominimona ailluena jiai innotimaci;

<sup>2</sup> iadedi inoñede judúuaidi judúuaiñedinona fuemo faitimaci. Naimacimo creyentiaina tainona llotimaci;

<sup>3</sup> iadedi nainomo are fiebidiaimaiai. Cai Nama facaisena jaitaiñeno llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci;

<sup>4</sup> iadedi nana comini naiena inoñedimaci. Comeciaina daje isoi lloisñede. Damerie judúuai facaisena itimaci. Damerie naie iaimaiai facaisena itimaci.

<sup>5</sup> Judúuaiñedinodi, judúuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigiacadimaci.

<sup>6</sup> Iena fidiano, Licaoniamos ite nairaimo aisicano jaidiaimaiai. Listra railla nairaimo jaidiaimaiai. Derbe railla nairaimo jiai jaidiaimaiai. Naie nairaiceimo ite eniruemo jiai jaidiaimaiai.

<sup>7</sup> Nainomo Jesús ie mare rafuena llofuetiaimaiai.

### *Listramo iaimaiaimo suilla rafue*

<sup>8</sup> Listramo damie taitaite. Nanomona naimie iese jeicia jira, jaca macariñede.

<sup>9</sup> Pablo llofuiana naimie raise cacajamona, “Jusiñamui cuena jillotarede” raillanona, taitaitimie innote. Pablo dinena naimiemo eruaillano, naimie inuana uiñote.

<sup>10</sup> Naimiemo ado llote:

—A naidada.

Iemei daiacaida naimie macarite.

<sup>11</sup> Ailluena comini Pablo finoca rafuena cioidimaci. Naimaci uaido ado cuiridimaci;

—Iñiaiai isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci.

<sup>12</sup> Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira.

<sup>13</sup> Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci.

<sup>14</sup> Iaimaiai iena cuanona, “Comini marañede rafuena finoacade” raillano, iaimaiai iniroina cuaranotiaimaiai. Comini motomo aisicana jaidiaimaiai. Ado llotiaimaiai;

<sup>15</sup>—Nabaiñiaí, ¿bue ñellena cocomo iese finodomoí? Jamai imadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiaí finode. Nana nainomo ite rana jiaí finode.

<sup>16</sup>Jaie Jusiñamuidi nana omoí judíuaiñedino omoí jitailla rafuena finuana rairuiñede;

<sup>17</sup>iadedi naimie finoca rafuemona naimiena uiñoredomoí. Omoí facaina mare rafue naimie finocabide. Noci deitate. Omoí riara sicotate. Omoímo guille itatate. Iemona omoí comeciaina caimare itatate. Iemona Jusiñamuina uiñoredomoí.

<sup>18</sup>Iese Pablo llete; iadedi iaímaiaímo juraretaíaina fecajana jaca faínonocaiacaiñedimaci.

<sup>19</sup>Nano nigarui illamona, Pisidiamo ite Antioquíamona judíuai comini bitimaci. Iconiomona jiaí bitimaci. Judíuai dinena fuemo faíamona, naimaci díbeimo comini jaidimaci. Iemona nofícido Pablona faírigite. Naie nairaimona naimiena sonocana uitimaci, fiódaitimiena naimie eruaiílla jira.

<sup>20</sup>Naimiena iese faínonocaiílla mei, creyentiaí naimie ecímo billamona, naimie a naidadate. Nai nairaimo abído jaide. Ie are Derbemo, Bernabé díga, jaide.

<sup>21</sup>Naie nairaimo Jesús ie mare rafuena llotiaímaiaí. Díga comini creyentiaína jaidimaci. Ie mei Listramo abído jaidiaímaiaí. Iconiomo abído jiaí jaidiaímaiaí. Pisidiamo ite Antioquíamo jiaí abído jaidiaímaiaí.

<sup>22</sup>Creyentiaí comeciaina ocuiñotadiaímaiaí. Cristona nia ínuana llotiaímaiaí. Raitiaímaiaí:

—Jusiñamui díne cai nia riñenia, eo duere sefuiticaí.

<sup>23</sup>Naga creyentiaí illanomo creyentiaína sedaraínina fetodiaímaiaí. Guiñeno Jusiñamuimo jiaí mei, guiñena facaise mei, naimiena naimaci jai ínuana jira, cai Nama illa anamo naimacina faínonocaidiaímaiaí.

### *Siriamu ite Antioquíamo abído jaidiaímaiaí*

<sup>24</sup>Pisidiamo jaillanona, Panfiliamo ridiaímaiaí.

<sup>25</sup>Pergemo Cristo uaina llua mei, Ataliamo jaidiaímaiaí.

<sup>26</sup>Nainomona botedo Siriamo ite Antioquíamo abído ridiaímaiaí. Nano naie iaímaiaí illanomo abído ridiaímaiaí. Nainomona iaímaiaí navui nia jaiñenia, creyentiaí dinena Jusiñamui iaímaiaína duenaillana uiñuamona, iaímaiaína oredimaci. Jusiñamui rafuena iaímaiaí lloíllena, iaímaiaína oredimaci. Naie maijiaí fuílla jira, jai abído bitiaímaiaí.

<sup>27</sup>Iaímaiaí rilla mei, creyentiaína ofitatiaímaiaí. Nana Jusiñamui iaímaiaímo finoca rafuena llotiaímaiaí.

—Jusiñamuidi judíuaiñedino naimiena ínuana jai jitaide —lloíllena.

<sup>28</sup>Dinomo creyentiaí díga are itiaímaiaí.

## 15

### *Jerusalémo Moisés micorí llogacínona siadua rafue*

<sup>1</sup>Antioquíamo Jerusalémona janore comini billano, creyentiaína iese llofuetimaci:

—Moisés micorí caímo llua isoi, omoí abína omoí detatañenia, jeacínomona jillobiñeitomoí.

<sup>2</sup>Ie jira creyentiaí uri iñedimaci. Pablo, iaímaiaí Bernabé díga, Jerusalémona bitino llofuiana eo uaitatiaímaiaí. Ie muidona creyentiaí dinena iaímaiaína, jiaíe creyentiaí díga, Jerusalémo jaillena fetodimaci.

Cristo oretagano diga, Jerusalémo ite creyentiaina sedaraini diga, bie rafuena siadoiacasite.

<sup>3</sup> Creyentiaí naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiaí jaidimaci. Creyentiaí illanuaimo llofuecana jaidimaci. Judúuaiñedino creyentiaina jai jaillana naimacimo jiaí llotimaci. Ie jira naie creyentiaí caimare itimaci.

<sup>4</sup> Jerusalémo ria, creyentiaídi naimacina feiñotimaci. Cristo oretagano itimaci. Creyentiaina sedaraini jiaí itimaci. Naimacimo nana Jusiñamui iaímaiaimo finoca rafuena llotiaímaiaí. Cristo rafuena iaímaiaí llofuiamona, judúuaiñedino Cristona ñnuana llotiaímaiaí.

<sup>5</sup> Iena cacajano, fariseuai díbeimo ite creyentiaímona jiaíno naidaita raitimaci:

—Moisés micorí llogacinuaina ñnuamona, judúuaiñede creyentiaí abina diana jitaídicaí.

<sup>6</sup> Bie rafuena siadollena, Cristo oretaganodí, creyentiaí sedaraini diga, danomo ofidimaci.

<sup>7</sup> Iena are siadua mei, Pedro naidacaillano, raite:

—Amatiaí, judúuaiñedinodí cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona ñnotimaci.

<sup>8</sup> Nana comini comeciaina naimie uiñuamona, judúuaiñedino naimiena ñnuana Jusiñamuidí uiñote. Caimo fecaja isoi, ie Joreño naimacimo fecaja jira, Jusiñamuidí judúuaiñedinona jitaillana jai uiñoticaí.

<sup>9</sup> Jusiñamuidí naimacina cai isoi jai feiñote. Naimiena naimaci ñnua jira, naimie naimaci comeciámona jeacinona jai dotade.

<sup>10</sup> ¿Bue ñellena Jusiñamuina ñnoiacaiñedomoi? Jusiñamui jitaillacino omoi finoacaiñena jira, naimie omoína duere finuana jitaídomoi. Cai jaiagai Moisés micorí llogacinodo jaidimaci; iadedí iena raise ñnoñedimaci. Nana ie llogacinona jaca finonidimaci. Iedo jaie jiaí jaidicaí; iadedí iena jiaí finonidicaí. ¿Bue ñellena iedo birui cai jaillana jitaídomoi?

<sup>11</sup> Jesucristo caína duenailla jira, cai jeacinomona jilloiticaí. Judúuaiñedino cai isoi jilloitimaci.

<sup>12</sup> Iena cacajano, nana ofidino uai llicaidimaci. Iemei Bernabé lluana cacadimaci. Pablo lluana jiaí cacadimaci.

—Jusiñamui judúuaiñedino motomo cocona siño rafuena finotate — llotiaímaiaí.

<sup>13</sup> Iaímaiaí ñaia mei, Jacobo raite:

<sup>14</sup> —Amatiaí, cuemo cacarei. Judúuaiñedinomo Jesús rafue Simón Pedro nano llua rafuena jai cacadicaí. Creyentiaina naimaci jaillena, Jusiñamui naimacina jai fetode.

<sup>15</sup> Jusiñamui facaina lloraini micoriaí iena jaie cuetimaci:

<sup>16-18</sup> Jusiñamui jaie llote: “David micorí illaíma isoi illaímana illena, cue Jitona íco oretaitícue.

David jícorí jito illaímana birui íñede; iadedí David micorí ífomo illaímana cue Jito íite.

Iemona judúuaiñedino cuena ñnoítimaci.

Naimaci cue comínina jaillena jiaí jitaídícue.

Iena cue llua jira, iena finoítícue” llote.

<sup>19</sup> Ie muidona cue comeci raite: Judúuaiñedinomona creyentiaina jaidinona duere finoñeíticaí.

<sup>20</sup> Naimacimo rabena oreta, dama buena lollena: “Jiraraimo fecaca llicisina riñeno. O aiñede riño diga íñeno. O íniñede íima diga íñeno. Llerínoga rana riñeno. Diruena jiaí riñeno”.

21 Jaiemona naga sábedo naga judúuai ofiracomo judúuaidi Moisés micori ciegafuiai mona naie isoide lletarafuena cacadimaci. Ie jira naie isoide rafuedo nia jaiticai: iadedi jiaie Moisés micori lletarafuedo jaiñeiticai.

22 Ie mei Cristo oretaganodi, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiai comeciaina facajano: “Jee” raitimaci. Pablo, iaimaiai Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiaimaiai.

23 Rabena cuetimaci, iaimaiai diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoidi cai amatiai. Omoimo jai cueticai. Judúuaiñedi omoi; iadedi cai amatiaidomoi.

24 Cai motomona jiaie comini naimaci llofuiado omoina uri itatañenana fididicai. Omoi jeacinomona omoi jilloillena, Moisés micori llogacinodo omoi jaillana jitaidimaci. Ie jirari omoi comeciari rucaicuerite. Naimacina oretañedicai.

25 Danomo cai ofilla mei, menamiena fetodicai, omoimo oretallena, Bernabé, iaimaiai Pablo diga. Bernabéna isiruiticai. Pablona jiai isiruiticai.

26 Iaimaiai cai Nama Jesucristo muidona navui niadedi fioidiaimaiai.

27 Ie jira Judas, iaimaiai Silas diga, oretaiticai. Omoimo bie rabe cuia isoi lloitiaimaiai.

28 Jusiñamui Joreño caimo illamona, bie rafuena omoimo lloiticai. Ailluena rafue omoi finuana lloñeiticai. Dani bie rafuena finojitomoi.

29 Jiraraimo fecaca rana riñeno. Diruena riñeno. Llerinoga rana riñeno. O añede riño diga iñeno. O iniñede iima diga iñeno. Iese omoi iñenia, marena iitomoi. Macaibaite” cuetimaci.

30 Ie mei Antioquíamo jaidimaci. Ailluena cominina ofitaja mei, naimacimo cartana fecadimaci.

31 Iena facajano, naie llucacimori iobidimaci.

32 Judas Jusiñamui facaina lloraima. Silas daje isoide. Diga rafuena creyentiaimo llofuetiaimaiai. Naimaci comeciaina jiai ocuiñotadiiaimaiai.

33 Diga irui nainomo illa mei, iaimaiaina oretatinomo creyentiai iaimaiaina marena abido oretatimaci.

34 Nainomo Silas comecina facajano, fiebide. Ie jira Judas dama abido jaide.

35 Antioquíamo Pablo, iaimaiai Bernabé diga, cai Nama Jesús rafuena llofuellena fiebidiaimaiai. Diga comini jiai iese llofuetimaci.

*Pablo jiaie eniruemo ite creyentiai dine dane jailla rafue*

36 Diga irui illa mei, Pablo Bernabémo llote: p –Naga navui coco llua nairaimo creyentiai dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

37 Bernabédi, naie iaimaiai diga, Juan Marcos uiacade.

38 Panfiliamo iaimaiaina navui Juan faionocaide. Iaimaiai diga llofuellena jaiñena jira, Pablo naimiena dane uicaiñede.

39 Riire ñaitiaimaiai. Comecina daje isoi lloñediiaimaiai. Ie jira dajena jaiñediiaimaiai. Bernabé Juan Marcona uillanona, Chipremo aillue botedo jaidiaimaiai.

40 Ie mei Pablo Silana uite. “Jusiñamui omicono canoite” creyentiai dinena raillanona, iaimaiaina oredimaci.

41 Siria railla eniruemo Jesús rafuena llocana jaidiaimaiai. Cilicia railla eniruemo jiai llocana jaidiaimaiai. Creyentiai comeciaina ocuiñotacana jaidiaimaiai.

## 16

### *Timoteo iaímaiaí díga jailla rafue*

<sup>1</sup> Nano Derbemo Pablo, iaímaiaí Silas díga, ridíiaímaiaí. Iemona Listramo ridíiaímaiaí. Nainomo Timoteo railla creyente ite. Naimie eidi judía íñaiño. Jíai creyente. Ie moo micorídi griego imie.

<sup>2</sup> Listramo ite creyentiaí, Iconiomo ite creyentiaí díga, naimiena: “Mare” raitimaci.

<sup>3</sup> Pablodí Timoteona uiacade, naimie díga jaillena. Timoteo moo micorí griego imiena jira, naimie abina nia detatañede; iadedí nainomo ite judíuai illa jira, Moisés micorí llua isoi, Pablo Timoteo ie abina dete. Judíuñedimie naimaci motomo ia, naimaci motomo inide.

<sup>4</sup> Naga nairaímo naimaci jaillanona, Jerusalémo siadogacínona creyentiaímo llote. Jerusalémo Cristo oretagano, creyentiaína sedaraini díga, navui naicínona siadotimaci. Creyentiaí naie lluaña ñnollena, iena llocana jaidimaci.

<sup>5</sup> Ie jira creyentiaí ñnocana jaidimaci. Nagarui ailluena comíni creyentiaína jaidimaci.

### *Pablo ñicairilla ra isoidena ciua rafue*

<sup>6</sup> Jusiñamui Joreño Asia railla eníruemo ie uaina naimaci llofuiana rairuilla jira, Frigia railla eníruemo macaricana jaidimaci. Iemona Galaciamo jaidimaci.

<sup>7</sup> Misiamo naimaci rillano, Bitiniamo jaiacade; iadedí Jesús Joreño dane imaci jaillana rairuide.

<sup>8</sup> Ie jira Misiamona ecido jaillano, Troas railla nairaímo jaidimaci.

<sup>9</sup> Nainomo naie naína Pablo ñicairilla ra isoidena ciode. Daje Macedonia imiedi uicomo naidaita naimiemo jica-jicanode. Raite: “Macedoniamos ruica o bi. Caina canuaíbi”.

<sup>10</sup> Naiena Pablo ciua mei, naie facaisemona Pablo díga jaidicue. Lucadicue. Ie jira bie rafuena raise uíñotícue, iena omo cuellena. Macedoniamos ruica dine cai jaille botena jenodicai. Comecina facadicaí: “Jusiñamuidi caina uaidote, nainomo ie mare rafuena cai llollena”.

### *Filipomo illa rafue*

<sup>11</sup> Ie jira Troamona Samotraciamo monaillaido atona ie mamedo jaidicai. Ie ícoitidíruido Neápolis railla nairaímo ridicai.

<sup>12</sup> Dinomona Filipomo duide naisodo jaidicai. Macedoniamos ite. Naie eníruue facaise ie nanoca nairaí Filipos. Naie nairaídi Romamona bitino nairaí. Díga irui nainomo iticai.

<sup>13</sup> Sábadoruido naie nairaímona nasedo jino jaidicai. Comecina facajamona: “Dinomos ñibai comíni oficabidimaci, Jusiñamuimo jíillena”, ille fuemo jaidicai. Nainomo dañaiñorie riñoniaí billanona, dinomos ana raidicai, naiñaiñuaimo Cristo rafuena llollena.

<sup>14</sup> Naimacimona dañaiño cai llofuiana eo cacade. Naiñaiño mamecídí Lidia. Tiatira railla nairaí íñaiño. Naiñaiñodí jiduirede ñniruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluaña feíñotade. Naie facaise creyentena jaide.

<sup>15</sup> Naiñaiño ie jofomo itino díga bautizaja mei, caimo llote:

—Cuedí cai Namana cue jai ñnuana omoí uíñuamona, cue jofomo mai bi, nainomo omoí fiebillesa. —Duere caina uai-uaidode.

<sup>16</sup> Jusiñamuimo jíranomos jíairuido jaidicaimo, daje jitaíñomomos dafafidicai. Naiñaiñodí jiaínomona íbacañaiño. Janaba anamos naiñaiño jiaí ite. Iemona



naiñaiño jairuido suille rafuena llouide. Naie rafuena llwana ibatajano, naiñaiño namaiaidi ailluena ucubena feiñouidimaci.

<sup>17</sup> Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

<sup>18</sup> Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

<sup>19</sup> Naiñaiño llumona ucubena jai oñenana naiñaiño namaiai jai uiñua jira, Pablo, iaimaiai Silas diga, gañadimaci. Iaimaiaina plazamo illacomini illanomo sonocana uitimaci.

<sup>20</sup> Dinomo iaimaiaina illacomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañediaimaiai. Iaimaiai judúuai comini.

<sup>21</sup> Romanuai cominina cai illa jira, iaimaiai llogacinuaina cai ñnoia, iedo cai jaia, marañede.

<sup>22</sup> Iena cacajano, nana comini naie iaimaiaina fanaisitimaci. Illacominidi naie iaimaiai iniroina cuaranuanona duiñode. Rasi diga, iaimaiaina diga icaiño fatatatimaci.

<sup>23</sup> Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena llotimaci.

<sup>24</sup> Iese llua jira, iaimaiaina llaveracomo fo iaimaiaina uite. Donoramo iaimaiai eilliai ñuitajano, raise donode.

<sup>25</sup> Naiona daferui facai Pablo, iaimaiai Silas diga, Jusiñamuimo ifuerillacinona ro-rodiaimaiai. Jiai jiddiaimaiai. Jiaie llavecano naiena cacadimaci.

<sup>26</sup> Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaiño nana llavecano imaci donua radi oni ecoride.

<sup>27</sup> Cárcelna sedaraima casidemo, cárcel ie nasiai ecocorinaillana cide. “Llavecano jai aisidimaci” raillamo naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade;

<sup>28</sup> Iadedi Pablodi eo riire cuirioidi:

—¡O abina dama meineño! Bene nana iticaisa.

<sup>29</sup> Lamparina atillena cárcelna sedaraima jicajanona, jarire fo jaide, Pablo iaimaiai Silas dine. Jacinaillano, naimie abidi docaillamona, iaimaiai uicomo caiñici ifodo ana rainadate.

<sup>30</sup> Iaimaiaina jino ua mei, nai iaimaiaimo jicanote:

—¿Buena finojiticue, cue jeacinomona cue jilloillena?

<sup>31</sup> Uai otiaimaiai:

—Coco Nama Jesúsna ñno. Iese na o jofomo ite comini diga o jilloillesa.

<sup>32</sup> Iemei naimiena Jesús ie rafuena llofuetiaimaiai, nana ie jofomo itino diga.

<sup>33</sup> Naie facaise iaimaiai bofellaña jocode. Iemei naimiedi, nana ie comini diga, bautizaga.

<sup>34</sup> Guillena, ie jofomo naie iaimaiaina uite. Jusiñamuina jai ñnua jira, na ie comini diga, naimie caimare ite.

<sup>35</sup> Ie oni monaidemo, illacominidi dajerie policiana cárcelmo oretatimaci, nai iaimaiaina jino orellena.

<sup>36</sup> Cárcel sedaraimadi naie rafuena Pablomo llote. Raite:

—Omico jaillena, illacominidi omicono oredimaci. Mai marena jai.

<sup>37</sup> Iadedi policiamo Pablodi llote:



—Cocodi romanuai cominidicoco; iadedi cocomo ite rafuena raise uiñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

<sup>38</sup> Illaicominimo policías naiena lluaibitemo, illaicominidi naiena cacajanona, eo jacinaiete, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci.

<sup>39</sup> Ie jira naie iaimaiai dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaiai jaillena oredimaci.

<sup>40</sup> Cárcelmona jino billano, Lidia jofomo fo jaidiaimaiai. Creyentiaina ciuano, naimaci comeciaina ocuiñotallena, naimacina dane llofuetiaimaiai. Ie mei oni jaidiaimaiai.

## 17

### *Pablo, iaimaiai Silas diga, Tesalónicamo illa rafue*

<sup>1</sup> Anfípolis railla nairaimo macaritiaimaiai. Apolonia railla nairaimo macaritiaimaiai. Ie mei Tesalónica railla nairaimo ridiaimaiai. Dinomo judíuai ofiracodi ite.

<sup>2</sup> Pablo fibilla isoi, nainomo fo jaide. Daje amani sábadoruimo Jusiñamuina cuegafuiaimona naimacina llofuate.

<sup>3</sup> Iese naimacina llofuate:

—Cristo llegi cacaiete. Fiodaillamona naimie jilloite. Naimiedi Jesús.

<sup>4</sup> Naiena cacadinomona ailluena ñnotimaci. Pablo, Silas iaimaiai dibeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci;

<sup>5</sup> iadedi judíuaidi uradoillano, jamai itinomona eo marañede ññaiaina uaiduanona, ailluena cominina ofitatimaci. Ie jira naie nairai uri ñnedimaci. Iaimaiaina comini uicomo uillena, Jasón jofomo binaisite.

<sup>6</sup> Iaimaiaina baiñenano, Jesóna, jiaie creyentiai diga, illaicomini illanomo aiñoicaida uitimaci. Cuirisite:

—Naga nairaimo cominina uri itatañediaimaiai. Benomo jai bitiaimaiai. Jai benomo billanona, Jasón ie jofomo iaimaiaina feiñote.

<sup>7</sup> Cai nanoca illaia ie llogacinona jai ñnoñedimaci. Ie anamo jai iacaiñedimaci. Raitimaci: “Jiaie illaia anamo iticai. Jesús raillamie anamo iticai”.

<sup>8</sup> Judíuai iese lluamona, cominidi uri ñnedimaci. Illaicominidi jiai uri ñnedimaci.

<sup>9</sup> “Naie iaimaiai dane biñeitiaimaiai” illaicominimo creyentiai raillano, illaicominidi Jasón jiaie creyentiai diga, jino oretatimaci.

### *Bereamo Pablo, iaimaiai Silas diga, illa rafue*

<sup>10</sup> Naie naio creyentiaidi Pablona, iaimaiai Silas diga, Bereamo raire oretatimaci. Dinomo rillano, judíuai ofiracomo jaidiaimaiai.

<sup>11</sup> Nainomo ite judíuai eo mare. Tesalónicamo ite judíuai isoñnedimaci. Bereamo itinodi Cristo rafuena iocire feiñotimaci. Niedi uanaicinoni railanona, nagarui Jusiñamuina cuegafuiaina facadimaci.

<sup>12</sup> Ie jira naimacimona ailluena ñnotimaci. Judíuaiñedinomona ailluena nanocañaiñuaidi ñnotimaci. Ailluena ññaia jiai ñnotimaci;

<sup>13</sup> iadedi Bereamo Pablo Jusiñamui ie uaina jai lluana Tesalónicamo ite judíuaidi fidiano, dinomo jaidimaci. Cominina fuemo faillena, jaidimaci.

<sup>14</sup> Naie facaise creyentiaidi Pablona oni oretatimaci. Monailai fuemo duide naisona oretatimaci. Silas, iaimaiai Timoteo diga, fiebidiaimaiai.

15 Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaímaiaí Timoteo diga, raire cue dine billesa” llono.

*Atenamo Pablo illa rafue*

16 Atenamo iaímaiaí rillena Pablo sedademo, naie nairaimo ailluena jiraraína ciode. Iena ciuanona, Pablo comecidi jeareficaide.

17 Naiena ciua mei, judíuaí ofiracomo judíuaí diga coniniri Jusiñamui rafuena siadote. Jusiñamuina jai ñnote judíuaíñedino diga coniniri iena jiaí siadote. Plazamo nagarui jamai itino diga coniniri iena jiaí siadote.

18 Jamai comecina facadinomona damierie naimie diga jiaí ñaitimaci. Epicúreo railla rafuedo jaisoidimaci. Estoico railla rafuedo jiaí jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaíno raite:

—Jiaíe nairai jusiñamuillaicaímo lloiacade isoide.

Jesús fiodaillamona jilluana Pablodí llouilla jira, iese raitimaci.

19 Ie jira naimiena naimaci siadouillanomo uitimaci. Naie illano Areópagona mameciredé. Jicanotimaci:

—¿Ñie isoide o comocinuai? Caimo llono, caí uiñollena.

20 Eo feiredicinuaina cacadicaí. ¿Buena nai llofuiacínodí llote? Iena uiñoiacadicaí.

21 Nana Atenamo ite cominí, jiaíe illanomona bitino diga, jamai aillí como imaci fidia rafuena ñai-ñaidimaci. Jamai aillí fidia rafuena caca-cacadimaci. Jiaíe rafuena finoñedimaci.

22 Jicanua mei, Areópago railla illanomo Pablo naidacaida llote:

—Atenas imaci, omoímo rafuena lloiacadicue. Omoí jusiñamuillaína eo sedacabidomoi.

23 Cue macarillamona, omoí jusiñamuillaína sedaja jiraraína ciodicue. Daje jirarai abímo iese cuega: “Uiñoñega Jusiñamuina sedadicaí” cuega. Uiñoñeno naimiena sedadomoi. Ja omoímo naimiena lloiticue.

24 Jusiñamui biniena jaie finode. Ie emodoconi Jusiñamuidí nana biníemo itinona jiaí finode. Naimiedi mona ie Nama. Enírue ie Nama. Ie jira íima finoca jofomo naimie íñede.

25 Naga jitaille rana naimíemo illa jira, naimiena canonidicaí. Naimie nana cominina comuitate. Jiaí nagarui jafaicí caí uadí caimo iga. Uanai nana rana caimo iga.

26 Damíedemona nana cominina jebuitate, nana eníruemo naimaci illena. Naimaci illa dínori naimie jonega. Naimaci illanomo naimie jiaí jonega.

27 Iese jonega, naimaci naimiena jenollena. Jenuano, níbaí naimiena baitimaci. Caimona naimie are íñede.

28 Naimie jaca illa jira, caí jiaí iticaí. Jiaí cajedicaí. Ie isoi omoí rafue llorainí jiaí llotimaci: “Naimie ie uruaídicaí”.

29 ‘Naimie caína comuitaja jira, Jusiñamuidí jirarai isoíñedena uiñoticaí. Jusiñamuidí oromona finoca ra isoíñede. Platamona finoca ra isoíñede. Noficimona finoca ra isoíñede. Íima ie onollí diga finoca ra isoíñede.

30 Cominidí abí uiñoñeno jeacino jaie finouidimaci. Jusiñamui naimacina nia janafeñede; iadedí jai birui Jusiñamuidí nana cominina naga illanomo naimaci comeciaí iuai meidollena jitaide.

31 Naimaci comeciaí iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúna naimie jai jilloitaja jira, iena uiñoticaí.

<sup>32</sup> Fiodaillamona Jesús jilluana cacajano, damierie jaisitimaci. Iecon jia nodi raite:

—Jia ruid o llua dane cacajiticaí.

<sup>33</sup> Iemei naimaci motomona Pablo jino jaide.

<sup>34</sup> Naie cominimona damierie naimie dibeimo jaidimaci. Inotimaci. Naimacimona damie Areópago como siadoudimie. Ie mamecidi Dionisio. Jiañaiño inote. Naiñaiño mamecidi Dámaris. Daje facaiseconi jiaie cominidi inotimaci.

## 18

### *Corintomo Pablo illa rafue*

<sup>1</sup> Atenamona Corinto railla nairaimo Pablodi jaide.

<sup>2</sup> Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaiaí. Romamona Claudio nana judíuai cominina jai oretate. Ie jirari bitiaimaiaí. Roma ie nanoca illaimadi Claudio.

<sup>3</sup> Pablo iaimaiaí daje isoi maijia jira, Pablo iaimaiaí jofomo fiebide. Iaimaiaí conima diga maijide. Chivos itiraiaí ie nilla iniroina tforisoidimaci, naiemona jofona finollena.

<sup>4</sup> Naga sábadoruimo judíuai ofiracomo llofuate, judíuaina inotallena, judíuaiñedinona iena jiaí inotallena.

<sup>5</sup> Macedoniamona Silas, iaimaiaí Timoteo diga, bitemo, Pablodi nagarui Jusiñamui uaina llofueuide. Judíuaimo: “Jesúdi cai Jilloitaraíma” llouide;

<sup>6</sup> ia naimie uaina inosiñedimaci. Jiaí naimie jinafomo jeare ñaitimaci. Naimaci comeciaí jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judíuaiñedino dine jaiticue, naimacina cue llofuellena.

<sup>7</sup> Iese raillano, oni jaide. Justo jofomo jaide. Naimiedi Jusiñamuina inouidimie. Ie jofo judíuai ofiraco ecimo ite.

<sup>8</sup> Crispodi, nana ie jofomo itino diga, cai Nama Cristona inote. Naimiedi judíuai ofiraco ie sedaraíma. Ailluena Corintomo ite cominí creyentiaina jaidimaci. Ie mei naimacidi bautizaga.

<sup>9</sup> Daje naiona Pablo nicaírilla isoidemona, Pablomo cai Nama Jesucristodi llote:

—Mai jaciruiño. Faicaiño cue rafuena llocana jai.

<sup>10</sup> O diga iiticue. Budi ona maraiño finoñeite. Bie nairaimo ailluena cominidi cue dibeimo jaitimaci.

<sup>11</sup> Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

<sup>12</sup> Corinto railla nairaidi Acaya railla eniruemo jainaiaide. Naie facaise Acaya ie gobernadori Galión. Naie facaiseconi damierie judíuai cominí Pablona faiacadimaci. Galión dine naimiena uitimaci.

<sup>13</sup> Raitimaci:

—Cai illaíma llogacino isoi bimiedi cominina Jusiñamuina sedallena llofuene.

<sup>14</sup> Pablo uai oiacademo, judíuaimo Galióndi llote:

—Judíuai, cacarei. Naimie maraiñede rafuena finodena, naimie omoína jifuetena, omoi llua mo nia cacarefidicue;

<sup>15</sup> iadedi jamai naimie uallaí cuemo llotomoi. Omoi usumatiaí micoriaí mameciaí cuemo jiaí llotomoi. Omoi einamací llogacinuaina cuemo jiaí llotomoi. Iena omoi coniniri siadotomoi. Bie isoide rafuena siadoiacaiñedicue.

<sup>16</sup> Iemona naimiedi nainomona naimacina oni orede.

<sup>17</sup> Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibañede.

### *Antioquíamo Pablo abido jailla rafue*

<sup>18</sup> Naifue suilla mei, nainomo Pablo are fiebide. Ie mei creyentiaina facaduano, Priscila iaiaiaia Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate.

<sup>19</sup> Efesomo rillanona, iaiaiaiaina fañonocaide. Judíuai comini Jusiñamui rafuena siadollena, Pablodi judíuai ofiracomo fo jaide.

<sup>20</sup> Are naimaci motomo fiebillena naimiemo jicantimaci; iadedi Pablo dinena uai ote:

—Fiebiñeiticue—

<sup>21</sup> Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide.

<sup>22</sup> Cesareamo sijiano, Jerusalémo macarite. Creyentiaia dine jaide. Ie mei Antioquíamo jiaia macarite.

<sup>23</sup> Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaia imaci comeciaina ocuiñotacana jaide.

### *Apolos illa rafue*

<sup>24</sup> Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriaia ciegafuiaia raise uiñote.

<sup>25</sup> Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiaia uiñoñede.

<sup>26</sup> Judíuai ofiracomo naimie llofuia, jacitaiñeno llofuate. Priscila, iaiaiaia Aquila diga, naina cacadiaiaiaia. Ie jira naimiena oni eneno uitiaiaiaia. Ie uiñoñega rafuena eo raise naimiena llofuetiaiaiaia.

<sup>27</sup> Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode.

<sup>28</sup> Judíuai diga marefodo jiaia eo ñaite. Iemona naimaci uai ollinodi iñede. Naimiedi Jusiñamui ciegafuiaiaimona Jesúsdi cai Jilloitaraimana llofuate.

## 19

### *Efesomo Pablo illa rafue*

<sup>1</sup> Corintomo Apolo nia itemo, nairiaia onifedo joide naido jailla mei, Pablo Efesomo ride. Dinomo rillanona, creyentiaina baite.

<sup>2</sup> Naimacimo jicanote:

—¿Cristona omoi inuaruimo Jusiñamui Joreña feiñotomoi?

Uai otimaci:

—Jusiñamui Joreña nia jaca cacaiñedicaia.

<sup>3</sup> Dane jicanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacai.

<sup>4</sup> Pablo uai ote:

—Mare. Juan lloste: “Omo: comencia: iuaina meido. Iemei bautizallomo:”. Ie ifo meido: timiena comini: inollena lloste. Jesúna inollena lloste. Jesús rafuena omo: mo raise lloiticue.

<sup>5</sup> Iena cacajano, cai Nama Jesús dibeido bautizadimaci.

<sup>6</sup> Naimacimo Pablo ie onollina joniama, Jusiñamui Joreño feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo lua rafuena jiai llotimaci.

<sup>7</sup> Nibai nana naimacidi doce iñia.

<sup>8</sup> Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui dibeimo naimaci comencia: iuaina meiduana Pablodi jacitaiño eo llouide. Nainomo daje amani fivui fiebide.

<sup>9</sup> Naimacimona jia: nodi Pablo uaina uaitatimaci. Jiai inoiacaiñedimaci. Naimaci inoñena ira, ofiracomo bitinomo: “Cristo rafuedi marañede” llouidimaci. Ie jira Pablodi creyentiai diga naimacimona eneno oni jaide. Tiranno ie lloracomo nagarui Pablodi llofueuide.

<sup>10</sup> Mena fiemona iese llofueuide. Ie jira diga Asia railla enruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

<sup>11</sup> Jusiñamuidi Pablona siño rafuena finotate.

<sup>12</sup> Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajama, duidinodi jillodimaci. Janaba anamo itinodi jiai jillodimaci.

<sup>13</sup> Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, janania: anamo itinomona janania: na oni oretaiacadimaci. Janania: mo raitimaci:

—Pablo lua iso, Jesús muidona bimacimona oni jai.

<sup>14</sup> Esceva ie siete jitotiaidi iese finoacadimaci. Escevari Jusiñamui diga ñairaima.

<sup>15</sup> Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omo: na uiñoñedicue.

<sup>16</sup> Iecon: Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimia: na jino aisidimaci. Naimacidi bofella: ai diga jino aisidimaci.

<sup>17</sup> Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidiana, eo jacinaitimaci. Iemona cai Nama Jesús mamecidi are soride. Comini: dinena: “Jesús uai eo siño” raitimaci.

<sup>18</sup> Ie jira ailluena creyentiaidi billano, imaci navui marañede fino: ca rafuena Jusiñamuimo llotimaci. Icorilla rafuena finouidimaci. Iena marefodo llotimaci.

<sup>19</sup> Ailluena icorilla rafuia: illabia: atiana, marefodo jobaidimaci. Niga raifi rabia: jobaillana facadimaci. Cincuenta mil ucube diese facai rabia: na jobaidimaci.

<sup>20</sup> Cai Nama Jesús uaina eo llocana jaide. Cominidi naie uai siñonana uiñotimaci.

<sup>21</sup> Naie rafue illa mei, Pablodi comecina facajano raite: “Macedoniamos cue macarillama, Acayamos cue jiai macarillama, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicue”.

<sup>22</sup> Naimie nia Asiamos nano nigarui illanona, mena canora: mana Macedoniamos oretate. Timoteona, iaima: ai Erasto diga, oretate.

*Efesomos ite comini: marañede rafue finoacadimaci*

<sup>23</sup> Naie facaisecon: Pablo nia oni jaiñenia, Jesucristo rafue muidona Efesomos ite cominidi marañede rafuena comuitatimaci.



<sup>24</sup>Demetrio raillamie platamona diga rana finouide. Naimiedi Diana ie joforeñuaina finouide. Naimie anamo ailluena maijuidimaci. Dianadi naimaci jusiñamui.

<sup>25</sup>Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi;

<sup>26</sup>iadedi Pablo raillamiedi diga cominina jai llofujete: “Comini finocarañaidi jusiñamuillaiñede”. Naie llofuiamona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide.

<sup>27</sup>Ie jira abina rairuicadicai, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feittaitimaci. Naiñaiñori raijicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuicadicai.

<sup>28</sup>Iena cacajano, eo iciritimaci. Raire cuiridimaci:

—¡Efeso ie Diana eo ebirede!

<sup>29</sup>Danirie siadumona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaimaiai Aristarco diga, gaitajano uitimaci. Naie iaimaiaidi Pablo ie nabai iaimaiai. Iaimaiai comuilanodi Macedonia.

<sup>30</sup>Pablo ofiracomo jiai fo jaiacade; iadedi creyentiaidi naimie fo jaillana rairuidimaci.

<sup>31</sup>Illaicominimona damierie nabaiñiai naimiemo fo jaillana jiai rairuidimaci.

<sup>32</sup>Fo itinomona damierie daje rafuena ebena cuiridimaci. Jiaino jiaifuena ebena cuiridimaci. Eo failliñaidimaci; ie iadedi bue ñellena naimaci ofillana raise uiñoñedimaci.

<sup>33</sup>Comini motomona judíuai dinena damie uicomo oredimaci. Ie mamecidi Alejandro. Cominina llucaitallena, ie onolli jaidianona, cominimo lloiacade;

<sup>34</sup>iadedi naimie judío imiēna naimaci uiñuanona, nana daacaiño cuiridimaci. Mena horas raifi cuiri-cuiridimaci:

—¡Efeso ie Diana eo ebirede!

<sup>35</sup>Iemei naie nairai rabe cueraimadi cominina llucaitatate. Naimaci llucaila meinoconi, naimie llucinona cacadimaci. Raite:

—¡Cacarei! Cai nairaidi Dianana sedacabidicai. Naiñaiño ebirediñaiño. Naiñaiñona eruaide jiraraidi monamona jaiē uaide. Iena jiai sedacabidicai. Nana bie eniruemo ite comini iena uiñotimaci. Bu naiēna uiñoñediēna jaca iñede.

<sup>36</sup>Bu cue lluaña jaca uaitañeite. Ie jira omoi llucacai. Comeciai facañeno buena finoñeno.

<sup>37</sup>¿Bue ñellena Gayo iaimaiai Aristarco diga, benomo atidomoi? Iaimaiaidi cai jusiñamui joreñona ñaiñediēna. Naiñaiñona jeare finoñediēna.

<sup>38</sup>Demetrio, ie maijiraini diga, iaimaiaina llogidoiacania, cominina llogidoraco ite. Diga jueces jiai ite. Coniniri nainomo iēna siado;

<sup>39</sup>iadedi jiai nicino omoimo ia, cai illaicomini ofia, biena siaduno, caimo lloitimaci.

<sup>40</sup>Birui bie rafue cai finua jira, illaicomini nibai caina duere finoitimaci. ¿Ñiese cai nibaille? Illaicomini caimo biena jicanoia, ¿ñiese raiticai?

<sup>41</sup>Naie llua mei, ofidinona jino orede. Iemei jai jono tuudidimaci.

## 20

*Macedoniamo Pablo dane jailla rafue*



<sup>1</sup> Efesomo ite rafue suilla mei, Pablodí creyentiaína uaidote. Naimaci começiaína ocuiñotafuena llofe. Iemei naimacina naimie facaduano, Macedonia railla eniruemo jaide.

<sup>2</sup> Nainomo ite nairaiaimo macarite. Começina ocuiñotallena, naimacina llofuecana jaide. Iese Macedoniamona Grecia railla eniruemo risaide.

<sup>3</sup> Nainomo daje amani fivui illa mei, Siriamo botedo abido jaiacade; iadedí judíuaidí naimiena meineiacanana Pablo fidiano, Macedoniamona abido macarite.

<sup>4</sup> Jiaíno naimie díga jaidímací. Sópater jaide. Naimiedí Berea nairaí imie. Pirro jito. Aristarco, iaímaiaí Segundo díga, jaide. Tesalónica nairaí imie iaímaiaí. Gayo naimie díga jiaí jaide. Gayodí Derbe nairaí imie. Timoteo naimie díga jiaí jaide. Tíquico, iaímaiaí Trófimo díga, jiaí jaidíiaímaiaí. Asia imie iaímaiaí.

<sup>5</sup> Coco uicodo naimaci jaillano, Troamo cocona sedadímací.

<sup>6</sup> Llomenico guillaruillaí railla rafue fuilla mei, Filipomona jaidícoco. Monailaido dabecuirorui coco jailla mei, Troamo naimaci díga dane danomo dafaífidícoco. Nainomo siete dígarui fiebidícoco.

### *Troamo Pablo illa rafue*

<sup>7</sup> Domingoruimo Jesús fiodaillana começillena, danomo ofidícaímo, Pablodí caína llofuefe. Icoiti naimie jaiacana jira, Pablo are ñaite. Naíona jítoma daferui illa facai nia ñaite.

<sup>8</sup> Cai ofillanomo ailluena lamparíniaí ite.

<sup>9</sup> Pablo are ñaia jira, daje coniruemo iniaicídí suide. Naie conirue mamecídí Eutico. Naimiedí ventanamo raide. Naimie eo inia jira, ventanamona ana uaide. Tercer pisomo a itícaí. Nainomona eniruemo naimiedí uaide. Ana jíbuisaíbidemo, naimiena meniñocaidemo, naimie jai fiodaillana ciódimaci.

<sup>10</sup> Ie jira Pablo ana jaide. Naimie emodomo jítadacaida, naimiena meniñote. Comínimo llofe:

—Omoí rucaicueriñeno. Naimie cajede. Jafaicína nia faite.

<sup>11</sup> Abido a jaidímací. Jesús fiodaillana começillena, llomeniconona tairuano, comínimo Pablo fecade. Guilla meinomo, naimaci díga naimie are ñaite, monaiacademo. Ie mei oni jaide.

<sup>12</sup> Nainomona conirue jai cajede uitímací. Ie jira nana naimaci naimieri eo iobidímací.

### *Mileto railla nairaímo Pablo jailla rafue*

<sup>13</sup> Pablodí Troamona Asón railla nairaímo arido jaiacana jira, botedo jaidícaí. Iese uicomo Asónmo jaidícaí. Nainomona Pablona botedo uiacadícaí.

<sup>14</sup> Ie jira Asónmo naimiena cai baillanona, cai díga botemo bite. Ie mei Mitilene railla nairaímo jaidícaí.

<sup>15</sup> Nainomona dane monailaido cai jaillano, ie areruido Quío railla nairaímo ruicafebellemo jaidícaí. Dane ie areruido Samos railla nairaí mamedo atona jaidícaí. Ie areruido dane cai jaillano, Miletomo sijidícaí.

<sup>16</sup> Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinocóni, cincuenta dígarui illanona bie rafue ite. Asia railla eniruemo naimie are iacaiñena jira, Pablo começina facade: “Efeso ecido monailaido jaitícaí”.

### *Efesomo ite creyentiaí sedarainímo Pablo llua rafue*

<sup>17</sup> Creyentiaína sedarainína uaidollena, Miletomona Efesomo Pablo caratana orede.

<sup>18</sup> Naimie díne naimaci rillanona, Pablo naimacímo llofe:

—Asiamo nano cue rillaruimona, niese omoi diga nagarui cue illana uiñotomoi.

<sup>19</sup> Cai Nama diga abina iedoño maijuidicue. Eecana sure maijidicue. Judíuai cuena duere uiñodosia jira, ie facaiseconi dueredicue.

<sup>20</sup> Cuemo ite marecinona omoimo jaca janoñedicue. Nana Jusiñamui rafuena omoimo jai lloticue. Omoi ofillanomo omoina llofueuidicue. Omoi jofuemo omoina jiai llofueuidicue.

<sup>21</sup> Judíuaina llofueticue. Judíuaiñedinona daje isoi llofueticue. Jusiñamui dibeimo omoi comeciai iuaina meiduana lloticue. Cai Nama Jesúna omoi iñuana jiai lloticue.

<sup>22</sup> Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue;

<sup>23</sup> iadedi Jusiñamui Joreño naga nairaimo cuemo llote: “Llaveracomo ona gaitajano ona jonesiite. Duere sefuitio”.

<sup>24</sup> Cue ille dinori are illemo comecina facañedicue. Dama cue ille dinori fuidoacadícue. Cai Nama Jesúmona cue feñoga maijana fuidoacadícue. Mare rafuena omoimo lloiacadícue. Jusiñamui omoina duenailana jiai lloticue.

<sup>25</sup> Jusiñamui anamo omoi illa rafuena omoimo jai lloticue. Jai dane cue uiecona cioñeitomoi. Iena uiñotícue.

<sup>26-27</sup> Cue uaina jaca janoñedicue; ia nana Jusiñamui uai omoimo lloticue. Ie jira cuemona omoi diga cue comeci mare. Jusiñamui uaido omoi jaiñenia, cue muidonañeite.

<sup>28</sup> Mai omoi abi rairui. Jusiñamui Joreñodi omoina creyentiaina sedatate. Naimacina raise seda. Jusiñamui dibeimo itinona llofue. Naimie Jito fiodailla muidona, naimacina ote, naimie iena.

<sup>29</sup> Naimacidi toica laudaiai isoidimaci. Nia abina raise uiñoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoi sedaca cominina ramo faite, danomo abido naimaci jaillena, jiconiai laudaiai gaitaja isoi.

<sup>30</sup> Omoimona uanaiñedinona llorainidi iite. Creyentiaina ramo faitimaci, omoi llucinona fañonocaillena, naimaci dibeimo illena.

<sup>31</sup> Ie jira abina rairui. Bie rafuena feitaño. Daje amani fiemona nana omoina jai llofueticue. Naiona omoina llofueticue. Aremona omoina jiai llofueticue. Omoina cue duenailmona, eianona omoina llofueticue.

<sup>32</sup> Mai. Cai Nama illa anamo omoina fañonocaiticue. Naimie uaimona naimie omoina duenailana jai uiñotomoi. Naie uaidi omoina jiai ocuiñotaite. Iemona Cristona iñocana jaitomoi. Nana naimie fetocano diga naimie illanomo ico jaca iitomoi.

<sup>33</sup> Jiaino ie ucubena jaca nicidoñedicue. Bu ie iñiroillaina jaca jiai oia-caiñedicue.

<sup>34</sup> Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomoi.

<sup>35</sup> Iese cue illamona omoina llofueticue. Iese maijiano duerede cominina canocana jaiacadica. Cai Nama Jesús ie llogacinona uiñotica. Naimie raite: “Raruiaina cai feñoia, iobidica; iadedi cai eo iobiacania, jiañonomo raruiaina fecadica”.

<sup>36</sup> Naie llua meino, naimaci diga caiñici ifodo rainadajano, Jusiñamuimo jide.

<sup>37</sup> Nana naimacidi eo eedimaci. Pablona caimaduanona, naimiena llibanotimaci.

<sup>38</sup> “Cuena dana cioñeitomoi” naimacimo llua jira, eo sunaitimaci. Iecon naimie diga botemo jaidimaci.

## 21

### *Jerusalémo Pablo jailla rafue*

<sup>1</sup> Naimacina cai facadua meinoconi, suiñodicaí. Cos railla nairaímo atona jaidicaí. Ie are Rodas railla uiasimo ridicaí. Iemei Pátara railla nairaímo ridicaí.

<sup>2</sup> Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí.

<sup>3</sup> Chipre railla uiasina cai ciojia, cai nabei díbeimo ite. Iemei Siria railla eniruemo jaidicaí. Tiro railla nairaímo sijidicaí. Botedo uiga raruiaina nainomo joneacadimaci.

<sup>4</sup> Tiromo ite creyentiaí cai baillanona, siete dígarui naimaci díga iticaí. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate.

<sup>5</sup> Dígarui illa meinomo oni jaidicaí. Naie nairaímona nana naimaci cai díga jaidimaci. Riñoniaí, naimaci uruiái díga, jaidimaci. Caiñici ifodo monaillai fuemo ana rainadajano Jusiñamuimo jidicaí.

<sup>6</sup> Naimaci facadua meinoconi, botemo jaidicaí. Naimaci imaci jofuemo abido jaidimaci.

<sup>7</sup> Tiromona Tolemaida railla nairaímo jaidicaí. Creyentiaína uaiduano, darui naimaci díga iticaí.

<sup>8</sup> Ie are jaillano, Cesareamo cai ria, Felipe jofomo jaidicaí. Felipedi Jesucristo ie rafuena lloraima. Jerusalémo diáconuaina creyentiaí jaie fetua facaise, Felipena fetodimaci.

<sup>9</sup> Naimie dinomo fiebidicaí. Naimiemo cuatro jisa ite. Naiñaiñuái nia ima abina uiñoñede. Jusiñamui naiñaiñuáiimo llucacinona llocabitimaci.

<sup>10</sup> Dígarui nainomo cai illamo Judeamona damie bite. Naimie mameci Agabo. Jusiñamui facaina lloraima.

<sup>11</sup> Caimo ria, naimiedi Pablo cinturóna aiñode. Naie díga ie eillina maite. Ie onollina jiai maite raillano:

—Jusiñamui Joreño raite: “Jerusalémo judíuai illaicomini bie cinturón jainaoide imana daje isoi maitimaci. Judíuaiñedinomo naimiena fecajitimaci” raite.

<sup>12</sup> Naiena cai cacajano, naie comini díga, Pablona caididicaí, naimie Jerusalémo jaiñellena.

<sup>13</sup> Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaídícue. Ua cue fiodaillana jaca jiai jitaídícue. Cue Nama Jesús muidona cue fiodaiadedi, damamai fiodaítícue.

<sup>14</sup> Cai lloga uai naimie ñinoñena muidona, raiticaí:

—Cai Nama jitaílle rafuena finuana jitaídicaí. —Iemei llucaidicaí.

<sup>15</sup> Nano nigarui illanona, cai raruiaina finuano, Jerusalémo jaidicaí.

<sup>16</sup> Cesareamo ite creyentiaímona jiaíno cai díga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

### *Jacobo díga Pablo ñaía rafue*

<sup>17</sup> Jerusalémo cai ria, creyentiaídi caina caimare uaidotimaci.

<sup>18</sup> Ie are Pablo, cai díga, Jacobo dine jaide. Nana creyentiaína sedaraini nainomo jai ofidimaci.

<sup>19</sup> Uaidua mei, Pablo nagacinuaido Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaína jaidimaci —llote.

20 Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judíuaimona ailluena comini jai creyentiana jaidimaci; ia nana naimaci Moisés micori llogacinodo eo jaidimaci.

21 O finoca rafuena jai fididimaci. Ona comini ñaiana jai fididicai. Jiaie nairai motomo ite judíuaina Moisés micori llogacinona fañonocaillana llofuetio. Naimaci uruia abina deñenana llofuetio. Moisés micori llogacinuaido jaiñellena llofuetio.

22 Ie jira ¿niese nibaiticai? O rillana jai fididimaci.

23 Ie jira omo cai llua fina. Cai ecimo cuatro ñima jai ite. Nie isoide rafuena Jusiñamuimo jai llotimaci.

24 Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci facaina iba. Naie rafue omoi fuiduanona, omoi ifogina rijiruda gareitomo. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicai.

25 Judíuaiñedino Moisés micori llogacinodo jaillena lloñeiticai. Naimacimona creyentiana jaidinomo navui cueticai: “Jiraramo fecaca rana riño. Diruena riño. Llerinoga rana riño. O aiñede riño diga iño. O iniñede ñima diga iño” cueticai.

26 Pablo “Jee” raillanona, nai cuatro ñima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiai rana fecajaruina jai llote. Siete digarui illanona, Moisés micori llua isoi, naie rafuena fuidoiacadimaci.

### *Pablona gaitaja rafue*

27 Naie siete iruillai fuiacanuillaimo Asiamona damerie judíuaidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona,

28 cuiiriidimaci:

—Caimaci, caina cano. Bimie naga illanomo llofuiamona, cominina raise itañede. Moisés micori llogacinuaido jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

29 Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana marañede.

30 Asiamona bitino cuiiriillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci.

31 Pablona meineiacania, soldaduai ie comandantedi nana comini ieillana fidide.

32 Iecon naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fañonocaidimaci.

33 Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

34 Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cuatello naimiena uillena llote.

<sup>35</sup> Cuartel tidabacuimo naimaci ria, comini jarire jailla jira, soldaduai Pablona uitimaci.

<sup>36</sup> Ailluena comini racadimaci. Ocuioisite:  
—¡Naimiena meine!

*Pablo ie abi ríidua llua rafue*

<sup>37</sup> Cuartelmo jaiacania, Pablo comandantemo llote:

—O diga ñaiacadícue.

Raijicaillamona, naimie uai ote:

—Griego uaido ñaitío—

<sup>38</sup> Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitío.

<sup>39</sup> Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiacadícue.

<sup>40</sup> —Jee —raite. Pablo tidabacui muidomo naidaide. Cominina llícaitallena, ie onollina jaidide. Comini llícailla mei, Pablo judíuai uaido naimacimo llote:

## 22

<sup>1</sup> —Caímaci, einamací, cue abi ríiduacínomo mai omoí cacarei.

<sup>2</sup> Naimie judíuai uaido llua naimaci cacajano, llícaidímaci. Ie jira Pablo llote:

<sup>3</sup> —Judío imiedicue. Ciliciamo ite Tarso railla nairaimo jeicigacue. Bene omoí nairaimo escuelamo jaidícue. Gamalielmona fueoticue. Moisés micorí llogacínuaína eo raise facadícue. Jusiñamui rafuedo birui omoí isoi jaidícue.

<sup>4</sup> Jesucristo iñotinona jaie eo duere finodicue. Diga creyentiaína maianona, cárcelmo joneticue. Fiñiaína duere finodicue. Riñoniaína jiai duere finodicue.

<sup>5</sup> Jusiñamui diga nanoca ñairaima cuena uiñote. Nana omoí illaicomini cuena uiñotimaci. Creyentiaína duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidícue, nainomo ite creyentiai maiano, Jerusalémo atianona, naimacina duere finollena.

*Pablodí Jesúsna iñnuana llua rafue*

*(Hch 9.1-19; 26.12-18)*

<sup>6</sup> Omoímo bie rafuena lloiticue. Jerusalémona jaidícue; iadedi Damascomo cue iaíreicaía, jitoma naidai iacania, ieconí monamona damíe cue abina eo quetiñote.

<sup>7</sup> Eníruemo ana uaidícue. Monamona damíe cuemo llua nacaícadícue: “Saulo, Saulo, ¿bue ñellena cuena duere finodio?”

<sup>8</sup> Jicanoticue: “¿Budío?” Monamona damíe uai ote: “Nazaret ie Jesúsídicue. Cuena duere finodio”.

<sup>9</sup> Cue diga itinodí cue quetiñua rana ciodimaci; iadedi cue diga ñaitimiena cacaiñedimaci.

<sup>10</sup> Raitícue: “Nama, ¿bue ñeíticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

<sup>11</sup> Cuena eo quetiñua jira, cioíñedicue. Cue diga itino cue onollido llínocaida, Damascomo cuena uitimaci.

<sup>12</sup> Nainomo Ananías raillamíedi ite. Jusiñamuina eo iñnote. Moisés micorí llogacínuaído eo jaisoide. Nainomo ite judíuaidí naimiena: “Mare” raitimaci.

<sup>13</sup> Naimie cuemo bite. Cuemo llote: “Saulo, ama, mai oni eroda”. Ieconí dane erodajanona, naimiena ciodícue.

14 Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena.

15 Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio.

16 Mai cue lluaana ñno. Naidadajanona, o jeacino oni dotallena, Jusiñamuimo jica. Ie mei bautiza” raite.

### *Judíuaiñedinomo Pablo jailla llua rafue*

17 Ie mei Jerusalémo abido cue billa mei, Jusiñamui jofomo Jusiñamuimo cue jiiia, nicairiticue isoidicue.

18 Cai Namana ciodicue. Cuemo llote: “Jerusalémona raire mai jai. Cominidi o cuena lluaana feiñoñeitimaci”.

19 Uai oticue: “Nama, naga judíuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uiñotimaci.

20 Esteban micori fiodailla facaiseconi nainomo iticue. Naimie o facaina lloraíma. Naimie fiodailla jira, iobidicue. Naimiena meinetino ñiroina sedadicue”;

21 iadedi cue Nama cuemo llote: “Mai jai. Judíuaiñedinomo ona are oretaiacadicue”.

### *Comandante anamo Pablo illa rafue*

22 Bie lloga ñnori comini Pablo lluaana cacadimaci. Iemei cuiriidimaci:

—Bie isoide ñima illana benomo jitaiñedicai. ¡Naimiena meine!

23 Cuirillamona naimaci ñiroina jaidisite. Icirisiano enruena jiai fadosite.

24 Judíuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie llollena, naimiena duere fino.

25 Naimiena maiano naimiena fallena, Pablodi nainomo ite capitámo jicanote:

—¿Juez ñia lloñenia, romano ñairai imiena fajana mare? Romano ñairai imiedicue.

26 Capitán iena cacajano, comandante ñine jaide. Iena llote. Jicanote:

—¿Ñiese ñibaiticai? Bimie romanuai ñairai imie.

27 Iena cacajano, comandante bite. Pablomo jicanote:

—¿O Romano ñairai imiedio?

Pablo uai ote:

—Jii.

28 Comandante ñinena raite:

—Romanuai ñairai imiena cue jaillena, eo ibadicue.

Pablo uai ote:

—Romanuai ñairai imiena jeicigacue.

29 Ieconí naimiena duere finoacadino naimiemona raire oni jaidimaci. Pablo romanuai ñairai imiena jira, naimiena jai ebena maia jira, comandante jiai jacinaite. Comecina ñibai facade: “Iese naimiemo cue finua jira, ie ñbana ollena, cue illaímamo cuena jiai llogidoite”.

### *Illaicomini motomo Pablo illa rafue*

30 Comandantedi judíuai Pablona llogiduana ua raise uiñoiacade. Ie jira ie are Pablona suiñollena llote. Jusiñamui ñiga nanoca ñairaini, nana judíuai illaicomini ñiga, ofillena llote. Pablona atiano, naimaci motomo uillanona, naimiena naidanete.



## 23

<sup>1</sup> Ie abina riidollena, Pablo naie judíuai illaicomini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

<sup>2</sup> Ananíadi Jusiñamui diga nanoca ñairaima. Pablo llwana naimie gaiñenamona, Pablo ecimo itinona Pablo fuena farotate.

<sup>3</sup> Pablo dinena naimiemo llote:

—Jusiñamui o fuena faroite. Mareuidimiena abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uiñoñeno cue fue ebena farollena llotio.

<sup>4</sup> Nainomo itino raite:

—Jusiñamui diga nanoca ñairaimamo jeare ñaitio.

<sup>5</sup> Pablo uai ote:

—Moisés micori iena jaie cuiana uiñoticue. “Illaicomina jeare ñañeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

<sup>6</sup> Cominimo Pablo eruaillamona, saduceuai railla comini nainomo illana cide. Fariseuai railla comini nainomo illana jiai cide. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacino mo ocuriticue. Ie jira bene cuena llogidoiacadomo.

<sup>7</sup> Naimie iena lloia, naimaci comeci daje isoi lloñedimaci.

<sup>8</sup> Saduceuai cominidi fariseuai comini isoi ñnoñedimaci. “Fiodaillamona jilloñeticai” saduceuai comini raillana ñnoside. “Jusiñamui jaienisa iñede. Comini joreñuai iñede” raillana ñnoside; iadedi fariseuai comini dinena nana naie rafue illana ñnotimaci.

<sup>9</sup> Ie jira eo failliñaidimaci. Fariseuai motomona jiaino naidadajanona, llote:

—Bimiemo jeacino iñede. Jusiñamui jaienici naimiemo nibai jaie llumona, bie rafue naimiemo ite.

<sup>10</sup> Naimaci iese riire failliñaidimaci. Naimaci Pablona llagui raillano, comandantedi soldaduaimo cuartelmo naimiena uillena llote.

<sup>11</sup> Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

### *Pablona meineiacana rafue*

<sup>12</sup> Monaidemo, judíuaimona jiaino comeciaina facadimaci: “Pablona nia cai meineñenia guiñeticai. Jiroñeticai”.

<sup>13</sup> Cuarenta baifemo ite comini iese comeciaina facadimaci.

<sup>14</sup> Naimaci judíuai illaicomini dine jaillano, raitimaci:

—Dani comeciaina facadica: Pablona nia cai meineñenia, jaca buena guiñeticai.

<sup>15</sup> Omoi dine Pablona atillena, naimiemo eo raise jicanua isoi, comandantemo jicano. Pablo iairei bia, naimiena cai meinellena, ocuidoitica.

<sup>16</sup> Pablo enaise naie rafuena fidiano, cuartelmo jaide, Pablomo llollena.

<sup>17</sup> Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

<sup>18</sup> Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

<sup>19</sup> Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

<sup>20</sup> Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci.

<sup>21</sup> Naimaci jitailla isoi finoñeno. Cuarenta digamie baifemo naimiena reiduano sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

<sup>22</sup> Comandante coniruena facaduano raite:

—Jaca bumo cuemo o lluaana lloñeno.

### *Félix dine Pablo oretaja rafue*

<sup>23</sup> Comandante mena capitána uaidote. Llote:

—Doscientos soldaduaia uaido, imaci raruia finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiai uaido.

<sup>24</sup> Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote.

<sup>25</sup> Cartana jiai cuete. Iese cuete:

<sup>26</sup> “Félix, omo cueticue. Claudio Lisiasdicue. Cai mare gobernador dio. ¿Nigacino? Cue uai o dine oredicue.

<sup>27</sup> Damie o dine oredicue. Judíuai naimiena meineiacana jira, soldaduai diga naimiena gaitataticue. Naimiena gaitataja mei, naimiedi romanuai nairai imienana fididicue.

<sup>28</sup> Judíuai illaicomini dine naimiena uiticue, naimaci llogiduacinona raise cue uiñollena.

<sup>29</sup> Naimaci einamací llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue.

<sup>30</sup> Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiai lloiticue. Naimaci naimiena omo lloitimaci” cuete.

<sup>31</sup> Comandante llua isoi, soldaduai naiona Pablona Antípatrismo uitimaci.

<sup>32</sup> Ico are eillido jaide soldaduai cuartelmo abido bitimaci; ia Pablo cabal-luaido jaidino diga oni jaide.

<sup>33</sup> Cesareamo railla nairaimo rillanona, gobernadormo cartana fecadimaci. Naimie dine Pablona jiai uitimaci.

<sup>34</sup> Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

<sup>35</sup> Gobernador dinena raite:

—O llogidotino bia, o rafuena cacajiticue.

Soldaduaímo jiai llote:

—Omoí anamo Herodes railla illaíma micorí jofomo naimiena seda.

## 24

### *Félix dine Pablo riidua rafue*

<sup>1</sup> Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiai bite. Naimiedi llogidoraima. Gobernadormo Pablona llogiduaibitimaci.

<sup>2</sup> Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio.

<sup>3</sup> Jobillamona, nana cai iena feiñoticaí.

<sup>4</sup> Ona iciacañedicue; iadedi o fue maria jira, cue llua mo dallu cacarei.

<sup>5</sup> Bimiedi eo cai abina aruire finode. Nana eniruemo ite judíuaina uri itatañede. Naimiedi Jesús raillamie rafuedo jaidino illaíma.

<sup>6</sup> Jusiñamui jofona jeare naimie finoiacana jira, naimiena gaitadicaí. Moisés micori llogacinuaido naimiena duere finoacadicaí;

<sup>7</sup> iadedi comandante Lisias ride. Caimona naimiena riire bairode. Naimiena cai llogidollena, o dine cai billena caimo llote.

<sup>8</sup> Pablomo o jicanoiacania, naimiemona bie rafuena uiñoitio. Nana naimiena cai llogiduacinona uiñoitio.

<sup>9</sup> Judíuai illaicomini, Tértulo llua isoi, dacinodo llotimaci.

<sup>10</sup> Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticaí. Ie jira cue abina riiduacinona omo marefodo lloiticue.

<sup>11</sup> Doce digarui illanona, Jerusalémo como birui ridicue. Iena uiñoiacadiosa jiaie cominimo jicano. Jusiñamuina sedallena, Jerusalémo iticue.

<sup>12</sup> Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue.

<sup>13</sup> Nie isoide rafuena cue finuana cioñedimaci. Ie jira cuena raise llogidonidimaci;

<sup>14</sup> iadedi jiaie rafuena lloiticue. Cai usumatiaí Jusiñamuina sedadimaci. Naimiena jiai sedadicue. Nana Moisés llogacinuaina ñnoticue. Nana Jusiñamuina lloraini micriaí ciegafuaina ñnoticue. Bimacimona jiaie llogacinuaido jai jaidicue. Bimacimona uanañedincinodo jaidicue.

<sup>15</sup> Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotimaci.

<sup>16</sup> Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena.

<sup>17</sup> Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue.

<sup>18</sup> Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue.

<sup>19</sup> Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena?

<sup>20</sup> Naimaci biacaiñenia, ¿bue ñellena bene itino bie rafuena raise lloiacañedimaci? Naimaci motomo Jerusalémo cue ia, maraiñede rafuena cue finuana lloñedimaci.

<sup>21</sup> Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

<sup>22</sup> Félixdi Jesús díbeimo itino rafuena raise uiñua jira, Pablo rafuena nairuido siadoiacañede.

—Comandante Lisias bia, dane omoi rafuena siadoiticue —raite.

<sup>23</sup> Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiaí naimie dine jaillena rairuiñede.

<sup>24</sup> Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaímaiaí. Jesúsna ñnuana cacadiiaímaiaí.

<sup>25</sup> Jeacino finoñellena, dama ie jitailla rafuena finoñellena, jiairuido Jusiñamui riicaillafue anamo iñellena cacadiiaímaiaí. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

<sup>26</sup> Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena.

<sup>27</sup> Mena años illa mei, Porcio Festodi Félix ifo meidote. Félixdi judúuaina iobitaacana jira, cárcelmo Pablona fainonocaide.

## 25

### *Festomo Pablo llua rafue*

<sup>1</sup> Naie provinciamo darui amani rilla mei, Cesaremona Jerusalémo Festo jaide.

<sup>2</sup> Nainomo Jusiñamui diga nanoca ñairainidi, jiaie judúuai illaicomini diga, Festomo Pablona llogidotimaci.

<sup>3</sup> Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci.

<sup>4</sup> Festo uai ote:

—Pablo Cesaremo fiebiite. Raire nainomo abido jaiticue.

<sup>5</sup> Omoi illaicominimona damerie cue diga jaitimaci, nicino naimiemo ia, naimiena llogidollena.

<sup>6</sup> Nibai ocho, nibai diez diga irui nainomo illa mei, Cesaremo naimie abido jaide. Ico are ie cominimo llouillanomo raide. Pablo atillena llote.

<sup>7</sup> Pablo billa mei, Jerusalémona bite judúuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci.

<sup>8</sup> Pablo uai ote:

—Judúuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

<sup>9</sup> Iena cacade; iadedi Festo judúuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

<sup>10</sup> Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue lolle. Judúuaimo jaca buena finoñedicue. Iena raise uiñotio.

<sup>11</sup> Romanuai railla nairai illaicomini llogacinona cue inoñenia, damamei jearede rafuena cue finoia, cue fiodaillemo jaca ocuridicue; iadedi cuemo nicino iñenia, cuena meinellena bu cuena judúuaimo fecañeite. Cue rafue naimie siadollena, Romamo cai nanoca illaima dine jaiacadicue.

<sup>12</sup> Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

### *Agripamo Pablo llua rafue*

<sup>13</sup> Diga irui illa mei, Agripadi Festo dine, ie miriño Berenice diga, Cesaremo bitiaimaia. Agripadi naie enirue illaima.

<sup>14</sup> Diga irui nainomo itiaimaia. Naimiemo Festodi Pablo ie rafuena llote:

—Félix Pablona cárcelmo bene fainonocaide.

<sup>15</sup> Jerusalémo navui cue ia, Jusiñamui diga nanoca ñairaimadi, judúuai einamaci diga, naimiena llogidote. Naimiena duere finollena cuemo jicanotimaci.

<sup>16</sup> Naimaci uai oticue: “Cai Romanos cominidi llogidogamiena jamai tainomo duere finoñedica; iadedi llogidogamiedi ie llogidotino uai nano cacareitica. Ie mei ie abi ridollicinomo jiai cacareitica”.

<sup>17</sup> Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue.

<sup>18</sup> Naimiena llogidotinodi lloia, naimiena marañede finoca rafue cue facaja isoi, llogidoñedimaci.

<sup>19</sup> Dani naimaci #nuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite.

<sup>20</sup> Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”;

<sup>21</sup> iadedi Pablo nainomo jaiacaiñede. Cai nanoca illaïma ðine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaïma ðine naimiena cue nia oretañenia.

<sup>22</sup> Agripadi Festomo llote:

—Naimie ñaïana cacaacadicue.

Festo uai ote:

—Ico are naimie ñaïana cacareitio.

<sup>23</sup> Ie jira ie are Agripa, iaïmaiaï Berenice ðiga, gobernador ofiracomo bitiaïmaiaï. Finobillano ebire bitiaïmaiaï. Soldaduaï imaci illaïcomini jiaï bitimaci. Naie nairaïmo ite nanoca comini jiaï bitimaci. Ofilla mei, Festo Pablona atillena llote.

<sup>24</sup> Festo llote:

—Agripa, nana beno itino, bimiena cidomoi. Jerusalémo ailluena judíuaï naimiena llogidotimaci. Bene cue ðine jiaï bitimaci. Naimie meiniana eo jitaïðimaci;

<sup>25</sup> iadedi naimiemo nicinodi iñenana jai uiñoticue. Naimiena meinellena cue lollena, nicinodi naimiemo iñede. Augusto ðine naimie jaillena naimie jicanua jira, naimiena oretaiticue.

<sup>26</sup> Nicinodi nia iñede, cai illaïmamo cue cuellena. Ie muidona omoi ðine naimiena jai atidicue. Agripa, naimie ñaïamo raise cacarei. Naimiemo cai jicanua mei, nibaï nicino naimiemo illana uiñoiticaï. Iemona Augustomo cueiticaï.

<sup>27</sup> Augusto ðine llavecamië cue oretaia, naimiemo nicino iñenia, cuemona maraiñede.

## 26

### *Pablo ie abina dane riidua rafue*

<sup>1</sup> Naie facaise Agripa Pablomo llote:

—Mai llono. O abi riiduacinona cacaacadicue.

Pablo: “Jiï” raillanona, ie onolli a ñuitade. Raite:

<sup>2</sup> —Agripa, bene o illa jira, cuemona mare. Cue fue baillafuedo o uicomo cue abina riidoiticue. Judíuaï cominidi ðiga rafuena cuena llogidotimaci.

<sup>3</sup> Nana cai judíuaï rafuena raise uiñotio. Nana cai einamacï rafuena jiaï uiñotio. Cuemo raise cacarei.

<sup>4</sup> Jerusalémo naimaci motomo cue illa jira, ðiga judíuaï cue coniruenamona cuena uiñotimaci.

<sup>5</sup> Cuenamaimaci lloiacania, fariseo imiena cue illana are uiñotimaci. Jiaie comini baïfemo fariseuaïdi cai einamacï llogacinuaina ñnotimaci.

<sup>6</sup> Jusiñamuidi cai usumatiaï micoriaïmo fiodaillamona comini ico jilloillena jaie llote. Ie suillemo jai ocuiridicue. Ie jira llogidoracomo birui jai iticue.

<sup>7</sup> Nagarui Jusiñamuina naimaci eo sedajamona, cai doce nairaïdi naie llogacino suillemo jiaï nia ocuiridimaci. Ore illaïma, bie ocuirillacino muidona judíuaï illaïcomini cuena llogidotimaci.

<sup>8</sup> ¿Bue ñellena Jusiñamuidi comini fiodaillamona jillotajana ñnoiacaiñedomoi?

<sup>9</sup> Jaie ie isoidicue. Nazaret ie Jesúna ñnotinona ðiga jearede rafuena jaie finoacadicue.

<sup>10</sup> Jerusalémo iena finodicue. Cárcelmo ailluena Jesúna #notinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue.

<sup>11</sup> Diga judíuai ofiracomo, diga icaiño, naimacina duere finodicue. Naimaci Jesúna jeare ñaiana jitaidicue. Naimaci diga cue eo icirilla jira, jiaie eniruemo ite nairaimo jiai jaidicue, naimacina duere finollena.

*Pablodi Jesúna #nuana llua rafue  
(Hch 9.1-19; 22.6-16)*

<sup>12</sup> 'Ie jira Damascómo jaidicue. Jusiñamui diga nanoca ñairaini uaido jaidicue.

<sup>13</sup> Ore illaíma, jitoma naidai ia, monamona quetiñotena cidicue. Naidi jitoma baífemo quetiñote. Cue abina quetiñote. Cue diga itino abina jiai quetiñote.

<sup>14</sup> Eniruemo cue ana uaia, damie llua cacadicue. Judíuai uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, ricaillamona raise maiga jurareta suiñoacana isoi. Ie isoidio. Ricaillamona, cuena duere finoacadio”.

<sup>15</sup> Uai oticue: “¿Budiotá?” Cai Nama cuemo llote: “Jesúdicue. Cuena duere finodio.

<sup>16</sup> Mai a naidacai. Cue rafuena o llofuellena ona fetodicue. O birui cúa rafuena lloitio. Ona cue uiñotalle rafuena jiai lloitio.

<sup>17</sup> Naimaci ona duere finoia, omoi cominimona ona jillotaiticue. Judíuaiñedinomona ona jiai jillotaiticue; iadedi judíuaiñedino dine ona oretaiticue,

<sup>18</sup> naimaci comeciai tainomo ñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiredinomo jai itimaci isoidimaci. Jusiñamuina uiñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci #nuamona, nana cuena #notino diga cue illano ico jaca iitimaci”.

<sup>19</sup> 'Ore Agripa, monamona cue cacaja rafuena #noticue. Jesúdi Jusiñamui Jitona #noticue.

<sup>20</sup> Damascómo itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judíuaiñedinomo iena jiai lloticue. Lloticue: “Omoi comeciáimo iticinona meido, Jusiñamui dibeimo omoi illena. Omoi comeciáimo iticinona omoi meidua mei, mare rafuena finocana jai”.

<sup>21</sup> Ie jira judíuai illaicomini Jusiñamui jofomo cuena gaitadimaci. Cuena meineiacadimaci;

<sup>22</sup> iadedi Jusiñamui cuena canode. Ie jira birui bene iticue. Illaicominimo beno nia lloticue. Illaicominiñedinomo jiai nia lloticue. Dama Jusiñamui facaina lloraini micoriai ico suille ciegafuena birui lloticue. Dama Moisés micori ico suite ciegafuena jiai birui lloticue. Jiaie rafuena lloñedicue.

<sup>23</sup> Jaie cuetimaci: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena uiñoitimaci. Iemona judíuaiñedino jeacinomona jilloillena uiñoitimaci”. Ie jira bie rafuena llocana jaidicue.

*Creyentena Agripa jaillena Pablo jitailla rafue*

<sup>24</sup> Iese Pablodi abi riiduanó, Festo riire llote:

—Pablo, odi uarico isoidio, eo comecina o facaja jira.

<sup>25</sup> Pablo uai ote:



—Uairicoñedicue. Festo, odi cue illaimadio. Cue lluacínodi uanaicino. Ebona ñai-ñaiacaiñedicue.

<sup>26</sup> Agripa cue lloga rafuena raise uñnote. Nana bie rafuena naimie jai uñua jira, naimie diga marefodo ñaiticue. Bainino suiñede.

<sup>27</sup> Ore Agripa ¿Jusiñamui lloraini ciegafuiaina ñnotio? omo jicanoticue. Iena o ñnuana jai uñnoticue.

<sup>28</sup> Agripa ñinena uai ote:

—Dallu o ñaiamona, cuena creyentena ñibai itataiacadio.

<sup>29</sup> Pablo uai ote:

—Ñibai dallu ñaiticue. Ñibai are ñaiticue; iadedi cue isoi o jaillana jitaicue. Ua nana cue ñaiana cacadino cue isoi jaillana jitaicue; iadedi omoi bie lloeo diga maiana jitaicue.

<sup>30</sup> Iemona Agripa naidacaide, Festo diga, Berenice diga. Nana raicino jiai naidacaidimaci.

<sup>31</sup> Jino jaillano, Pablo joreña siadotimaci:

—Bimie jaca buena finoñede, naimiena cai meiniana lloena. Buena finoñede, cárcelmo illena.

<sup>32</sup> Agripa Festomo llote:

—Naimie cai nanoca illaima ñine jaillana jicanoñedena, niadedi naimie jino marena oreca.

## 27

### *Romamo Pablo jailla rafue*

<sup>1</sup> Italiomo Augusto ñine Pablo oretajana Festo llua mei, Pablona jiaie llavecana diga capitámo fecade. Naie capitádi Julio. Augustona mameciredede batallómo jainaiide.

<sup>2</sup> Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai.

<sup>3</sup> Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai ñine Pablo ari jaillana rairuiñede. Ie jira naimacimona ie jitaile rana ote.

<sup>4</sup> Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai.

<sup>5</sup> Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia.

<sup>6</sup> Naie bote Roma ñine jaiñena jira, capitádi jiaie botena jenode. Capitádi Alejandríamona bite botena baite. Naie bote Italiomo jaiacade. Ie jira naie botemo cai jonecaida, caina uite.

<sup>7</sup> Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai ñine jaidicai.

<sup>8</sup> Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

<sup>9</sup> Digarui cai faifilla jira, noci deisoilla facaise jai illa jira, jaillena eo jaciredede. Ie jira botemo maijidinomo Pablo llote:

<sup>10</sup> —Nabaiñiai, cai jaillena eo jacirenana uñnoticue. Eo marañeno caimo sefuiticai. Cai raruiaina ñibai faifiticai. Botena jiai ñibai faifiticai. Cai ñibai jiai faifiticai —llote.

<sup>11</sup> Iese llote; iadedi naie bote piloto oni jaiacade. Naie bote nama jiai oni jaiacade. Capitán iaimaiai llua Pablo llua baifemo ñnote.

<sup>12</sup> Igobe marañena jira, rollime facaise illa jira, ailluena comini nainomona jiacadimaci. “Fenice railla nairaimo niedi riiticaí” raillano jiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide.

<sup>13</sup> Beici dinena aifidi bia, “caí jitailla aifidi bite” raillanona, suiñodicaí. Creta iaírei monaillai fuemo jaidicaí.

<sup>14</sup> Ie mei raire caí dine eo riire aifí bite. Naie aifí noci deisoilla dinena bite.

<sup>15</sup> Botena oni uite. Botena atona eronenidicaí. Ie muidona jamai ebena jaidicaí. Aifidi caina iese uite.

<sup>16</sup> Janorede uiasi fuemo aifí raise iñenanomo jaidicaí. Nai uiasi mameci Clauda. Faiññellena bote ie janorede nocae sefuire a aiñodicaí.

<sup>17</sup> A aiñua mei, rao diga botena ruica maiticaí. Sirte railla conillie illanomo caí joodai raillano, velaiaina duiñodicaí. Iemei aifí jamai uigacaí.

<sup>18</sup> Ie areruido aifí riire illa jira, cargana oni dotadicaí.

<sup>19</sup> Dane ie are bote ie raruiaí, caí onolli diga, oni dotadicaí.

<sup>20</sup> Diga irui jitoma bainide. Diga irui ucuaí jiaí bainide. Aifí eo riire nia ite. Caí jillobiñellemo jai ocuiriñedicaí.

<sup>21</sup> Diga irui caí guiñena mei, Pablo naimacimo llote:

—Nabaiñiaí, cue uaina navui ñnotiomoidena, niadedi bie isoi sefuiñedicaí. Cretamo caí fiebidicaina, bie isoi sefuiñedicaí.

<sup>22</sup> Omoi comeciaina ocuiño. Bie botedi faifite; iadedi caimona jaca buna faifíñeite.

<sup>23</sup> Jaive naiona Jusiñamui jaienici di cuemo bairede. Jusiñamuimo jainaiaidicue. Naimiena sedadicue.

<sup>24</sup> Naie jaienici cuemo llote: “Pablo, jaciruiñeno. Romamo o nanoca illaíma dine iitio. Jusiñamui ona duenailla jira, nana o diga jaidino jilloitimaci”.

<sup>25</sup> Ie jira omoi comeciaina ocuiño. Cuemo llua isoi, naimiedi bie rafuena suitate. Jusiñamui iena finuana ñnoticue.

<sup>26</sup> Nibaí uiasimo jutadaiticaí.

<sup>27</sup> Catorce digarui naio illamona, Adria railla monaillaimo jamai caí jaia, naiona daferui facai marineruaidi: “Enirue iaíre ite” raillanona comeciaina facadimaci.

<sup>28</sup> Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede.

<sup>29</sup> Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci.

<sup>30</sup> Naie facaise marineruaí botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

<sup>31</sup> Iena ciuano, Pablo capitámo llote. Soldaduaímo jiaí llote:

—Botemo bimaci fiebiñeniadedi, jilloñeitomoi.

<sup>32</sup> Ie jira soldaduaídi nocae maía raona jaitadimaci. Jai dinomo nocaena faínonocaidimaci.

<sup>33</sup> Nia monañenia, Pablo nana caímo llote:

—Guiño. Catorce digarui illanona, jai guiñedomoi.

<sup>34</sup> Ie jira guiño, omoi mairillesa. Ua faifíñeitomoi.

<sup>35</sup> Iese naimie raillanona, Jusiñamuimo iobillacinona fecade, nana comini illa uicomo. Llomenicono tairuano, guite.

<sup>36</sup> Nana naimaci comeciái ocuiñocaida, jiaí guitimaci.

<sup>37</sup> Botemo doscientos setenta y seis diese iticaí.

<sup>38</sup> Caí monillamona, fiebide trigona monaillaimo oni fadodicaí, bote meenaiñellena.

<sup>39</sup> Ie oni monaidemo, erodatemo, naie eniruena uiñoñedicaí. I gobemo conillici illana ciodicai. Nainomo jamai ebena sijiacadicaí.

<sup>40</sup> Ie jira lloelluna nainomo oni faínonocaidicaí. Datarabe maiana suiñoñodicaí. Vela aífimo sebiñoñoticaí. Monailai fuemo enirue dine jai jaidicaí.

<sup>41</sup> Iemei jaiciridifomo ridicaí. Eniruemo jodate. Bote muido eniruemo jaiáire jodate. Eo baguamona jillaci taicosite.

<sup>42</sup> Naimaci iamona jillobi raillano, soldaduai llavecanona meineiacadimaci.

<sup>43</sup> Pablona jillotaiacana jira, capitán iena rairuide. Llote:

—Nano iana uiñoñotino diese monaillaimo ana daia. Eniruemo jai.

<sup>44</sup> Jiaino bote ie rabicido juicaida icana jai. Jiaino bote ie raruiado juicaida icana jai. —Iese eniruemo nana marena ridicaí.

## 28

### *Maltamo naimaci illa rafue*

<sup>1</sup> Jai cai jillua mei, Malta railla uiasimo cai illana uiñoñoticaí.

<sup>2</sup> Nainomo ite comini caína marena feiñoñotimaci. Iraína bonotatimaci. Noci deilla jira, rosirena jira, irai ecimo agaillena caína uaidotimaci.

<sup>3</sup> Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide.

<sup>4</sup> Jaio naimie onollido llillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

<sup>5</sup> Jaiona ciuanona, Pablo iena iraimo dotade. Iemei naimiemo jaca bue isoide rafue suiñede.

<sup>6</sup> Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

<sup>7</sup> Naie illanomona uiasi illaíma enirue iaíre ite. Naimie mamecidi Publio. Caína marena feiñoñote. Darui amani ie jofomo caína marena itatate.

<sup>8</sup> Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jía mei, ie onolli naimiemo joniano, naimiena jillotate.

<sup>9</sup> Bie rafue suilla jira, naimie dine nana uiasimo ite duidino bi-bidimaci. Naimacina jillotate.

<sup>10</sup> Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

### *Romamo Pablo rilla rafue*

<sup>11</sup> Daje amani fivui illa mei, Alejandríamona bite botedo jaidicaí. Naie uiasimo nana rollime facaiseconi naie bote ite. Mena jusiñamui iaímaiaí joreño bote muidomo ite. Damie Cástorna mameciredede. Jiáimie Póluxna mameciredede.

<sup>12</sup> Naie botedo oni cai jaillanona, Siracusamo sijidicaí. Darui amani nainomo iticaí.

<sup>13</sup> Nainomona jaillano Regiomo sijidicaí. Darui illa mei, aifi beici dinena billa jira, ie areruido Puteolimo ridicaí.

<sup>14</sup> Sijia mei, nainomo creyentiaína baiticaí. Naimaci diga siete digarui cai illana jitaídicaí. Ie mei Roma dine jaidicaí.

<sup>15</sup> Romamo nia cai riñenia, nainomo ite creyentiaí cai billana fididimaci. Cai dine bitimaci. Foro de Apio railla nairaímo damierie bitimaci. Jiaino Tres

Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiai ocuiñote. Cai diga Romamo jaidimaci.

<sup>16</sup> Romamo cai ria, capitán llavecanona ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisi raillano, daje soldado nainomo naimiena sedade.

### *Romamo Pablo llofua rafue*

<sup>17</sup> Darui amani illa mei, Pablo Romamo ite nanoca judíuaina uaidote. Danomo ofilla mei, naimacimo llote:

–Caimaci, jaca buena cai cominimo finoñedicue. Cai einamací llogacinuaina jaca ñnoticue;

<sup>18</sup> iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira;

<sup>19</sup> iadedi judíuai: “Dama ite” railla jira, cai nanoca illaima dine jaillena jicanoticue; iadedi cue nairai diga jaca iciriñedicue.

<sup>20</sup> Omoi diga ñaillena, omoína cioacadícue. Fiodaillamona ico comini jillollena cue llofuecabilla jira, bie lloeo diga maigacue.

<sup>21</sup> Uai otimaci:

–Judeamona jiaíno ona cuega cartana jaca feiñoñedícai. Caimo o rafuena lollena, jaca buna biñede. Bene jaca bu ona jeare ñaiñede.

<sup>22</sup> Ie jira omona naie rafuena cacaacadícai. Naga illanomo comini o llofuiana uaitajana uiñotícai. Creyentiaina jeare ñaitimaci. Iena fididícai. Ie jira caimo iena raise llono.

<sup>23</sup> Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Moisés micorí llogacinuaimona, Jusiñamui facaina lloraini micoríai cuegafuiaimona, Jesúsna llofue.

<sup>24</sup> Jiaíno naimie llofuiana ñnotimaci. Jiaíno ñnoñedimaci.

<sup>25</sup> Nana naimaci comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo llote:

–Jusiñamui Joreñodi Isaías micorína cai usumatiaimo raise llotatate. Omoi usumatíai micoríai illa isoi nia itomoi. Isaías micorídi omoína jai cuega rafue jai suide. Naimie micorí cuete:

<sup>26</sup> Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>27</sup> Omoi comeciái jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisnidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue díbeimo iacaiñedomoi, omoína cue jilloitai raillanona’ ”.

<sup>28</sup> Jusiñamui rafuena omoi ñnoñena muidona, judíuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

<sup>29</sup> Iese naimie llua mei, judíuaidi coniniri siadocana abido jaidimaci.

<sup>30</sup> Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote.

<sup>31</sup> Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofue. Marefodo llofue. Naimiedi cai Nama Jesucristo rafuena llofue. Jaca budi naimie llofuiana rairuiñede. Teofilo, jaca digacino omo jai llotícue. Mai. Lucadícue.

## ROMAMO ITE CRISTONA HNOTINOMO PABLO ORETAGA RABE

### *Romamo ite creyentiaimo Pablo cartana orede*

<sup>1</sup> Romamo ite creyentiaí, omoí dine cartana oredicue. Pablodícue. ¿Nigacino? Jesucristo díbeimo maijidícue. Jusiñamui fetocamiedícue. Ie mare rafuena cue lollena, cuena orede.

<sup>2</sup> Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiaí cuega. Iemona birui facacabidícai.

<sup>3</sup> Bie rafuedi Jusiñamui Jitona llote. Naimie jaie ite usumadi cai illaíma David micori.

<sup>4</sup> Naimie Jusiñamui Jitonana uiñotícai. Jusiñamui Joreñodi siño rafuedo caina iena uiñotade. Jusiñamui Jito fiodaillamona, Jusiñamuidi ie Jitona jillotate. Jusiñamui Jitodi Jesucristo. Cai Nama.

<sup>5</sup> Caina duenaillanona, caina oretate, naga nairaiaína naimiена #notallena, naimiена naimaci iobitallena.

<sup>6</sup> Naimacimona itomoi. Naimiemo omoi duillena, Jesucristo omoína jai fetode.

<sup>7</sup> Romamo ite creyentiaí, Jusiñamui isiruiganodomoí. Naimie isoi mareuidinona omoi illena, fetocanodomoí. Cai Moo Jusiñamui, cai Nama Jesucristo díga, omoína duenaite. Iena uiñocana mai omoi jai. Iaimaiaí omoína uri jai itatatiáimaiaí. Iena omoi uiñocana mai omoi jai.

### *Roma díne Pablo jaiacade*

<sup>8</sup> Díga comini, díga illanuaimo, Jesucristona omoi #nuana jai fididimaci. Ie jira nano dofoconi omoi facaina Jesucristomo iobillacinona fecaacadícue, Jusiñamuimo iena naimie fecallena.

<sup>9</sup> Jusiñamuimo cue jiaí, omoi ri jidícue. Jusiñamui iena uiñote. Naimie Jito rafuena cue lluanona, cue comecimona naimiена sedadícue.

<sup>10</sup> Jusiñamuimo cue jiaí, naimiemo jicadícue, cuena canollena. Naimie jitaia, omoi dine ja muidomo cue riitícue. Iena jicadícue.

<sup>11</sup> Omoína eo cioacadícue. Jusiñamui Joreño uai cuemo illamona, omoi comeciaina ocuiñotaiacadícue.

<sup>12</sup> Jesucristona omoi #nuamona, naimiена cue #nuamona, coninina cai comeciaina ocuiñotaitícai.

<sup>13</sup> Cue amataí, díga icaiño omoi dine jaiacadícue. Iena omoi uiñuana jitaídícue. Jaiacadícue; iadedi nia jainidícue. Cuemona Jesucristo rafuena cacajamona, dajerie jiaie nairaiaí jai #notimaci. Omoi dine Jesucristo rafuena lluaiacadícue, iena omoímona dajerie #nollena.

<sup>14</sup> Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadícue. Griego uaido ñaiñedinomo iena jiaí lloiacadícue. Abina uiñotinomo iena lloiacadícue. Abina uiñoñedinomo iena jiaí lloiacadícue.

<sup>15</sup> Ie jira omoímo Jesucristo rafuena eo lloiacadícue.

### *Jesucristo rafue siño*

<sup>16</sup> Jesucristo rafueri iobidícue. Naie rafuedi siño. Jusiñamuidi naga iena #notinona naimaci jeacinomona jillotate. Judúuaidino nano iena cacadimaci. Ie mei judúuaiñedinomo iena jai cacadimaci.

<sup>17</sup> Naie rafuemona Jusiñamui caina feiñuana uiñotícai. Jusiñamui caina marebicaitajana uiñotícai. Naimiена cai #nuamona iena uiñotícai.

Jusiñamui facaina lloraima micori jaie cuega: “Jusiñamuina ñnuamona marebicaidimiedi Jusiñamui dibeimo ico jaca iite” cuega.

*Comini jeacinona fnoiadedi, dani naimaci muidona*

<sup>18</sup> Nana Jusiñamuina jitañedinodi naimie duere finollifue anamo jai itimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci.

<sup>19</sup> Jusiñamui naimacina naimiena uiñotaja muidona, imaci comeciainona Jusiñamui illana uiñotimaci.

<sup>20</sup> Enirue finua facaisemona naimie finoca ramona naimie illana uiñotimaci. Naimiena conidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci.

<sup>21</sup> Jusiñamui uiñotimaci; iadedi naimie uaina ñnoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciái jai tainomo ite isoide. Jai marebificañedimaci.

<sup>22</sup> “Abina uiñoticaí” raitimaci; iadedi abina uiñoñedimaci. Jamai ebe isoidimaci.

<sup>23</sup> Jusiñamui jaca ite. Naimie uai siño. Naimiena sedaacañedimaci; iadedi jaie rana sedaacadimaci. Fiodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

<sup>24</sup> Ie jira Jusiñamui naimacina fañonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci.

<sup>25</sup> Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

<sup>26</sup> Iese naimaci illa jira, naimaci jitailla meirede rafuena finollena, Jusiñamui naimacina fañonocaide. Coniñona aifuedotimaci.

<sup>27</sup> Naimaci jitailla jira, conimana aifuedotimaci. Naimaci maraiñede finoca rafuemonona duere sefuillemona ibana feiñoitimaci.

<sup>28</sup> Jusiñamuina naimaci uiñoiacañena jira, maraiñede rafuemo naimaci comeciái facallena, Jusiñamui naimacina fañonocaide. Naimaci finorainiga rafuainana finocana jaidimaci.

<sup>29</sup> Naga isoide maraiñedicinona finouidimaci. Naga isoide jearedicinona finouidimaci. Jaie comini rana nicidoudimaci. Jaie cominina duere finouidimaci. Jaiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jaie cominina jeare finouidimaci. Eo ñaillaredimaci.

<sup>30</sup> Jaie comini joreñona ñaoidimaci. Jusiñamuina jaca gaiñedimaci. Cominina jeare ñaoidimaci. Abina idoudimaci. Abina biruidimaci. Diga jearede rafuemo comeciaina facauidimaci. Naimaci moo uaina ñnorainidimaci. Naimaci ei uaina ñnorainidimaci.

<sup>31</sup> Ebena itimaci. Naimaci lloga uaina finorainidimaci. Jaie cominina isiruirainidimaci. Naimacina jai dueruirainidimaci. Iese jaisoidimaci. Iese nia jaicabidimaci.

<sup>32</sup> Jusiñamuidi jaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui llwana uiñotimaci; iadedi naie rafuena finocana jaidimaci. Iena jaie comini fnoiadedi, iobilanona, “Macai mare iese imaci finua” raitimaci.



## 2

### *Jusiñamuidi marañede rafuena finodinona duere finoite*

<sup>1</sup> Ero, omoi judíuaimona damie comecina nibai facade: “Bie isoide marañede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeticue” raillamo naimie comecina facade; iadedi naie isoide marañede rafuena naimie finua jira, Jusiñamui naimiena jiai duere finoite.

<sup>2</sup> Jusiñamuidi uanaicinona uiñuamona, marañede rafuena finodimiena duere finoite. Iena uiñoticaí.

<sup>3</sup> “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite.

<sup>4</sup> Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno.

<sup>5</sup> O comeci jaiarena jira, o comeci Jusiñamui dibeimo meidoiacaiñedio. Ie jira ico eo duere sefuitio. Ie riicaillifuemona Jusiñamuidi nana naimiena inoñedinona duere finoite. Iena Jusiñamui finoa, Jusiñamuimona mare.

<sup>6</sup> Nagamiai imaci finua ille dinori Jusiñamui naimacina duere finoite.

<sup>7</sup> “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite.

<sup>8</sup> Marañede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona inoñedimaci.

<sup>9</sup> Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedino cominina jiai duere finoite;

<sup>10</sup> iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite,

<sup>11</sup> naga nairaina daje isoi naimie finua jira.

<sup>12</sup> Judíuaiñedinodi Moisés micori llogacino anamo inedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci inoñena jira, jiai jaca daje isoi duere sefuitimaci.

<sup>13</sup> Moisés micori llogacinona cacajamona, Jusiñamuimona jaca buna marebicaiñede; iadedi iena inuamona marebicaide.

<sup>14</sup> Judíuaiñedinodi Moisés micori llogacino anamo inedimaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci.

<sup>15</sup> Moisés micori llogacino anamo naimaci illa isoi, naimaci comeciaimona marecinona naimaci finoiadedi, iena uiñotimaci. Ie jira marañedinona naimaci finoiadedi, iena jiai uiñotimaci.

<sup>16</sup> Biena llofuecabiticue. Ico Jusiñamui llua jira, Jesucristodi cominimo imaci comeciamo iticinona juez isoi lloite. Marañedinona finuidinomo duere finollicinona lloite. Marecinona finuidinomo duere finollicinona lloñeite.

### *Moisés micori llogacinodo judíuai comini raise jaiñedimaci*

<sup>17</sup> Abina iedumona, omoimona damierie raitomoi: “Judíuai imacidicaí. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi.

<sup>18</sup> Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi.

<sup>19</sup> Jusiñamuina uiñoñedinona llofueiacadomoí. Naimiena naimaci uiñoñena jira, jitiredinomo itimaci isoidimaci. Uanaicinona naimacimo omoí llumona, naimaci comeciaina lligaiñoiacadomoí. Naimacina uanaicinona uiñotaiacadomoí.

<sup>20</sup> Jusiñamuina raise uiñoñedinona llofueiacadomoí. Naimacina abina uiñotaiacadomoí. Naimie rafuena nia raise uiñoñedinona llofueiacadomoí. Moisés micorí llogacinomo nana uiñuacino illa jira, naiemo uanaicino illa jira, iese iacadomoí.

<sup>21</sup> Jiaie cominina llofueiacadomoí; iadedi ¿niese omoí comeciaino fueoiacaiñedomoí? “Rana fiñeno” llotomoí; iadedi fiñedomoí.

<sup>22</sup> Omoí aiñede riño diga iñenana llotomoí; iadedi ie isoi finodomó. Jusiñamuina eruaide jiraraina gaiñedomoí; iadedi naie ra illanuaimona naie jiraraina fiñedomoí.

<sup>23</sup> Moisés micorí llogacinori abina iedotomoí; iadedi iena omoí iñoñena jira, Jusiñamuina jeare finodomó.

<sup>24</sup> Iena Isaías micorí jaie cuete: “Omoí muidona judíuaiñedinodí Jusiñamuina jeare ñaitimaci” cuete.

<sup>25</sup> Jusiñamui díbeimo jai omoí illana jiaie comini uiñollena, omoí abina detatatoí. Moisés micorí llogacinona omoí iñoiadedi, omoí abina detatajadi mare; iadedi naicinona omoí iñoñenia, abina detatañedino isoi jai itomoí. Jusiñamui díbeimo iñedomoí.

<sup>26</sup> Moisés micorí llogacinona judíuaiñedino iñoiadedi, naimaci abina detatañenia, Jusiñamuimona naimie díbeimo ite judíuai isoidimaci; iadedi abina detatañedimaci.

<sup>27</sup> Moisés micorí llogacinuaina uiñotomoí. Omoí abiaina detatatoí; iadedi Moisés micorí llogacinona judíuaiñedinodí iñua jira, Moisés micorí llogacinuai omoí iñoñena jira, Jusiñamuimona omoí baifemo uaidimaci.

<sup>28</sup> Omoí jeiciamona Jusiñamui ua cominiñedomoí. Omoí abiaina detatajamoná, Jusiñamui ua cominiñedomoí;

<sup>29</sup> iadedi omoí comeciái marena illamona, Jusiñamui ua cominidomoí. Abi detataja jira, Jusiñamui cominiñedomoí; iadedi omoí comeciái marena illa jira, Jusiñamui cominidomoí. Raise naimiena iñotinodí cominimona iobillacinona feiñuana jitañedimaci; iadedi Jusiñamuimona iobillacinona jitaídimaci.

### 3

<sup>1</sup> Bie cartana omoí feiñuanona, iena facallemona, damierie comecina facaite: “Judíuaidicái; ia naiemona, ¿niese jiaie comini baifemo faiticái? Cai abiaina detataticái; ia naiemona jaca buena oñedicái”.

<sup>2</sup> Ie jira omoímo lloiacadicue: “Judíuaina cai illana eo mare”. Jusiñamuidí dani caimo ie rafuena llote. Jiaie cominimo lloñede.

<sup>3</sup> Cai cominimona dajerie Jusiñamui rafuena iñoñedimaci; iadedi Jusiñamuidí ie lloga rafuena jaca finode.

<sup>4</sup> Comini tainona llotimaci; iadedi Jusiñamuidí uanaicinona jaca llote. David micorí iena jaie llote:

O lloga uaimona uanaicinona o llouillana uiñoticaí.

O finoca rafuena jiaie comini uaitaia, o dinena jaca anafenodio.

Iena uiñoticaí.

<sup>5</sup> Dane damierie comecina facaite: “Jusiñamuidí mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidí Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finóñena, jiaie cominina naimiena cai uiñotaja jira”. Omoimona iese dajerie comeciaina facadimaci;

6 iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiai duere finonite.

7 Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena.

8 Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, maraiñedicinona finocana cai jailla’ ”. Iese cue lloñena jira, Jusiñamui naimacina duere finoia, cuemona mare.

### *Jeacinona nana cai finodicai*

9 Judíuaidicai; iadedi jeacinona nana comini finua jira, jiaie nairai baifemo faiñedicai. Judíuaidicai; iadedi jeacinona finodicai. Judíuaiñedinodi jeacinona jiai finodimaci.

10 Jusiñamui facaina lloraini micoriai iena jaie cuete: Marebicaidino jaca iñede. Nana comini maraiñedimaci.

11 Jaca buna Jusiñamuina raise uiñoñedimaci. Naimiena raise uiñoiacaiñedimaci.

12 Mare rafuedo nana jaiñedimaci. Maraiñedicinona finoidimaci. Jaca buna marecinona finoñedimaci.

13 Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

14 Naimaci fuijai eo borede.

15 Icirillamona jiaie cominina raire meinetimaci.

16 Níne naimaci jaia, diga maraiñede rafuena comuitatimaci.

17 Uri illana uiñoñedimaci.

18 Jusiñamuina jaciruiñedimaci jaie iese cuete.

19 Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci ridolle uai iñede. Nana comini Jusiñamui duere finollicino anamo itimaci. Iena uiñoticaí.

20 Moisés micori lloga uaina ñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

### *Jesucristona cai ñnuamona jillobidicai*

21 Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicai; iadedi Moisés micori iena jaie llote. Jusiñamui facaina lloraini micoriai iena jiai llotimaci.

22 Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina daje isoi feiñoite.

23 Nana caidi jeacinona finodicai. Jusiñamui caina jitailla isoi, marena iñedicai.

24 Caina naimie duenailamona, naimie jitailla jira, Cristo Jesúsna cai ñnuamona, caina marebicaitate.

25 Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñoticaí.

26 Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

<sup>27</sup> Cai jeacinomona marena cai illena, buena finoñedícaí. Ie jira cai finuamona abi iedoñedícaí. Buena finoñedícaí; iadedí Jesucristona cai ñnuamona, jillobidícaí. Ie jira cai finoca rafueri abina iedoñedícaí.

<sup>28</sup> Moisés micorí lloga uaina cai ñnuamona, marebicaiñedícaí; iadedí Jesucristona cai ñnuamona marebicaidícaí.

<sup>29</sup> Jusiñamuidí daní judíuái imací Mooñede; iadedí naimíedí nana comíní imací Moo.

<sup>30</sup> Cai Moodí jaca damíena jira, naimíena naimací ñnua jira, judíuáina marebicaitate. Naimíena naimací ñnua jira, judíuáiñedinona jái marebicaitate.

<sup>31</sup> Cai ñnuamona cai marebicailla jira, Jusiñamui facaina llorainí micoríai jáie lloga uaina caitañedícaí; iadedí iena ua ñnocana jaidícaí.

## 4

### *Abraham micorímona fueotícaí*

<sup>1</sup> Abraham micorí rafuena ja ñaiacadícue. Naimíe marebicaillafuena omoímo lloiacadícue.

<sup>2</sup> Ie finoca rafuemoná naimíe micorí marebicaidena, naimíe micorí abina iedote; iadedí ie finoca rafuemoná naimíe micorí marebicaiñede. Ie jira Jusiñamuimona naimíe micorí abina iedoiacaiñede.

<sup>3</sup> Iena Moisés micorí jáie cuega: “Jusiñamuina Abraham micorí ñnua jira, Jusiñamuidí naimíe micorína jeacinona jaca finoñedimíena isoítate. Naimíe micorína marebicaitate” cuega.

<sup>4</sup> Maijillena buna damíe ocuiadedí, íbajana jamái fecañeíte; iadedí maijá facaina fecaíte.

<sup>5</sup> Ero, ie maijiamona jaca bu jeacinona jaca finoñedimíena isoíacaiñede. Jusiñamuina naimací ñnua jira, Jusiñamuidí maraiñedinona marebicaitate.

<sup>6</sup> Bie rafuena David micorí jái jáie cuega: Ie maijiamona bu marebicaiñena jira, Jusiñamui marebicaitagamíedí iocíre ííte.

<sup>7</sup> Naimací maraiñedinona Jusiñamui dotajamona, iocíre íitímací. Jusiñamui naimací jeacinona dane abído íetañeíte.

<sup>8</sup> Naie jeacinomo Jusiñamuidí comecína dane facañeíte. Naimíedí jái feitaíte.

Ie jira iocíre íitímací.

<sup>9</sup> Daní abina detatátino iocíre illena lloñede; ía abina detatañedinomo íena jái llote. Jusiñamuina Abraham micorí ñnua jira, Jusiñamui naimíena marebicaitate.

<sup>10</sup> Naimíe micorí abina nía detatañenia, naimíe micorí marebicaide.

<sup>11</sup> Naimíe micorí marebicailla meí, Jusiñamui dínená Abraham micorímo abí detatajana llote. Abraham micorí íe abina detatajamona, Jusiñamuina naimíe micorí ñnuana uíñotícaí. Ie abina detatajamona, judío ímíena jái jáide; iadedí Jusiñamuina ñnuamona, naimíe micorí marebicaide. Ie jira Abraham micorídí nana Jusiñamuina ínotíno moo. Nana comíní abíaina detatañedímací; iadedí naimací ñnua jira, Jusiñamui naimacína marebicaitate.

<sup>12</sup> Cai comíní abíaina detatátímací; iadedí cai moo Abraham micorí ísoí naimací ñnua jira, Abraham micorí ísoí marebicaidímací. Ie jira Abraham micorí nana naimací moo.

### *Abraham micorí ñnuamona, Jusiñamui lloga uaidí suide*

<sup>13</sup> Abraham micorímo Jusiñamuidí: “Nana enírué omo íitícue” llote. “O uruíaimo íena jái íitícue” llote. Moisés micorí llogacínona Abraham micorí ñnua jira, íese Jusiñamui lloñede; iadedí Jusiñamui lloga uaina Abraham

mícori ñnua jira, iese Jusiñamui llote. Abraham mícori ñnua jira, Jusiñamuidi naimiena marebicaitate.

<sup>14</sup> Moisés mícori lloga uaina ñnotinomo: “Nana eniruena omoimo iitícue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jiaí jai saide; iadedi iese iñede. Dani naimiena ñnotinomo: “Nana eniruena omoimo iitícue” llote.

<sup>15</sup> Moisés mícori lloga uaina naimaci raise ñnoñenia, Moisés mícori lloga uaido jaidino Jusiñamui riicaillifue anamo itimaci; iadedi Moisés mícori lloga uai iñedena, Jusiñamuimona buna duere sefuiñeite.

<sup>16</sup> “Eniruena omoimo iitícue” naimiena ñnotinomo Jusiñamuidi llote. Duenaimonona llote. Nana Abraham uruiaí mícoriaimo iena llote. Dani Moisés mícori lloga uaido jaidinomo lloñede; iadedi Abraham isoi ñnotinomo jiaí llote. Abraham mícori isoi cai jailla jira, naimiedi cai moo.

<sup>17</sup> Jusiñamui iena jaie llote: “Ona diga nairaí imaci moona jai itataitícue” llote. Jusiñamui fiodaitinona jilloitarede. Nia iñede rana ie uaido jiaí comuítate. Ie jira Jusiñamui Abraham mícorimo llua isoi, suide. Jai fiodaitino illa isoi Abraham mícori abi illa jira, Jusiñamui naimie abina mairitate. Ie ai oñiñomo urue comuillena llote.

<sup>18</sup> Jusiñamui Abraham mícorimo jiaí llote: “Ailluena uruiaí omo iite. Diga nairaí omona jebuite” llote. Abraham mícoridi naie ñnorainiga rafuena ñnote.

<sup>19</sup> Jaca ñnote; iadedi cien años naimie mícorimo illamona, naimie jai eeiroma. Naimie mícori aidi, Sara mícoridi, oñiñona jira, naiñaiño uruedi comuñede.

<sup>20</sup> Abraham mícoridi Jusiñamui llua ñnote. ñnocana jaillano, iobilacina Jusiñamuimo fecade.

<sup>21</sup> Abraham mícoridi Jusiñamui lloga uaina finuana eo ñnote.

<sup>22</sup> Ie jira Jusiñamui naimiena marebicaitate.

<sup>23</sup> Naie rafue jaie cueda; iadedi dama Abraham mícorimo duiñede;

<sup>24-25</sup> iadedi caimo jiaí duide. Jusiñamuina ñnotinona marebicaitate. Cai Nama Jesús fiodaillamona, Jusiñamuidi naimiena jillotate. Cai jeacino facaina fiodaite. Caina marebicaitalena, naimiena jai jillotate.

## 5

### *Jai cai marebicaidicai*

<sup>1</sup> Jusiñamuina cai ñnuamona cai marebicailla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai.

<sup>2</sup> Jesucristo muidona Jusiñamui caina duenaillamona, caina marebicaitate. Naimie ebirena isoi cai illema caimare ocuridicai;

<sup>3</sup> iadedi duere cai sefuiadedi, jiaí iobidicai. Duere sefuillamona, cai comeciaí ocuiñocana cai jaillana uiñoticai.

<sup>4</sup> Cai comeciaí ocuiñuamona facacifidicai. Facacifillamona, Jusiñamuimo ocuridicai.

<sup>5</sup> Jusiñamui caina isiruilla jira, tainomo ocuriñeiticai. Ie Joreña caimo fecade. Ie Joreño cai comeciaimo illa jira, ie Joreño Jusiñamuidi caina naimie caina isiruillana uiñotade.

<sup>6</sup> Cai jeacinomona dani jillonidicaimo, Cristo cairi fiodaite. Maraiñedicai; iadedi naie facaiseconi cairi fiodaite.

<sup>7</sup> Maraiñedimie facaina caimona jaca buna fiodaiacaiñede. Caimona nibai damie maremie facaina fiodaite; iadedi nana comini iese fiodaiacaiñedimaci. Maraiñedimie facaina jaca buna fiodaiacaiñede;

<sup>8</sup> iadedi nia maraiñedicaimo, Jusiñamui caina isiruillamona, Cristo cairi fiodaite.



<sup>9</sup> Cristo cairi fiodaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite.

<sup>10</sup> Cai dinena Jusiñamuina cai enoilla facaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabaila jira, cai ico jilloillena raise uiñoticai.

<sup>11</sup> Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

### *Adán micori finoca rafue*

<sup>12</sup> Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fiodaicana jaidicai.

<sup>13</sup> Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede.

<sup>14</sup> Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

<sup>15</sup> Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena.

<sup>16</sup> Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodica; iadedi marebicaidicai.

<sup>17</sup> Dama Adán micori jeacinona finuamona, cai jeacino ite diga nana cai fiodaicana jaidicai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticai.

<sup>18</sup> Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairidimaci.

<sup>19</sup> Adán micori Jusiñamuina ñnoñenamona, nana comini jeacinona finodimaci. Jesucristo Jusiñamuina ñnuamona, ailluena comini marebicaitimaci.

<sup>20</sup> Jusiñamui Moisés micorimo rafuena llote. Iena comini ñnoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite.

<sup>21</sup> Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

## 6

### *Jesucristomo cai duillamona, jeacino anamo jai iñedicai*

<sup>1</sup> Jeacino anamo jai iñedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoiticaí”.

<sup>2</sup> Iese comecina facañeno. Jeacino anamo jai cai iñena jira, jeacinona finocana cai jaiñena.



<sup>3</sup> Biena uiñotomoi. Cristo Jesús ðibeimo cai illamona, nana caiði bautizagacai. Cristo fiodailla jira, cai comeciáimo ite jearedicino anamo jai iñedicai.

<sup>4</sup> Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie ðibeimo cai illamona, cai jeacino anamona jillodicai. Cai comeciáimo jiaie rafue birui illa jira, jiaie rafuedo jai jaidicai.

<sup>5</sup> Cristo fiodaite; iadedi naiemona jillode. Naimie ðibeimo cai illanona, cai comeciáimo ite jearedicino anamona cai jillua jira, Cristo ie mare rafue anamo birui iticai.

<sup>6</sup> Cristo fiodailla jira, cai comeciáimo ite jearedicino anamo jai iñedicai. Cai mo jai jainaiñena jira, jeacino finocana cai jaiñena.

<sup>7</sup> Jeacino anamo jai cai iñena jira, jeacinona finocana cai jaiñena.

<sup>8</sup> Cristo fiodaite; iadedi jillode. Naimie fiodailla jira, cai jearedicino anamo jai iñedicai. Naimie jillua jira, jiaie rafuedo birui jaidicai.

<sup>9</sup> Fiodaillamona Cristo jillua jira, naimiedi dane fiodaiñeite. Naimie fiodaitemo, cai jeacino facaina naimiedi jai fiodaite. Jai dane fiodaiñeite.

<sup>10</sup> Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo ðibeimo jaca iite.

<sup>11</sup> Ie jira jeacino anamo iñenanomo omoi comeciaina faca. Cristo Jesús ðibeimo jai omoi illanona, Jusiñamui jitailla rafuena finollemo omoi comeciaina faca.

<sup>12</sup> Jeacinona finocana jaiñeno. Omoi comeciái jeacinona finoacania, iena iñoñeno.

<sup>13</sup> Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina iño. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi iñena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi.

<sup>14</sup> Moisés llogacinuai anamo omoi jai iñena jira, jeacino anamo jai iñedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoína Jusiñamui duenaillamona, naimie omoína birui canocabide.

### *Patrón anamo itinomona cai fueolle*

<sup>15</sup> Moisés micori llogacino anamo jai iñedicai; iadedi omoimona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena.

<sup>16</sup> Biena uiñotícaí. Patrón anamo bu ia, ie patrón comeci jitailla rana finode. Ie ocuica rana iñote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite ðiga fiodaicana jaidomoi. Ie jira Jusiñamui illanomo ico iñeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi.

<sup>17</sup> Jeacino anamo jaie itomoi. Iemei omoimo jiaie comini Jesucristo rafuena jai llotimaci. Iena cacajanona, iena raise iñotomoi. Ie jira Jusiñamuimo iobillacinona fecadicue.

<sup>18</sup> Jeacino anamona jai jillobillamona, marecinona finocana jai jaidomoi.

<sup>19</sup> Cue lluaña omoi raise cacaillena, bie isoide rafuena lloticue. Omoi comeciái railla jira, jeacinona navui finodomoi. Maraiñedicinona finocana navui jaidomoi. Cristo ðibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciái Jusiñamui jitailla isoi marena iitomoi.

<sup>20</sup> Jeacino anamo navui omoi ia, Jusiñamui jitailla isoi, marecinona finoñedomoi.

<sup>21</sup> Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci.

<sup>22</sup> Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi.

<sup>23</sup> Jeacinona finocana omoi jaia, omoi jeacino ite diga fiodaitomoi. Jusiñamui illanomo ico iñeitomoi; iadedi cai Nama Jesucristona omoi inuamona, Jusiñamuidi omoina jaca itataite. Naimie illanomo ico iitomoi.

## 7

### *Inirede riñomona cai fueolle*

<sup>1</sup> Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo duiñede.

<sup>2</sup> Ie isoide. Nana naimie ille dinori, inirede riño ie inimo duide. Iese Moisés micori jaie llote. Ie ini fiodailla mei, ie inimo jai duiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare.

<sup>3</sup> Ie ini nia fiodaiñenia, jiaimie diga naiñaiño ia, ie ini abimo jeacinona jai finode, Moisés micori lloga uai naiñaiño ñnoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

<sup>4</sup> Ie isoide. Cristo fiodailla jira, Moisés micori llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana cai jaillena, fiodaillamona Cristo jai jillode.

<sup>5</sup> Jusiñamuina nia cai ñnoñenia, cai jitailla rafuena finocana jaidicaí. Moisés micori llogacinona uiñoticaí; ia cai maraiñede jitailla rafuena finocana jaidicaí. Cai jeacino ite diga fiodaicana jaidicaí;

<sup>6</sup> ia Moisés micori llogacino jai saide. Caimo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai sedajamona, Jusiñamui Joreño rafuedo jai jaidicaí. Moisés micori ciegafuiaido jai jaiñedicaí.

### *Cue comecimo ite maraiñedicino*

<sup>7</sup> “Moisés micori llogacino maraiñede” lloñeiticaí; iadedi naie llogacino iñedena, jeacinona uiñoñedicue. Jiaimie mo ite rana cue niciduana maraiñenana jaie uiñoñedicue. Moisés micori jaie llote: “Jiaimie mo ite rana nicidoño” llote. Ie jira naiemona niciduanana maraiñenana uiñoticaí.

<sup>8</sup> Naie llogacino muidona cue comeci jeacinona finoacade. Ie muidona rana nicidoticaí. Naie llogacino iñedena, jeacino finuana uiñoiacaiñedicaí. Naie llogacino iñedena, jeacino anamo iñedicaí.

<sup>9</sup> Moisés micori llogacinona nia cue uiñoñenia, caimare uri iticaí. Naiena cue uiñuamona, jeacino cue finuana uiñoticaí. Ico Jusiñamui diga cue iñenana uiñoticaí.

<sup>10</sup> Nano cue comecina facadicaí: “Naiedo cue jaillamona, Jusiñamui diga ico jaca iiticaí”. Iese cue comecina facadicaí; iadedi naie llogacinona cue uiñuamona, Jusiñamui dibeimo cuena jaca itatañede.

<sup>11</sup> Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere

cue sefuillicinona oticue. Naimie dibeimo Moisés micori llogacino cuena itatañede; ia naimie dibeimona cuena itatate.

<sup>12</sup> Iese ite; iadedi Moisés micori llogacinodi mare. Jusiñamui mona ite.

<sup>13</sup> Naie llogacino mare. Naie rafue muidona fioidaite; ia jeacino muidona fioidaite. Jeacina cue finua jira, Jusiñamui illanomo ico jaca itaite. Naie mare llogacinomona jeacino cue finuana eo marañenana itaite.

<sup>14</sup> Jusiñamui Joreño Moisés micorina naie llogacina cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraiana itaite.

<sup>15</sup> Cue finua rafuena raise uioñede; cue mare jitailla rafuena cue finuana jira. Cue gairena marañede rafuena finocadite.

<sup>16</sup> Cue marañede finocañega rafuena cue finuana, Moisés micori llogacino marena uioñede.

<sup>17</sup> Cue comeci iena dama uioñede; iadedi cue comecimo ite jeacino cuena finotate.

<sup>18</sup> Cue comecimo marenano ite. Mare rafuena finocadite; iadedi iena finocadite.

<sup>19</sup> Cue mare finocaga rafuena uioñede; iadedi cue marañede finocañega rafuena finocadite.

<sup>20</sup> Cue finocañega rafue cue finuana, cue comeci iena dama uioñede; iadedi cue comecimo ite jeacino cuena iena finotate.

<sup>21</sup> Biese cuemo suicabide. Mare rafuena cue finocaniadedi, jeacina finocadite.

<sup>22</sup> Cue comeci Jusiñamui lloga uaina gaire;

<sup>23</sup> iadedi cue comecimo marañede rafuena illana uioñede. Cue comeci namatacade. Cuena jeacina finocadite.

<sup>24-25</sup> Eo dueredite. Jusiñamui lloga uaina cue comecimona finocadite; iadedi cue comecimo ite marañede rafue cuena jeacina finocadite. Jeacino finocana cue jaca, duere sefuitite. Jusiñamui illanomo ico jaca itaite. Naiemona jaca buna cuena jillobitañede. Dama Jusiñamui cuena jillobitaite, cai Nama Jesucristo muidona. Ie jira Jusiñamui cue iobocabillasa.

## 8

### *Jusiñamui Joreño cai comeciaina namatacana cai jailla*

<sup>1</sup> Cristo Jesús duidinocai. Ie jira Jusiñamui caina duere uioñede.

<sup>2</sup> Jeacino anamo jai cai ita jira, caina duere uioñede. Jeacina cai finuana, Jusiñamui illanomo ico jaca itaite. Duere sefuitite; iadedi naiemona Jusiñamui Joreño caina jai jillobitaite. Jesucristo cai duellanona, caina jaca itaite.

<sup>3</sup> Moisés micori llogacina cai raise uioñena jira, jeacinomona dani jillobitaite. Ie jira Jusiñamui ie Jitona orede, imana naimie jailla. Cai isoi naimie jai; iadedi naimie jeacina uioñede. Jeacina finocadite. Cai jeacino facina fioidaite, naimie orede. Naimie uidei cai jeacina anafitate. Ie jira jeacino anamona jai caina jillobitaite.

<sup>4</sup> Iese finode, cai marena illana, Moisés micori llogacino illa isoi. Ie jira cai comecimo ite marañede jitailla rafuedo jai jaitaite; iadedi Jusiñamui Joreño jitailla rafuedo jai jaitaite.

<sup>5</sup> Cai comecimo ite marañede jitaillacino cai jaiadedi, naiemo cai comeciaina facadite. Iena finocadite; iadedi Jusiñamui Joreño jitailla rafuedo cai jaiadedi, iemo cai comeciaina facadite. Naimie jitailla rafuena finocadite.

<sup>6</sup> Maraiñede jitaillicinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci.

<sup>7</sup> Jiaino Jusiñamuina enoidimaci. Jusiñamui lloga uaina jitañedimaci. Iena inonidimaci.

<sup>8</sup> Iese itino Jusiñamuina iobitanidimaci.

<sup>9</sup> Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede.

<sup>10</sup> Jeacinona omoi finua jira, fiadaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira.

<sup>11</sup> Cristo Jesús fiadaillamona, Jusiñamuidi naimiena jillotate. Omoimo ie Joreño illa jira, omoi fiadaide, Jusiñamuidi ie Joreño uaido omoi abiaina jiai jillotaite.

<sup>12</sup> Cue amatiai, iese caimo suite. Ie jira cai comeciaino ite maraiñedicinodo cai jaiñelli.

<sup>13</sup> Naicinodo cai jaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

<sup>14</sup> Nana Jusiñamui Joreño namatadinodi Jusiñamui uruia.

<sup>15</sup> Jusiñamui Joreño feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi.

<sup>16</sup> Cai comeciaina Jusiñamui Joreño uiñotajamona, cai comeciainona Jusiñamui uruiaidicaina jai uiñoticai.

<sup>17</sup> Naimie uruiaidicaina jira, ie uruiaimo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticai.

<sup>18</sup> Biena uiñoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira.

<sup>19</sup> Iese cai illemo nana Jusiñamui finoca radi iocire birui ocurridimaci.

<sup>20</sup> Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocurridimaci,

<sup>21</sup> naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fiadañeitimaci.

<sup>22</sup> Biena uiñoticai. Nana Jusiñamui finoca radi danomo eo duere sefuicana nia jaidimaci. Marena illemo nia ocurridimaci.

<sup>23</sup> Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uiñoticai. Monamo Jusiñamui uruiaina ico cai illemo ocurridicai. Cai fiadaia, fiadaillamona cai abiaina jillotaite. Jiaifo eruaite cai abiaimo meidollemo ocurridicai. Ie mei cai abiai dane fiadañeitimaci.

<sup>24</sup> Naiemo cai ocurillamona, cai jeacinomona navui jillobidicai. Bumo ie jitaile ra ia, iemo naimie ocuriñede. Ie feiñoñega ramo ocuride. Ie isoidemo ocurridicai.

<sup>25</sup> Caimo suiñede rafuemo cai ocurilla jira, iemo fecuise ocuridicai.

<sup>26</sup> Birui duere cai sefuia, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote.

<sup>27</sup> Jusiñamui cai comeciaina uiñote. Naimie jitaillacinona ie Joreño jia jira, iena uiñote. Jusiñamui cominidicai. Ie Joreño cai facaina ñaiana cacade.

### *Jusiñamui caina isiruite*

<sup>28</sup> Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uiñoticaí.

<sup>29</sup> Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena.

<sup>30</sup> Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticaí.

<sup>31</sup> Iese caina itataja jira, Jusiñamuidi cai facaina illa jira, bu cai facaina iñellena, damamai iesedicaí.

<sup>32</sup> Jusiñamuidi ie Jitona duere sefuillamona jillotañede; iadedi namie jitailla jira, cai facaina ie Jitona orede, cairi fiodaillena. Ie muidona naimie dibeimo marena cai ille rafuena caimo jiai iite.

<sup>33</sup> Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite.

<sup>34</sup> Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite.

<sup>35</sup> Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meineia, Cristo caina nia isiruite.

<sup>36</sup> Iena Jusiñamui facaina lloraima micori jaie cuega: Jusiñamui muidona caina jaca meinetimaci, mercadomo toica llaudaiaí fallena illa isoi cuega.

<sup>37</sup> Cristo caina isiruilla jira, caina naimie canuamona, naga bie isoide rafue caimo sua, cai comeciái ocuiñocana cai jailla.

<sup>38</sup> Jusiñamui caina isiruite. Naimiemonona jaca budí caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaídi, Taifedi, Janabadi Jusiñamui isiruillacinomonona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomonona caina baironide.

<sup>39</sup> Monamo ite radi Jusiñamui isiruillacinomonona caina baironide. Eniruemo ite radi Jusiñamui isiruillacinomonona caina baironide. Nana Jusiñamui finoca radi Jusiñamui isiruillacinomonona caina baironide. Cai Nama Cristo Jesúmo cai duilla jira, Jusiñamui caina isiruillana uiñoticaí.

## 9

### *Jusiñamuidi judúuai railla cominina fetode*

<sup>1-2</sup> Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comeciaina uiñotajamona, iena uiñotiticue. Cue cominiri sunaiticue.

<sup>3</sup> Cue comini Cristo rafuena ñinoiacañedimaci. Ie muidona Jusiñamui rícaillifue anamo birui itimaci. Naiemonona naimaci jilloillena, naimaci duere sefuillicino ifomo cue iticuedena, cuemonona mare. Naimacidi cue amatiaí.

<sup>4</sup> Israel railla cominidimaci. Jiaicidi judúuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena cioidimaci. Iena



naimaci ñnollena, Moisés micorimo Jusiñamuidi rafuena jiai llote. Naimiena sedallena jiai llote. Naimaci dine naimaci jilloitaraimana oretallena jiai llote.

<sup>5</sup> Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidecue.

<sup>6</sup> Cai cominimo Jusiñamuidi ie uaina llote; iadedi nana cai comini iena ñnoñena jira: “Jusiñamui ie lloga uaina finoñede” raiñeiticai. Jusiñamuina naimaci raise ñnoñena muidona, nana Israel micorimona comuide cominidi Jusiñamuimo duiñedimaci.

<sup>7</sup> Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruia”.

<sup>8</sup> Naie lluamona nana Abraham micorimona comuidinona ie uruiañenana uiñoticai. Jusiñamui lloga uaina ñnotinodi naimie ua uruia.

<sup>9</sup> Jusiñamuidi Abraham micorimo jaie llote: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” llote. Ie mei iese suide.

<sup>10</sup> Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaiaia micorina jocode. Nano doforamiedi Esaú micori. Jaiamiedi Jacob micori.

<sup>11-13</sup> Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micori Jusiñamui lluaña jiai cuete: “Jusiñamui llote: ‘Jacobna eo isiruiticue; iadedi Esaúna janore isiruiticue’ llote”. Naie iaiaia micori nia jeiciñenia, iaiaia micori marecinona nia finoñenia, iaiaia micori marañedicinona nia finoñenia, Jusiñamuidi iaiaia micorina iese llote. Ie finoca rafuemona Jacob micorina fetode; iadedi Jusiñamui jitailla jira, Jacob micorina fetode.

<sup>14</sup> “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede.

<sup>15</sup> Jusiñamui bie isoide rafuena Moisés micorimo llote: “Cue dinena cue jitaillanona duenaiticue; ia cue dinena cue jitañenanona duenaiñeiticue” llote.

<sup>16</sup> Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite.

<sup>17</sup> Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

<sup>18</sup> Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena ñnotañede.

<sup>19</sup> Nibai comeciaina facadomo: “Cominina iese Jusiñamui itataia, ¿bue ñellena naimacina duere finoacade?”

<sup>20-21</sup> Iese comeciaina facañeno. ¿Ñiese nainona naimiemo ducañitomo? Ero, jñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode.

<sup>22</sup> Ie isoide. Nana comini dajena eruaiñedicai. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uiñotaacade; iadedi naimacina nia duere finoñede.

<sup>23</sup> Cominina Jusiñamuidi jiai duenaila jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate.



<sup>24</sup> Jusiñamui caina iese itatate. Da judíuaina iese itatañede; ie iadedi judíuainēdinona jiai iese itatate.

<sup>25</sup> Jusiñamui iena jaie llua Oseas micorí jaie cuete:  
Cue comiñēdinodi cue cominina jaitimaci. Isiruiñeganona isiruiticue.

<sup>26</sup> Dane jiai cuete:

Navui cue comiñēdomoi; iadedi jiaie comini omoina ico lloitimaci:  
“Naimacidi jaca cajede cai Jusiñamui ie uruiaidimaci” lloitimaci  
cuete.

<sup>27</sup> Isaías micorí railla lloaíma jaie cuete: “Monailai fuemo conillie eo ite. Ie isoi Israel micorí uruiaí eo jebuitimaci; iadedi Jusiñamuidi nana naimacina jillobitañeite. Dajeriena jillotajanona,

<sup>28</sup> jiaíno mo ie lloga uaina raire finoite. Naimacina duere finoite” cuete.

<sup>29</sup> Isaías micorí jiai cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiai jaie cuenode.

Naimaci micoriái isoi iñedicaí, nana cai cominina naimiedi duere finoñena jira.

### *Judíuaidi Cristo rafuena jitañēdimaci*

<sup>30</sup> Biemo comeciaina faca. Judíuainēdinodi Jusiñamui jitailla isoi, marena illana navui uiñoiacaiñēdimaci; iadedi iena jai uiñotimaci. Jesucristona naimaci ñnuamona, marena illana jai uiñotimaci.

<sup>31</sup> Jusiñamui jitailla isoi marena naimaci illena, judíuaidi Moisés micorí llogacinodo jaidimaci; iadedi Moisés micorí llogacinona naimaci raise ñnoñena jira, marena illana jaca uiñoñēdimaci.

<sup>32</sup> Naimaci finoca rafuemonona marena iacadimaci. Marena naimaci illena, Jesucristona ñnoiacaiñēdimaci. Naimie muidona marena iñēitimaci.

<sup>33</sup> Isaías micorí iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñēitimaci.

Naimiena naimaci ñnoñenia, faifitimaci;

iadedi naimiena ñnotinodi tainona ñnoñēitimaci.

Suubicaiñēitimaci” llote.

## 10

<sup>1</sup> Cue amatiaí, judíuái comini jilluana eo jitaídicue. Jusiñamui díga cue ñaía, iena jicadícue.

<sup>2</sup> Jusiñamui jitaillacinona eo finoacadimaci. Iena uiñotícue. Iena finoacadimaci; iadedi iena finuana raise uiñoñēdimaci.

<sup>3</sup> Jusiñamui naimacina marena itatallena uiñoñēdimaci. Naimaci finoca rafuemonona marena iacadimaci. Jusiñamui llua isoi jaiacaiñēdimaci.

<sup>4</sup> Nana Cristona ñnotimiedi Moisés micorí llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

<sup>5</sup> Moisés micorí jaie cuete: “Naimie marena illena, cue lluado jaidimiedi jaca iite, cue llua naimie raise ñnoía” cuete.

<sup>6</sup> Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticaí. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticaí.

<sup>7</sup> Fiodaitino dine jaiticaí, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode.

<sup>8</sup> Jusiñamui uai llote: “Naie rafue cai ðine jai ite. Iena jai uiñoticaí”. Cai jilloillena Cristona cai ðnuana birui lloticaí.

<sup>9</sup> Jiaie cominimo: “Cristodi cai Nama” omoi lloia, Cristo fodaillamona Jusiñamui naimie jillotajana omoi ðnoia, jilloitomoí.

<sup>10</sup> Cai comecimona cai ðnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

<sup>11</sup> Isaías micori iena jaie cuete: “Cristona ðnotinodi tainona ðnoñeitimaci. Suubicaiñeitimaci” cuega.

<sup>12</sup> Naie rafuedi nana cominina ñaite. Judíuaina ñaite. Judíuaiñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite.

<sup>13</sup> Cristodi naga naimiemo jicanotimiena jillotaite;

<sup>14</sup> iadedi Cristona naimaci nia ðnoñenia, naimiemo jicanonidimaci. Cristo naimaci facaina fodailla rafuena naimaci nia cacaiñenia, naimiena ðnonidimaci. Naimacimo naie rafuena jiaie comini lloñenia, iena cacaiñeitimaci.

<sup>15</sup> Jusiñamui ie rafue llorainina jai orede. Isaías micori iena jaie cuete: “Mare rafuena llotino cai ðine billano, eo iobidicaí” cuete.

<sup>16</sup> Iese cuete; iadedi ailluena comini naie rafuena nia jitaiñedinaci. Isaías micori iena jiai jaie cuete: “Jusiñamui, ailluena comini cai lluaña ðnoiacañedinaci” cuete.

<sup>17</sup> Cai lluaña Cristo rafuena cacadimaci. Cristo rafuena cacajamona, damierie naimiena ðnotimaci.

<sup>18</sup> Judíuai comini naie rafuena jai cacadimaci. Jusiñamui facaina lloraíma micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci  
cuete.

<sup>19</sup> Judíuai comini naie rafuena cacadimaci; iadedi iena ðnoñedinaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedinno ðiga uradoitomoí.

‘Naimaci abina uiñoñedinaci’ raitomoí;

iadedi cue rafuena naimaci feiñua jira, naimaci ðiga iciritomoí” llote.

<sup>20</sup> Isaías micori marefodo jiai cuete:

Jusiñamui llote: “Cuena jenoñedinno cuena jai baitimaci.

Naimacina cue jilloitallena cuena jicanoñedinomo jai bairedicue” llote.

<sup>21</sup> Jusiñamui judíuai cominina jiai llote: “Naimacina cue ðine jaca uaidoticue; iadedi ðnoiacañedinaci. Cuena jitaiñedinaci” llote.

## 11

### *Judíuai cominimona dajerie ðnoitimaci*

<sup>1</sup> Jusiñamuidi judíuaina fañonocailamo omoi comeciaina facañeno. Judío imiedicue. Abraham uruiai micoriaimona comuidicue. Benjamín railla nairai imiedicue.

<sup>2</sup> Naimacina jaie naimie fetua jira, Jusiñamui judíuaina fañonocaiñede. Elíamo jaie ite rafuena uiñotomoí. Jusiñamuimo naimiedi judíuaina llote:

<sup>3</sup> “Cue Nama, o facaina lloraini micoriaina meinetimaci. Ona cai seda janona judaidimaci. Dama cue fiebidicue. Cuena jiai meineiacadimaci”.

<sup>4</sup> Jusiñamui ðinena uai ote: “Dama iñedio. Siete mil ðñiaí cue ðibeimo nia eenoticue. Baal railla jiraraina jaca sedañedinaci. Cuena nia sedadimaci” llote.

<sup>5</sup> Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci.

<sup>6</sup> Naimacina duenaillamona, naimacina fetode. Naimaci finoca rafue muidona naimacina fetode. Naimaci finoca rafue muidona naimacina fetodena, naimacina duenaillamona naimacina fetode.

<sup>7</sup> Ie jira iena iese lloiticue. Ailluena judúuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñnoiacañedimaci.

<sup>8</sup> Jusiñamui facaina lloraini micoriai iena jaie cuega: “Jusiñamuidi naimacina abina uiñoñede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacañedimaci. Birui iese nia itimaci” cuega.

<sup>9</sup> David micori iena jiai llote:  
Naimacimo aillue ra illamona, Jusiñamui naimacina duere finoite.

<sup>10</sup> Naimaci comeciai Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

### *Judúuañedinomona dajerie ñnoitimaci*

<sup>11</sup> Naimie rafuena judúuai comini jitañena jira, Jusiñamui naimacina duere finode; iadedi naimacina sofeñede. Jusiñamuina judúuai ñnoñena jira, Jusiñamuidi judúuañedinona jai jillotate. Naimacina jai jillotate, judúuai dinena judúuañedinona uradoillena. Uradoillamona Jusiñamuidi naimaci naimiena ñnollena jitaide.

<sup>12</sup> Cristona judúuai jitañena jira, Jusiñamuimona judúuañedinodi diga marecinona birui feiñotimaci. Cristo dibeimo ico judúuai ia, Jusiñamuimona judúuañedino ailluena feiñoitimaci.

<sup>13</sup> Judúuañedino, omoimo rafuena lloiacadicue. Omoi dine Jusiñamuidi cuena orede. Cue maijari eo marena ñaiticue,

<sup>14</sup> cue comini cuena uradoillena, Cristona dajerie ñnotallena.

<sup>15</sup> Cristona naimaci nia ñnoñena jira, judúuañedino jai ñnotimaci. Cristona ico judúuai ñnoia, Jusiñamui diga jaca iitimaci.

<sup>16</sup> Janore jisa juilliruñu marenia, nana juilliruaidi mare. Riara ie jainauai marenia, nana ie igailai mare. Judúuaidi ie isoidimaci. Naimaci jaiagai micoriai jainauai isoidimaci. Naimaci jaiagai marenia, naimacidi jiai mare. Birui ite judúuaidi igailai isoidimaci.

<sup>17</sup> Taide igailaidi ie amenamo jai duiñede. Ie isoidimaci. Naimacimona Cristona jaino ñnoñena jira, Cristomo jai duiñedimaci. Sotaca riara isoi, naimaci ifomo itomoi. Ie jira Jusiñamuimona rafuena jai feiñocabitomoi.

<sup>18</sup> Naimaci ifomo omoi illa jira, abina uradoiñeno. Igailaimona jainao cajellena, ie ijina oñede; iadedi iemo duilla jira, jainomona igailai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feiñocabitomoi.

<sup>19</sup> Comeciaina facadomoi: “Taide igailai ifomo iticai isoidicai. Jusiñamui judúuaina oni dotade, caina fetollena”.

<sup>20</sup> Uanaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui.

<sup>21</sup> Naimiena naimaci ñnoñena jira, judúuaina duere finode. Naimiena omoi ñnoñenia, daje isoi omoina duere finoite.

<sup>22</sup> Biemo comeciaina faca. Naimiena ñnoñedinona jai duere finode; iadedi omoina duenaite. Naimiena ñnocana omoi jaia, naimie omoina nia duenaite. Iese omoi jaiñenia, naimie omoina dotaite.

<sup>23</sup> Judíuai Cristona ñnoñeno navui jaidimaci: iadedi Cristona naimaci birui ñnoia, naimie dibeimo Jusiñamui naimacina itatarede, igai riaramo sotaja isoi.

<sup>24</sup> Ailli riarana cueticue. Naie amenamo nano duiñedomoi. Judíuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judíuaina abido oite.

### *Eo ailluena judíuai jilloitimaci*

<sup>25</sup> Bie rafuena omoi uiñuana jitaidicue. Iena navui uiñoñedicaí. “Judíuai baifemo faiticaí” omoi raiñellena, buena omoimo lloticue. Diga judíuai Cristona birui ñnoiacaiñedimaci. Jusiñamui jitailla diese judíuaiñedino jillua facaisena, iese iitimaci.

<sup>26</sup> Ie mei eo ailluena judíuai jilloitimaci. Jusiñamui facaina lloraini micoriai iena cuetimaci:

Jerusalémona cai Jilloitaraíma biite.

Jacob micori uruiaímona jeacinona dotaite.

<sup>27</sup> Naimaci jeacinona oni dotajanona, Jusiñamui jaie lloga uai suite.

<sup>28</sup> Cristona birui ñnoiacaiñedimaci. Jusiñamuina enoidimaci. Jusiñamuina naimaci jitaíñena jira, naimie omoina fetode. Ie jira jillodomoi; iadedi Jusiñamuidi judíuaina nano jaie fetode. Naimaci jaiagai micoriaímo ie lloga uaina jira, naimacina nia isiruite.

<sup>29</sup> Jusiñamui ie lloga uaina saiñede. Naimacina fetua jira, naimacina faínonocaiñeite.

<sup>30</sup> Jusiñamuina navui ñnoñedomoi; iadedi Jusiñamuina naimaci ñnoñena jira, Jusiñamui omoina jai duenaite.

<sup>31</sup> Jusiñamuina jai ñnoñedimaci; iadedi omoina naimie duenailla isoi, Jusiñamuidi naimacina ico jiai duenaite.

<sup>32</sup> Jusiñamui nana comínina naimiena ñnoñenana uiñotade, naimacina naimie duenaillena.

<sup>33</sup> Jusiñamui caína eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicaí. Naimie finoca rafuena raise jiai uiñoñedicaí.

<sup>34</sup> Jusiñamui facaina lloráíma micori iena jaie cuete: “Jaca buna cai Nama Jusiñamui comeci facajacinona uiñoñede. Jaca buna naimiemo ie finoca rafuena lloñede.

<sup>35</sup> Jíairuido íbana feiñollena, jaca buna naimiemo rana fecañede” cuete.

<sup>36</sup> Naga ra naimiemo illa jira, naga ra naimiemona bite. Naga rana finode. Naimiemo iobillacinona cai fecacabillasa. Iena jitaidicue.

## 12

### *Jusiñamui anamo raise omoi i*

<sup>1</sup> Cue amatiai, omoimo bie rafuena lloticue. Jusiñamui caína duenailla jira, omoi jeanide comeciáímona, naimie jitaílle rafuena omoi finuamona naimie anamo raise omoi i. Naimie jitaílla isoi omoi i. Naimiedi omoi iese illana gaide. Omoi comeciáímona naimiena raise omoi seda.

<sup>2</sup> Cristona uiñoñedino isoi omoi iñeno; iadedi omoi comeciái iuaina meiduanona, jiaie rafuedo mai omoi jai. Ie mei Jusiñamui jitaílla rafuena finuana uiñoitomoi. Mare rafuena finuana uiñoitomoi. Naimiena iobitajacinona jiai uiñoitomoi. Eo mare rafuedo jaillana uiñoitomoi.

<sup>3</sup> Jusiñamui cuena duenaillamona, bie rafuena omoimo cue llollena, naimie uai cuemo ite. “Jiaie comíní baifemo faiticue” raillamo o comecina facañeno;

iadedi: “Nie isoidimiedicue” o raillamo o comecina raise faca. Jusiñamuimona o feiñoga diese ñnuacinomo o comecina faca.

<sup>4</sup> Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiade.

<sup>5</sup> Ie isoide. Cristona jai ñnoticai. Aillosiedicai; iadedi daajena naimiemo jainaiaidicai. Dani caimo jiai jainaiaidicai.

<sup>6</sup> Jusiñamuidi daje isoide uaina naimie dibeimo cai maijillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise llono. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue.

<sup>7</sup> Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua.

<sup>8</sup> Comeci ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiailamona, iese coninina canocana jaiticai.

### *Cristo rafuedo cai jailla*

<sup>9</sup> Omoi comeciainomona nana cominina isirui. Marañedicinona gaiñeno; iadedi mare rafuedo omoi jai.

<sup>10</sup> Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

<sup>11</sup> Cristo rafuena sefuiruiñeno finocana omoi jai. Cai Namana iocire seda.

<sup>12</sup> Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

<sup>13</sup> Jiaie creyentiai rania, naimacina cano. Omoi jofuemo creyentiai ria, naimacina nafue.

<sup>14</sup> Jusiñamui dibeimo naimaci marena illena, omoina duere finodinona Jusiñamuimo jii. Naimaciri marena ñaino. Naimacina faidoñeno.

<sup>15</sup> Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

<sup>16</sup> Daje isoi omoi comeciiai lloillamona uri omoi i. Abina birioicaiñeno. Jamai bue isoidino diga nabairi. “Jiaie comini baifemo uiñoticai” raiñeno.

<sup>17</sup> Jiaie comini omoina jeare finoia, naimacina daje isoi jeare finoñeno. Ibana oñeno. Omoi marena illana jiaie comini uiñollena, marena omoi i.

<sup>18</sup> Omoimona rafuena suiñoñeno. Nana comini diga uri omoi i.

<sup>19</sup> Cue isiruigano, bu omoina jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. Ibana oiticue’” cuete.

<sup>20</sup> Ibana oñeno. Jusiñamui facaina lloraima iena jaie jiai cuega: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite.

<sup>21</sup> Jiaie comini omoina jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomo.

## 13

<sup>1</sup> Nana illaicominina naimaci ifomo Jusiñamuidi itataja jira, illaicomini lloga uaina nana cai ñnua.

<sup>2</sup> Illaicomini uaina bu ñnoñenia, Jusiñamuina jiai ñnoñede. Ie mei Jusiñamui naimiena duere finoite.

<sup>3</sup> Mare rafuena finodinodi illaicomina jaciruiñedimaci; iadedi maraiñede rafuena finodino naimacina jaciruitimaci. Omoina duere finoñellena, mare rafuena finocana omoi jai. Iese omoi jaia, omoina marena ñaitimaci.

<sup>4</sup> Jusiñamui facaina omoina canodimaci. Maraiñede rafuena omoi finoia, naimacina jacirui. Omoina duere finollena, naimacimo uai ite. Maraiñede rafuena finodimiena Jusiñamui facaina duere finoitimaci.

<sup>5</sup> Ie jira naimaci uaina ñino, Jusiñamuimona omoi duere sefuiñellena. Omoina: “Mare” jiai raitimaci.

<sup>6</sup> Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

<sup>7</sup> Gobierno omoina ibataia, iena iba. Illaicominimo iobillacinona feca.

<sup>8</sup> Ra omoi oia, ibaño jaiño; iadedi conina omoi isirui. Jiaie comina isiruitimiedi nana Jusiñamui lloga uaina jai finode.

<sup>9</sup> Moisés micori diga lletarafuena jaie cuete: “O aiñede riño diga iño. O iniñede ima diga iño. Jiaimiena meineño. Rana fiño. Jiaimemo ite rana nicidoño” cuete. Jiai lletarafue ite: “Dani omoi abiaina omoi isiruilla isoi, jiaie comina omoi isiruilla”. Bie lletarafuena omoi ñinoia, nana lletarafuena jai ñnotomoi.

<sup>10</sup> Jiaie comina omoi isiruia, naimacina jeare jai finoñedomoi. Jiaie comina omoi isiruia, nana Jusiñamui lloga uaina jai ñnotomoi.

<sup>11</sup> Iena birui cai finua. Jesucristo billiruidi iaiei jai ite. Naimiena cai nano ñnua facaiseconi, naimie billiruimo cai comeciaina facadica; iadedi nagarui naimie billirui iaiei iñoicaide.

<sup>12</sup> Jesucristo nia dane biñena jira, eniruemo cai illa jira, jitreñonomo itica; isoidica. Naimie bia, naimie diga cai illemona, useredonomo raie ja itica; isoitica. Ie jira jeacinona finocana cai jaillana mai cai fañonocailli. Jesucristo rafue anamo raise cai illesa.

<sup>13</sup> Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena.

<sup>14</sup> Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

## 14

### *Jiaie creyentena jeare ñaiño*

<sup>1</sup> Cristona ñnotimiena omoi dine biade, naimiena raise feiño. Naimie Cristona nia raise ñnoñena, naimiena nafue; iadedi omoi isoi naimie ñnoñena, conima uina caitaño.

<sup>2</sup> Dajerie naga rana gutimaci; iadedi jiaimie difai guiga rana guite. Naimie riñede. Ie comecina facade: “Cue ria, jeacinona jai finoiticue”.

<sup>3</sup> Naga rana guiñedimiena miño. Naga rana gutimiena miño. Jusiñamuidi naimacina jai feiñote. Ie jira miño.

<sup>4</sup> Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi railanona, Jusiñamuidi naimacina canoite.

<sup>5</sup> Dajerie creyentia; comeciaina facadimaci: “Judíuai rafue finuaruilla; Jesuñamuina sedajitica; nairuilla; jairuilla; baifemo ualla jira”. Jiaño raitimaci: “Nagarui daje isoide” raitimaci. Nagamie ie comecina raise facajamona,

<sup>6</sup> cai Namana iobitallena, nagamie ie jitaillaruimo cai Namana sedaite. Naga rana gutimie iobillacinona Jusiñamuimo fecajano, cai Namana iobitate.



Naga rana guiñedimie iobillacinona Jusiñamuimo fecajano, cai Namana jiai iobitate.

<sup>7</sup> Cristomo cai duilla jira, dani cai jitailla rafuena finonidicai. Cai fiodailliruina jiai llonidicai.

<sup>8</sup> Naimiedi cai finolle rafuena ocuide. Cai fiodailliruina jiai lloite. Naimiemo cai duilla jira, iese iticai.

<sup>9</sup> Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiai iiticai.

<sup>10</sup> Naimie baifemo omoi iñena jira, jiaie creyentena miñeno. Naimie uaina caitaño. Naimiedi Cristo dibeimo ite. Jusiñamui uicomo nana ico iiticai. Jusiñamuidi marañedinona duere finoite. Maredinona duere finoñeite.

<sup>11</sup> Isaías micori jaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

<sup>12</sup> Nainomo Jusiñamuimo nana cai finouiga rafuena lloiticai. Ie jira jiaie creyentia digamarena omoi i.

*Jiaie creyentena jeacino finoi raillano, mare rafuedo cai jailla*

<sup>13</sup> Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla.

<sup>14</sup> Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue ríia, jeacinona finoñedicue. Iena uiñoticue; iadedi jiaimie comecina facade: “Biena cue ríia, jeacinona jai finodicue”. Naimie comecina iese facajamona, iena naimie ríia, naimiemona jeacinona jai finode.

<sup>15</sup> O riga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riño, naimiena Jusiñamuina fainonocaitañellena.

<sup>16</sup> Ie jira o jitailla rana finoño. Jiaie comini ona miñellena, naie rana riño.

<sup>17</sup> Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite.

<sup>18</sup> Iese cai jaia, Cristona raise sedadica. Jusiñamuina iobitadica. Jiaie comini caina marena jiai ñaitimaci.

<sup>19</sup> Ie jira uri icana cai jailla. Dani cai comeciaina ocuiñocana cai jailla.

<sup>20</sup> Omoi ríiacaga ra muidona, jiaie cominina Jusiñamuina fainonocaitaño. Naga radi mare, ríllena; iadedi bue isoide omoi ríia muidona, jiaimie Jusiñamuina fainonocaia, jeacinona jai finodomo.

<sup>21</sup> Bue isoide omoi ríia muidona, jiaimie jeacino finoi raillanona, iena riño. Bue isoide omoi jirua muidona, jiaimie jeacino finoi raillanona, iena jiroño. Bue isoide omoi finua muidona, jiaimie jeacino finoi raillanona, ie isoide omoi finoño. Naimiedi Cristomo jai duide.

<sup>22</sup> Mare ra omoi finoa, omoi comeciaina iena uiñotomo. Jusiñamuidi omoi comeciaina uiñua jira, iena marefodo lloño. Omoi comeciaina jeacinona omoi finoñenana uiñotomo. Ie jira iocire itomo.

<sup>23</sup> “Nie isoide ra cue ríia, jeacinona finodicue” raillanomo bu iese comecina facaia, iena naimie riñena. Iena naimie ríia, Cristona naimie raise finoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

## 15

*Jiaie creyentena cai canua*

<sup>1</sup> Cristo rafuedo raise jaidicai; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitaille rafuena finoñeiticai;

<sup>2</sup> iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena.

<sup>3</sup> Eniruemo navui naimie ia, Cristo ie jitailla rafuena jiaí finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiaí cuete: “Jusiñamuina jeare ñaíacadimacimo, cuena jiaí jeare ñaitimaci” cuete.

<sup>4</sup> Naiemona cai fueollena, naiemona cai comeciái ocuiñotallena, Jusiñamuina jiaie ciegafuiaídi caimo ite. Naiemona Jusiñamui illanomo cai illemo ocuridicai.

<sup>5</sup> Jusiñamui cai comeciaina ocuiñotade. Naimie coniniri omoína uri itatajana jitaídicue. Cristo Jesús llua isoi, omoi uri illana jitaídicue,

<sup>6</sup> daje isoi omoi comeciái lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaídicue.

*Judúuaiñedinodi Cristo rafuena jiaí cacadimaci*

<sup>7</sup> Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño.

<sup>8</sup> Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jiaie llote. Eniruemo billanona, Cristo iena fuiduaíbite.

<sup>9</sup> Judúuaiñedino Jusiñamuina iobitallena, Jusiñamui naimacina duenailla jira, Cristodi bite. David micori Cristo llua jiaie cuete:

Judúuaiñedino motomo cue illamona ona iobitaitimaci.

Ruamona cue muidona ona jiaí iobitaitimaci.

<sup>10</sup> Moisés micori jiaí cuete:

Judúuaiñedino, Jusiñamuimo duide comini diga iobi.

<sup>11</sup> David micori jiaí cuete:

Nana judúuaiñedino, Jusiñamuimo iobillacinona fecá.

Nana comini naimiemo iobillacinona fecacabillasa.

<sup>12</sup> Isaías micori cuete:

Isaí micori uruiaimona damie comuitajamona, naimiedi judúuaiñedinona sedaite.

Naimie naimacina jillobitallena, naimiemo ocuriritimaci.

<sup>13</sup> Jusiñamui iemo omoína ocuritate. Naimiena omoi ñnuanona, naimie omoína caimare itatajana jitaídicue. Uri itatajana jiaí jitaídicue. Iemei Jusiñamui Joreño naimie siño uai diga omoi jilluamo omoína ocuritaite.

<sup>14</sup> Cue amatiaí, omoína uiñoticue. Eo maredomoi. Cue lloga rafuena eo uiñotomoi. Coninina llofueredomoi.

<sup>15</sup> Iena omoi comecillena, dafuerie rafuena omoimo marefodo cueticue. Jusiñamui cuena fetuanona, ie rafuena cue llollena, cuena orede.

<sup>16</sup> Judúuaiñedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiaí maretaite.

<sup>17</sup> Jusiñamui dibeimo cue maijia jira, Cristo Jesús muidona cue maijari iobidicue.

18 Cue maijiana marefodo lloiticue. Judíuainedina Jusiñamuina inotallena, Cristodi cuena canode. Cue llwana cacadimaci. Cue illana cioidimaci.

19 Cristodi cuena siño rafuena finotate. Jusiñamui Joreño uaido cuena finotate. Iemei Cristona jai inotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue.

20 Nainomo Cristona nia uiñoñedino dine navui cue jaiacana jira, nainomo Cristo rafuena lluidicue. Jai cacadino illanomo cue jiacaiñena jira, nainomo lluaiñedicue.

21 Isaías micori biena jaie cuete:

Cristo rafuena nia cacaiñedinodi iena cacaitimaci.

Naimiena uiñoitimaci

cuete.

### *Romamo Pablo jaiacade*

22 Nainomo cue maijiacana jira, Romamo omoi dine nia jaiñedicue.

23 Diga nairaimo Cristo rafuena bene jai cue llua jira, cue maijille bene jai inede. Diga años omoi dine cue jiacana jira.

24 Españamo cue jaia, omoi dine jaiticue. Omoi diga nano nigarui caimare ñaiticue. Ie mei Españamo cue jaillena, cuena canoitomoi.

25 Omoi dine jaiticue; iadedi Jerusalémo ite creyentiaina cue canollena, nainomo nano jaiticue.

26 Macedoniamoi ite creyentiadi ucubena ofitatimaci. Acayamo ite creyentiadi ucubena jiai ofitatimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue.

27 Iena feaacadimaci. Judíuainedimaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci.

28 Naimacimo bie ucubena raise cue fecaja mei, Españamo cue jaillemona, omoi dine nano jaiticue.

29 Omoi dine cue ria, naimie rafuena cue lollena, Cristo cuena raise canoite.

30 Cue amatiai, cai Nama Jesucristomo omoi duilla muidona, Jusiñamui Joreño coniniña omoina isiruitaja muidona, Jusiñamuimo omoi jii, cue facaina jiai omoi jii.

31 Judeamo ite creyenteñedinomona cue jillobillena, Jerusalémo ite creyentiaino cue feaacalle ucubena naimaci raise feiñollena, cue facaina omoi jii.

32 Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue.

33 Jusiñamui omoina uri itatajana jitaidicue.

## 16

### *Romamo itinomo Pablodi ie uaina orede*

1 Febe raillañaiño omoi dine jaite. Naiñaiño omoi uiñuana jitaidicue. Naiñaiñodi creyente. Cencrea railla nairai inaiño. Cristo dibeimo maijiano, nainomo ite creyentiaina canocabide.

2 Cristomo omoi duilla muidona, jiaie creyentiaina cai feiñoiacacabilla isoi, naiñaiño raise feiño. Diga cominina naiñaiño canua jira, naiñaiño jitailla diese cano. Curna jiai canode.

3 Priscila dine cue uaina oredicue. Naiñaiño ini Aquila dine cue uaina jiai oredicue. Cristo Jesús facaina cue diga maijidiiaimaia.

<sup>4</sup> Cue facaina niadedi fiodaitiaimaia. Ie jira iaimaiairi iobidicue. Diga nairaimo judiuaifede creyentia itimaci. Cuemona Cristo rafuena cacadimaci. Cue facaina iaimaia niadedi fiodailla jira, iaimaiairi jia iobidimaci.

<sup>5</sup> Iaimaia jofomo rollena bitino dine cue uaina oredicue. Epeneto dine cue uaina jia oredicue. Cue isiruigamie. Asia railla eniruemo itinomona naimiedi Cristona nano inotimie.

<sup>6</sup> María dine cue uaina oredicue. Omoina canollena, omoi motomo maijide.

<sup>7</sup> Andrónico dine cue uaina oredicue. Junias dine cue uaina oredicue. Naie iaimaiaidi cue comini. Cárcelmo danomo navui iticai. Jesucristo oretaganodi iaimaiaina marena ñaitimaci. Naimiena nia cue inoñena facaise Cristona inotiaimaia.

<sup>8</sup> Amplias dine cue uaina oredicue. Cristomo naimie duilla jira, naimiedi cue isiruigamie.

<sup>9</sup> Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie.

<sup>10</sup> Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue.

<sup>11</sup> Herodión dine cue uaina oredicue. Naimiedi cue comini. Narciso cominimona dajerie inotimaci. Naimaci dine cue uaina oredicue.

<sup>12</sup> Trifena dine cue uaina oredicue. Trifosa dine cue uaina oredicue. Cai Nama facaina maijidiiaifua. Pérsida dine cue uaina oredicue. Cue isiruigañaño. Cai Nama facaina eo maijide.

<sup>13</sup> Rufo dine cue uaina oredicue. Cai Namana eo raise inote. Naimie ei dine cue uaina jia oredicue. Naiñaifodi cue ei isoide.

<sup>14</sup> Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentia dine cue uaina oredicue.

<sup>15</sup> Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomo ite creyentia dine cue uaina oredicue.

<sup>16</sup> Conini caimare omoi uaido. Diga nairaimo creyentia itimaci. Nana naimacidi omoi dine naimaci uaina oredimaci.

<sup>17</sup> Cue amatia, daje rafuena nia lloiticue. Omoi comecia daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño.

<sup>18</sup> Cai Nama Jesucristo facaina maijifnedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci.

<sup>19</sup> Ailluena cominidi Cristona omoi inuana uiñotimaci. Ieri iobidicue. Marecinona finuana raise omoi uiñuana jitaidicue. Marañedicinona omoi finuana jitaifnedicue.

<sup>20</sup> Jusiñamuidi omoina uri itatate. Naimie omoina canoite, Taifena anafellitallena. Cai Nama Jesucristo omoina duenaillesa.

<sup>21</sup> Omoi dine Timoteo ie uaina orede. Cue diga jia maijicabide. Lucio ie uaina jia orede. Jasón ie uaina jia orede. Sosípater ie uaina jia orede. Naimacidi cue comini.

<sup>22</sup> Tercidicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

<sup>23</sup> Gayodi ie uaina jia orede. Naimie jofomo ricabidicue. Creyentiaidi naimie jofomo rocabitimaci.

<sup>24</sup> Erasto ie uaina orede. Naimiedi bie nairai ie ucube eenoraïma. Cuarto ie uaina orede. Naimiedi jiai creyente.

*Jusiñamuimo iobillacinona jaca cai fecajasa*

<sup>25</sup> Cue mare rafue llua isoi, Jusiñamui omoi começiaïna ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede;

<sup>26</sup> iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini inollena, nana cominido bie rafuena llocana birui jaide. Jusiñamuidi jaca ite.

<sup>27</sup> Jusiñamuidi naga rana uiñote. Naimiemo Jesucristo mamecido iobil-lacinona jaca cai fecajasa. Mai. Macaibaite. Pablodice.

## CORINTOMO ITE CRISTONA HNOTINOMO PABLO NANO ORETAGA RABE

### *Corintomo ite creyentiaimo Pablo cartana orede*

<sup>1-2</sup> Corinto railla nairaimo ite creyentia, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebicaitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena.

<sup>3</sup> Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaia omoina uri jai itatatiamaia. Iena omoi uiñocana mai omoi jai.

### *Cristo muidona Jusiñamuimona ailluena feiñotica*

<sup>4</sup> Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaite. Ie jira naimiemo omoi facaina iobillacinona jaca fecadicue.

<sup>5</sup> Jusiñamui omoina duenaillamona, ie rafuena omoi lollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina eo canode. Omoina naimiemo ite rafuena raise uiñotade.

<sup>6</sup> Ie muidona Cristo rafuena raise inotomoi. Cristo rafuena cai jino llamona, naimiemo raise inofidomoi.

<sup>7</sup> Ie muidona Jusiñamuimona omoimo jaca buena fiebiñede, naimie dibeimo omoi raise majillena. Naimie dibeimo omoi raise majiamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocuirillanona, Jusiñamuimona ailluena rafuena feiñotomoi.

<sup>8</sup> Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiena inoñedinona duere finoite.

<sup>9</sup> Jusiñamui ie lloga uaina jaca finoite. Naimie inogamie. Naimie Jitona omoi nabaillena omoina fetode. Naimie Jitodi cai Nama Jesucristo.

### *Naimaci comeciai daje isoi lloñedimaci*

<sup>10</sup> Cue amatia, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciai daje isoi lloillana jitaidicue. Daje isoi omoi comeciai facajana jitaidicue.

<sup>11</sup> Cloé raillamie cominimona bie rafuena cue fidia jira, iese omoimo lloticue. “Omoi comeciai daje isoi iñedomoi” naimie llote.

<sup>12</sup> Omoimona damierie raitomoi: “Dani Pablo llofua dibecinodo jai jaidica”. Damierie raitomoi: “Dani Apolos raillamie llofua dibecinodo jai jaidica”. Damierie raitomoi: “Dani Pedro llofua dibecinodo jai jaidica”. Damierie raitomoi: “Dani Cristo llofua dibecinodo jai jaidica” raitomoi. Nana iese itomoi. Iemona omoi comeciai daje isoi iñedomoi. Cloé cominimona iese fididicue.



<sup>13</sup> Ero, diga omoi Jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fiodañedicue. Cue dibeimo omoi illena cue bautizañegaomoi.

<sup>14</sup> Omoína cue bautizañena jira, omoimo ite rafue cuemona comuiñena jira, iobidicue. Dama Crispona bautizadicue. Gayona jiaí bautizadicue.

<sup>15-16</sup> Estéfanos jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciáí lloiñenia, cue muidonañede.

<sup>17</sup> Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraíma isoi omoimo cue llofueticuedena, cue lloga rafuemo omoi comeciáina facañedomoi. Ie jira eo abina uiñoraíma isoi omoimo llofueñedicue. Cristo fiodaillamona, omoi jeacinomona naimie omoína jillotate. Iena omoi feitañenana jitaídicue.

*Cristo finoca rafuemoná Jusiñamui uai siñonana uiñoticaí*

<sup>18</sup> Cristona iñoñedinomona cruzmo Cristo fiodailla rafuedi jamaífue. Naimacidi faíficana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciáí meidorede. Caidi naie rafuena iñotidicaí.

<sup>19</sup> Ero, Jusiñamui facaina lloráima micori Cristona iñoñedinona jaie cuete: Jusiñamui llote: “Abina uiñoraíni imaci uiñuacinona saitaiticue. Abina baitadino imaci baitajacinona saitaiticue” llote. Ie muidona naie isoide comini jilloñenana jai uiñoticaí.

<sup>20</sup> Naie isoide comini uiñuacinomona jaca jillonidicaí. Abi uiñoraíma uiñuaciodi Cristo fiodailla rafue baífemo faíñede. Moisés micori cuega-fuena uiñoraíma uiñuaciodi Cristo fiodailla rafue baífemo faíñede. Uaina uaitatimie birui ite uiñuaciodi Cristo fiodailla rafue baífemo faíñede. Jusiñamuidi naimiena uiñoñedinomoi abí uiñuacinona jai jamaitate. Iena naimie jamaitajamona, naimaci uiñuaciodo naimaci jilloñenana jai uiñoticaí.

<sup>21</sup> Ie jitaillacino diese Jusiñamui finua jira, naimaci abí uiñuacinomona naimiena iñoñedinomoi. Ie jira naimie mare jitaillacinomona, naimiena iñotidicaí jai jillotate. Naimaci jeacinomona naimacina jai jillotate. Cristo rafuena caí lluamona iñotimaci. Jusiñamuina iñoñedinodi naie rafuena: “Jamaífue” raitimaci.

<sup>22</sup> Siño rafuena naimaci cioacana jira, judúuai railla cominidi iese raitimaci: “Siño rafuena Jusiñamui finoa, omoi lloga rafuena iñoticaí” raitimaci. Grieguái railla comini dinena raitimaci: “Omoi lloga rafuena caí abina uiñuacino ie isoi itena, iena iñoticaí” raitimaci;

<sup>23</sup> iadedi Cristo rafuena llocana jaidicaí. Cruzmo naimie jai fiodaillana lloticaí. Ie jira judúuaidi caí lloga rafue muidona iciritimaci. Naiena oiacaíñenano iciritimaci. Damie naimaci illaimana jaillemono ocuridimaci. Naimaci ocurillamie fiodaillamo naimaci comeciáina facañedinomoi. Cristo fiodailla jira, raitimaci: “Naimiedi caí ocuriñenamie” raitimaci. Judúuaiñedinomoi dinena raitimaci: “Omoi lloga rafuedi jamaífue” raitimaci. Ailluena comini caí lloga rafuena jitaíñedinomoi;

<sup>24</sup> iadedi Jusiñamui damerie judúuaina jai fetode. Dajerie judúuaiñedinomoi jiaí jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiaí uiñotimaci.

<sup>25</sup> Jusiñamui Cristona orede, caí jeacino facaina naimie fiodaillena. Jusiñamuina iñoñedinomona Cristo finoca rafuedi jamaífue. Ebinidífue. Caimona Cristo finoca rafuedi Jusiñamui iñoñedinomoi uiñuacino baífemo faíte.

<sup>26</sup> Cue amatiái, Jusiñamui omoína navui fetode; iadedi ¿nie isoidomoi? Jamai bue isoidomoi. Omoi comeciána iemo faca. Jusiñamuina ñnoñedinomona abina uiñoñedomoi. Omoi creyentiaí díbeimo eo abi uiñotino raise iñedimaci. Omoi creyentiaí díbeimo illaicomini raise iñedimaci. Omoi creyentiaí díbeimo ucuberedino raise iñedimaci. Jusiñamui ie isoidinona eo fetofede;

<sup>27</sup> iadedi abina uiñoñedino raillanodomoina fetode, eo abina uiñotino dinena meidailena. Illaicominiñedinona jiaí fetode, illaicomini dinena meidailena.

<sup>28</sup> Jamai bue isoidinona fetode, jamai bue isoiñedino baifemo failena. Jusiñamuimona jamai bue isoiñedinodi jamai comini.

<sup>29</sup> Ie muidona jaca buna Jusiñamui uicomo abina iedoñena.

<sup>30</sup> Caína ie cominina Jusiñamui jaitaja jira, Jesucristomo duidicái. Cristomona Jusiñamuina uiñoticaí. Cristo fiodailla jira, Jusiñamui caí jeacinona feitate. Iemona jeacino caí finoñellena, caína canocabide. Jusiñamuidi jeacino anamona caína jiaí jai jillotate.

<sup>31</sup> Jusiñamui facaina lloraima micorí iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

## 2

### *Pablodí cruzmo Cristo fiodailla rafuena llocabite*

<sup>1</sup> Cue amatiái, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue.

<sup>2</sup> Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue.

<sup>3</sup> Omoi motomo navui cue ia, meiruiocaillamona jacinaioidicue. Jusiñamui facaina cue raise jino lloñeni raillano jaciruioidicue.

<sup>4</sup> Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoína cue lloga rafue siñonana uiñotade.

<sup>5</sup> Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoína jillotaja jira, jai ñnotomoi.

### *Jusiñamui Joreñodo bie rafuena uiñoticaí*

<sup>6</sup> Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoi jiaí llofuecabitimaci. Cominimo jai ite uiñuacinodo llofueñedicai. Illaicomini uiñogacinodo llofueñedicai. Ico faifitimaci. Ico jiaí uainicaitimaci. Ie jira naimaci uiñogacinodo llofueñedicai;

<sup>7</sup> iadedi Jusiñamuimona abi uiñuacinona caí feiñuamona, iedo llofueticai. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico caí illena jitaide. Iena jaie caí uiñoñedicai. Jusiñamui jaca buna iena jaie uiñotañede.

<sup>8</sup> Birui ite illaicominidi Jusiñamuimo ite rafuena nia uiñoñedimaci. Iena uiñotimacidena, cruzmo caí ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caína iena uiñotade.

<sup>9</sup> Jusiñamui facaina lloraima micorí iena jaie cueba:  
Jaca buna naimiena ñnotino facaina Jusiñamui finoca rafuena cioiñede.  
Jaca buna iena cacaiñede.  
Jaca buna iemo comecina facañede

cuega. Jusiñamui rafuena uiñoñedino naie rafuena jaca uiñoñeitimaci; iadedi naimiena isiruitino naie rafuena uiñotimaci.

<sup>10</sup> Birui Jusiñamui caina iena uiñotade. Ie Joreño do caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

<sup>11</sup> Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

<sup>12</sup> Jusiñamuimona ie Joreño naie feiñotimaci. Jiaie cominimona naie Joreño naie feiñoñedimaci. Jusiñamui Joreño do caina Jusiñamui caimo caidiño fecaca rafuena uiñotade.

<sup>13</sup> Omoimo naie rafuena llofuecabitimaci. Cominimona fueoga uaido llofueñedimaci; iadedi Jusiñamui Joreño caimo llofua uaido llofuetimaci. Ie jira Jusiñamui Joreño ite cominimo naie rafuena llofuecabitimaci.

<sup>14</sup> Jusiñamuina ñnoñedinodi Jusiñamui Joreño mona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci.

<sup>15</sup> Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci.

<sup>16</sup> Jusiñamui facaina lloraíma micori iena jaie cuega: “Jaca buna Jusiñamui comecimo iticinona uiñoñede. Budi naimiena jiai llofuenide” cuega. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

### 3

#### *Danomo Jusiñamui ñibeimo maijidimaci*

<sup>1</sup> Cue amatiai, Jusiñamui Joreño anamo itinona omoi raise itomoidena, omoína llofueñedicue. Omoi jitaillacinodo nia omoi jailla jira, omoína llofueticue. Cristo rafuedo janore jai jaidomoi. Jusiñamui uruiaina jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaína omoi jailla mei, Cristo rafuedo eo jaiñedomoi.

<sup>2</sup> Feinide rafuena navui llofueticue. Eo feirede rafuena omoimo llofueñedicue. Omoína iena nia llofueñedicue. Omoi uruiái janore moonaiilla mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiña jira, Jusiñamuimona nia moonaiñedino isoidomoi.

<sup>3</sup> Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciai daje isoi lloñedomoi. Jusiñamuina ñnoñedino isoi nia itomoi. Jamai ebe isoi nia itomoi.

<sup>4</sup> Omoimona damerie: “Pablo llofua ñibecinodo jaidicai” raitomoi. Jiaíno: “Apolos raillamie llofua ñibecinodo jaidicai” raitomoi. Iese omoi raia, Jusiñamuina ñnoñedino isoi itomoi. Ie jira iese raiño.

<sup>5</sup> Jamai bue isoidicue. Apolos jiai jamai bue isoide; iadedi Jusiñamui ñibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco.

<sup>6</sup> Naie rafuena cue llofuiamona nano ñnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoína naie rafuena ñnotacana jaide.

<sup>7</sup> Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoína ñnocana jaitate.

<sup>8</sup> Daje uaina Apolos diga maijidicue. Coco maijia diese Jusiñamuimona coco íbana feiñoticoco.

<sup>9</sup> Jusiñamui facaina maijidicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate.

<sup>10</sup> Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue lluaamona Cristona ñnotomoi. Birui jiaimie omoina naie rafuena jai llofujete. Omoi comeciaino naie rafue raise itabillena, omoina llofujete. Bu omoina llofueia, omoi comeciaina marena illacinomo naimie comeciaina facajanona, omoina naimie llofuecabilla.

<sup>11</sup> Omoi jeacinomona omoi jilloillena, jaca daje rafue ite. Jiaie rafuedi ññede. Iena omoimo jai llofueticue. Naie rafuedi Jesucristona ññate.

<sup>12</sup> Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comeciaino raise itabiñede.

<sup>13</sup> Jusiñamuidi nagamie ie llofuiacinona ico lloite. Jesucristo abido bia, Jusiñamui ñie isoidicinodo naga naimie facaina maijidino luana lloite. Naimaci llogacinona eo facaciite.

<sup>14</sup> Ie mei Cristo rafuena raise atona llotinodi Jusiñamuimona ibana feiñoitimaci.

<sup>15</sup> Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo maijidimaci.

<sup>16</sup> Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentia.

<sup>17</sup> Cristo ñibeimona omoi creyentiaina bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie ñibeimona omoina itatatimiena duere finoite.

<sup>18</sup> Bie rafuedo omoi raise jaillena, ñani omoi abiaina jifueñeno. Creyenteñedinodo uiñuacinodo jaiñeno. Omoimona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedinodo uiñuacinodo omoi jaiñeno.

<sup>19</sup> Jusiñamuimona naimiena ñnoñedinodo uiñuacinodi jamaifue. Jusiñamui facaina lloraíma micori jaie cuega: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”.

<sup>20</sup> Jiai cuega: “Jusiñamuidi abi uiñotino railla comini imaci comeciaina facajacino jamaifueña uiñote”.

<sup>21</sup> Ie jira omoi llofuerainiri abi ñedoñeno. Jusiñamuimona nana rafue omoimo jai illa jira, naimaci abi uiñuacinodo abina ñedoñeno.

<sup>22</sup> Marena omoi comeciaina illacino jítai raillano, Cristo omoi ñine caina oretate. Cuena oretate. Apolona oretate. Pedrona oretate. Naiemona omoi ra ollena, omoi jítai raillano, eniruedi ite. Omoi jítai raillano, birui nana omoimo ite rafuedi suide. Omoi jítai raillano, jiairuido nana omoimo iite rafuedi suite. Nia omoi fiodañenia, Cristo omoina canoite. Omoi fiodaia, naimie ñine jaitomoi. Naiemona marena omoi comeciaina illacino jítai raillano, ua nana rafue omoimo jai ite.

<sup>23</sup> Cristomo omoi jainaiaila jira, naimie anamo itomoi. Jusiñamuimo Cristo jainaiaila jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

*Cristo fetocano naimie dibeimo maijide*

<sup>1</sup> Caimo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaie uiñoñedicai; iadedi naimie caina uiñotaga rafuena birui llofueticai.

<sup>2</sup> Ero, naga patródi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraini naimiena naimaci ñnuamona naimie rafuena raise llwana jitaide.

<sup>3</sup> Cue uaina omoi uaitañenia, iena omoi uaitaia, jiaino iena uaitaia, iemo comecina facañedicue.

<sup>4</sup> Cuemo nicino ia, iena uiñoñedicue; iadedi Cristomona cue comecimo jeacino nibai ite. Ia, naimie cuemo lloite. Iemona cuena duere finoite.

<sup>5</sup> Ie jira: “O llucino mare” cuemo lloñoeno. “O llucino marañede” cuemo jiai lloñoeno. Cai Nama nia abido biñenia, iena cuemo omoi lloñoeno. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite. Iemona naimaci maijia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloñoeno.

<sup>6</sup> Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina ciegafue llua isoi, omoi illana jitaidicue. Omoi llorainiri tainomo iobiñoeno. Omoi Cristo facaina llorainimona damie jiaie lloraima baifemo faiamo omoi comeciaina facañeno.

<sup>7</sup> Nana omoi llofuerainidi daje isoidimaci. Jusiñamuimona nana naimacimo ite uaina feiñotimaci. Dani naimaci comeciainona iena naimaci oñena jira, ie diga abina iedoñoeno.

<sup>8</sup> “Nana Jusiñamuimona iticinona jai feiñoticai. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticai” omoi comeciaina facadomo; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue.

<sup>9</sup> Jusiñamuidi nana omoina cue baifemo faitatate raillanomo cue comecina facadicue. Cristo rafuena llorainidicai; iadedi cue baifemo omoi faiamo cue comecina facadicue. Omoimona jamai bue isoidicai. Nana comini duere cai illamo raise eruaidimaci. Jusiñamui jaienisaiddi duere cai illamo jiai eruaidimaci.

<sup>10</sup> Cristo rafuena cai llua muidona, omoimona ebe isoidicai. “Cristo rafuena raise ñnuanona, iedo raise jaidicai” raillanomo omoi comeciaina facadomo; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomo; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomo. “Jiaie comini cairi iobidimaci” raillanomo omoi comecina facadomo; iadedi Jusiñamuimona iese iñedomoi.

<sup>11</sup> Cai guille buedi jaca iñede. Iniroinidicai. Jiaie comini caina duere finodimaci. Jofonidicai.

<sup>12</sup> Cai ra ollena, cai onolli diga duere maijidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai.

<sup>13</sup> Cai joreñoena jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciainia facadimaci; ia Cristo dibeimo ie rafuena nia llocana jaiacadicai.

<sup>14</sup> Bie carta cue cuamona, omoina meirutaiacañedicue; ia omoina nia llofueiacadicue. Isiruiga uruiaidomoi isoidomoi. Ie jira bie rafuena omoi raise uiñuana jitaidicue.



<sup>15</sup> Omoïna Cristo rafuena llofuellena, diga lloraini omoïmo ite; iadedi cuemona Cristo rafuena omoï nano cacaja jira, omoï moo isoidicue. Cue uruiaina jai jaidomoi isoidomoi.

<sup>16</sup> Ie jira omoïmo cue llogacinodo mai omoï jai.

<sup>17</sup> Iedo omoï jaillena, omoïna canollena, omoï dine Timoteona jai oredicue. Naimiena isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoï raise jaillena, naimiedi omoïna llofuate.

<sup>18</sup> “Pablo caina jaciruilla jira, naimie cai dine biñeite” raillanomo omoï comeciaina facajamona, omoïmona damierie jai abina biridomoi.

<sup>19</sup> Iese comeciaina facadomoi; iadedi Jusiñamui jitaia, omoï dine raire jaiticue. Ie mei ñie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemona iena uiñoiticue.

<sup>20</sup> Ero, jamai ñaiamona, Jusiñamui anamo naimie jitailla isoi iñedica; iadedi naimie finoca rafuedo cai jaillamona, naimie jitailla isoi iticai.

<sup>21</sup> Omoï dine ñco cue ria, ¿ñiese omoï diga ñaiticue? Cuemo llono. Cue lluana omoï ñnoñenia, omoïmo riire lloiticue. Cue lluana omoï ñnoia, omoïna cue isiruillamona, omoïmo fecuise lloiticue. Ie jira cuemo llono.

## 5

### *Pablo eo jearede rafuena finodimiena riire llote*

<sup>1</sup> Jiaie rafuena omoïmo lloiticue. Eo jearede rafue omoï motomo jai illana jai fididicue. Jusiñamuina ñnoñedino naie isoide rafuena finoñedimaci; iadedi omoïmona damie ie eicañona ote, ie aina.

<sup>2</sup> Jearede rafue omoï motomo ite; iadedi ñia abina ñedotomoi. Naie isoide rafue omoï motomo navui suilla jira, ¿bue ñellena sunañedomoi? Omoï rocabillacomo naimie bia, naimie fo billana rairui.

<sup>3</sup> Omoï dine iticuedena, bie rafue ñani omoï siadollena, omoï danomo ofillena lloticue. Omoï dine cue iñena jira, cue comecidi omoï dine ite. Bie rafuemo cue comeciina facaoidicue. Bie rafue omoï diga are siadoñeiticue; iadedi naie rafuena finodimiena cue ñaiana jai uiñoticue.

<sup>4</sup> Cai Nama Jesús facaina cue ñaiamona, naimiena ñaiticue. Ofillanona bie rafue omoï siadollena, omoï diga cue iacanana omoï comeci. Omoïna canollena, cai Nama Jesucristo omoï diga ite.

<sup>5</sup> Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo ñibeimo dane iite. Cristo ñco abido bia, naimiedi Cristo ñibeimo dane raise illa jira, Cristo naimiena duere finoñeite.

<sup>6</sup> Jearede rafue omoï motomo illa jira, ¿buena abina ñedotomoi? Janorede siritate ra juilliruai mo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoïmo ite jearede rafuemona oni omoï i, naiemona jearede rafuedo omoï jaisa.

<sup>7</sup> Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoï illena, omoï comeciaino ite jeacinona fañonocai. Jeacino anamo omoï jai illa jira, iena fañonocai. Pascua rafue facaiseconi judíuai cominidi toica llaudaijai fajamona, naimaci jeacino facaina Jusiñamui ñbana oñede. Cai facaina Cristo jai fiodailla jira, cai jeacino facaina Jusiñamui ñbana oñeite; iadedi ñemona naimiena nabaidicai. Ie jira jeacinona finocana cai jaiño.



<sup>8</sup> Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicínodo mai cai jailli.

<sup>9</sup> Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaia diga itiñaiñuai diga nabairiñellena lloticue.

<sup>10</sup> Nibai iena raise cacaiñedomoi. Ie jira iena dane lloticue. Cristona iñoñedinona ñaiñedicue. Naimaci aiñede riñoniai diga ia, naiñaiñuai iniñede iñiaia diga ia, naimaci rana nicidoia, rana naimaci fiaia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uiñoñedino illa jira, ¿ninomo niadedi iticai?

<sup>11</sup> “Cristona iñoticaia” raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaia diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoñeno.

<sup>12-13</sup> Cristona iñoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona iñotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

## 6

### *Cristona iñoñede juezmo jiaie creyentena llogidoño*

<sup>1</sup> Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaia dine jaiñedomoi, naicinona siadollena? ¿Bue ñellena Cristona iñoñede juez dine naimiena meiruiñeno llogidotomoi?

<sup>2-3</sup> Jesucristo abido bille mei, Cristona iñotinodicaidi Cristona iñoñedinona duere sefuillena lloticaia. Taife comini duere sefuillicinona ico jiaia lloticaia. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi?

<sup>4</sup> Nicino omoimo ia, ¿bue ñellena Cristona iñoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci.

<sup>5</sup> Omoi meidaillena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena.

<sup>6</sup> Iese finocabiñedomoi; iadedi nicino omoi creyentiaimo ia, Cristona iñoñedimie mo jiaie creyentena llogidocabitomoi.

<sup>7</sup> Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñoeno anamo ee. Naimiemona omoi duere sefuia, dama ite.

<sup>8</sup> Iese iñedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

<sup>9</sup> Jusiñamui sedajanomo naimiena iñoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede ima diga itino, jiraraina sedacabidino, daje isoide ima diga conima aifiedotino, daje isoide riño diga conioño aifiedotino,

<sup>10</sup> rana bainino ficabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci.

11 Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

### *Jearede rafuemona abina rairui*

12 Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentia iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi.

13 Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredica. Naiemona jeacino cai oñena jira, aimetaia, guiredica. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite.

14 Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abia diga caina ico jillotaite. Cai abi jaca illa jira, jearede rafuena birui cai finoñena.

15 Cristomo jainaiadica. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno.

16 Ie aiñede riño diga bu ia, ie ai illa isoi, jai dajena jaidiaimaia. Ie jira Jusiñamui jaie llote: “Riño diga iima illa jira, jai dajena jaidiaimaia” llote.

17 Cai Nama Cristomo bu duia, dajena jai jaidiaimaia. Jusiñamui Joreño iaiaimaiaimo illa jira, iaiaimaia comecei daje isoi jai lloide.

18 Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoia, naimie abimo jearede rafue finoñede.

19 Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentia. Jusiñamuimo jai jainaiadomoi. Ie muidona omoi jitaillacinodo jaiñeno.

20 Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

## 7

### *Pablodi iima ie aina ua rafuena ñaite*

1 Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiaie mare;

2 iadedi jeacino omoi finoi raillano, nagamie ie aina otena, jiaie mare. Nagañaiño ie inina otena, jiaie mare.

3 Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena.

4 Naiñaiño abi dañeñede; iadedi daño ie ini abimo jiaie duide. Naimie abi damañede; iadedi dama ie ai abimo jiaie duide.

5 Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comeceina raise o facallena, iemo omico comecei daje isoi lloillamona, diga irui illamona danomo omico iniacaiñenia, jiaie mare. Naie facaise

fuilla meinomo riño diga o iacanamona, dane danomo ini, Taife omi como ramo fai raillano.

<sup>6</sup> Dane lloiticue. Jeacinona omoi fino raillano, nagamie ie aina otena, mare. Nagañaiño ie inina otena, jiaie mare. Iese omoimo lloticue; iadedi iese ocuiñedicue.

<sup>7</sup> Ainidicue. Cue illa isoi omoi illana jitaidicue; iadedi daje isoiñedicaí. Jusiñamui caina itataja diese iese iticaí. Dajerie ainidimaci. Dajerie airedimaci. Dajerie ininidimaci. Dajerie iniredimaci.

<sup>8</sup> Nia ainidinomo lloiticue. Nia ininidinomo lloiticue. Feciñuaimo jiaie lloiticue. Ainidicue. Cue illa isoi omoi iacania, cuemona mare;

<sup>9</sup> iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie imamo o comecina facañellena, daje imana ono, o inina.

<sup>10</sup> Creyentiaimo nia lloiticue. Airedinomo lloiticue. Iniredinomo jiaie lloiticue. Cue uaido lloñedicue; iadedi caí Nama jaie llote: “Riño ie inina sofeñeno.

<sup>11</sup> Hima ie aina sofeñeno” llote. Iese llote; iadedi nie riño ie inina sofeia, jiaie imana naiñaiño oñena. Himana naiñaiño oiacania, ie ini diga dane abido illasa.

<sup>12</sup> Nia lloiticue. Caí Nama buena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono.

<sup>13</sup> Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiño llono.

<sup>14</sup> Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaiaiaia uruiaina, jiaie creyente iaiaiaia uruiaia isoi, omoi roracomo feiño.

<sup>15</sup> Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiema dotaño” naiñaiño llono. “Naimie jaillena rairuiño” naiñaiño llono. Sofeia mei, jai dajemo duiñediaiaiaia. Jusiñamui naga creyente uri illana jitaide;

<sup>16</sup> iadedi ie ini diga ie ai fiebia, ie ini creyentenamona, naiñaiño nibai creyentena jaite. Ie ai diga ie ini fiebia, ie ai creyentenamona, naimie nibai creyentena jaite.

<sup>17</sup> Iena lloticue; iadedi Jusiñamuimona ie feiñoega uaido nagamie jailla. Creyentiaina omoi jailla facaiseconi, omoi maijuilla ramo nia raise omoi maiji. Naga creyentiaia illanomo buena llofuecabiticue.

<sup>18</sup> Nia creyentiaina omoi jaiñenia, judíuaí isoi omoimona dajerie omoi abiaina detatatomoi. Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno;

<sup>19</sup> iadedi Jusiñamui uaina omoi inuamo omoi comeciaina birui faca. Jiaie rafue baifemo faite.

<sup>20</sup> Creyentiaina omoi jailla facaiseconi, omoi maijuilla ramo nia raise omoi maiji.

<sup>21</sup> Creyentiaina omoi jailla facaise omoimona dajerie patrón anamo itinodomoi. Nia patrón anamo itino isoi omoi jai. Iemo omoi comeciaina jarire facañeno. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai.

22 Cristona omoi ñnua facaise, patrón anamo omoi mona damierie navui itomoi; iadedi Jusiñamui omoi na fetode. Naimiena omoi ñnuamona, omoi jeacino anamo jai ñnedomoi. Patrón anamo omoi mona damierie navui ñnedomoi; iadedi Jusiñamui omoi na fetode. Ie jira naimie anamo jai itomoi.

23 Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo ñnenoi; iadedi Jusiñamui jitaillacino anamo i.

24 Cue amatiai, creyentaina omoi jailla facaiseconi omoi maijiuilla ramonia raise omoi maiji. Jusiñamui omoi na canuanona, jearede rana omoi maijiñenia, ñie isoide rana omoi maijia, Jusiñamuimona mare.

25 Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloñena jira, iena birui lloticue. Naimie cuena duenailla jira, naimie uaina ñnoticue. Ie muidona comini ñnogamedicue.

26 Birui duere omoi sefuilla facaise illa jira, omoi illa isoio omoi i.

27 Omoi mona bu airenia, naiñaiño na dotañena. Bu ainia, dama ainide. Riño na oñena;

28 iadedi o aina illena ñninide riño na o otiodena, jeacinona finoñedio. Omoi mona o ñnina illena ainide ñimana o otiodena, jeacinona finoñedio; iadedi aina bu ua mei, ñnina bu ua mei, eo duere maijiite. Iese omoi duere sefuiñellena, omoi mo iena lloticue.

29 Cue amatiai, biemo omoi comeciaina faca. Jesucristo abido dane billirui iairei ite. Naimie jitailla rafuena omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciai eo facaja.

30 Omoi mona damierie sunaia, damierie caimare ia, iemo omoi comeciaina eo facañeno. Damierie raruiaina ibaia, naieri eo iobiñeno.

31 Omoi mona damierie bene ite rana ebiruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

32 Omoi comeciai jarire ñnenana jitaidicue. Nia ainidimie abi juarede, dama Cristo rafuena maijillena. Naimiena iobitaiafade;

33 iadedi airedimie bene ite rafuemo ie comecina facade. Ie aina iobitaiafade. Naiñaiño mo ite rafuemo naimie comecina facade. Cristo rafuemo ie comecina jiai facade;

34 iadedi mena rafuemo ie comecina eo facallemo abi juanide. ñninidaiño abi juarede, ññaño Cristo rafuena maijillena. Nana naiñaiño comecimona naimiena iobitaiafade; iadedi ñniredaiño bene ite rafuemo comecina facade. Ie ñnina iobitaiafade. Naimiemo ite rafuemo naiñaiño comecina facade.

35 Aina uana rairuiñedicue. ñnina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

36 Ero, omoi mona naiñaiño oiacaña ñimamo ie moo, ie jisa caidiñeno fecaca. Naiñaiño jai moonalla jira, naiñaiño jitailla jira, naiñaiño na feca. Fecaia, ie moo jeacinona finoñede;

37 iadedi ñnina naiñaiño oiacañenia, naimie comeci llamona, ie comecina eo facajamona, ie jisa fecacaiñenia, jiai mare.

38 Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

39 Jiaie rafuena lloticue. Riño ie ñni ñna fiodañenia, naiñaiño naimiemo jaca duide. Ie ñni fiodailla mei, jiaie ñmana ie ñni ifomo naiñaiño oiacania, mare; iadedi creyentedimiena naiñaiño ua.

<sup>40</sup> Naie feciñodi iimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

## 8

### *Jusiñamuina eruaide jiraraimo llicisi fecaja rafue*

<sup>1</sup> Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damerie naie isoide llicisi riana: “Maraiñede” raitimaci. Creyentiamona Jusiñamuina eruaide jirarai jamai rana illa jira, damerie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie ríia, jiaie creyentiamo comecina facañede. Jiaie creyentiaina bu isiruvia, naimacimo ie comecina facade. Cristo rafuedo jiaie creyentiai raise jaillana jitaide.

<sup>2</sup> “Eo abina uiñoticue” ie comecina bu facaia, nia eo raise abina uiñoñede;

<sup>3</sup> iadedi Jusiñamuina ua cai isiruillamona, jiaie creyentiaina cai isiruvia, jai abina uiñoticai. Jusiñamui dinena caina jiai uiñotaacade.

<sup>4</sup> ¿Niese Jusiñamuina eruaide jiraraimo fecaca llicisina ñaiticai? “Jusiñamuina eruaide jirarai jaca cajeñenana uiñoticai” raitomoi. “Jusiñamui jaca dajede. Iena uiñoticai” raitomoi;

<sup>5</sup> iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci.

<sup>6</sup> Iena sedacabidimaci; iadedi cai dani Jusiñamuina sedacabidicai. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

<sup>7</sup> Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci ríia: “Naie jirarai sedadicaí” naimaci comeciaina facadimaci. Naie rafue naimaci raise uiñoñena jira: “Jeaçinona finodicaí” raitimaci.

<sup>8</sup> Ero, nie isoide llicisi cai ríamona, llicisi cai riñenamona, Jusiñamui caina feiñoñede. Naimiena cai iñuamona caina feiñoñote. Buena cai riñenia, buena cai ríia, jeaçinona finoñedicaí. Naiemona mareçinona jiai finoñedicaí.

<sup>9</sup> Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi ríia, naimiemona jeaçinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite.

<sup>10</sup> Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”.

<sup>11</sup> Omoi ama abido danomo jiaia, omoi muidona. Cristo naimie facaina fodaite; iadedi omoi finoca rafue muidona, omoi ama abido danomo jaite.

<sup>12</sup> Iese omoi finoa, omoi amana jeaçinona finotatomoi. Naimie comecina ocuiñoñañedomoi. Ie muidona Cristomo jeaçinona jiai finodomoi.

<sup>13</sup> Cristomo jeaçino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.



## 9

*Cristo facaina llorainidi naimaci jitailla rana jamai feñua*

<sup>1</sup> Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuenajaie fetua facaise cai Nama Jesúsna ciodicue. Creyentiaina omoi jailla jira, cai Nama facaina cue maijiana uiñotomoi.

<sup>2</sup> Jiaie comini Jesucristo oretagamiedicuena nibai uiñoñedimaci; iadedi omoi iena uiñotomoi. Cristona omoi iinua jira, Jesucristo cuena oretajana uiñotomoi.

<sup>3</sup> Cue llofuiacinona bu uaitaia, iese cue llofuiacinona riidoticue.

<sup>4</sup> Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa.

<sup>5</sup> Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiai macaria, omoi dine Pedro macaria, naimaci jitailla rana naimacimo jamai fecaidomoi. Ie jira, ¿niese cue jitailla rana cuemo jamai fecañeitomoi?

<sup>6</sup> Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi.

<sup>7</sup> Ero, soldadodi ie guille ibañede. Iena jamai feñote. Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue.

<sup>8</sup> Jamai comini uaido naiena llofueñedicue; iadedi Moisés micori cuela fuaimona iena fueotice.

<sup>9</sup> Naimie micori jaie cuela: “Jusiñamui llote: ‘Jurareta trigo oni juillena saisia, iemona ie guillesa, ie fuena maiñeno. Maiñenia, ie maijia fuemona guite’ llote”. Ie isoide. Omoi motomo cue maijia fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade.

<sup>10</sup> Cristo rafuena cue llofuecabilla jira, cue llua fuemona cue jitailla rana jamai cue feñua. Iemo ocuridicue. Ie isoide. Ie illimo bu maijia, naiemona riarra ollena, nainomo maijide. Iemo ocuride.

<sup>11</sup> Omoi motomo Cristo rafuedo omoi raise jaillena, navui llofueticue. Ie jira cue jitailla raruia omoimona jamai cue ua.

<sup>12</sup> Omoimona raruiaina jiaie lloraini feñocabilla jira, cuemona Cristo rafuena nano omoi cacaja jira, cue jamai jiai feñua; iadedi omoimona raruiaina jicañedicue.

Cue jitailla raruia cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruia oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaina jicañedicue.

<sup>13</sup> Ero, Jerusalémo judíuai comini Jusiñamuina sedauilla jofu ite. Nainomo naie comini toiniaina atiuidimaci, Jusiñamuimo fecallena. Moisés micori jaie llua isoi, naimaci jeacino facaina toiniaina fajanona fecadimaci. Nainomo maijuidino comini atica toiniaimona naimaci rillena, ibajanona ocabitimaci. Iena uiñotomoi.

<sup>14</sup> Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai llote.



15 Omoimona raruiaina jaca jicañedicue. Raruiái birui cue ollena, bie cartana jiaí cueñedicue. Dama cuemo ite ra diga iiticue. Omoimona iena feiñoticuedena, meiruioicaida feiñoticue. Omoimona cue feiñoñena jira, omoí facaina Cristo rafue cue llumona, abina iedoticue. Raruiái cuemo jamái omoí fecaía, ¿ñiese abina iedoiticue?

16 Jiaíe lloraini rana feiñua isoí cue feiñoía, Cristo rafuena cue llumona abina iedoñeiticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite.

17 Dama cue comeci jitaillamona Cristo rafuena cue lloiacania, Jusiñamui mona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue.

18 Ie jira, ¿ñiese ibana feiñoiticue? Ibana nibái feiñoiticue; iadedi omoímo Cristo rafue cue lloía, cuemona mare. Omoimona cue jitailla rana cue oñenia, cuemona mare.

19 Omoimona raruiaina cue feiñoñena jira, omoí anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo ðibeimo cue itatallena. Iese jaiñedicuedena, eo janore comini Cristo ðibeimo nibái jai itataticue.

20 Judíuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo ðibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue.

21 Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiaí jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiaí jaidicue. Cristo lloga uaido jiaí jaidicue. Naimacina Cristo ðibeimo itataiacadicue.

22 Naimaci diga cue nabairillena, Cristo rafuena nia raise ñnoñedino diga cue ia: “Omoí baífemo Cristo rafuena uiñoticue” raiñedicue. Naimacina iciaicaiñedicue, naimacimo jeacinona cue finoi raillano. Naimacina cue isiruillamona, naimacina canoacadíicue. Naimacina Cristo rafuena raise ñnuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibái ñnoitimaci”.

23 Cristo rafuena ailluena comini ñnollena, iese jaidicue. Iena llocana jaidicue. Naimaci ñnua jira, iobidicue.

24 Ero, dani cai jitaillacinodo cai jaiñena. Iemona omoí fueollena, jiaíe uaido lloticue. Riire aisia rafuena omoí comini jifanoía, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena ñnocana mai cai jailli, ico Jusiñamui illanomo monamo ibana nana cai feiñollena.

25 Naga aisidimie riire aisillena, ie abina mairitallena, ie abina eenote. Mairillena, ie abina nagarui jiaí facatacabite. Ibana feiñollena, iese finode. Ibana bu oía, dallu iobide. Ero, jeacinona cai finoi raillano, cai abiaína cai eenua. Naimie jitailla isoí cai illena, Cristo rafuemo jiaí cai facacabilla. Monamo cai rillanona, ibana cai feiñollemo, jaca iobiticaí.

26 Riire aisiacadimie ebena aisíñede. Onolli diga mena iaímaiaí jamái jifanoía, jafaicina jamái ducoiñediaímaiaí; iadedi conimana ducoidiaímaiaí. Ie isoide. Cristo rafuedo raise cue jaiacania, jamái ebena jaiñedicue; iadedi nana cue comecimona iedo jaidicue.

27 Cue comecina raise sedadicue. Dama Cristo rafue anamo iacadíicue. Dama iena ñnoiacadicue. Ja muidomo ibana cue feiñollena, iese finodicue.

Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

## 10

### *Jiraraina sedañena rafue*

<sup>1</sup> Cue amatiai, bie rafuena feitaño. Cai jaiagai micoriai finoca rafuemona fueoiticai. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñaijitate, safefodo nana naimaci ruica jaillena.

<sup>2</sup> Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci.

<sup>3</sup> Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.

<sup>4</sup> Nainomo jinui jiai iñena jira, Jusiñamui llua jira, Moisés micori noficina butajamona, toide jinuina nana jirodimaci. Naimaci nine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide;

<sup>5</sup> Iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

<sup>6</sup> Cai jaiagai finoca rafuemona cai fueua. Maraiñede jearede rafuena naimaci finua isoi ebiruiño. Abimo omoi oño.

<sup>7</sup> Jusiñamuiñedimiena sedaño. Cai jaiagaimona damerie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo gutimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimiena omoi sedaño.

<sup>8</sup> Naimaci jearede rafuena finodimaci. Naimacimona damerie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño.

<sup>9</sup> Cai jaiagaimona damerie Jusiñamui Joreñoña ñaitimaci. Naimaci guisoiga radi Jusiñamuimona bite. Naiena ñiamona, Egiptomote guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina ricaitaño. Cristona cai nia ñnoñena facai finoca rafuemo cai comeciaina facaño.

<sup>10</sup> Cai jaiagaimona damerie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñuaina cai ñaiño.

<sup>11</sup> Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona.

<sup>12</sup> Naie isoide rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise ñnua jira, iena finoñeiticai” comeciaina facadomoi; iadedi omoi abiaina omoi rairuiñenia, jeacinona finoitomoi.

<sup>13</sup> Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi ñnogamie. Ie muidona omoi comeciai ocuillacino baifemo Jusiñamuidi Taife omoimo ramo faiana rairuite.

Naiemona omoi jilloillena, Taife uai omoi ñnoñellena, Jusiñamuidi omoína canoite.

<sup>14</sup> Cue amatiai, Jusiñamui omoína canuamona, Jusiñamuiñedimie facaina finoca rafuemonona oni i.

<sup>15</sup> Abina uiñotomoi. Ie jira omoimo cue llucinona omoi cacaja mei, iemo omoi comeciaina omoi faca.

<sup>16</sup> Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruanona, janore llomeniconona guiticai. Jusiñamuimo iobillacinona nano fecadicaí. Ie mei janore vino jirodicaí. Iena cai jiruamona, Cristona cai nabaillana uiñoticaí. Cruzmo Cristo fiodailla jira, naimiena nabaidicaí. Naie facaise llomeniconona cai tairuñuamona, naimiena cai nabaillana uiñoticaí. Cristo fiodailla jira, iese iticaí.

<sup>17</sup> Diga creyentiaidicaí; iadedi daje llomenicomona jaca guiticaí. Daje llomenicomona cai guilla jira, dajena Cristomo cai duillana uiñoticaí.

<sup>18</sup> Ero, judíuai raila cominimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci.

<sup>19</sup> Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledi jamai guille. Naie jiraraidi jamai ra. Cajeñede;

<sup>20</sup> iadedi Jusiñamuina ñnoñedinomona jamai rañede. Naimacimona nanocara. “Iemo rille cai fecajia, cai moon sedadicaí” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitaiñedicue. Taifemo omoi duillana jitaiñedicue.

<sup>21</sup> Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, marañede.

<sup>22</sup> Iese omoi finoia, Jusiñamuina jai iciritaitomoi. Naimiena omoi icia, ¿niese naimie ricaillafuemonona jilloitomoi? Jaca jilloñeitomoi.

### *Jiaie creyentiaína canocana cai jailla*

<sup>23</sup> Ero, Jusiñamui díbeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo díbeimo itatañedicaí. Iena cai finoia, cai amana Cristo rafuena ñnotacana jaiñeiticaí. Naimiena ramo faicana uitataticai.

<sup>24</sup> Omoimona nagamie dama naimiemo ite rafuemo comecina facañena; iadedi naga jiaie creyentemo ite rafuemo ie comecina jiai facaja.

<sup>25</sup> Ero, ninena o llicisina omoi ibaia, Jusiñamuiñedimie mo naie llicisina fecajana jicanoñeno; iadedi jicanoñeno iena jaricitaiñeno rino.

<sup>26</sup> Iena David micorí jaie cueba: “Jusiñamui bie eniruena finode. Nana rana finode. Cai guillena, cai guille rana nana comuitaga” cueba. Ie jira ¿niese fimaiticaí? Naimie mare finoca rana cai ríia, jeacinona finoñedicaí.

<sup>27</sup> Ero, naimie diga o guillena Cristona ñnoñedimiedi ona uaidoia, naimie dine o jaiacania, naimie dine guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno;

<sup>28</sup> iadedi Cristona raise #noñedimie nainomo jiai guitemo, omo lloia: “Bie llicisidi Jusiñamuiñedimie jai fecaca llicisi”, iena o riñeno. Iena o riia, Cristona raise #noñedimie comecina facaite: “Jeaçinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno.

<sup>29</sup> Naimie comecina facajacinodo cai jaiñenamona, nana Jusiñamui comuitaga guillena guiredicai; iadedi Cristona nia raise #noñedimiemona nana guinidicai; iadedi naimie comecina facajacinodo jaiñedicai.

<sup>30</sup> Cai guia, Jusiñamuimona naie guille comuitaja jira, Jusiñamuimo iobilacinona fecadicai; iadedi cai guillamona damierie cai joreña ñaiamona, iena guiñeiticai.

<sup>31</sup> Omoimo iena nia lloiticue. Nie isoide rana omoi guia, nie isoide rana omoi riia, nie isoide rana omoi jiroia, nie isoide rafuena omoi finoia, naieri Jusiñamuina iobita.

<sup>32</sup> Jusiñamuina nia #noñedino canocabi, naimie uaina naimaci cacaillena. Jusiñamuina jai #notinona jiai canocabi, naimaci abido danomo uaiñellena.

<sup>33</sup> Buena cue finoia, nana cominimo cue comecina facadicue. Ie jira nagarui cue jitaillacinodo jaiñedicue; iadedi Cristo rafuena naimaci #nollena, nana cominina canocana jaidicue.

## 11

<sup>1</sup> Cristo lloga rafuedo jai jaidicue. Cue isoi omoi jai.

### *Roracomo riñoniai illa rafue*

<sup>2</sup> Cuenia nia feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoi iobidicue;

<sup>3</sup> iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jiai ite. Nagamie ai ie ini anamo ite. Omoi afemo itinno uaina omoi #noñenia, marañede.

<sup>4</sup> Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide.

<sup>5</sup> Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade.

<sup>6</sup> Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemona naiñaiño meidaillamona, ie ini anamo illamona, ie ifogimo iniroina bicuano naiñaiño jaite.

<sup>7</sup> Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñotocai. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla.

<sup>8</sup> Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide.

<sup>9</sup> Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena, naiñaiño comuide.

<sup>10</sup> Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño na naimaci ciuanona, Jusiñamui jaienisaïmona jiaï mare.

<sup>11</sup> Naga riño ie ini anamo ite; iadedi Cristona cai ñnua jira, riño baifemo ñimadi faiñede. Hima baifemo riño jiaï faiñede; iadedi daimaiaï conimana iaïmaiaï canua. Cristo naga ñimana, naga riñoña daje isoi feiñote.

<sup>12</sup> Naga comini Jusiñamui comuitaga. Nano facaiseconi Adán micorimona Eva micorina jaie comuitate; iadedi birui naga ñima riñoña comuide.

<sup>13</sup> Biemo omoi comeciaina omoi faca: Omoi roracomo Jusiñamui diga ñie riño ñaia, omoi einamacï finocabilla isoi, ie ifogina bicoñoña jaia, ¿ñiese omoi comeciadi raite? Cue comeci: “Maraiñede” raite. Ie ini anamo naiñaiño ññedena eruaide.

<sup>14</sup> Nana omoi biesedena raicabitomoi: “Ñie ñima ie ifotirai eo areniadedi, cai cominimona maraiñoña ciode;

<sup>15</sup> iadedi ñie riño ifotie eo arenia, mare” raicabitomoi. Naiñaiñuaï ieri iobidimaci. Jusiñamui iena sicotajamona, naiñaiño ifotie ie ifogina raise ñbaide.

<sup>16</sup> Iena jaca llofuecabitucue. Jiaie creyentiaï illanomo cue isoi comeciaina lloidimaci. Omoimona bu cue llogacinona uaitaïacania, damamei ite.

### *Cristo fiodailla rafuena raise comeciñedimaci*

<sup>17</sup> Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena ñnocana jaiñedomoi; iadedi naiemona maraiñede rafue comuide.

<sup>18</sup> Rollena omoi oficabia, omoi comeciaina daje isoi lloinñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiaï guillena aticabidomoi. Mare; iadedi danomo guiñedomoi. Omoimona damierie ucuberena jira, dueredino diga guiacaiñedomoi. Omoi guille caididomoi.

<sup>19</sup> Omoi iese illana jitaiñedicue; iadedi daje isoi omoi comeciaina lloinñenamona, Jusiñamui dibeimo raise itinodi uinoga. Omoimona damierie danomo omoi guillamona, Jusiñamuina omoi isiruillana uinoticaï.

<sup>20</sup> Cristona sedallena omoi oficabia, guitomoi; iadedi vino jiruanona, llomeniconna guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue.

<sup>21</sup> Nagamiaï guillena aticabidomoi. Dani coniniri raise guiñedomoi. Danirie omoi atica guillena guitomoi. Jiaïnona guillena ññedomoi. Damierie omoïmo ailluena guille ite. Damierie omoïmo guille raise ññede. Jiaïnona guillena omoi ññena jira, damierie jaca aimetaitimaci; iadedi jiaïno monidimaci. Damierie guilla motomo jiaï jifaidimaci. Conini nabaiñedomoi. Ie jirari Cristo fiodailla rafuena raise comecinidomoi.

<sup>22</sup> Ero, omoi jofue ite, jamaï guillena. Omoi oficabia, ¿bue ñie guillaredomoi? ¿Bue ñie jiaïnomo guille fecacaiñedomoi? Jiaie creyentiaïna omoi isiruiñenamona, Jusiñamuina jiaï isiruiñedomoi. Janore guille itinona duere finodomoi, naimacina omoi ecaacaiñena jira. Iese omoi illa jira, omoïri iobiñedicue.

### *Cristo fiodailla rafuena llofuiacino*

<sup>23</sup> Navui omoïna biena llofueticue; iadedi omoi raise ñnoñena jira, iena dane llofueiticue. Cai Nama iena cuemo jaie llote. Cai Nama Jesús ie gaitatajarui facaiseconi, ie llofueoicaigano diga ia, naimaci guia, llomeniconna llinote.

<sup>24</sup> Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue



fiodaillana omoï começi. Cue fiodaillemona omoï jeacïnomona jilloitomoï. Biena omoï guillamona cuena começi. Bie llomenicodi cue abi facai ie. Cue llua isoi iena omoï finocabi” raite. Ie mei iena guitimaci.

<sup>25</sup> Ie mei jiroracomo jai totaca vino Jesús llinuanona, Jusiñamuimo iobil-lacïnona fecade. Ie começina facade: “Adán micori facaisemona cominina imaci jeacïno facaina Jusiñamui duere finoñellena, toiniaina atiuidimaci, naimiemo fecallena”. Iemo ie começina facajano, raite: “Cue fiodaillemona, dama cue diaillemona, Jusiñamuidi omoïmo jiaie rafuena birui llote. Omoï jeacïnona oni dotajana llote. Bie vinodi naie rafue facai ie. Cue llua isoi, bie vinona omoï jiruamona, cuena começi. Mai, iena jiro” raite. Ie mei jirodimaci.

<sup>26</sup> Naga icaiño Cristo facaina llomeniconona omoï guia, Cristo facaina vinona omoï jiroia, omoï jeacïno facaina cai Nama fiodaillana uiñotomoï. Naimie nia abido dane bille dinori naiena começi.

### *Cristo fiodailla rafuena raise começiacadicaï*

<sup>27</sup> Cristo fiodailla rafuena raise começi. Naie llomeniconona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacïnomona Cristo naimie jilluana naimie ñinoñena jira, Cristomo jeacïnona finode.

<sup>28</sup> Jeacïno omoï começaimo illamo omoï começaina faca. Jeacïno omoï começaimo ia, iena guiñeno. Iena jiroñeno. Jeacïno omoï começaimo iñenia, iena guiño. Iena jiro. Jeacïno ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro.

<sup>29</sup> Jeacïno naimie começimo nia illamona, iena guia, iena jiroia, maraiñede. Naimie jeacïno facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite.

<sup>30</sup> Ie muidona omoïmona ailluena irareside. Ie jira omoïmona damierie fiodaite.

<sup>31</sup> Cai começaina raise cai facajamona, jeacïnona cai fainonocaia, Jusiñamui caina duere finoñeite.

<sup>32</sup> Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena ñinoñedinona duere finoite. Naimaci diga cai duere sefuiñellena, birui caina duere finode.

<sup>33</sup> Cue amatiai, Cristo fiodailla rafuena omoï começillena omoï ofia, daacaiño omoï guillesa, jiaïno riñedinona seda.

<sup>34</sup> Bu eo aimetaia, jofomo nano guilla. Guillanona omoï ofillinomo bi. Dani coniniri raise omoï guiacaiñenia, Jusiñamui omoïna duere finoï raillano, jofomo guiño. Nana naie rafuena nia lloñedicue; iadedi omoï dine dane cue ia, iena lloiticue.

## 12

### *Cristo facaina raise maijillena, Jusiñamui Joreño naga creyentena canode*

<sup>1</sup> Cue amatiai, jiaie rafuena cuemo jai jicanotomoï. Iena ja ñaiticue. Jusiñamuimona diga uaina feiñoticaï. Naimiemona naimie facaina maijia uaina feiñoticaï. Naimie facaina cai maijillena, jiaie creyentiaina cai canol-lena, naimiemona cai oga uaina ñaiticue. Iena omoï raise uiñuana jitaidicue.

<sup>2</sup> Ero, Cristona nia omoï ñinoñenia, Jusiñamuiñedimiede jiraraina sedaudomoï. Iedo jaie tainodo jai-jaisoidomoï. Taife iedo omoïna jifuete.

<sup>3</sup> Ie jira biena omoï raise uiñuana jitaidicue. Jusiñamui Joreño uaido nie creyente ñaia, Jesús Joreño na jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui



Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiño.

<sup>4</sup> Jusiñamui Joreño caimo jai illa jira, Jusiñamui Joreñomona cai maijia uaina oticai. Naga creyente daje isoi oñedicai.

<sup>5</sup> Naga creyente Cristo facaina daje isoide uai diga maijiñedicai; iadedi Cristo facaina nana maijidicai.

<sup>6</sup> Jusiñamuidi diga uai llua motomo naga creyentena maijitate, naimie jitailla rafuena naimaci finollena.

<sup>7</sup> Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticai.

<sup>8</sup> Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate.

<sup>9</sup> Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate.

<sup>10</sup> Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jainomo jino lollena. Dajerie creyentemo uaina itatate, nie isoide uaido Cristo rafuena railla lloraima llua uaiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiai uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaiñolle uaina itatate, comini iena raise uiñollena. Iena naimaci nia dobaiñoñenia, iena jiai raise uiñoñedimaci.

<sup>11</sup> Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

### *Cristomo dajena duidicai*

<sup>12</sup> Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai.

<sup>13</sup> Dama Jusiñamui Joreñodi dajena Cristomo nana creyentiaidicaidi duidicai. Dajerie judíuaidicai; dajerie judíuaiñedicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreñona nana feiñoticai.

<sup>14</sup> Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai.

<sup>15</sup> Ero, cai abimona cai eilli ñibai facaite: “Onolli isoñedicue. Onolli cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo faiñede. Dafoconi ite.

<sup>16</sup> Ero, cai jefo ñibai facaite: “Uisi isoñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo faiñede. Ie isoide. Dajena Cristomo omoi duilla jira: “Jiaimie baifemo iticue” raiño. Jiaie creyentena abina uradoiño.

<sup>17</sup> Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacadicai? Ie isoide. Dajena Cristomo omoi duilla jira, naga creyentena jitaidomoi, Cristomo dajena ñnocana omoi jaillena. Jiaie creyentena uaitaño.

<sup>18</sup> Jusiñamui cai abimo diga rana comuitate. Naimie jitailla isoi, cai abimo naga rana comuitate.

<sup>19</sup> Cai abimo diga ra iñedena, ¿buedo cajeniticai?

<sup>20</sup> Diga ra cai abimo ite; iadedi jaca dajede cai abi.

<sup>21</sup> Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena inocana jaillana jitaidicai. Jiaie creyentemona abina iedoñoeno.

<sup>22</sup> Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare;

<sup>23</sup> iadedi dajerie ra ebire eruaillena, cai abi jifollena, iniroina jitaicai. Meiruiñellena, cai abi bainillena, iniroina jiaie jitaicai.

<sup>24</sup> Cai uiecomo meiredino iñena jira, iena jifoñedicai. Ero, Jusiñamui cai abina finode. Dajerie ra jiaie ra baifemo iñede.

<sup>25</sup> Jusiñamuidi naga cai abimo ite ra dajena maijiana itatate. Dajena maijicana jaide.

<sup>26</sup> Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicai. Ie isoide. Cristomo dajena duidicai. Jiaie creyente duere sefuia, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

<sup>27</sup> Ero, caidi naimie cominina jira, Cristomo dajena nagasaiaie duidicai.

<sup>28</sup> Ie jira Jusiñamuidi naimiena inotinomona damieriena nano fetuanona, Cristo naimacina oretate, ie rafuena lollena. Ie mei jainona fetode, naimacimo ie rafuena llua mei, jainomo ie rafuena jino lollena. Jainona fetode, ie rafuena llofuellena, cominina ie rafuena raise uiñotallena. Jaino ie uaina itatate, naimie facaina naimaci maijillena, jiaie creyentiana naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena.

<sup>29</sup> Ero, Jusiñamui nana omoina fetofede, ie rafuena jino lollena. Damieriena fetode. Nana omoina fetofede, ie rafuena llofuellena. Damieriena fetode. Nana omoina fetofede, siño rafuena finollena. Damieriena fetode.

<sup>30</sup> Nana omoina fetofede, duidinona jilloitallena. Damieriena fetode. Nana omoina fetofede, omoi uiñoñega uaido ñaillena. Damieriena fetode. Nana omoina fetofede, naie uiñoñega uai jino dobaiñollena. Damieriena fetode.

<sup>31</sup> Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

## 13

### *Nana jiaie cominina cai isiruillafue*

<sup>1</sup> Cai uiñoñega uaido ñaia uaina cai ñaia, Jusiñamui jaienisaie isoi cai ñaia, cominina cai isiruiñenia, jamai ñaiafuena ñaiticai.

<sup>2</sup> Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo inoia, cominina cai isiruiñenia, Jusiñamuimona jamai bue isoidicai.

<sup>3</sup> Jiaie cominina cai canollena nana caimo ite rana cai fecaia, Cristo rafuena cai lollena cai niadi fiadaiaacania, cominina cai isiruiñenia, jaca buena oñedicai. Jusiñamuina jaca iobitañedicai.

<sup>4</sup> Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai.

<sup>5</sup> Cominina cai isiruvia, abina iedoñedicaí. Naimacimo cai comeciaina facabidicaí. Cai rana caidicabiñedicaí. Naimaci diga iciricabiñedicaí. Naimaci caina jeare finoia, ibana ocabiñedicaí.

<sup>6</sup> Cominina cai isiruvia, naimaci jeare finoca rari iobicabiñedicaí. Naimaci uanai mare finoca rari iobicabidicaí.

<sup>7</sup> Cominina cai isiruvia, naimaci caina duere finoia, ibana ocabiñedicaí. Cai joreña bu ñaia, caina taino lloia, iena ñnocabiñedicaí. Cai marena illamo ocuridicaí. Cai comeciaina ocuiñocana jaidicaí.

<sup>8</sup> Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite.

<sup>9</sup> Nana Jusiñamui caina uiñotagacinona nia raise cacaiñedicaí. Nana Jusiñamui rafuena nia raise jino lloñedicaí;

<sup>10</sup> iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticaí. Naimiemo ite rafuena jiaí raise uiñoiticaí.

<sup>11</sup> Jiaie rafuedo iena llofueticue. Jaiie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fainonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoiticaí; iadedi monamo cai ia, eimie isoi iena raise uiñoiticaí.

<sup>12</sup> Ero, jacaie acaranimona cai joreñodi raise bainide. Ie isoide. Jusiñamuiemo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiaí raise uiñoiticaí.

<sup>13</sup> Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticaí. Naimie llogacino suillemo jai ocuridicaí. Jusiñamuina cai isiruillamona, jiaie cominina jiaí isiruiticaí. Naie isiruillacino jiaicino baifemo faite. Ie jira coninina isiruicana omoi jai.

## 14

### *Omoi uiñoñega uaido omoi ñaia rafue*

<sup>1</sup> Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido.

<sup>2</sup> Ero, omoi uiñoñega uaido ñaia uaina omoi ñaicabia, jaca buna omoina cacaiñena jira, cominina canollena ñaiñedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciainomona ñaitomoi.

<sup>3</sup> Jusiñamui rafuena jino omoi lloia, cominina canodomoi. Naimacina Jusiñamuina ñnotodomoi. Naimie dibeimo raise itatatomoi. Naimaci comeciaina ocuiñotodomoi.

<sup>4</sup> Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

<sup>5</sup> Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacareillena, iena omoi oni dobaiñoia, cuemona jiaí mare. Ie mei naie ñaiamona, Jusiñamui rafuena naimaci cacajamona, creyentiaina canodomoi.

<sup>6</sup> Cue amatiaí omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoina canoñedicue; iadedi Jusiñamui

cuemo jai lloga rafuena omoimo cue lloticuedena, omoina canodicue. Jusiñamui rafuena raise cue jai uiñua jira, omoina cue llofueticuedena, omoina jiai canodicue.

<sup>7</sup> Ero, quena jamai tainuaido bu fia, ie figana uiñoñedicaí. Guitarra bu jamai tainuaido taia, ie taillana uiñoñedicaí.

<sup>8</sup> Ejércitomo trompetana jamai tainuaido fia, soldaduai maijillena raise uiñoñedimaci.

<sup>9</sup> Ie isoide. Cai cacaiñena uaido omoi ñaia, omoi ñaiana uiñoñedicaí. Iese omoi ñaia, jamai tainona ñaite isoi cacadicaí.

<sup>10</sup> Eo ailluena nairaiái ite. Naga nairai ie uai ite dani naimaci ñaillena;

<sup>11</sup> iadedi nie nairai ie uaina cue uiñoñenia, naimacimona jiaie nairai imiēna eruaidicue. Cuemona naimaci jiaie nairaina eruaidimaci. Conini diga ñaiana cacaiñedicaí.

<sup>12</sup> Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena ñnocana omoi jaillena. Jusiñamui Joreñomona dani daje uaina nicidoñeno; iadedi nana nicido.

<sup>13</sup> Ie jira ie uiñoñega uaido bu ñaia, ie oni dobaiñua uaina naimiemo illena, jiaie creyentiaí iēna cacaillena, Jusiñamuimo jicaja.

<sup>14</sup> Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iēna cacaiñedicue. Iēna uiñoñedicue.

<sup>15</sup> Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiai ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiai roiticue.

<sup>16</sup> Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoina cacaiñedino: “Jee” raitimaci?

<sup>17</sup> Iobillacinona Jusiñamuimo raise fecadomoi; iadedi omoina cacaiñedinsona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñaiñeno.

<sup>18</sup> Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue;

<sup>19</sup> iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona marañede.

<sup>20</sup> Cue amatiaí, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca.

<sup>21</sup> Jusiñamui facaina lloraíma micori jaie cueda: “Jusiñamui llote: ‘Cue comini dine jiaie nairaina cue oretajamona, cue cominina cuena ñnotallena, naie jiaie nairai uaido cue cominimo lloiticue; iadedi iēna jitañeitimaci. Cuena jaca uiñoñeitimaci’ llote”.

<sup>22</sup> Ie isoide. Uiñoñega uaido omoi ñaiamona, Cristona ñnoñedino iēna raise cacaiñedimaci; iadedi Cristona ñnotino iēna cacadimaci. Iemona fueotimaci. Jusiñamui rafuena omoi llofuiamona, Cristona ñnoñedino iēna cacajamona, Cristona ñnoñedimaci; iadedi Cristona ñnotinona canodomoi.

<sup>23</sup> Danomo nana omoi ofia, omoi uiñoñega uaido nana omoi ñaia, Cristona ñnoñedino iēna cacajanona, omoina; “Uairico” raitimaci;

<sup>24</sup> iadedi omoi ofia, Jusiñamui rafuena omoi jino lloia, iēna Cristona ñnoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite.

<sup>25</sup> Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñnoite. Ie muidona raite: “Uanai, Jusiñamui omoi motomo ite”.

*Roracomo omoi ia, raise marena omoi i*

<sup>26</sup> Cue amatiai, rollena omoi oficabia, ¿ñiese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiana raise itatallena, nana omoi finua rafuena raise fino.

<sup>27</sup> Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite.

<sup>28</sup> Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia.

<sup>29</sup> Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua.

<sup>30</sup> Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire lliscailla. Iemei jiaimie lloite.

<sup>31</sup> Iese damierie nana lloitoimoi, naie lluanona Jusiñamui rafuena raise omoi uiñollena, omoi comeciai jiai ocuiñollena.

<sup>32</sup> Naga llotimiedi ie uiñua diese lluanu uiñote. Ie jira jiaimie nia lloia, iena cacarei. Iemei jiaimie llua.

<sup>33</sup> Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

<sup>34-35</sup> Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

<sup>36</sup> ¿Ñiese cue llucinodo jaiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote.

<sup>37</sup> “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote;

<sup>38</sup> iadedi naimie iese uiñoñenia, Jusiñamui Joreñomona naimie uai iñenana uiñoiticaí.

<sup>39</sup> Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiñeno.

<sup>40</sup> Omoi ofia, cue llua isoi, Jusiñamuina raise marena seda.

## 15

*Fiodaillamona Cristo jai jillode*

<sup>1</sup> Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena ñnocana jaidomoi.

<sup>2</sup> Naiena omoi ñnuamona, Jusiñamui omoi jeacinomona omoina jillotate. Naiedo nia omoi jaia, iena raise omoi ñnoia, jai jillobidomoi.



<sup>3</sup> Nanoca rafuena omoina llofueticae. Jiaie creyentiaimona buena jai cacadicue. Jusiñamui facaina lloraini micoriai jaie ciegafuia i soi cai jeacino facaina Cristodi fiodaite.

<sup>4</sup> Raiafomo naimiedi jonega. Darui amani illanona naimemona Jusiñamuidi naimiena jillotate, Jusiñamui facaina lloraini micoriai jaie llua isoi.

<sup>5</sup> Ie mei Pedro naimiena ciode. Ie mei ie once llofueoicaigano naimiena ciodimaci.

<sup>6</sup> Ie mei quinientos naimiena inotino naimiena daruido ciodimaci. Naimacimona damerie jai fiodaitimaci; iadedi ailluena nia fiodaifidimaci. Cristo jilluana uifnotimaci.

<sup>7</sup> Ie mei Jacobo naimiena ciode. Ie mei nana ie oretagano naimiena ciodimaci.

<sup>8</sup> Ie mei naimiena jiai ciodicue. Ie jira fiodaillamona naimie jilluana uifnoticai. Ie doce llofueoicaigano fetua mei, diga años illanona, naimiena nia cue uifnotena facaise cuena fetode. Ie mei ie rafuena cue lollena, cuena oretate.

<sup>9</sup> Ailluena creyentiaina jaie cue duere finua jira, nana jiaie Cristo oretagano cue baifemo faitimaci. Jamai bue isodicue; iadedi Cristo cuena fetode.

<sup>10</sup> Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenaifede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue.

<sup>11</sup> Jiaie oretagano Cristo rafuena llofueia, iena cue llofueia, daje isoide rafuena llocana jaidicai. Naie rafuena omoi cacajamona, iena inotomoi.

### *Fiodaillamona nana creyentiaico jilloitimaci*

<sup>12</sup> Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitimaci”.

<sup>13</sup> Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede.

<sup>14</sup> Cristo jilloñenia, Cristo rafuena jai tainona lloticai. Naie rafuena jiai tainona inotomoi.

<sup>15</sup> Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaina ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticai.

<sup>16</sup> Fiodaillamona nana creyentiaico jilloñenia, Cristo jiai jaie jilloñede.

<sup>17</sup> Cristo nia jilloñenia, naimiena tainona inotomoi. Jusiñamui omoi jeacinona niadedi oni dotañede.

<sup>18</sup> Cristona inuanona jai fiodaitinodi jiai jai faifidimaci. Jusiñamui illanomo jaca ifneitimaci; iadedi iraimo jaca iitimaci.

<sup>19</sup> Nana cai ille dinori dani Cristo caina jilloitallemo cai ocurria; iadedi naimie jilloñenia, jai duere iticai. Jai tainomo ocurridicai.

<sup>20</sup> Ero, tainomo ocurriñedicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentia jiai jilloitimaci.

<sup>21</sup> Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloiticai.

<sup>22</sup> Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloiticai, naimie diga jaca cai illena.

<sup>23</sup> Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticai.



24-25 Ie mei naimie dinena nana naimie dibeimo iñedinona anafefitaite. Nana naimie dibeimo iñede joreñuaina jiai anafefitaite. Illaimana Cristo illamona, nana naimie dibeimo iñedinona anafefitaite. “O uai cuemo o illamona, nana o jitailla rafuena jai fuidodicue” ie Moomo lloite.

26 Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fioidañeitimaci.

27 Jusiñamuidi nana cominina Cristo anamo itataite. Ie muidona creyentiaidicai dane fioidañeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede.

28 Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiena jira, nana naimie finoca ra naimie anamo iite. Nana comini naimie anamo iitimaci.

29 Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese iñedomoi. Dajerie creyentiai marena illamona, omomona dajerie creyentiaina jaidomoi. Naimaci jai fioidaitimaci; iadedi fiodaillamona ico jilluana iñotimaci. Iena omoi iñuanona, bautizagaomoi.

30 Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fiodaicabiticue?

31 Cue amatiai, cai Nama Jesucristomo omoi duilla jira, omoiri iobidicue; iadedi nagarui niadedi fiodaicabiticue. Cristo rafuena omomo cue llocabilla jira, jiaie comini iciritimaci. Icirillamona, cuena meineiacadimaci.

32 Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llamona jaca buena oñeiticue. Ie muidona fiodaillamona cai jaca jilloñeiticaidena, Cristo rafuena fañonocaida, ico raire jamai cai fiodailla jira, jamai ua jai jaicaillafuena cai jaiacaiticai. Ie ia iese iñede. Cristo jai jillode.

33 Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiñeno.

34 Ie jira raise abina uiñuanona, mai jai. Jeacinona finocana jaiñeno. Omomona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidallena, omomo iese lloticue. Jusiñamui rafuedo raise mai omoi jai.

### *¿Niese creyentiai jilloitimaci?*

35 Omomona damie nibai jicanoite: “¿Niese fiodaillamona creyentiaidicai jilloiticai? Naimaci abiai nibai jai rifaidimaci. ¿Nie isoide abiai diga dane iitica?”

36 Iese bu jicanoia, raise começina facañede. O illimo buena o ria, janore sicua meinoconi, o riga radi jai abidi rifaide.

37 Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede.

38 Naga riarra daje isoi eruañede. Jusiñamui jitailla isoi, jiaiforie eruaide. Ie isoide. Naga fioidaitimie jillua mei, Jusiñamui jitailla isoi, ie abina jiaiforie itataite.

39 Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede.

<sup>40</sup> Jusiñamui ðine ico cai ia, cai abiaí iite, nainomo cai illena. Bene cai abiaí jiaí ite, bene cai illena. Monamo cai ia, ebireniticaí. Bene cai ia, jiaí ebire iticaí; iadedi daje isoi ebire iñedicaí.

<sup>41</sup> Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuai isoi lligaiñoñede. Naga ucuai daje isoi lligaiñoñede. Monamo cai ico illena, naimie jitailla ðiese cai abiaí caimo iite.

<sup>42</sup> Ie isoide. Fiodaillamona cai jillua mei, cai abiaí jiaífo eruaite. Cai fiodaillamona cai abiaí rifaide; iadedi cai jilluamona, cai abiaí dane jai rifaiñeite.

<sup>43</sup> Cai fiodaillamona cai abiaí jai ebinide; iadedi cai jilluamona, cai abiaí ebirenite. Fiodaicana cai jailla jira, cai abiaí birui raise mairiñede; iadedi ico cai jilluamona, cai abiaí mairite. Nana Jusiñamui jitailla rafuena finoreniticaí.

<sup>44</sup> Cai fiodaia, come abiaí isoi caimo birui ite; iadedi cai jilluamona monamo ico caimo cai abiaí jiaí iite. Enirue iena cai abiaí birui caimo ite. Ie jira monamo cai jiaífo eruaite abiaí caimo iite.

<sup>45</sup> Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemona cai comuilla jira, fiodaiticaí. Fiodaillamona Cristo jillua jira, ico cai jiaí jilloille jira, caina jiaífo eruaite abiaína ico itataite.

<sup>46</sup> Eniruemo birui cai illa jira, caimo birui ite abiaí diga iticaí. Fiodaillamona ico cai jillua mei, monamo cai ia, jiaífo eruaite abiaí diga iiticaí.

<sup>47</sup> Adán micoridi enirue ie. Imuicimona Jusiñamuidi naimiena finode. Cristodi eniruemo billanona, imana jaide; iadedi Jusiñamui ðinena monamona naimie bite.

<sup>48</sup> Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiaí imuicina jaiticaí; iadedi Cristomo jiaí duidicaí. Cai jillua mei, naimie isoi ico iiticaí.

<sup>49</sup> Adán micorimona cai comuilla jira, naimiena eruaidicaí. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaífo eruaite abi naimiemo ite. Cai jillua mei, Cristona eruaiticaí.

<sup>50</sup> Cue amatiaí, buena lloticue. Caimo jai ite abiaí diga monamo Jusiñamui ie cominina sedajanomo iñeiticaí. Cai abiaí rifailla jira, cai fiodailla facaise naie isoide abiaí diga nainomo jaca iñeiticaí.

<sup>51</sup> Ero, Jusiñamui cuena uiñotaga rafuena omoimo ja lloiticue. Iena navui jaca uiñoñedicaí. Nana creyentiaidicaí fiodaiñeiticaí; iadedi Jusiñamui cai abiaína jiaífo meidotaite.

<sup>52</sup> Omoi uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentiaína Jusiñamuidi jillotajanona, naimaci abiaína meidotaite. Nia fiodaiñedinodicaí cai abiaína jiaí meidotaite. Dane fiodaiñeiticaí.

<sup>53</sup> Cai abiaí birui rifaiacade. Ie jira birui fiodaicana jaidicaí. Jusiñamuidi cai abiaína ico meidoite. Ico monamo jiaífo abiaí caimo ia, cai abiaí rifaiñeite. Fiodaiñeiticaí.

<sup>54</sup> Iese caimo sua, Jusiñamui facaina lloraima micori jaie cuega uai jiaí suite. Cuega: “Nairuimona creyentiaí jaca fiodaiñeitimaci”.

<sup>55</sup> Cai jaca illa jira, fiodaicana jaiñeiticaí. Fiodaillana jaciruiñeiticaí, dane cai fiodaiñeiticaina jira.

<sup>56</sup> Jeacino illa jira, birui fiodaicana jaidicaí. Moisés micori jaie llogacino illa jira, iena cai raise finonina jira, jeacino caimo illana uiñoticaí;

<sup>57</sup> iadedi cai jeacino facaina cai Nama Jesucristo fiodailla jira, jeacino anamo jai iñedicaí. Cai fiodailla mei, dane fiodaiñeiticaí. Jusiñamui caina iemona jai jillotate. Ie muidona naimieri cai iobillasa.

<sup>58</sup> Cue amatiaí, fiodaillamona nana creyentiaí ico jillua jira, Cristo rafuena ñnocana jai. Naganomo iñeno; iadedí Cristo rafuena llocana omoí jai. Naimie jitailla rafuena ñnocana omoí jai. Naimie facaina omoí maijia, tainona maijiñedomoí. Naiemona diga mare rafue comuite. Iena jai uiñotomoí.

## 16

### *Jerusalémo itinomo ucubena oredimaci*

<sup>1</sup> Jiaíe rafuena cuemo jicanotomoí. Jerusalémo ite creyentiaímo ucubena oretaiacadomoí. Galaciamo ite creyentiaímo cue llua isoí, omoímo lloiticue.

<sup>2</sup> Naga domingo omoí ucubemona daje diese eneno oni eeno. Omoí maijia bailla diese ucubemona cue bille ñnori iena eeno. Iese naga domingo omoí eenoñenia, ico cue bia, ¿ñiese dacaiño ofrendamo ailluena ucubena joneítomoí?

<sup>3</sup> Omoí ñne cue rilla mei, omoí eenoga ucubena uillena, Jerusalémo ite creyentiaímo omoí fetocanona oretaiticue. Cartana jiaí oretaiticue, omoí fetocano mareuidinona Jerusalémo itino uiñollena.

<sup>4</sup> Jerusalémo cue comeci jiaí jaiacania, cue diga jaitimaci.

### *Pablo jai macariacade*

<sup>5</sup> Macedonia railla eniruemo nano jaiticue. Creyentiaína cioillena, dajerie nairaimo jaiticue. Ie mei omoí ñne jaiticue.

<sup>6</sup> Diga irui omoí diga ñbaí iiticue. Nana rollime facaise omoí diga ñbaí iiticue. Ñbaí daje amani fivui iiticue. Ie mei cuena omoí canollemona oni jaiticue. Omoí ñnomona cue jaia, cue jaillinona nia uiñoñedicue.

<sup>7</sup> Omoí ñne birui nia jaiñeíticue. Omoí ñne birui cue jaia, dallu omoí diga iiticue; iadedí jiaíruido omoí ñne cue jaia, caí Nama jitaia, omoí diga are iiticue.

<sup>8</sup> Beno Efesomo nia iiticue.

<sup>9</sup> Beno diga comini Cristo rafuena cacaacadimaci. Naimacimo iena llofueiacadicue. Diga comini cue llua uaitatimaci. Cue llua jitaíñedimaci Ie jira bene nia lloiacadicue. Pentecostés railla rafue fülle mei, jaiticue.

<sup>10</sup> Omoí ñne Timoteo ria, naimiena raise marena nafue. Cue isoí caí Nama facaina naimie maijicabide.

<sup>11</sup> Ie muidona naimie llucanona jamaiñeno. Omoímona naimie jaiacania, cue ñne abido naimie raise rillena, naimiena raise cano. Naimie jaiacania, naimie caimare caimaduano oreta. Jiaíe creyentiaí diga naimie billemo ocuridicue.

<sup>12</sup> Apolona jicanotomoí. Jiaíe creyentiaí diga omoí ñne naimie jaillana naimiemo lloticue; iadedí naimie comeci nia jaiacaiñede. Jiaíruido abi juarena, omoí ñne jaite.

### *Fuiduacino*

<sup>13</sup> Jeacinomona abina rairui. Cristo rafuena ñnocana omoí jai. Eimie isoí omoí comeciaina ocuiño.

<sup>14</sup> Jiaíe cominina omoí isiruillamona, nana omoí ñnoacalle rafuena ñno.

<sup>15</sup> Cue amatiaí, Acaya railla eniruemo Estéfanadi, ie comini diga, nano creyentiaídimaci. Iena uiñotomoí. Naimaci jitailla jira, jiaíe creyentiaína canocabidimaci.

<sup>16</sup> Naie isoidino lloga uaina cacarei. Naga Cristo ñbeimo maijídino uaina cacarei. Iedo omoí jai.

<sup>17</sup> Omoímona cue ñne Estéfnas bite. Fortunato diga, Acaico diga naimie billa jira, iobidicue. Cue ñne iñedomoí; iadedí naimaci billa jira, omoí isoí cuena canodimaci.

<sup>18</sup> Naimaci billamona cue começi caimataide. Omoi começiai jiai caimataide. Naie isoidinomo: “Marena maijidomoi” omoi railla.

<sup>19</sup> Diga creyentiai Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiai orediaimaiai. Iaimaiai jofomo dajerie creyentiai rocabitimaci. Cristomo naimaci duilla jira, omoina isiruillanona, nana naie creyentiai imaci uaina jiai oredimaci.

<sup>20</sup> Nana bene ite creyentiai imaci uaina oredimaci. Nana creyentiaina eo caimare uaido.

<sup>21</sup> Omoimo cue uaina jiai oredicue. Cuena canollena, naimiemo cue llua isoi, jiaimie bie carta cuega; iadedi cue mameçi bene dama cueticue. Nana iena ino. Pablodicue.

<sup>22</sup> Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

<sup>23</sup> Cai Nama Jesús omoina duenaillasa.

<sup>24</sup> Jesucristomo cai duilla jira, omoina cue isiruillana omoi uiñuana jitaidicue. Mai. Macaibaite.

## **CORINTOMO ITE CRISTONA HNOTINOMO IE EMODOMO PABLO ORETAGA RABE**

### *Corintomo ite creyentiaimo Pablo cartana orede*

<sup>1</sup> ¿Nigacino? ¿Nie isoidomoi? Pablodícue. Corintomo ite creyentiaí, omoi dine bie carta oredícue. Nana Acaya railla eniruemo ite creyentiaimo bie carta jiaí oredícue. Jusiñamui jitailla jira, ie rafuena cue jino lollena, Jesucristo oretagamiedícue. Cue diga Timoteo illa jira, naimie ie uaina omoi dine jiaí orede.

<sup>2</sup> Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiaí omoína uri jai itatate. Iena omoi uiñocana mai omoi jai.

### *Pablo ie duere sefuilla rafuena cuete*

<sup>3</sup> Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caína jaca duenaite. Cai comeciaina jaca ocuiñotade.

<sup>4</sup> Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaínona canoredícue. Nie isoide rafuemonona naimaci duere sefuia, nie isoide ramo naimaci jiria, Jusiñamui caína ocuiñotaja isoi, naimaci comeciaina ocuiñotaredícue.

<sup>5</sup> Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiaíno comecina ocuiñotajana raise uiñoticue.

<sup>6</sup> Duere cue sefuillamona, omoína canoredícue. Jusiñamui jitaillacino omoi finocana jaillana jitaídícue. Cuena naimie ocuiñotajamona, Cristona omoi faínonocaiñellena, cue isoi omoi duere sefuia, omoína ocuiñotaredícue.

<sup>7</sup> Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñoticue.

<sup>8</sup> Cristomo cai duillamona, cue amatiaí isoi itomoi. Asia railla eniruemo jaie eo duere sefuidícue. Iena omoi raise uiñollena, ie rafuena dane omoímo lloiacadícue. Eo duere cue sefuilla jira, cue comeci niadedi ocuiñoñedícue. Niadedi fiodaitícue.

<sup>9</sup> “Naie facaise fiodaitícue” raillanomo cue comecina facadícue. Cue finoca rafuemonona dama jillonidícue; ia Jusiñamui uai siñona jira, naimie cuena jillotate. Fiodaitinona naimie jillotarede. Niadedi fiodaitinona jiaí jillotarede. Naimiedi naimie cuena jillotajana cue inuana jitaide.

<sup>10</sup> Naie facaise eo duere sefuillamona cuena jillotate. Ico cue duere sefuia, iemonona dane cue jilloillena inoticue.

<sup>11</sup> Iena cue facaina omoi jicabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuena Jusiñamui canua jira, iobillacinona fecaitimaci.

### *Pablo Corintomo navui jaiñede*

<sup>12</sup> Cuena gaiñedino cuena nibai jeare ñaitimaci; ia daje rafueri abina iedotícue. Cue comecimona iena uiñoticue. Cristona inoñedinona marena finodícue. Omoína marena finodícue. Jusiñamui jitaillacino finocana jaidícue. Jusiñamuimona jeacinona finoñecana jaidícue. Cue comecina facacinomona iese jaiñedícue; ia Jusiñamui cuena canuamona, iese jaidícue.

<sup>13</sup> “Iese cuetio; iadedi o comecimo jiaie rafue ite diga caimo cuetio” raitomoi. Omoína jifueiacaiñedícue. Cue cuega cartaiaina jai facadomoi. Cue cuega rafue omoi raise cacajana jitaídícue.

<sup>14</sup> Cuená nia eo raise uifioñedomoi; ia cuena uifioñocana omoi jaillanona, cueri omoi iobillana jitaídícue. Cai Nama Jesús abido bia, omoiri cue iobilla isoi, cueri omoi iobillana jitaídícue.

<sup>15</sup> Omomimo iese cue comecina facajamona, omoi díne navui jaiacadícue. Macedoniamoi cue jaiacadícuemo, raise omoina cue iobitallena, omoi díne nano navui jaiacadícue.

<sup>16</sup> Macedoniamona cue abido bia, omoi díne navui dane jaiacadícue. Judeamo cue díga jaillena, omoi mona damieriena omoi oretajana jitaídícue. Iese cue jaillamo navui comecina facadícue.

<sup>17</sup> Omoi díne cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci.

<sup>18</sup> Iese ifnedícue. Jusiñamui uanaicinona jaca llua isoi, cue comeci naganomo ifne. Omomimo cue lloga uai finodícue.

<sup>19</sup> Jusiñamui Jito Jesucristo rafuena omomimo navui llotícue. Cristo ie llogacinona jaca meidoñede. Silvano iena jiai llofuede. Timoteo iena jiai llofuede. Nagarui daje isoide rafuena llofuetícai. Jiairuido jiaie Cristo rafuena llofueñedícai.

<sup>20</sup> Nana Jusiñamui jai lloga uai Cristo finoca rafuemoná suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadícai.

<sup>21</sup> Jusiñamui Cristo díbeimo caina jai itatate. Ie rafuena cai lollena, caina jai fetode.

<sup>22</sup> Ie cominina caina itatate. Iena cai uifioñollena, ie Joreño caimo jai itatate.

<sup>23</sup> Jusiñamuidi cue uanaicinona llua uifioñote. Uanaicinona cue lloñenia, Jusiñamui cuena duere finuana jitaídícue. Omoi finoca rafue jai cue uifioñuamona, omomimo cue raire lloi raillano, omoi díne navui dane jaiñedícue.

<sup>24</sup> Cristona jai omoi ifnuana uifioñotícue. Cristona ifnocana omoi jailla jira, omoi finolle rafuena lloñedícue; ia omoi iocire illana jitaídícue.

## 2

<sup>1</sup> Omoi díne nia cue jaiñellemo comecina facadícue. Omoi díne navui cue ia, iocire coniniri ifnedícai.

<sup>2</sup> Omoina jai icidícue. Cueri omoi iobillana jitaídícue; ia omoina cue dane icia, coniniri iocire ifneitícai.

<sup>3</sup> Omomimo cartana navui oredícue. Omoi díne ite rafuena raise finollena, iena oredícue. Cuená iobitajana uifioñotomoi. Omoi díne ite rafuena omoi raise finoa, coniniri iocire iitícai. “Cuená iobitaitomoi” raillanomo cue comecina facadícue.

<sup>4</sup> Cue comeci eo sunaillamona, cue comeci eo eiamona, carta navui oredícue. Omoina iciaifnedícue; ia omoina cue eo isiruillana omoi uifioñuana jitaídícue. Ie jira omoi díne ite rafuena raise fino.

### *Maraiñede rafuena finodimie rafuena feita*

<sup>5</sup> Maraiñede rafue navui damie finua jira, sunaitícai. Naimie muidona cue comecido duere jaide; ia daje isoi omoi comeciái jiai duere jaide.

<sup>6</sup> Omoi nabei díne ite cominimona naimie jai duere sefuilla jira, dama iesede. Naimiena dane duere finoñeno;

<sup>7</sup> ia naimie finoca rafuena mai feita. Iena dane lloñeno. Naimie comecina ocuifioñota. Naimiena iese omoi canoñenia, omoi mona duere sefuillamona, abido danomo jaite.

<sup>8</sup> Ie jira: “Ona nia isiruitícai” naimiemo llono. Iena eo jitaídícue.

<sup>9</sup> Nana cue llua omoi ifnuana cue facacillena, carta omoi díne navui cuetícue.



<sup>10</sup> Naimie finoca rafuena omoi feitaia, iena cue jiai feitaicue. Cristo rafuena omoi inocana jaillana cue jitailla jira, naimie rafuena feitaicue. Cristo cuena uinuamona, iena feitaicue.

<sup>11</sup> Taife ramo cai faiana uiñoticaí. Cristo rafuedo cai raise jaiñellena, naimie jitaillana uiñoticaí. Cristo dibeimona caina Taife itañenia, omoi motomo itimie finoca rafuena feitaicaí.

*Troamo navui Pablo ia, uri iñede*

<sup>12</sup> Troamo navui jaidicue. Cristo rafuena cue llollena jaidicue. Cai Nama comini comeciaina jetajamona, naimie dibeimo cue maijiamona, ie rafuena lloticue.

<sup>13</sup> Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaina facaduanona, Macedoniamona jaidicue.

*Jusiñamuidi Cristo dibeimo iñedinona anafeditaite*

<sup>14</sup> Jusiñamui fue eo mare. Cristo dibeimo iñedinona naimie anafeditajanona, Cristo comina cai illamona, naimie rafuena uicana jaidicaí. Ie rafuena cai lloia, iena comini inoia, Jusiñamui naimacina jai caimare itatate.

<sup>15</sup> Cristomo cai duillamona, ie rafuena cai lloia, Jusiñamuina iobitadicaí. Cai llamona, damerie jillodimaci. Iena jitaiñenamona, damerie faifidimaci.

<sup>16</sup> Iena cacajamona, damerie faificana jaidimaci. Jusiñamui illanomo jaca iñeitimaci. Iena cacajamona, jaino Jusiñamui illanomo jaca iitimaci. Jamai bue isoidicue; ia bie rafue llocana jaidicue.

<sup>17</sup> Damerie Jusiñamui rafuena llamona, ucubena oiacadimaci. Omoimo comeciina facañedimaci; ia iese llofueñedicue. Omoimo cue comeciina facajanona, bie rafue cue llamona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

### 3

*Cristo caimo lloga rafuedo birui jaidicaí*

<sup>1</sup> Omoi dine damerie llofueraini jaia, cartaiaina uicabitimaci. Naimaci cartaiaimo jainodi: “Bie llofueraini mare” raillanona cuetimaci. Omoimona jaino cuega cartaiaina: “Bie comini mare” raillana jitaiñedicue. Cuemona jaino cuega cartaiaina: “Pablo mare” raillana jiai jitaiñedomoi.

<sup>2</sup> Omoi marenana jai uiñotocue. Cue marenenana jai uiñotomoi. Carta isoidomoi. Jusiñamui dibeimo omoi comeciaini meiduamona, cue comeciimona omoina raise uiñotocue. Omoi birui illamona, omoina fidiamona, nana comini omoina raise uiñotimaci. Ie jira jainodi: “Bie comini mare” raillana omoimona jitaiñedicue.

<sup>3</sup> Cristo rafuena omoimo llotocue; ia Cristo omoi comeciaina jai meidotaja jira: “Omoi mare” raillanona naimie jai cuedadena, nana comini uiñotimaci. Tinta diga naimie cueñede. Jusiñamui Moisés micorimo jaie lloga rafue jamai noficimo cuega. Cai cajede Jusiñamui birui iese cueñede; ia naimie Joreño uaido omoi comeciaina birui meidote.

<sup>4</sup> Cristomo cue jai duilla jira, Jusiñamuina cue inuamona, omoina iese llotocue.

<sup>5</sup> Cue finoca rafuemona iese lloñedicue; ia Jusiñamui uai cuemo illamona, iese omoimo llotocue.

<sup>6</sup> Jiaie rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue inuamona, Jusiñamui illanomo

jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

<sup>7</sup> Moisés micorimo lloga rafuedo jaillamona, Jusiñamui ñine buna jaca iñena. Noficimo Jusiñamui cuega. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamuimona naimie abido bia, Israel comini Moisés micori uiecomo eruainidimaci. Nagarui Jusiñamui diga naimie ñañenia, naimie micori uieco ja muidomo queninide.

<sup>8</sup> Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede.

<sup>9</sup> Moisés micori rafuedo bu jaia, faifcana jaide; ia naie rafue ebirede. Birui ite rafuedo bu jaia, Jusiñamuimona marebicaide. Ie muidona birui ite rafue jaie ite rafue baifemo ua eo faite.

<sup>10</sup> Moisés micori rafue jaie ebirede; ia jaie rafue birui illa jira, Moisés micori rafue jai birui ebinide.

<sup>11</sup> Birui ite rafue jaca saiñena jira, ua eo ebirede.

<sup>12</sup> Iena cai uñuamona, bie rafuena marefodo jaciruiñeno lloticue.

<sup>13</sup> Iniroi diga, Moisés micori isoi cue uiecona ibañedicue. Naimie micori ie uieco ibaide, ja muidomo ie uieco quenirena feioicaillana comini cioñellena; ia cue lloga rafuena marefodo llocabiticue.

<sup>14</sup> Moisés micori comini Jusiñamui rafuena jaca ñnoñedimaci. Naimaci comeciai jitaiñena jira, ñnoñedimaci. Moisés micori rafuena birui judúuai comini facaia, iena nia raise cacañedimaci. Dani Cristona ñnuamona, naimaci comeciai raise cacareitimaci.

<sup>15</sup> Cristo rafuena birui naimaci ñnoñena muidona, Moisés micori rafuedo nia jaidimaci.

<sup>16</sup> Cai Nama ñibeimo bu jaia, naimie comeci raise cacade. Moisés micori rafuedo naimiedi cai jaiñenana raise uñote.

<sup>17</sup> Cai Nama Joreña lloiticue. Cristo ñibeimo cai jaia, naimie Joreño caimo jiai ite. Cristona cai nabaillamona, jeacino anamo jai iñedicaí. Moisés micori rafue anamo jai iñedicaí.

<sup>18</sup> Cristomo jai cai duilla jira, naimiena cai comeciamona raise uñua jira, ie ebirede uaina uñoticaí. Acaranimo cai eruaillamona, cai abina ciodicaí. Ie isoide. Cai illamona jaie comini Cristona uñotimaci. Cai Nama Joreño caina canuamona, naimie ebirena isoi cai illena, icana jaidicaí.

## 4

<sup>1</sup> Jusiñamui cuena duenaillamona, cue comecina ocuiñocaida, Cristo rafuena llocana jaidicue.

<sup>2</sup> Meirede rafuena llofueñedicue. Iena bainino llofueñedicue. Jifuianona omoina llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uñuamona, naimie rafuena uanaicinona llofuecabiticue. Cue llofuiana bu raise cacacia, uanaicino cue llofuecabillana uñote.

<sup>3</sup> Faifcana jaidinodi cue mare lloga rafuena raise cacañedimaci.

<sup>4</sup> Taife anamo naimaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifedi Cristo rafuena naimaci raise uñuana jitaiñede.

<sup>5</sup> Cue finoca rafuena llofueñedicue; ia Jesucristodi cai Namanana llofuecabiticue. Naimie ñibeimo cue maijiamona, omoina canollena, naimie rafuena llofuecabiticue.

<sup>6</sup> Enirue finua facaise Jusiñamui llote: “Jitiredino nana eniruemo iñellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

*Cai comeciai ocuiñocaida #nocana jaidicai*

<sup>7</sup> Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi.

<sup>8</sup> Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiño comecina ocuiñocana jaidicue.

<sup>9</sup> Damierie cuena duere finodimaci; ia Jusiñamui cuena fañonocaiño cuena canode.

<sup>10</sup> Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue.

<sup>11</sup> Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uiñotomoi.

<sup>12</sup> Naimie rafue cue llua muidona, cuena meineiacadimaci; ia bie rafuena omoi #nuamona, Jusiñamui illanomo jaca iitomoi.

<sup>13</sup> Jusiñamui facaina lloraima jaie cuela: “Cue #nua jira, iena llofueticue”. Naimie isoi cue #nua jira, bie rafuena jiai llofuecabiticue.

<sup>14</sup> Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiai jillotaite. Jesúmo cai duilla jira, naimie illanomo danomo caina ico itataite.

<sup>15</sup> Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenailana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci.

<sup>16</sup> Ie jira iena sefuiruiñedicue. Cue mairici fuicana nagarui jaide; ia cue comeci nagarui #nocana ocuiricana jaidicue.

<sup>17</sup> Birui duere sefuidicue; ia iemo cue comecina eo facañedicue. Cristo rafue muidona birui duere cue sefui, Jusiñamui illanomo ico cue ia, nainomo ebire marena iiticue. Iemo cue comecina eo facadicue.

<sup>18</sup> Cuemo birui suide rafuemo comecina eo facañedicue. Jusiñamui illanomo cue nia cioiñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

## 5

<sup>1</sup> Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite.

<sup>2</sup> Birui cue duere sefuillamona, Jusiñamui cuemo ico itatalle abina eo oiacadicue.

<sup>3</sup> Cue fiodailla mei, Jusiñamui cue joreño jiaie isoide abina itataite.

<sup>4</sup> Cue jiaie isoide abi cuemo illena, cue jamai fiodaiacaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite.

<sup>5</sup> Jusiñamuidi ie Joreño caimo itatajamona, cai abiaina iese jiai itatajana uiñoticai.

<sup>6</sup> Iena cue uiñuamona, nie isoide rafue ia, #nocana jaca jaidicue. Nia cue fiodaiñenia, cai Nama illa ecimo nia iñedicue.

<sup>7</sup> Naimiena birui cioiñedicue; ia naimiena ñnocana jaidicue.

<sup>8</sup> Iese jaidicue. Cue Nama diga cue illena, fioidaiacaducue;

<sup>9</sup> iadedi nia cue fioidañenia, naimiena jaca iobitaiacaducue. Cue fioidaia, naimiena jiai jaca iobitaiacaducue.

<sup>10</sup> Naimie llua jira, Cristo uicomo ico nana iiticaí. Cai bene finoca rafuena uiñotaite. Marañede rafuena cai bene finua diese, naimiemona ibana feiñoñeiticaí. Mare rafuena cai bene finua diese, naimiemona ibana feiñoiticaí. Ie muidona naimie jitaillacinona jaca finoacaducue.

### *Jusiñamui diga cai uri illafue*

<sup>11</sup> Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaidicue.

<sup>12</sup> “Cuedi maremedicue” lloñedicue; ia cue abi facaina omoi riidollena, bie rafuena lloticue. Omoi motomo damerie llofuerañi naimaci llofuiacino diga abina iedotimaci; ia naimaci comeciaino iticino diga abina iedoñedimaci.

<sup>13</sup> “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoína llofuellena, omoi facaina maijidicue.

<sup>14</sup> Nie isoidicuenta, Cristo cuena isiruillana cue uiñuamona, jaca llofueiacaducue. Nana comini facaina damie fioidaillana jai ñnoticue. Naimaci jeacino ifomo naimie jai fioidaite.

<sup>15</sup> Nana cai facaina naimie fioidaite. Fioidaillamona Jusiñamui naimiena jai jilloitate. Naimiena nia cai ñnoñenia, dani cai comeciaino ite rafue diga iobidicaí; ia naimiena jai cai ñnua mei, dani cai comeciainomona naimiena cai iobitajana naimie jitaide. Ie jira cue illana jai uiñotomoi.

<sup>16</sup> Damerie llofuerañidi jiañonomo eruaillamona, naimaci comeciaina facajamona: “Naimaci mare” raitimaci. Jiaicaiño: “Naimaci marañede” raitimaci; iadedi Cristona cue ñnua facaisemona iese cominimo eruañedicue. Naimiena nia cue ñnoñenia, Cristona jaiie raise uiñoñedicue. “Naimiedi jamai ñima” raillamo comecina facaducue; ia iese naimiemo birui comecina facañedicue.

<sup>17</sup> Cristona cai ñnua mei, naimiemo jai cai duillamona, cai comeciainuaina meidoticaí. Jai jiaie isoidicaí. Jiaie rafuedo jai jaidicaí. Jaiie caino ite rafuedo jai jaiñedicaí.

<sup>18</sup> Jusiñamui cai comeciainuaina meidotade. Cristo fioidaillamona, Jusiñamui dibeimo caina itatate. Iemona naimiena jai nabairedicaí. Naimacimo ie rafuena llollena, cuena fetode, jiaie cominina ie dibeimo itatallena.

<sup>19</sup> Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena llollena, cuena jai fetode.

<sup>20</sup> Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaillanona, naimie diga uri i.

<sup>21</sup> Cristo jeacino jaca finoñede; ia cai jeacino facaina, Jusiñamui jitailla jira, jeacino finodimie isoi jaide. Naimiemo cai duillamona, Jusiñamui jitailla isoi, jai marebicaidicaí.

## 6

<sup>1</sup> Bie rafuena nia lliacaducue. Jusiñamui facaina cai maijiamona, naimie dibeimo cominina itataticaí. Naimie caina duenaillana uiñoticue. Iena omoi ñnocana jaillana jitaidicue.

<sup>2</sup> Jaie Jusiñamui cuetatate:

Cue jitailla facaise omoï jitaillacinona jai cacadicue.

Omoï jilloillena, omoïna jai canodicue.

Ero, Jusiñamui birui omoïna cacaacade. Birui omoïna canuanona, omoïna jillotaicade. Ie muidona naimiena ñnocana jai.

<sup>3</sup> Bie rafuena omoï ñnoñellena, cue llofuiacinona omoï jamaiñellena, bu diga rafuena comuitaiacaiñedicue.

<sup>4</sup> Jusiñamui ñibeimo cue maijiamona, ñie isoide rafuemonna ramo cue jiria, cue illamona naimiedi: “Mare” cuena raillana jitaidicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue.

<sup>5</sup> Damierie cuena fatimaci. Cárcelmo cuena jonetimaci. Naimaci illanuamona cuena riire dotadimaci. Eo cue maijia jira, diga icaiño eo raise iniñedicue. Aime guisoidicue.

<sup>6</sup> Jearede rafuena ebiruiñedicue. Cristo rafuena uiñocana jaidicue. Icriñedicue. Jiaïnona canocabidicue. Jusiñamui Joreño anamo iticue. Cominina raise isiruiticue.

<sup>7</sup> Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taïfena emodofillena, Jusiñamui jitailla isoi, marecinona finocana jaidicue.

<sup>8</sup> Damierie cuena marena jai ñaitimaci. Jiaïno cuena jeare ñia ñaitimaci. Damierie cueri jai iobidimaci. Jiaïno cue joreño jai ñaitimaci. Damierie: “Caina jifuetio” cuena raitimaci; ia ñia uanaicinona llocabiticue.

<sup>9</sup> Damierie: “Jamai bue isoidio” cuena raitimaci; ia jiaïno cuena raise uiñuamona, naimaci ñinena jamai bue isoïñedicue. Nagarui niadedi fiodaicabiticue; ia ñia iticue. Duere sefuicana jaidicue; ia Jusiñamui cue comecina ocuiñotacana ñia jaidicue.

<sup>10</sup> Sunaiticue; ia iocire jaca iticue. Dueredicue; ia ailluena comini comeciaina eo caimaretadicue. Buenidicue; ia Jusiñamuimona ailluena marecinona feiñoticue. Iese jaca jaidicue. Cue illamona: “Naimiedi mare” cuena omoï raillana jitaidicue.

<sup>11</sup> Corintomo itino, cue nabaiñiai, cue comecimo ite rafuena marefodo jai lloticue. Cue comecimona omoï diga marena iacadicue.

<sup>12</sup> Cuemona omoïna raise isiruiticue; ia omoï ñinena ñia cuena eo isiruiñedomoï.

<sup>13</sup> Cue uruiaï omoï isoilla jira, omoï diga ñaiticue. Omoïna cue isiruilla isoi, cuena omoï isirui.

*Jusiñamui cai comeciaino illanodicai*

<sup>14</sup> Creyentedimie jearede ramo faitatai raillano, daje isoide rafuedo iaïmaiaï jaiñena jira, daje isoi rafuena iaïmaiaï comeci lloïñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicinona uiñotimiedi useredimono jai ite isoide. Jeacino anamo ñia itimie jitreñimono ñia ite isoide. Cristo rafuena naimie uiñoñede; ia Cristo rafuena omoï uiñuamona, useredimono jai itomoï isoidomoï.

<sup>15</sup> Cristodi Taïfe diga jaca nabairinide. Creyentemiedi creyenteñedimie diga daje isoi inide. Daje isoi comecina facañede.

<sup>16</sup> Creyenteñedimiedi Jusiñamuina sedañede; ia jiraraina sedade. Creyente comecimo Jusiñamui illamona, Jusiñamuina sedade. Nana creyentiaï comeciaino Jusiñamui ite. Iena jaie Jusiñamui llote:



Comini motomo iiticue.

Naimacina nabaiticue.

Naimaci Jusiñamuniticue. Cue comininitimaci.

<sup>17</sup> Ie muidona cuena ñnoñedino diga daje rana namatañoeno.

Naimaci jearede jetaca rafuena abimo oñoeno.

Iemona omoina raise feiñoiticue.

<sup>18</sup> Omoi Moona iiticue. Cue uruiaina jaitomoi.

Siño jitodicue.

## 7

<sup>1</sup> Cue isiruiganodomoí. Bie llogacino Jusiñamui caimo jai llua jira, naga maraiñede rafuena fañonocaida, cai jailla. Naga cai comeciaina jearetade rafuena fañonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

*Pablo cartamo ciegacino diese finodimaci*

<sup>2</sup> Omoi comeciaina cuena raise feiño. Buna jeare finoñedicue. Buna jifueñedicue.

<sup>3</sup> Maraiñede rafuena jai omoi finuana lloñedicue. Omoimo cue comecina nagarui facadicue. Iena ailli lloticue. Nia cue ia, raire cue fiodaia, omoina jaca uibiñocabiticue.

<sup>4</sup> Cue llucacina omoi ñnuana raise uifnoticue. Omoiri iobidicue. Omoi diga jai uri iticue. Duere sefuidicue; ia iocire iticue.

<sup>5</sup> Macedoniamos navui cue jaidicue, cue comeci uri iñede. Cue ñibeimo iñedinomona nagarui duere sefuillamona, cue comeci jarire ite. Cristo ñibeimona creyentiaina naimaci itatallemo cue comeci jarire ite.

<sup>6</sup> Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comecina ocuiñotade.

<sup>7</sup> Cue ñine naimie ria, iocire iticue. Omoimo ite rafue cue cacajamona, jiai iocire iticue. Cuena omoi cioacanana llote. Cue comeci jarire illari sunaitomoi. Cuena ridoiacadomoi. Iena cue cacajanona, iocire iticue.

<sup>8</sup> Carta omoi ñine navui oredicue. Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue.

<sup>9</sup> Omoi sunaillana jitañedicue; ia iemona Jusiñamui ñibeimo omoi comeci iuai omoi meidua jira, iocire iticue. Cue cuela carta muidona iciriñedomoi; ia Jusiñamui jitailla isoi sunaitomoi.

<sup>10</sup> Jusiñamui jitailla isoi, ie jeacino facaina bu sunaillamona ie comeci iuai Jusiñamui ñibeimo meidoia, sunaiñede; ia bu jamai sunaillamona ie comeci iuai Jusiñamui ñibeimo meidoñenia, faifite. Jusiñamui diga jaca iñeite.

<sup>11</sup> Jusiñamui jitailla isoi omoi sunaillamona, omoi comeciaina raise finodomoí. Maraiñede rafue ñibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui ñibeimo naimie illena, maraiñede rafuena finodimiena duere finodomoí. Nana bie rafuena raise fuidodomoi.

<sup>12</sup> Carta navui omoi ñine cue oretaia, maraiñede rafuena finodimienmo cue comecina eo facañedicue. Naimiemona duere sefuidimienmo cue comecina eo facañedicue. Cuemo omoi comeciaina facajana omoi uifollena, navui cueticue. Jusiñamui iena uifnote.

<sup>13</sup> Ie jira cue comecina ocuiñotitcue. Tito jiai iocire illa jira, dane iobidicue. Naimie comecina caimare omoi itataja jira, iobidicue.



<sup>14</sup> Omoï dñe Tito nia jaiñenia, naimiemo omoïna lloticue. “Naimaci ona feiñoitimaci. Naimaciri iobidicue” naimiemo navui lloticue. Iese naimiena omoï feiñua jira, ieri meidaiñedicue. Omoïmo uanaicinona jaca lloticue. Naimiemo cue llua isoi jiai suide.

<sup>15</sup> Naimie llofuiacino omoï ñnoiacana jira, naimie omoïna birui raise isiruite. Meiruoicaida, comeciai jarire illamona, naimiena feiñotomoi.

<sup>16</sup> Omoïna raise uiñoticue. Cristo ñnocana omoï jaillana raise ñnoticue. Omoïri iocire iticue.

## 8

### *Creventiaï Jusiñamuimo ucubena fecaja rafue*

<sup>1</sup> Cue amatiai, omoïmo jiaie rafuena lloiacadicue. Jusiñamui naimacina canuamona Macedoniamoi ite creventiaïna omoï uiñuana jitaïdicue.

<sup>2</sup> Eo duere sefuidimaci. Jiai eo dueredimaci; ia iocire illamona, jiaie creventiaïmo ucubena caidiñeno fecacabidimaci.

<sup>3</sup> Naimacimo ite ucube ðiese fecadimaci. Iena uiñoticue. Naimaci jitailla jira, naie baiñemo fecadimaci. Naimacimo iese fecajana jaca lloñedicue.

<sup>4</sup> Naimacimo iese lloñedicue; ia iena naimaci eo feaacana jira, jiaie creventiaïna canollena, cuemo iena eo jicanotimaci. Ucube ðiga jiaïno creventiaïna naimaci canuana cue llua na eo jitaïdicue.

<sup>5</sup> Cue comecina facaja isoi, fecañedicue. Ucubena fecadimaci; ia: “Cai Nama ðibeimo majiacadicaï” jiai llotimaci. Nie isoide rafuena naimaci finuana cue ocuillena, Jusiñamui jitailla isoi, jitaïdicue.

<sup>6</sup> Omoï dñe Tito dane jaillena jitaïdicue. Omoï dñe naimie navui ia, ucube omoï uana naimie canode. Iemona janore tainedomoi. Jiaie creventiaïna omoï canuana raise fuiduana jitaïdicue.

<sup>7</sup> Cristona ñnocana jaidomoi. Iena jiaïnomoi llocabitomoi. Cristo rafuena raise uiñotomoi. Cristo jitaillacinona eo finocana jaidomoi. Cuenajiaï isiruitomoi. Ie muidona omoï ucube ðiga, jiaie creventiaïna omoï raise canuana jiaï jitaïdicue.

<sup>8</sup> Omoïna iese riire lloñedicue. Macedoniamoi ite creventiaïna eo canuana omoï uiñuamona, jiaï creventiaïna omoï canoia, Cristona omoï isiruillana uiñoiticaï.

<sup>9</sup> Cai Nama Jesucristomona cai fueua. Naimie caina duenaillana uiñotomoi. Ie Moo ecimo naimie nano illamona, naga ra naimiemo ite; ia eniruemo ie billamona, caina canollena, ñmana jaillanona, duere ite. Iemona Jusiñamui rafuena cai cacaja jira, duere iñedicaï.

<sup>10</sup> Ie jira omoïmo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaïdicue.

<sup>11</sup> Omoï jitaillamona bie rafuena fuido. Omoïmo ite ucube ðiese fecajana.

<sup>12</sup> Ailluena ucubena omoïmo iñenia, dama iesede. Omoï jitailla jira, omoïmo ite ucube ðiese omoï fecaja, Jusiñamuimona mare;

<sup>13</sup> ia omoï jitailla rana omoï ollena, omoï ucube iñeni raillano, omoï jitailla baiñemo omoï fecajana lloñedicue.

<sup>14</sup> Jiaie creventiaïmo ra birui raise iñena jira, naimacina omoï canuana jitaïdicue. Omoï ra ico iñenia, naimaci ðinena omoïna canuana jitaïdicue, nana omoïmo daje isoi omoï ra illena.

<sup>15</sup> Moisés micori illa facaise ite cominimona cai fueua. Naimacina jiaie iese cueda: “Jusiñamui oretaga guiga ramona ailluena guillena, nagarui ðamierie iraiuidimaci. Jiaïno janore guillena, iraiuidimaci; ia coniniri fecajamona, imaci jitailla ðiese nagarui nana guitimaci”. Ie muidona omoïmo ite ucubemona naimaci jitailla ra illena, jiaie creventiaïmo omoï fecajana jitaïdicue.

*Pablo Titona ñaite*

<sup>16</sup> Omoï ðine Tito dane oretaiacadïcúe. Cúe isoi naimïe omoïmo comecina facade. Omoïna canoacade. Naimïe comecina Jusiñamui iese itataja jira, Jusiñamui iobidïcúe.

<sup>17</sup> Omoï ðine jaillena naimïemo llotïcuemo, naimïe ðinena: “Jee” raite. Naimïemo nia iese cúe lloñenia, omoïna naimïe eo canoiacana jira, naimïe omoï ðine jaillemono ie comecina facade. Omoï ðine raïre jaite.

<sup>18</sup> Naimïe ðiga jiaïmie oretaiticúe. Naga nairaïmo ite creyentiaïði: “Cristo rafuena eo raise llofuecabite” naimïena raitimaci.

<sup>19</sup> Cúe ðiga jaillena, naimïena fetodïmaci. Dueredïnomo omoï ucubena cúe uillena, cúe ðiga naimïe jaite. Iemona cai Namana iobitaiticai. Iemona nana creyentiaïði naimacina cúe canuana uiñoitïmaci.

<sup>20</sup> Omoï ucubena raise cúe sedajana jitaidïcúe. Iemona: “Pablo cai ucube fïide” omoï llwana jitaiñedïcúe. “Iena Pablo raise fecañede” omoï llwana jitaiñedïcúe.

<sup>21</sup> Iena raise marena sedaacadïcúe. Jusiñamui iena uiñote. Nana creyentiaï iena uiñuana jiaï jitaidïcúe.

<sup>22</sup> Iaïmaïaï ðiga jiaïmiena jiaï oretaiticúe. Naimïe Cristona eo ñnocana jaillana raise uiñotïcúe. Omoï rafuena naimïe fidiano, jiaïe creyentiaïna omoï canuana naimïe ñnuanona, omoï ðine naimïe eo jaiacade.

<sup>23</sup> Omoïmo Titona bu jïcanoïa, naimacïmo naimïena raise llono. Danomo Cristo ðibeïmo maïjïdicoco. Cúe ðiga omoïna canode. Jiaïe iaïmaïaïna bu jïcanoïa: “Jiaïe creyentiaï iaïmaïaïna fetuamona bitïiaïmaïaï” llono. Cristona iobitaiacadïiaïmaïaï.

<sup>24</sup> Cúena omoï isiruillamona: “Omoï mare” omoïna cúe llwamona, naimacina raise nafue. Nana cúe jitailla rafuena omoï finuana naimacï uiñuana jitaidïcúe. Omoï ucubena eenuana raise fuiduana jitaidïcúe. Iena omoï finuamona, abïdo naimacï bia, naimacina oretaga creyentiaïmo iena lloitïmaci.

**9***Jiaïe creyentiaïna canollena, omoï ucube olle rafue*

<sup>1</sup> Bie rafuena omoï jai uiñua jira, iena dane lloñeitïcúe.

<sup>2</sup> Ucubena omoï jai fecaacana uiñotïcúe. “Benomo Macedoniammo ite creyentiaïmo omoïri iobidïcúe” llocabitïcúe. “Navuidï añomona fecaacadomoi” llocabitïcúe. “Acaya railla provinciammo ite creyentiaï fecaacadïmaci” llocabitïcúe. Iese omoï illamona, bene ite creyentiaï jiaïno creyentiaïna jiaï canoacadïmaci.

<sup>3</sup> Iese uiñotïcúe; ia omoïna cúe canollena Titona oretaiticúe, cúe jitaillacino omoï raise fuidollena. Ucubena dajena uana raïre jitaidïcúe.

<sup>4</sup> Omoï ðine Macedoniammo ite creyentiaï ðiga cúe rillanona, omoï ucube dajena nia iñenia, iese omoïna cúe lluaconi meidaitïcúe. Omoïði jiaï meidaitï omoï.

<sup>5</sup> Ie muidona Tito idai jaillana jitaidïcúe. Ucube dajena uana omoï llua isoi, omoïna canoite. Omoï ucube dajena uana lloiacaiñedïcúe; ia omoï comeciaïmona jiaïno creyentiaïna canuana omoï jitailla jira, iena jitaidïcúe.

<sup>6</sup> Jiaïe rafuedo iena lloitïcúe. Janore iduaina bu ria, janore llisillana oite. Ailluena iduaina bu ria, ailluena llisillana oite. Cúe llua jira, omoï ucube dajena oia, eo caïmare iñeitomoi; ia omoï comeciaï jitaillamona omoï ucubena dajena oia, eo caïmataïtomoi.

<sup>7</sup> Ucube dajena omoi oia, nagamie ie comecina facajamona fecaja. Naimie jitañenia fecañena. Naimie jitailla jira, naimie fecaja. Jiaimie omoina ñai railano, “Cai ucubena fecaiticai” raiñeno; ia o jitaillamona iena feca. Comeciai iocire illamona omoi fecaia, Jusiñamuina iobitadomoi. Iena Jusiñamui jitaide.

<sup>8</sup> Jusiñamui omoi jitailla bai femo omoimo fecarede. Nana omoi jitailla ra omoimo naimie illamona, jia inomo omoi fecaia, naimacina canorenitomoi.

<sup>9</sup> Jusiñamui facaina lloraima micori iena jaie cueba: “Jusiñamuina inotimie dueredinona canocabide. Mare rafuena finocana jaide”. Ie omoi finollemo, Jusiñamui omoina canoite.

<sup>10-11</sup> Ero, illimo maijirainimo Jusiñamui iduaina itatate. Iena sicuamona, monaillamona, nainomo maijirainidi naiemona guicabite. Ie isoide. Omoimo Jusiñamui nana omoi jitailla rana jaca itataite. Iemona jiaie creyentiaina raise canorenitomoi. Omoi ucubena cai uia, iena jiai creyentiai feiñoia, Jusiñamuimo iobillacinona eo fecaitimaci.

<sup>12</sup> Ucubena omoi oretai, duerede creyentiaina canodomoi. Omoi muidona naimaci Jusiñamuimo iobillacinona jiai fecadimaci.

<sup>13</sup> Iemona Cristona omoi raise inuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaina canoitomoi.

<sup>14</sup> Omoi facaina Jusiñamuimo jaitimaci. Omoina naimaci isiruillamona, Jusiñamui omoina eo canuana naimaci uiñuamona, omoi facaina jaitimaci.

<sup>15</sup> Jusiñamui cana eo canua jira, iobillacinona naimiemo cai fecallena, cai uai raise inede. Uainicaidicai. Naimie eo mare. Naimiena cai iobillasa.

## 10

### *Cai Nama Pablona fetua jira, ie uai Pablomo ite*

<sup>1</sup> Jiaie rafuena lloiacadicue. Omoimona damerie llotimaci: “Cai dine Pablo ia, naimiedi cana jaciruite. Riire caimo naimie rafuena lloñede; ia cai dine naimie inenia, riire caimo naimie rafuena llote” llotimaci. Ero, Cristo iciricabiñena isoi iacadie. Naimie isoi omoimo lloiacadicue.

<sup>2</sup> Riire omoimo lloiacaiñedicue. Omoimona damerie cuena raitimaci: “Pablodi Cristona inoñedimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloiticue.

<sup>3</sup> Comena iticue; ia comini diga cue rafue inede.

<sup>4</sup> Tafe dibeimo itino diga cue rafue illa jira, jamai cue uai diga naimacina llicaitaiticue; ia Jusiñamui uai diga naimacina llicaitaiticue.

<sup>5</sup> Cristo uai diga Jusiñamui dibeimo inedino llucinoconi uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacina uainicaitaticue, naimacina Cristo rafuena cue inotallena.

<sup>6</sup> Cristo anamo omoi raise ia, cue lloga uaina omoi raise inocana jaia, omoimona raise inoñedinona duere finoiticue.

<sup>7</sup> Cominimo jamai eruaillamona: “Naimaci mare” raitomoi. Jiacaiño: “Naimaci marañedicue” raitomoi; ia naimaci comeciaina uiñoñedomoi. Omoimona damie nibai comecina facade: “Cristomona cue uai illamona, Pablo bai femo faiticue”. Cue dinena raiticue: “Cristomona cue uai illamona, daje isoidicoco. Cue bai femo naimie faiñede”.

<sup>8</sup> Abina iedoñedicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue.

<sup>9</sup> Omoimo riire lloiena cue uai ite; ia cue carta diga omoina jacinaitaiacaiñedicue. Omoina canoiacadie.

<sup>10</sup> Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai rinide. Cristo rafue raise llwana raise uiñoñede”.

<sup>11</sup> Iese iñedicue. Omoi motomo cue ia, cartana cue cueia, daje isoi llofuecabiticue.

<sup>12</sup> Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue.

<sup>13</sup> Jusiñamui cue maijiana cuemo llote. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue.

<sup>14</sup> Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue.

<sup>15</sup> Jiaie llofueraini llofuiamona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoina canoacaducue.

<sup>16</sup> Jiaie nairaia illanuaimo Cristo rafuena nia lloiacadicue; ia nainomo jaie llofueraima llofuiamona buena oiacañedicue.

<sup>17</sup> Bu abina iedoiacania, cai Nama finua rafueri naimie abina iedua.

<sup>18</sup> Ie llofua diga bu abina iedoia, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

## 11

### *Pabla: Cristo oretaganona abi caitadinona llote*

<sup>1</sup> Abina cue raise uiñoñenia, cue diga iciriñeno. Cue llwamo nia cacarei.

<sup>2</sup> Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Hima diga nia iñediñaiño, ie inina illena, ie jitaillamaimo ie moo fecaja isoi, Cristomo omoina fecaacaducue. Omoimo jecino iñena isoilla jira, omoina Cristomo fecaacaducue.

<sup>3</sup> Jiaie rafuemo omoi comeciaina facacana omoi jaillamo jacinaiticue. Jaie jaiona eruailamona, Taife Eva micorina jifue. Jiai llofueraini Cristo rafuedo omoi raise jaiñenana itatajamo jacinaiticue.

<sup>4</sup> Diga llofueraina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillemo jacinaiticue.

<sup>5</sup> “Cristo oretaganodicai” raitimaci; ia naimaci cue baifemo faiamo cue comecina facañedicue.

<sup>6</sup> Naimaci isoi rafuena jino llwana eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabiticue.

<sup>7</sup> Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijidicue. Iese cue illa jira, damierimona marañede rafuena finodicue; ia cuemonona eo mare rafuena jai uiñotomoi. Iemonona abina jai uiñotomoi.

<sup>8</sup> Omoina cue canollena, jiaie creyentiamona ucubena feiñoticue. Omoi facaina naimacimona feiñoticue.

<sup>9</sup> Rana cue jitailla facaise omoimona ucubena jicañedicue; ia Macedonia-bite creyentiai cuena canodimaci. Omoimona navui ucubena cue oñena jira, birui cue oñena jira, cuemonona ibana oñeitomoi.

<sup>10</sup> Cristo cue illana uiñuamona, naimie uanaicinodo cue jaillamona, nana Acaya railla provinciamona iena jaca lloiticue.

<sup>11</sup> Omoina cue isiruilla jira, ucubena omoina jicañeiticue. Jusiñamui cue comecina raise uiñote.

<sup>12</sup> Abina iedeamona omoi motomo damierie: “Pablo isoi llofueticaí” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijidicaí” naimaci raiñellena, ucubena omoimo jaca jicañeiticue.

<sup>13</sup> Cristo oretaganona abi caitadinodimaci. Cristo dibeimo raise maijiñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci.

<sup>14</sup> Ieri rajicaiñedicue. Comina jifuellena, Taifedi Jusiñamui jaienicina abi caitadinena jaicabide.

<sup>15</sup> Taife dibeimo itinodi Jusiñamui ie mare rafuena llofuerainina jaicabidimaci. “Cai lloga rafuedo omoi jaia, Jusiñamuimona marebicaítomoi” llofuecabitimaci. Naimaci finolle rafue diese Jusiñamuimona duere sefuitimaci.

*Cristo oretagamiena naimie illa jira, Pablo duere sefuide*

<sup>16</sup> “Pablo abina uiñoñedimie” raillamo omoi comeciaina facañeno; ia iese cuena omoi comeciaina facaia, cue lluomo nia cacarei. Omoi motomo ite llofueraini abina iedua isoi, iacaiñedicue; ia janore cuemo iticino diga abina iedoticue.

<sup>17</sup> Abina iedeamona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue.

<sup>18</sup> Omoi dine damierie llofueraini naimaci illa diga abina iedua isoi lloiticue.

<sup>19</sup> Abina uiñoñedimaci; ia: “Abina eo raise uiñoticaí” omoi lluamona, naimaci llofuiacinona cacacabidomoi.

<sup>20</sup> Naimaci anamo omoina itataiacadimaci. Omoimo ucubena jicacabidimaci. Omoina ocuicabidimaci. Icirillamona, omoi uiecuaina bofedimaci. Iese omoina finocabidimaci; iadedi buena naimacimo finoñedomoi. Ibana oñedomoi.

<sup>21</sup> Iese omoimo finoñedicue, omoina cue jaciruilla jira.

Cue illana omoimo ja lloiticue. Nibai abina raise uiñoñedicue; ia naie llofueraini isoi cue illa diga abina iedoticue.

<sup>22</sup> Omoi motomo ite damierie llofuerainina ja lloiticue. Judíuai uaido ñaitimaci. Iena jiai ñaiticue. Judíuai nairai imaci. Daje isoidicue. Judíuai nairai imiedicue. Abraham micori uruiadimaci. Jiai naimie micori uruedicue.

<sup>23</sup> “Cristo dibeimo maijidicaí” raitimaci. Abina uiñoñedimie isoi lloticue; ia naimaci baifemo Cristo dibeimo maijidicue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue.

<sup>24</sup> Judíuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci.

<sup>25</sup> Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui naio monaillaimo botedo jamai furi baiticue.

<sup>26</sup> Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monaillaido cue jaia, duere sefuicabidicue. Cristo rafuena llorainina abi caitadinomona jiai duere sefuicabidicue.



<sup>27</sup> Cue ucube ollena, duere maijicabidicue. Diga icaiño raise iniñedicue. Diga icaiño aime guiticue. Rollimemona duere sefuicabidicue. Iniroininamona jiaí duere sefuidicue.

<sup>28</sup> Diga jiaíe rafuemoná duere sefuicabidicue. Duenailamona naga creyentiaí illanuáimo cue comecina nagaruí eo facadícue. Iemo nagaruí cue comecina cue facaía, duere sefuicabidícue.

<sup>29</sup> Nie creyente Cristo rafuedo nia raise inoñenia, naimiemo cue comecina eo facadícue. Nie creyentena jiaímie jeacino finotaía, naimiemo cue comecina facadícue.

<sup>30</sup> Cue abina iedoiacania, jamai bue isoidimiedicuena lloiacadícue.

<sup>31</sup> Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue lluaña uíñote.

<sup>32</sup> Cue illana nia lloiacadícue. Damascomo jaie creyentena cue jailla facaise cuena gaitatallena, Aretas railla illaíma anamo ite gobernadorí nairai llaiga nasena sedatate;

<sup>33</sup> iadedi llaígafo ecimo ite jofo a ite ventanamona cirígai isoide diga ana jaillanona, naiemona jillodícue.

## 12

### *Pablo nicairilla isoide rafuena ciode*

<sup>1</sup> Abina iedoiacaiñedicue; ia cue illana janore nia lloiticue. Iemona bue oñeíticue; ia cue illa abina riidoiacadícue. Cristo cuemo acataga rafuena lloiacadícue. Cristo cuemo jai llua rafuena jiaí lloiacadícue.

<sup>2-3</sup> Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uíñoñedicue. Nibai dama cue joreña uite. Dama Jusiñamui iena uíñote. Naimie mare illanomo iticue.

<sup>4</sup> Nainomo cue ñainina rafuena cacadícue.

<sup>5</sup> Ie diga abina iedoñeíticue. Cue jamai bue isoidimie diga abina iedoíticue.

<sup>6</sup> Uanaicinona cue lluañamona cue abina iedoiacania, tainona abina iedoñeíticue. Omoi cuena ciuamona, cue lloga rafuena omoi cacajamona, cuena uíñotomoi. Ie baífemo cuena omoi comeciaina facajana jitaiñedicue.

<sup>7</sup> Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidícue. Taife jaenici cuena duere finua isoi, duere sefuicabidícue.

<sup>8</sup> Cuemona iena naimie oni oretallena, cai Namamo dacaíño amani jiidicue;

<sup>9</sup> ia cuemo llote: “Ona jillotañeíticue; ia cue ona duenailacinodo jaca ocuiñoítio. O abi eo mairiñenia, ona cue canuana raise uíñoítio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uíñoíticue.

<sup>10</sup> Cristo muidona duere cue sefuia, cue comecina ocuiñoíticue. Cue jamai bue isoia, cuena bu jeare ñaía, bumona duere cue sefuia, cuena bu duere finoia, cue comecina ocuiñoíticue. Cue duere sefuia, cue Nama cuena eo canode.

### *Pablo Corintomo ite creyentiaímo comecina eo facade*

<sup>11</sup> Abina uíñoñedimie isoi iticue. Cue illana cue cuia jira, abina uíñoñedimie isoi iticue; ia iese cuena itatatomoi. Cuena riidoñedomoi; ia jiaíno eo mare railla llofuerainina raise feíñotomoi. Jamai bue isoidicue; ia naimaci cue baífemo faíñedimaci.

<sup>12</sup> Omoi motomo siño rafuena cue finua jira, Jusiñamui cuena oretajana uíñotomoi. Cristo rafuena sefuiruíñoeno omoi motomo iticue.



<sup>13</sup> Cuemona duere sefuiñedomoi. Jiaie creyentiaí omoi baifemo faíamo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiaí isoiñedomoi. Iena omoi gaiñenia, iena feita. Cue diga iciriñeno.

<sup>14</sup> Menacaiño navui omoi dine jaidicue. Omoi dine dane jaiacadicue. Omoimo ucubena jicañeiticue. Omoi rana jitañedicue; ia Cristo díbeimo omoi illana, naimiena omoi raise ñnuana jitaídicue. Cue uruiaí isoidomoi. Rana eenoñedomoi, omoi mootiaí iena; ia omoi mootiaí rana eenotimaci, omoi ena. Ie isoide. Cue uruiaí isoi omoi illamona, omoimona rana jitañedicue; ia omoimo rafuena iacadicue.

<sup>15</sup> Nana cuemo ite ra omoimo fecaacadicue. Nana cue comecimo iticinona omoimo jiaí iacadicue. Omoína eo isiruiticue; ia cuena janore isiruitomoi.

<sup>16</sup> “Caímona ucubena jicañedio; ia jifuecana caímona otio” raicabitomoi.

<sup>17</sup> Ero, omoi dine menamiena cue oretajamona, omoimona ¿nie isoide rana otiaímaiaí? ¿Niese omoína jifuetiaímaiaí?

<sup>18</sup> Omoi dine Titona oretaticue. Jiasie creyente imiena Tito diga oretaticue. ¿Niese Tito omoína jifujete? Omoimo coco comecina daje isoi facadicoco. Daje rafuedo jaca jaidicoco. Omoína jaca jifueñedicoco. ¿Niese omoi comeciaina raitomoi?

<sup>19</sup> “Caímona ie abina riidote” cuemo nibai comecina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo díbeimo omoi raise illana, naimiena raise omoi ñnollena, bie rafuena llocabiticue.

<sup>20</sup> Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiaí nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina íedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaínona jeare ñaicabitomoi. Nibai nia jiaíno joreñona ñaicabitomoi. Nibai nia abina uradoidomoi. Nibai daje isoi comeciaina nia lloiñedomoi. Omoi iese illari cue comecidi jarire ite.

<sup>21</sup> Omoi dine dane cue ria, omoi muidona Jusiñamui cuena meidaitajamo jacinaiticue. Cristo díbeimo omoi raise iñenia, sunaiticue. Jearede rafuena omoi nia faínocaiñenia, omoi aiñede riño diga illana omoi faínocaiñenia, omoi iniñede ñima diga illana omoi faínocaiñenia, sunaiticue.

## 13

### *Iraicaiño Pablo naimacina llofujete*

<sup>1</sup> Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaie llote: “Mena iaímaiaí daje isoi lloillamona, daje amani daje isoi lloillamona, maraiñedicinona finodimiena duere finua”.

<sup>2</sup> Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciái iuai nia meidoñenia, naimacina duere finoiticue.

<sup>3</sup> Iemona Cristo uai cuemo illana uiñoitomoi. Naimiena omoi ñnuamona, naimie uai siñonana uiñotomoi. Jamai uaido naimie omoína jillotañede; ia ie siño uaido omoína jai jillotate.

<sup>4</sup> Jamai bue isoidimie isoi cruzmo naimie fodaite; ia fodaillamona Jusiñamui uaido jillode. Cristomo cue duillamona, jamai bue isoidimiena iticue; ia Jusiñamui uai cuemo illamona, omoimo ite rafuena raise finoiticue.

<sup>5</sup> Cristona ñnocana omoi raise jaillemono omoi comeciaina faca. Cristo jitaillacino omoi finollemono comeciaina faca. Cristomo omoi duillamona, Cristo omoi diga illana uiñotomoi. Cristomo omoi duiñenia, naimie omoi diga nia iñede.

<sup>6</sup> Cristo omoi diga illana omoi uiñuamona, Cristo uai cuemo illana jiai uiñoitomoí.

<sup>7</sup> Maraiñedicino omoi finocana jaillana jitaiñedicue. Jusiñamuimo iena jiiiticue. Omoi comeciai iuai omoi meidoñenia, Cristo uai diga omoína duere finoacaiñedicue. Omoi comeciai iuai meiduana jitaidicue; ia Cristo uai diga omoína cue duere finoñenia, Cristo uai cuemo illana nibai uiñoñeitomoí.

<sup>8</sup> Cristomona cue uai illana omoi uiñollena, maraiñedicino omoi finuana jitaiñedicue. Mare rafuena omoi finocana jaillana jitaidicue. Iena finocana jiai jaiacadicue.

<sup>9</sup> Cristo rafuena ñnocana omoi raise jaia, iobidicue. Omoímo cue riire lloñenia, iobidicue. Cristo jitaillacino eo raise finocana omoi jaillena jicabidicue.

<sup>10</sup> Birui bie rafuena cueticue. Omoi dine iñedicue; ia bie cartana omoi feiñua mei, omoi comeciaina raise finuana jitaidicue. Cai Namamona cue uaina feiñoticue. Iedo omoímo riire lloiacaiñedicue; iadedi iedo naimie dibeimo omoi raise itataiacadicue.

<sup>11</sup> Cue amatiai, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciai daje isoi lloicana jai. Coniniri uri omoi i. Iemona Jusiñamui omoína isiruillana uiñoitomoí. Jusiñamui omoína uri itatajana uiñoitomoí.

<sup>12</sup> Nana creyentiaina eo caimare uaido.

<sup>13</sup> Nana cue diga ite creyentiai imaci uaina oredimaci.

<sup>14</sup> Cai Nama Jesucristo omoína jaca duenaite. Jusiñamui omoína jaca isiruillamona, coninina omoi isirui. Naimie Joreño omoímo illamona, coninina omoi nabai. Iese jitaidicue. Mai. Macaibaite. Pablodicue.

## GALACIAMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Galaciamo ite creyentiai, omoi dine bie carta oredicue. Pablodice. ¿Nigacino? ¿Nie isidomo? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediaimaiai. Comini cuena oreñedimaci. Cue lloga uaina cominimona jiai oñedicue.

<sup>3</sup> Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatatiimaiai. Iena omoi uiñocana mai omoi jai.

<sup>4</sup> Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite.

<sup>5</sup> Cai Moona jaca cai iobillasa. Iena jitaidicue.

### *Pablo lloga rafuedi jaca dajede*

<sup>6</sup> Jusiñamuina raire omoi fañonocaillari rajicaidicue. Cristo dibeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomo.

<sup>7</sup> Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itatañedimaci.

<sup>8</sup> Jesucristo rafuena omoimo jaie llotica. Jiaie rafuena lloticaidena, Jusiñamui ricaillafue anamo nia cai illasa. Jusiñamui jaienici jiaie rafuena llotena, Jusiñamui ricaillafue anamo jiai naimie illasa.

<sup>9</sup> Omoimo jaie iese lloticue. Dane ja lloticue. Cai llua isoi Cristo rafuena omoimo bu lloñenia, Jusiñamui ricaillafue anamo naimie illasa.

<sup>10</sup> Comini cueri iobillana jitañedicue; iadedi Jusiñamui cueri iobillana jitaidicue. Comina iobitaiacadicuena, Cristo dibeimo nia maijñedicue.

### *Ie oretagamiena jaillena, Cristo Pablona fetua rafue*

<sup>11</sup> Cue amatiai, cue lloga rafuena omoi raise uiñuana jitaidicue. Omoi jeacinomona omoi jilluana jaie lloticue. Bie rafuena comini comeciai facajacinomona oñedicue.

<sup>12</sup> Cominimona oñedicue. Bu jaca cuena iena llofueñede; iadedi Jesucristo cuena uiñotade.

<sup>13</sup> Jesucristona nia cue ñnoñenia, cue judíuai einamací lloga rafuedo cue jaillana jai fididomo. Cristona ñnotinona jaie eo duere finodicue. Naimacina fuidoacadicue.

<sup>14</sup> Cue einamací jaie llua isoi, Jusiñamuina raise ñnoticue. Naimací llogacínuaído eo duere cue jailla jira, daje facai cue diga itino baifemo ñnoticue;

<sup>15</sup> iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote.

<sup>16</sup> Omoi judíuaiñedomoimo naie Jito rafuena cue lollena, cuemo ie Jitona jaie bairetate. Naie facaise cuemo jai suide rafuena bu diga ñañedicue;

<sup>17</sup> ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jañedicue. Cuena Jesucristo nia oretañenia, naimacina orede, ie uai lollena. Arabia railla eniruemo cue illa mei, Damasco railla nairaímo abido jaidicue.

<sup>18</sup> Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue.

<sup>19</sup> Naie facaiseconi nana Jesucristo oretaganona cioiñedicue. Pedrona ciodicue. Jacobona jiai ciodicue. Naimiedi cai Nama ie ama Jainona cioiñedicue.

<sup>20</sup> Omoimo nana cue ciegacinodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue.

<sup>21</sup> Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue.

<sup>22</sup> Judeamo ite Cristona ñnotinodi cuena nia cioiñedimaci.

<sup>23</sup> Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai ñnuana navui jitaiñede. Caina fuidoacade”. Jiaie cue finoca rafuena fidiñedimaci.

<sup>24</sup> Ie fidiamona, cueri Jusiñamuimo iobillacinona jai fecadimaci.

## 2

### *Jerusalémo Pablo jailla rafue*

<sup>1</sup> Catorce años illanona, Jerusalémo dane jaidicue. Bernabé cue diga jaide. Titona uiticue.

<sup>2</sup> Jusiñamui cuemo llua jira, nainomo ite creyentiaimo jaidicue. Judíuaiñedino Cristo rafuena jai ñnuana cue llollena, jaidicue. Cue llofuiana naimaci raise uiñollena, creyentiai illaicominimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci.

<sup>3</sup> Tito cue diga ite. Naimiedi judío nairai imieñede; iadedi naimaci abina detacabilla isoi, creyentiai illaicomini dinena naimie abi detatajana lloñedimaci.

<sup>4</sup> Creyentiaina abi caitadino billa jira, Tito abina detatajana siadotica. Naimacina cai uaidoñeno bitimaci. Moisés micori llogacinuai anamo cai iñenana naimaci uiñollena, bitimaci. Cristo Jesús cai ñnuua jira, Moisés micori llogacinuaido jai jaiñedica. Moisés micori llogacinuai anamo caina dane itatallena, iena uiñoiacadimaci.

<sup>5</sup> Cai mare rafuena jiaiena jaca meidoñellena, naimaci ñaiana dallu cacareiñedica. Uanaicinona omoi uiñuana jitaidica.

<sup>6</sup> Naie creyentiai illaicomini omoimo llollena, cuemo jiaie rafuena lloñedimaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede.

<sup>7-9</sup> Cue llofuiana rairuiñedimaci; iadedi creyentiai illaicomini cuena Bernabé diga marena feiñotimaci. “Daje isoi comecaina facadica” raillamona, cue llofuiana: “Jai mare” raitimaci. Creyentiai illaicominidi Jacobo, Pedro, Juan digamie. Judíuai dine Pedrona Jusiñamui oretaja isoi, cue llumona judíuaiñedino dine Jusiñamui cuena oretajana uiñotimaci. Pedro llumona Jusiñamuidi ailluena judíuaina creyentiaina itatate. Cue llumona, Jusiñamuidi ailluena judíuaiñednona creyentiaina jiai itatate. Iemona Jusiñamui uai cuemo illana jai uiñotimaci. Judíuaiñednomo Jesucristo rafuena llocana nia coco jaillana jitaidimaci; iadedi judíuaimo Jesucristo rafue llocana nia jaidimaci.

<sup>10</sup> Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

### *Antioquíamo suide rafue*

<sup>11</sup> Antioquíamo cue jailla mei, Pedro nainomo jiai jaide. Nainomo Pedro bia, marañedifue naimie finua jira, naimie uiecomo naimiemo riire lloticue.

<sup>12</sup> Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuaiñede creyentiai diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiai diga Pedro jai guiñede. Ie ñnoga rafuedo naimie jai jaiñede.

<sup>13</sup> Naimie iese illamona, judíuai creyentiaidi judíuaiñede creyentiai diga jai jiai guiñedimaci. Pedro illa isoi, Bernabé iedo jiai jaide.

<sup>14</sup> Naimaci iese illa jira, Jesucristo rafuedo raise jaiñedimaci. Uanaicínodo jaiñedimaci. Iena cue uñua jira, nana comini uicomo Pedromo lloticue: “Judío nairai imedio; iadedi o jeacínomona o jilloillena, cai einamaci llucínodo birui jaiñedio. Ie jira, ¿bue ñellena judíuaiñedino cai einamaci llucínodo jaillana jai jitaideo?”

### *Judíuidi creyentiaina jailla mei, Moisés micori llogacinuaído jai jaiñedimaci*

<sup>15</sup> Nia lloticue: Judíuaiñedinodi Moisés micori lloga uaina jaie uiñoñedimaci. Caidi judíuaina jeicigacai. Ie muidona Moisés micori llogacinuai anamo jaie jeicigacai.

<sup>16</sup> Iese iticai; iadedi Moisés micori llogacinuaído jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñnuamona marebicaidicai. Iena uiñotícaí. Ie jira Cristo Jesúsna ñnoticai, cai marebicaillena. Cai marebicaillena, Moisés micori llogacinuaina ñnoñedícaí. Moisés micori llogacinuaina ñnuamona, jaca buna marebificainide.

<sup>17</sup> Jusiñamuimona cai marebicaiacallena, Cristona cai ñnuamona jeacino finorainiñedícaí. “Cuena ñnuamona, marebicaitomoi” Cristo iese llofueuide. Naimie llua isoi cai marebicaiñenia, cai jeacínomona nia cai jilloñenia, Cristo muidona; iadedi iese iñedícaí.

<sup>18</sup> Moisés micori llogacinuai jai jamaiñocaidicue. Ie jira naicínuai dane abido cue oia, iena birui cue ñnoñena jira, jai jeacino finoraimiedicue.

<sup>19</sup> Iemona cue marebicaiñena jira, Moisés micori llogacinuai cuemo jai duiñede. Ie anamo jai iñedícaí. Ie muidona Jusiñamui llogacinuaído jai jaidicue. Cristo anamo jai iticue.

<sup>20</sup> Naimie díbeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuena isiruillamona, naimie jitaillamona, cueri fodaite.

<sup>21</sup> Jusiñamui caina duenaillana jamaiñedícaí. Jusiñamui jitailla isoi, Moisés micori llogacinuaina cai ñnuamona marebicaidícaína, Cristo tainomo niade fodaite.

## 3

### *Jesucristona ñnuamona judíuidi Jusiñamui Joreña feiñotimaci*

<sup>1</sup> Gálatas imaci, abina jai uiñoñedomoi. Jiaíno omoína birui jifujete. Omoímo Jesucristo cruzmo fodailla rafuena jaie marefodo lloticue. Iena raise cacadomoi.

<sup>2</sup> Ie jira omoímo biena jicanoiacadícaí: ¿Ñiese Jusiñamui Joreña jaie feiñotomoi? Moisés micori llogacinuaído jaillamona iena feiñoñedomoi. Jesucristo rafuena omoi cacajamona, ñnotomoi. Ie mei Jusiñamui Joreña feiñotomoi. ¿Ñiese birui abina uiñoñedomoi?

<sup>3</sup> Omoï marebicaillena, Jusiñamui Joreño omoïmo jai ite; iadedi Moisés micori rafuena dane omoï jaiacanamona, omoï jiaie finolle rafuemonajai marebicaiacadomoï.

<sup>4</sup> Jusiñamui Joreñomona diga marecinuaina feiñotomoï; iadedi iena jai jitañedomoï. Iese omoï illana ñnoñedicue.

<sup>5</sup> Dane jicanoiticue: ¿Ñiese Jusiñamuidi ie Joreño omoïmo fecade? ¿Ñiese siño rafuena omoïri finode? Moisés micori llogacinuaido omoï jaillamona ie Joreño omoïmo fecañede. Moisés micori llogacinodo omoï jaillamona, siño rafuena omoïri finoñede; iadedi Jesucristo rafue omoï cacajamona, iena omoï ñnua jira, ie Joreña fecade. Iemona siño rafuena omoïri jiaie finode.

### *Abraham micori Jusiñamuina ñnua muidona marebicaide*

<sup>6</sup> Abraham micori ie rafuena lloiticue. Naimie micorimona fueoiticai. Moisés micori naimiena cuete: “Abraham micori Jusiñamuina ñnua jira, Jusiñamuimona naimiedi marebicaide”.

<sup>7</sup> Iena cai cacajamona, Abraham micori isoi cai ñnuamona, naimie ua cominina cai illana uiñoticai.

<sup>8</sup> Jusiñamuidi judíuainedino ico marebicaillena jaie uiñote. Naimiena ico naimaci ñnollena jaie jiaie uiñote. Iena uiñuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi ñnotinona marebicaitaiticue” llote.

<sup>9</sup> Abraham micoridi ñnote. Jusiñamui naimiena marebicaitate. Ie isoide. Nana Jusiñamuina ñnotinona marebicaitate;

<sup>10</sup> iadedi nana Moisés micori llogacinuaido jaidino jai faidobidimaci. Moisés micori iena jaie cuega: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai.

<sup>11</sup> Biena uiñoticai. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina ñnuamona marebicaidimaci. Ie mei jaca iitimaci”.

<sup>12</sup> Moisés micori llogacinuai daje isoñede. Nana Moisés micori llogacinuaina finuamona comini marebicaide. Moisés micori iena jaie cuega: “Cue lloga uai finuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

<sup>13</sup> Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuega: “Cruzmo cuinacamie Jusiñamuimona jai faidobide”.

<sup>14</sup> Jusiñamuina naimie ñnua jira, Abraham micori jaie marebicaide. Jesucristo fiodailla muidona, naimiena judíuainedino ñnuamona, Abraham micori isoi marebicaidimaci. Jusiñamuidi ie Joreña caimo fecallena jaie llote. Ie muidona Jesucristona ñnuamona, Jusiñamui Joreña birui feiñoticai.

### *Jusiñamui lloga rafue*

<sup>15</sup> Cue amatiai, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetiaimaiai. Iaimaiai mamecina nainomo cuia mei, jiairuido damie naie rafuena jiaifo dama meidonide.

<sup>16</sup> Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena llote. Cristona ññate.

<sup>17</sup> Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena llote. Cuatrocientos treinta años



illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede.

<sup>18</sup> Jusiñamui llua jira, Abraham micori jillode; iadedi Moisés micori llogacínuaído cai jaillamona, cai jilloiadedi, Abraham micori isoi jilloñedicaí.

<sup>19</sup> Iese itena, ¿bue ñellena Jusiñamui Moisés micorimo jiaie rafuena llote? Naiemona jeacínona cai uiñollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicaí. Jusiñamuidi ie jaienisaímo naie rafuena llote, Moisés micorimo iena llollena. Ie mei Moisés naie rafuena cominimo llote;

<sup>20</sup> iadedi Jusiñamuidi Abraham micorimo ie rafuena atona llote. Jiaimie mo iese lloñede, Abraham micorimo iena llollena.

<sup>21</sup> Moisés micorimo Jusiñamui rafuena llote; ia naiemona Abraham micorimo llogacínuaído nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaídicaí;

<sup>22</sup> iadedi Moisés micori ciegafuiaídi nana comini jeacínuaído anamo illana llote. Moisés micori llogacínuaído jaillamona, jeacínuaído anamona jilloñedicaí. Jesucristona cai ñnuamona Jusiñamui llua isoi, jeacínuaído anamona jilloídicaí.

<sup>23</sup> Jesucristona ñnuana nia cai uiñoñenia, Moisés micori llogacínuaído anamo iticaí. Jesucristo billamona, naimiena ñnuana uiñoticaí.

<sup>24</sup> Moisés micori llogacínuaído cai lletarafue. Cristo díbeimo cai illena caina lletade. Cristona cai uiñuamona, naimiena cai ñnuamona, marebicaídicaí.

<sup>25</sup> Naimiena ñnuana jai cai uiñuamona, naie lletarafuena jai oñedicaí.

#### *Abraham micori ua uruiaí*

<sup>26</sup> Cristo Jesúsna ñnuamona, nana omoi Jusiñamui cominidomoi.

<sup>27</sup> Cristo díbeimo omoi illamona, bautizagaomoi. Iemona naimie Moodi jiai omoi Moo.

<sup>28</sup> Jusiñamuimona dajena itomoi. Naimiedi nana cominina feiñote. Judíuaina omoi illamona, omoína feiñote. Judíuainedínona omoi illamona, omoína feiñote. Mullaiaína omoi illamona, omoína feiñote. Mullaiaíñedínodomoidena, omoína feiñote. Iñiaína omoi illamona, omoína feiñote. Riñoniaína omoi illamona, omoína feiñote. Jesucristona omoi ñnuana jira, jaca damacidomoi.

<sup>29</sup> Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiaídomoi.

## 4

### *Jusiñamui uruiaína jaidicaí*

<sup>1</sup> Moisés micori llogacínuaído dane lloiticue. Jiaie rafuedo iena lloiticue. Riaí uruiaí moo fiodailla mei, ie moo raruaídi nano doforamiemo fiebide. Naie nano doforamie uruenia, naimie mamecido naimiemo jide. Naimiemo nia raise jiiñede. Naimiedi nia jamai ite isoide. Naimie ie jofomo mullaiaí isoi ite.

<sup>2</sup> Naimie moo llua dinori jaino anamo naimie ite. Ie moo raruaí jaino anamo jai ite. Naimie jai eimiena illemona naimie moo raruaídi naimiemo raise jai duite.

<sup>3</sup> Jaie daje isoidicaí. Uruiaí isoidicaí. Cai jaiagai llogacínuaído anamo iticaí;

<sup>4-5</sup> iadedi ie jitailliruimo Jusiñamuidi ie Jitona orede, naicínomona caina jilloitallena. Jusiñamui uruiaína cai jaillena, ie Jitodi naicínuaído anamo riñomona jeiciga.

<sup>6</sup> Naimie uruiaídicaína jira, Jusiñamuidi ie Jito Joreño cai comeciaímo orede. Naimiena cai feiñuanona, naimiedi caina Jusiñamuina: “Cai Moo” raitatate.

<sup>7</sup> Ie jirari jiaíno anamo jai iñedomoi; iadedi Jusiñamui uruiaídomoi. Jusiñamui uruiaídomoína jira, nana naimie lloga rafue omoímo jai duide.

*Moisés micorí llogacínuaí anamo omoí jaia, danomo abído jaidomoi*

<sup>8</sup> Jaie Jusiñamuina nia omoí uiñoñenia, ua jusiñamuillañede ra anamo itomoi. Naie isoide rana sedauídomoi.

<sup>9</sup> Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi.

<sup>10</sup> Judíuaí cominí rafuena finocabillaruímo jiaí finocabidomoi. Iemona: “Marebicaiticaí” raillanona iese finocabidomoi.

<sup>11</sup> Cue lloga uai omoí finoñena jira, omoímo tainona jai llotícue. Nibaí jai tainomo maijídícue.

*Pablo naimaci díga illana uibiñote*

<sup>12</sup> Cue amatiaí, omoí díne nano cue jaia, Moisés micorí llogacínno anamo iñedomoi. Naie llogacínno anamo jaie itícue; ia biruí ie anamo iñedícue. Biruí cue illa isoí omoí illana jiaí jitaídícue. Omoí díne cue nano ia, cuena raise feiñotomoi.

<sup>13</sup> Cristo rafuena omoímo nano cue llua facaiseconi duidícue. Iena uiñotomoi.

<sup>14</sup> Cue duico omoímona jacíre eruaíde; iadedi cuena jearuíñedomoi. Jusiñamui jaienicí omoí díne billa isoí, cuena feiñotomoi. Jesucristo omoí díne billa isoí, cuena jiaí feiñotomoi.

<sup>15</sup> Jaie caímare itícaí. ¿Ñiese biruí cue díga caímare iñedomoi? Cuena omoí canoítina, cuemo fecallena, omoí uisí jaie jino juiconoíacadomoi.

<sup>16</sup> Omoímo jicanoíacadícue: ¿Uanaicínuaí omoímo cue llua jira, omoí enoíllamíena jai jaidícue?

<sup>17</sup> Moisés micorí llogacínuaído jaidínno omoína eo nabairítimaci; iadedi mare rafuena finoacaiñedímaci. Naimaci díga omoí nabairillena, cue díga omoí nabairillana jai jitaíñedímaci.

<sup>18</sup> Mare comeciáimona cuena omoí jaca jitaía, eo mare. Omoí díne cue ia, iese omoí jitaía, mare. Omoí díne cue iñenia, iese omoí jitaía, jiaí mare.

<sup>19</sup> Cue uruiaí, Cristo omoí comeciáina raise namataja dínorí, omoírí cue comeci eo duere dane llicídaite.

<sup>20</sup> Omoí díga ja iacadícue, omoí díga atona raise ñaíllena. Omoímona are cue illa jira, dane raise caí nabairillena, omoímo cue llua raise uiñoñedícue.

*Jesucristo rafue Moisés micorí llogacínuaí baífemo faíte*

<sup>21</sup> Moisés micorí llogacínuaí anamo iacadínno, omoímo daje rafuena jicanoíacadícue: ¿Moisés micorí ciegafuíaina raise cacadomoi?

<sup>22</sup> Moisés micorí jaie cüega: “Abraham micorímo mena jito ite. Daje jito ie mullaíñomona comuíde. Jiaíe jito ie mullaíaiñediñaiñomona comuíde. Naiñaiñodi ie nanoca aí.

<sup>23</sup> Abraham micorí jitaílla jira, ie mullaíño jítóna comuídate; iadedi ie mullaíaiñediñaiñño jito comuíde, Jusiñamui llua jira”.

<sup>24-25</sup> Naie rafuemoná caí fueolle. Ie íaiñuaídi mena jai lloga rafue isoídaíñuaí. Abraham micorí mullaíño mamecí Agar micorí. Naiñaiñodi Sinaí raílla anedumona lloga rafue isoíde. Arabia raílla eníruemo Sinaímona Jusiñamuídi Moisés micorímo rafuena llote. Naiñaiñño mullaíñóna jira, ie urue mullaímana jeicíga. Ie nama anamo jaca ite. Ie isoíde. Moisés micorímo llogacínuaído jaidínodi naie rafue anamo itímaci. Jerusalémo ítino Moisés micorí llogacínuaí anamo jai nia illa jira, Agar micorí Jerusalén raílla naíraí isoíde.

26 Jiaíñaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullaiñoñena jira. Nainomo jainaiaidicai, Moisés micori llogacinuai anamo jai cai iñena jira.

27 Isaías micori iena jaie cuete:

Oiniño, mai iobi.

Urue nia jocoñediñaiño, ado iobi.

Inirediñaiño baifemo eo uruiairenitio.

Iemona Moisés micori llogacino anamo iñedinomona Cristona ñnotinona ailluena jaillana uiñoticaí.

28 Cue amatiaí, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruiaina jaidicai.

29 Ero, mullaiño jitodi mullaiaíñediñaiño jitona jaie duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci.

30 ¿Ñiese cai nibaille? Moisés micori Sara micori llua jaie cuete: “Mullaiño, naiñaiño jito diga, oni dota. Ie moo fodailla mei, mullaiño jito ie moo raruiaina feiñoñeite. Dama mullaiaíñaiñoñede jito ie moo raruiaina feiñoite’ llote”.

31 Ie jira mullaiño urue isoíñedicaí Moisés micori llogacinuai anamo jai cai iñena jira, mullaiaíñediñaiño urue isoidicai.

## 5

### *¿Ñie isoide rafuedo jaitomoi?*

1 Moisés micori llogacinuai anamona Cristodi caina jai jillotate. Ie jira omoi comeциаina ocuiño. Jaie omoi illa isoi, dane jaiño. Omoi marebicaitañede rafue anamo jaie itomoi. Ie jira Moisés micori llogacinuai anamo iñeno. Iemona marebicaiñeitomoi.

2 Jeacinomona omoi jillobillena, Moisés micori llogacino omoi jaiacanamona, omoi abiaina omoi detataia, Cristo rafuena jai jitaiñedomoi.

3 Dane lloiticue: Jeacinomona omoi jillobillena, naga abina detatagamie nana Moisés micori llogacinuaina ñnua. Nana iena ñnoñenia, naimie jilloñeite.

4 Moisés micori llogacinuaina ñnuamona omoi marebicaiacania, Cristo rafuena jai duiñedomoi. Jusiñamui caina duenailamona, Cristona jaie cai dine orede. Moisés micori llogacino omoi jaiacania, Cristo rafuena jai jitaiñedomoi.

5 Moisés llogacinuaina ñnuamona marebicaiñedicaí; iadedi Jesucristona cai ñnuamona, Jusiñamui Joreño caina canuamona, cai marebicaillemo iocire ocuiridicai.

6 Abina detatajamona, cai jeacinomona jilloñedicaí. Abina cai detatañenamona, jai jilloñedicaí. Dama Cristona cai ñnuamona jillobidicai. Naimiena cai ñnua jira, nana cominina isiruicana jaidicai.

7 Cristo rafuedo navui marena jaidomoi; ia damerie uanaicinona omoi ñnuana jai jitaiñedimaci.

8 Jusiñamuimona naimaci uaina oñedimaci. Jusiñamui omoína navui uaidote, naimie ñibeimo omoi illena.

9 Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jaia, diga cominina jifuerede, naimie jailla ñibeido jaillena.

<sup>10</sup> Jiaie rafuedo omoi jaiñellemo cue comecina jai facadicue. Cai Nama cue ñnua jira, cue lloga uaido omoi jaillemo cue comecina jai facadicue. Omoi comeciaina naganomo itatatimiena uiñoñedicue; iadedi Jusiñamui naimiena duere finoite.

<sup>11</sup> Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira.

<sup>12</sup> Omoi comeciai naganomo itatatinodi raitimaci: “Janore jisa abina detatajamon, cai jeacinomona jillobidicai”. Iese itena, Jusiñamuina uiñoñedino finua isoi, namiena naimaci abiai diana jiai jitaidicue.

<sup>13</sup> Moisés llogacinuai anamona Jusiñamui omoina jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano.

<sup>14</sup> Moisés micori iena jaie llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacinuaina jai finodomoi.

<sup>15</sup> Iese omoi finoñenia, conima diga omoi riire iciria, jaca danomo iñeitomoi.

### *Jiaie cominina omoi isiruilla rafue*

<sup>16</sup> Omoimo nia lloiticue. Jusiñamui Joreño omoi comeciaino namatajano omoi i. Omoi comeciaino ite marañedicinodo omoi jaiñeno.

<sup>17</sup> Cai comeciaino ite marañedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena;

<sup>18</sup> iadedi Jusiñamui Joreño anamo omoi raise ia, naimie lluaña omoi raise ñnoia, Moisés micori llogacinona jai jitañedomoi.

<sup>19</sup> Ero, marañede comeciaino iticinodo omoi jaia, bie isoidicinona finocabidomoi: añede riño diga illacina, iniñede ñima diga illacino, jeare ñaiacino, diga eo jearede rafuena finuacino,

<sup>20</sup> jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino,

<sup>21</sup> dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaie lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite.

<sup>22</sup> Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeci caimare illacino, uri illacino, riire iciriraininacino, duenaillacino, jiaie cominina canuacino, ie lloga uaina finuacino,

<sup>23</sup> uai oñenacino, abina eenuacino. Moisés micori llogacinuai bie isoidicinona ñañede.

<sup>24</sup> Cristo Jesúmo jainaiadinodi naimaci marañede comeciai jitaillacino anamo iñedimaci.

<sup>25</sup> Jusiñamui Joreño caimo illa jira, naimie cai comeciaina namatajacinodo cai jaillesa.

<sup>26</sup> Iemona abina cai biriñellesa. Abina jiai cai iedoñellesa.

## 6

### *Jiaie llofuiacino*

<sup>1</sup> Cue amatiai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise iciñeno lloño. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiai abi rairuillesa.

<sup>2</sup> Bu duere sefuia, bu Taife ramo faia, coninina cano. Iese omoi canoia, Cristo llogacinuaina jai inotomoi.

<sup>3</sup> “Cuemo iese suiñeite. Dama abina sedadicue. Jamai bue isoiñedicue” comecina facadimie dama abina jifujete. Naimie jamai bue isoide.

<sup>4</sup> Maraiñeni raillano, ie finoca rafueconi iobillena, nagamiiaie ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiamiemmo ite maijia rafuedi naimiemo duiñede.

<sup>5</sup> Naimie finoca rafuemonna nagamie jeacinona finoia, dama naimie muidona.

<sup>6</sup> Naga Jesucristo rafuena fueotimiedi ie llofuegamie mo mare ra fecalle.

<sup>7</sup> Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite.

<sup>8</sup> Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faiñeite.

<sup>9</sup> Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla facaiseconi ibana feiñoitica.

<sup>10</sup> Ie jira nana cominina canocabi. Nana creyentiaina ua eo canocabi.

### *Facaduacino*

<sup>11</sup> Ero, jerie cuiano omoimo bie facaimo cueticue.

<sup>12</sup> Jiaie cominimona iobillacinona omoi abiaina detatajana jitaicino feiñoiacana jira, omoi abiaina detatajana jitaicimaci. Cristo rafue lloticainadedi: “Cristo rafuena uiñoñedinodi niade duere caina finodimaci” raillanomo comeciaina facajamona, iese jitaicimaci.

<sup>13</sup> Omoi abiaina detatajana jitaicimodi Moisés micori llogacinodo raise jaiñedicimaci. Nana iena inoñedicimaci. Omoiri abina iedoiacana jira, omoi abiaina detatajana jitaicimaci;

<sup>14</sup> iadedi Jusiñamuidi jiaie rafueri abina cue ieduanana jitañede. Dama Cristo cueru fiodailla rafueri abina iedoticue. Ie jira Jusiñamuiñede rafuemo jainaiñedicue. Naie rafue anamo jai iñedicue.

<sup>15</sup> Abina diamona cai jeacinomona jilloñedica. Abina deñenanomona jaca jilloñedica; iadedi Jusiñamui Joreño caina comonori comuitajamona jillobidica.

<sup>16</sup> Jusiñamuidi nana bie llucacino jaidino uri itatatesa. Naimie naimacina duenailasa. Jusiñamui cominidi ua jaca iese illasa.

<sup>17</sup> Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellaña jai oticue.

<sup>18</sup> Cue amatiai, cai Nama Jesucristo omoina duenailasa. Mai. Pablocue.

## EFESOMO ITE CRISTONA HNOTINOMO PABLO ORETAGA RABE

### *Efesomo ite creyentiaimo Pablo cartana orede*

<sup>1</sup> Efeso railla nairaimo ite creyentiai, Pablodicue. Bie carta omoi dine oredicue. Ie rafue lollena, Jusiñamui jitailla jira, Jesucristo oretagamiedicue. Naimiemo omoi jai jainaiilla jira, Jesucristona inocana jai jaidomoi.

<sup>2</sup> Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iamaiai omoi comeciana uri itatajacabillana uiñocana mai omoi jai.

### *Cristomo jai cai jainaiilla jira, Jusiñamui marena itatajacinona feiñotica*

<sup>3</sup> Cristomo cai jainaiilla jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiilla jira, cai comeciai marena itatajacinona Jusiñamuimona jai feiñotica.

<sup>4</sup> Iena ja lloiticue. Enirue nia iñenia, Jusiñamui nana naimiena inotinona jaie fetode. Cai facaina Cristo ico fodaillena naimie uiñuamona, caina jaie fetode. Naimiemono cai marebicaillena, jeacinona cai finoñellena, caina fetode.

<sup>5</sup> Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fodaillamona Jusiñamui uruiaina jaidica.

<sup>6</sup> Naimie caina fetuamona, naimie caina duenaillana jai uiñotica. Iemona naimiedi eo mareuidimena jai jai uiñotica. Ie isiruiga Jitomo cai jainaiillamona iena uiñotica. Naimiemo buena cai finoñenia, caina duenaite. Naimiena cai iobitallena, caina fetode.

<sup>7-8</sup> Caina eo duenaillanona, ie Jito fodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jai oñeite.

<sup>9</sup> Naimiena cai raise inollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade.

<sup>10</sup> Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. "Cristo cai Nama" raitimaci.

<sup>11</sup> Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidica.

<sup>12</sup> Naimie caina fetuanona Cristona jaie inotica. Naimie diga ico jaca cai illemono birui ocuridica. Naimiena cai iobitallena caina fetode. "Naimie fue eo mare" cai raillena caina fetode.

<sup>13</sup> Cristona jai birui inotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi.

<sup>14</sup> Jusiñamui Joreño caimo jaca illa jira, Jusiñamui diga ico cai jaca illena uiñotica. Jusiñamuidi caina ie cominina jai jaitate, naimiena cai iobitallena. "Naimie fue eo mare" cai raillamona, naimiena iobitaitica. Naimiemo cai jainaiilla jira, naimiemono nana cai comeciai marena itatajacinona feiñotica.



*Naimaci facaina Pablo j#de*

<sup>15</sup> Cai Nama Jesúna omoi #nuana jai fididicue. Nana jiaie creyentiaina omoi isiruillana jiaí fididicue.

<sup>16</sup> Ie jirari Jusiñamuimo cue j#ia, omoína feitañedicue. Omoi facaina naimiemo iobillacinona jaca fecadicue.

<sup>17</sup> Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue j#anona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue.

<sup>18</sup> Naimie dibeimo omoína naimie jai uaidua jira, naimie diga ico jaca omoi illemona, iena omoi raise uiñuana jitaídicue. Naimie cominina omoi jai jailla jira, naimie illanomo ico eo marena iocire iitomoí. Iena omoi raise uiñuana jitaídicue.

<sup>19</sup> Naimie uai ua eo siñonana omoi uiñuana jitaídicue. Naimiena cai #nua muidona, ie uaido naimie caina canorede. Iena omoi raise uiñuana jitaídicue.

<sup>20</sup> Fiodaillamona Cristona ie uaido Jusiñamui jai jillotaja jira, naimie uai siñonana uiñotomoí. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaímana dane itatate.

<sup>21</sup> Ie jira Cristo nana Jusiñamui jaienisaí afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaímaiaí isoide joreñuaí afemo naimie ite. Birui iese ite. Ico iese nia iite.

<sup>22</sup> Jusiñamuidi naga ra Cristo anamo ua jai itatate. Cristona nana creyentiaí imaci illaímana jiaí ua jai itatate.

<sup>23</sup> Cristomo daajena nana cai creyentiaídicaídi duidicaí. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

## 2

*Jusiñamui caina isiruilla jira, cai jeacinomona jai jillobidicaí*

<sup>1</sup> Jusiñamuina jaie omoi nia #noñenia, naimiemo omoi duiñena jira, naimiemona fiodaitino isoidomoí. Jeacino anamo omoi illa jira, naimiemona fiodaitino isoidomoí. Jeacino finocana jaidomoí. Maraiñedicinona finocana jaidomoí.

<sup>2</sup> Jeacinona ebiruitomoí Jusiñamui dibeimo iñedino rafuedo jaidomoí. Taife dibeido jai jaisoidomoí. Jusiñamuina oiacaíñedino Taife jitailla rafuedo jaisoidimaci.

<sup>3</sup> Naimaci isoi jaie nana iticaí. Cai comeciaímo ite jearede jitaillacinona finodicaí. Iedo jai jaisoidicaí. Ie jira Jusiñamui riícaillafue anamo jaie iticaí. Iese jaie nana iticaí.

<sup>4-5</sup> Jeacinona jaie cai finua jira, jeacino anamo iticaí. Jusiñamuina #noñedicaí; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticaí.

<sup>6</sup> Cristona jillotaja mei, Jusiñamui ie ecimo naimiena dane itatate. Cristomo cai jai jainaiaílla jira, Jusiñamui nainomo caina jiaí jainaiaítate.

<sup>7</sup> Cristo finoca rafuemona caina iese jai itatate. Caina iese jai itatajamoná, nana cominidi Jusiñamui caina eo duenaillana uiñoitimaci.

<sup>8</sup> Naimie caina duenaillanona, caina jai jillotate. Jaca buena cai finuamona jillobiñedicaí; iadedi naimie jitailla jira, naimie caina jai jillotate.

<sup>9</sup> Cai jilloillena jaca buena cai finoñena jira, abina iedoñedicaí.

<sup>10</sup> Jesucristomo cai jainaiaillamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

*Cristomo jai cai duilla jira, jiaie nairaia digu birui uri iticai*

<sup>11</sup> Omoi jaie isoillana uiñotomoi. Iena comecitomoi. Jusiñamuina jaie uiñoñedomoi. Judíuaiñedinona omoi jeiciñena jira, cai judíuai comini isoi abiaina detañedomoi. Ie jira cai cominimona marañedomoi.

<sup>12</sup> Omoi jeacinomona Cristo omoina jilloitaiacanana naie facaiseconi uiñoñedomoi. Cai judíuai nairaimo jainaiañedomoi. Ie muidona Jusiñamui cai judíuai cominimo jaie lloga rafuena uiñoñedomoi. Jusiñamuina nabaillana uiñoñedomoi. Jusiñamui digu omoi ico jaca illena uiñoñedomoi. Jusiñamuina omoi uiñoñena jira, naimiena sedañedomoi.

<sup>13</sup> Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fodailla jira, naimiena birui ñnotomoi. Naimiena omoi jai ñnuamona, cai digu naimie dibeimo jai itomoi.

<sup>14</sup> Naimie omoi comeci jai uri itatate. Cai comeci jia jai uri itatate. Cai judíuaimona omoina jaie jearuiticai. Iese jaie iticai; iadedi Cristo muidona dani coninina nana birui nabaidicai.

<sup>15</sup> Cristo fodaillamona Moisés micori jaie llogacino anamo jai iñedicai. Naie llogacino dani cai judíuaimo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabairedicai.

<sup>16</sup> Cruzmo Cristo fodailla jira, Jusiñamui dibeimo cai illamona, mena nairaïmona caina daje nairaïna jai itatate. Ie jira daje nairaïna uri iticai.

<sup>17</sup> Cristo jaie billanona, mare rafuena llote. Omoi judíuaiñedinomo, cai judíuaimo, comeci uri illana llote. Nana caina jilloitaiacanana llote.

<sup>18</sup> Naimie muidona Jusiñamuina jai nabairedicai. Jusiñamui Joreño caina canuamona, naimie digu birui nabairedicai.

<sup>19</sup> Jusiñamui cominina omoi jai illa jira, nana naimiena ñnotino digu Jusiñamuimo daajena duidomoi. Caimona birui jiaie cominiñedomoi.

<sup>20-22</sup> Jofo isoidicai. Jofona cai finoacania, naie ibiri nano finodicai. Ie mei digu rana cai atiamona, iena niticai. Ie isoide. Digu jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai digu Cristomo omoi jai duillamona, Jusiñamui Joreño nana cai comeciaino jai ite.

### 3

*Judíuaiñedinomo Pablo Cristo rafuena llofue*

<sup>1</sup> Jesucristo rafuena omoi judíuaiñedinomo cue llofueuilla jira, cárcelmo iticue.

<sup>2</sup> Omoina naimie duenaïllanona, omoina llofuellena, Jusiñamui cuena ore-tate. Iena jai uiñotomoi.

<sup>3</sup> Jusiñamui cuemo jaie uiñoñega rafuena jai llote. Naie rafuena janore como jai cueticue.

<sup>4</sup> Bie carta omoi facaia, Cristona jaie uiñoñega rafuena cue jai uiñuana uiñoitomoi.

<sup>5</sup> Jusiñamuidi cominimo iena jaie raise uiñotañede; iadedi ie Joreño do Cristo facaina llorainina iena birui jai uiñotade.

6 Iena lloiticue. Judíuaiñedomoi; iadedi Jusiñamui cuemo jaie llote: “Judíuaiñedino Cristona ñnuanona, omoi judíuai isoi jilloitimaci” llote. Omoi facaina Cristodi fiodaite. Naimiena omoi ñnoia, omoina ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca iitomoi. Jusiñamui cuena iena jaie uiñotade.

7 Jusiñamui jitailla jira, cuena naimie duenaillanona, naimie uai cuemo illamona, naie mare rafuena llofuecabiticue.

8 Creyentena nia cue jaiñena facaiseconi, creyentiaina jaie cue duere finouilla jira, jamai bue isoidicue. Nana jiaie creyentiaie cue baifemo faitimaci; iadedi Jusiñamui cuena duenaillanona, ie rafuena cue llollena, cuena oretate. Cristo caina eo raise marena canocabillana llofuecabiticue.

9 Naie jaie uiñoñega rafuena nana comini birui uiñollena, cuena oretate. Jusiñamui naga rana finode; iadedi naimie jitailla jira, naie jaie uiñoñega rafuena jaca buna jaie raise uiñotañede. Nana comini iena birui raise uiñollena, cuena oretate.

10 Judíuaiñedino judíuai diga creyentiaina jaillamona, Jusiñamui jaienisaie naimie uai siñonana uiñoitimaci. “Naimie fue eo mare” raitimaci.

11 Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide.

12 Cristona cai ñnua jira, Jusiñamui diga jaciruiñeno birui jai ñairedicai. Naimie caina cacajana jiaie uiñoticaie.

13 Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeciie sefuiruisiñeno; iadedi Cristo rafue omoimo cue lluanona cue duere sefuia, iobicana omoi jai.

#### *Cristo caina eo isiruite*

14 Cai Moo Jusiñamui caina eo canocabillanomo cue comecina facaia, naimiemo jiidicue.

15 Naimiedi nana creyentiaie imaci Moona jira, naimiemo jiidicue.

16 Naimiemo cue jianona, omoi facaina jiidicue. Naimiemo eo ebirede siño iticino illamona, ie Joreño naimie omoi comeciaina raise ocuiñotallena jicanoticue.

17 Cristona omoi ñnuamona, naimie omoi comeciaina raise namatallena jicanoticue. Jusiñamuina omoi isiruicana jaillana jiidicue. Jiaie cominina omoi isiruicana jaillana jiaie jiidicue.

18-19 Cristo caina jaca eo isiruillana, nana jiaie creyentiaie diga jaca eo isiruillana, omoi eo raise uiñuana jiidicue. Naimie caina eo isiruillacino cai comeciie facajacino baifemo uailla jira, naimie caina eo isiruisoillacinona jaca raise uiñoñedicai; iadedi iena janore cai uiñuamona, Jusiñamui omoi comeciaina namatallena jiidicue. Iese omoi facaina jicabidicue.

20 Ie jira Jusiñamuimo iobillacino cai fecajasa. Ie uaido cai comeciie marena icana jaitate. Naimiemo cai jicajacino baifemo naimie fecarede. Cai comeciie facajacino baifemo naimie jiaie finorede.

21 Ie muidona naimiemo iobillacinona nana cai creyentiaidicaide fecacabilasa. Jesucristo finoca rafue muidona iobillacinona jiaie cai fecacabilasa. Mai.

## 4

### *Jusiñamui Joreño jai caino illa jira, cai comeci daje isoi lloide*

1 Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaina omoi jai jailla jira, Cristo jitailla isoi omoi i. Jusiñamui omoina jai fetode naimie jitailla rafuena omoi finollena.

<sup>2</sup> Ie muidona abina jaca iedoñoeno. Raire iciriñoeno. Jiaimie ona duere finoia, ibana oñoeno; iadedi uai oñoeno naimiena jaca isirui.

<sup>3</sup> Jusiñamui Joreño omoimo illamona, omoi comeciai daje isoi lloicana jai. Daje isoi omoi comeciai lloillamona, omoi jitaillamona dani uri omoi i.

<sup>4</sup> Iena nia lloiticue. Cristona cai #nuamona, daajena naimiemo jainaiaidicai. Jusiñamui Joreño nana caimo illamona, dani omoi comeciai lloicana omoi jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicai.

<sup>5</sup> Jaca dajede Nama sedacabidicai. Caina jilloitallena, da naimiena #noticai. Dama naimie facaina bautizaganodicai.

<sup>6</sup> Cai Moo Jusiñamui jaca dajede. Jaca dajede Jusiñamuina nana cai creyentiaidicaidi sedadicai. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

<sup>7</sup> Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiana naimiemo #notacana jaillena, ie uai caimo fecade.

<sup>8</sup> Iena cai raise uiñollena, David micori jaie ciegafuemona fueoiticai. Naimie cueba: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijiacino caimo illana uiñoticai.

<sup>9</sup> Biemo omoi comeciaina faca. Monamo abido naimie jailla jira, monamona eniruemo Cristo nano billana uiñoticai.

<sup>10</sup> Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede.

<sup>11</sup> Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lollena, ie uaina fecade. Ie rafuena nia #noñedinomo lollena, damieriemo ie uaina fecade. Creyentiana ie rafuena llofuellena, damieriemo ie uaina fecade.

<sup>12</sup> Iese ie uaina fecade, naimie facaina raise cai maijillena, nana jiaie creyentiana cai canollena, Ie mei Cristo rafuena daajena #nocana jaiticai.

<sup>13</sup> Iena cai #nuamona, Jusiñamui Jitona raise uiñocana jaiticai. Cai comecidi daje isoi lloicana jaiticai. Naimie jitaillacinodo raise jaiticai. Naimie marena icana illa isoi jaiticai.

<sup>14</sup> Cai uruiyai facaise cai comeciai naganomo ite. Naie facaise nie isoide rafuena cai cacajia, iena raire #noticai. Cristo #nocana cai jaillamona, uruiyai isoi cai iacaiñena. Damierie naga llofueraima uaido jaidimaci. Damierie llofueraididi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena;

<sup>15</sup> Iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uiñoticai. Cristodi cai illaimana jira, caina ocuide.

<sup>16</sup> Naga creyente naimiemo jainaiaide. Aillosiedicai; iadedi daajena naimiemo jainaiaidicai. Daajena naimiemo cai jainaiailamona, naimie jitaillacino cai finoia, naimiena #nocana jaiticai. Iemona dani coninina isiruicana jaiticai. Daajena naimiemo cai jainaiaila jira, cai comeciai daje isoi lloicana cai jailla.

*Cristomo jai cai duilla jira, naimie rafuedo birui jaidicai*

<sup>17</sup> Omoimo nia lloiticue. Cai Namamo cue duilla jira, biena lloiticue. Jusiñamuina #noñedino isoi dane omoi iñoeno. Jaie naimaci isoi itomoi. Naimaci comeciadi tainomo jai jaide isoide. Cacarefiacaiñedimaci.

<sup>18</sup> Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui dibeimo illana jaca uiñoñedimaci. Uanaicinona uiñoiacaiñedimaci.

<sup>19</sup> Jearede rafuena naimaci finoia, meiruiñedimaci. Naimaci comeciai oiacana rafuedo jai jaidimaci. Naga jearede isoide rafuena eo finocana jaidimaci;

<sup>20</sup> iadedi Cristo rafuena omoi cacajamona, naimiena omoi raise uiñuamona, naimaci isoi omoi illena fueoñedomoi. Cristo rafuena omoi cacajamona, jiaiena illena jai fueotomoi.

<sup>21</sup> Naimiena cacajanona iena ñnotomoi. Naimiena cue llofuiamona, naimiena Cristo facaina lloraini llofuiamona, danomo omoi roracomo omoi ofia, Cristo uanaicinona cacadomoi.

<sup>22</sup> Biena omoi na llofuecabiticue. Cristona jaie nia omoi ñnoñena isoi, omoi jaiñeno. Omoi comeciaimo jaie iticinodo jaiñeno. Naga jearede rafue omoi comeciai oiacanamona faifcana jaie jaidomoi. Iedo birui jaiñeno;

<sup>23</sup> iadedi Cristo dibeimo omoi jai illanona, naimiemo omoi comeciai facajano, Jusiñamui omoi na canuamona, omoi comeciai iuaillaina meidocana jai.

<sup>24</sup> Cristo rafuena birui ñnotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide.

<sup>25</sup> Ie jira tainona lloñeno. Cristomo daajena jai jainaiaila jira, coninimo uanaicinona jaca omoi llono. Jiañona omoi jifueñeno.

<sup>26</sup> Maraiñedicinona bu finoia, naimiemo riire llono; iadedi iese o lloia, naimiena jeare ñaiñeno. Jiaimie ona icia, naimiena jeare ñaiñeno. Naimie diga o rafue ia, naie rafue nairuido marena fino,

<sup>27</sup> Taife ramo o fai raillano. Bu diga o nicino ia, iena raire marena o finoñena, ibana oiacanitia. Naie raire o feitaña jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido linoñeno.

<sup>28</sup> Naimiemo ra illena, fiamona omoi mona navui bu ia, creyentena naimie jai jailla jira, naimie dane fiiñena; iadedi ra naimie jitaia, naimie maijite. Ie maijiamona ie ra ollena, ucubena feiñoite. Ie mei dueredinona naimie jiai canoite.

<sup>29</sup> Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoitomoi, Jusiñamui dibeimo naimaci raise illena.

<sup>30</sup> Jusiñamuimo omoi jai jainaiaila jira, jeacinona finoñeno. Jeacino omoi finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñotica. Cristo dane abido billemona, naimie dine cai jaca illena, caina jai jillotate.

<sup>31</sup> Jiaie cominina icineno. Icirineno. Uaina uaitaño. Jiaie cominina jeare ñaiñeno. Naimacina duere jeare finoñeno;

<sup>32</sup> iadedi coninina canua. Jiaie cominina duenai. Jiaimie diga omoi nicino ia, naimie finoca rafuena faitajanona, naimie diga marena ñaino. Naie rafuena dane abido linoñeno. Cristo finoca rafue muidona, Jusiñamui omoi jeacinona jai faitaja isoi, jiaimie diga omoi rafue ia, naifuena omoi feita.

## 5

### *Jusiñamui cominina jai cai illamona, naimie jitaillacinona finoitica*

<sup>1</sup> Jusiñamui isiruiga uruiaidomoi. Naimie marecinona finua isoi, omoi fino.

<sup>2</sup> Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade.



<sup>3</sup> Jusiñamui cominidomoi. Omoi aiñede riño diga iñeno. Omoi iniñede iima diga iñeno. Rana nicidoñeno. Jearede rafue finuamo omoi comeciaina facañeno.

<sup>4</sup> Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobilacinona fecacana omoi jai.

<sup>5</sup> Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede iima diga icabitiñaiñodi Cristo ie cominina sedajanomo jiai duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi.

<sup>6</sup> “Creyente naie isoide rafuena finorede” bu lloia, naimie omoina jifueiacade. Naimie iese lluana iñoñeno. Jusiñamui naie jeacinona finocana jaidinona duere finoite.

<sup>7</sup> Ie jira naimaci jearede finoca rafuedo jaiñeno. Naimacina nabaiñeno.

<sup>8</sup> Jusiñamuina jaiie omoi uiñoñena jira, jitiñedino itomoi isoidomoi; iadedi cai Namamo omoi duillamona, uanaicinona iñocana omoi jai.

<sup>9</sup> Jusiñamuina omoi jai uiñoia, jeacinona omoi fañonocaia, Jusiñamui jitaillacinona finocana jaitomoi. Uanaicinona llocana jaitomoi.

<sup>10</sup> Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai.

<sup>11</sup> Jitiñedino nia itino finoca rafuedo omoi jaiñeno. Naimaci finoca rafuemoni marecinodi jaca comuiñede. Naimacimo: “Maraiñede” llono.

<sup>12</sup> Iena cue meidalla jira, naimaci jearede bainino finoca rafuena ñaiacaiñedicue.

<sup>13</sup> Marecinona omoi jaca finuamona, jiaie comini naimaci finoca rafue eo maraiñenana raise uiñotimaci.

<sup>14</sup> Cai ofia, naiena rocabiticai:

Mai casi. Iniñeno.

Jai fioidaitino isoidomoi;

iadedi omoi comeciaina Cristo jai lligaiñoite.

<sup>15</sup> Ie jirari omoi marena illena, abina rairuicana omoi jai. Jusiñamuina iñoñedino ebena jaicabidimaci. Naimaci isoi jaiñeno.

<sup>16</sup> Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai.

<sup>17</sup> Ie jira ebe isoi jaiñeno; iadedi Cristo jitaillacinona uiñocana omoi jai.

<sup>18</sup> Iocire omoi iacania, naiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jiai iitomoi.

<sup>19</sup> Danomo omoi ofia, nana omoi comeciainona diga isoide ruana iocire rona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomoi.

<sup>20</sup> Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca feca.

*Cristomo jai cai duilla jira, cai comini diga marena iacadica*

<sup>21</sup> Cristo anamo omoi illa jira, jiaie creyente baiñemo omoi faiacinomo omoi comeciaina facañeno; iadedi coninina nagamiiaina cano.

<sup>22-23</sup> Inirediñaiñuai, omoimo rafuena lloiacadicue. Cai Nama Cristomo omoi jainaiñaiñai jira, naimie jitailla jira, omoi iniñaiñai anamo raise omoi i. Naimaci uaina raise iño. Cristo nana creyentiai afemo illamona, naimacina naimie



sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci.

<sup>24</sup> Cristo anamo nana creyentiai illa isoi, naiñaiñuai iniñiai uaina jaca inua.

<sup>25</sup> Airedino, omoimo jiai lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fodaite. Ie isoi omoi ainiaina omoi isirui.

<sup>26</sup> Nana creyentiai marena illena naimie fodaite. Jusiñamui jitailla isoi, caina marebicaitate. Cristo fodailla jira, Cristo jai lloga rafuena cai inuamona, cai jeacinomona jai jillobidicai.

<sup>27</sup> Fodaite, nana cai creyentiai comeciai marena illena. Cai comeciai jeaninana jitaide. Cristo abido bille facaisemo, Jusiñamui jitailla isoi cai marenana jitaide.

<sup>28</sup> Naimie abi naimie isiruilla isoi, naga ini ie aina isiruilla. Iaimaiaia daajena jira, ie aina isiruitimiedi ie abina jiai isiruite.

<sup>29</sup> Jaca bu ie abina enoñede; iadedi ie abina sedade.

<sup>30</sup> Naimiemo nana cai creyentiai duilla jira, Cristo caina isiruillamona, caina sedade. Ie isoi nagamie ie aina isiruilla.

<sup>31</sup> Bie jaiie lloga uaimona iena uiñoticai. Moisés micori Jusiñamui lluaña jaiie cuega: “Ie aina ollena, ima ie moona, ie ei diga faionocaite. Iemei dajena iitiaimaiaia”.

<sup>32</sup> Naie llofuiacinomona jiai rafuena fueoiticai. Cristona ñaiticue. Creyentiaina ñaiticue. Naimiemo cai duillamona, daajena iticai.

<sup>33</sup> Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitaño inua.

## 6

<sup>1</sup> Uruiaia, omoimo rafuena lloiacadicue. Cai Nama jitailla jira, omoi eiñiaia uaina ino. Omoi mootiaia uaina jiai ino. Jusiñamuimona marenana jira, iaimaiaia uaina ino.

<sup>2-3</sup> Moisés micori Jusiñamui lloga uaina jaiie cuega: “O moo uai ino. O ei uai ino. Marena o illena, raire o fodaifellena, iaimaiaina o isiruillamona, iaimaiaia uaina ino” cuega. Jusiñamui diga lletarafuena llote; iadedi bie nanoca rafuena llote.

<sup>4</sup> Mootiaia, omoimo lloiticue. Omoi uruiaina jamai icineno; iadedi naimacina cai Namana naimaci uiñollena llofue. Naimaci inoiacaiñenia, abina naimaci uiñollena, naimacina isiruillamona, naimacina duere fino.

<sup>5</sup> Patrón anamo itino, omoimo lloiticue. Omoi patrones ocuica uaina ino. Omoi maijana naimaci ocuia, naimacina iobitallena, jaciruioicaida raise maiji. Omoi comeciaimona naimaci jitailla rana maiji. Cristo iedena, naimaci ocuica uaina ino.

<sup>6</sup> Omoimo naimaci eruaia, naimacina iobitallena, marena maiji; iadedi omoimo naimaci eruaifenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciai maiji raillamona, marena omoi maiji.

<sup>7</sup> Patrón facaina maijiacino dan comecina facaño; iadedi iocire maiji, cai Nama facaina omoi maijidomoidena.

<sup>8</sup> Biena uiñoticai: Marena bu maijia, cai Nama Cristomona ibana icofeñoite. Patrón anamo itino iena feñoitimaci. Patrón anamo inedino iena jiai feñoitimaci.

<sup>9</sup> Patrones, omoimo lloiticue. Omoi Nama Cristo monamona omoimo eruailla jira, Cristo monamona naimacimo jiai eruailla jira, omoi anamo itinona marena fino. Naimacina riire ocuifeno. Naimacina jeare finoño.

Cristo nana naimie cominimo daje isoi comecina lloide. Ie jira omoi anamo itinona marena fino.

*Cristomo jai cai duilla jira, naimie cai comeciaina ocuiñotaite*

<sup>10</sup> Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai.

<sup>11-12</sup> Ero, Taife caina ramo jifueoicaida faite. Caina anafefitaiacade. Naimie isoidino caina jiai anafefitaiacadimaci. Naimacidi aillosie. Naimaci anamo nana Jusiñamuina ñinoñedino jai itimaci. Jitiredinomo naimaci illanona, Jusiñamui dibeimo ñnedimaci. Beno eniruemo itimaci. Jusiñamui illanomo duiñnedimaci. Cominina ñaiñnedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cai dibeimo ñnedimaci. Naimacimona abina omoi rairui.

<sup>13</sup> Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide.

<sup>14</sup> Cristomo omoi comeciai facajanona, uanaicinona jaca llono. Jusiñamui jitailla isoi, marecinona finocana omoi jai.

<sup>15</sup> Cristo rafuemona omoi comeciai uri itatajamona, iena meiruiñeno llocana uiño.

<sup>16</sup> Taifemona nana jearede rafuedi comuide. Naimiedi ramo faiacana jai jaide. Cristona omoi ñnuamona, Taife ramo faiacinona jamai.

<sup>17</sup> Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona ñinoñeno. Taifena anafenollena, Jusiñamui Joreño Jusiñamui uaimona fueo.

<sup>18</sup> Jusiñamui Joreño omoina canuamona, Jusiñamui diga ñaicabi. Taife ramo omoimo faia, iena omoi ñinoñellena, Jusiñamui omoina canoite. Iese abina omoi rairuia, Taifena anafefitaitomoi. Taife ramo faiacino naimaci ñinoñellena, nana jiaie creyentiai facaina jiai jicabi.

<sup>19</sup> Cue facaina jiai omoi jii. Marefodo nana Cristo ie rafuena cue lluana omoi jii. Cristo nana cominina jilloitaiacanana nia lloiacadicue.

<sup>20</sup> Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluana mai omoi jii.

<sup>21-22</sup> Tíquico omoi dine oretaiticue. Naimiedi cue isiruiga ama. Naimiedi ñnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fiditomoi. Iena cacajamona omoi comeciai ocuiñoitomoi.

<sup>23</sup> Cai Moo Jusiñamui, cai Nama Jesucristo diga, omoina uri itatajamona, Cristona jai omoi ñnuamona, coniniri uri icana jaillana jitaidicue. Iaimaiiai omoina isiruillamona, iaimaiaina omoi ñnuamona, nana jiaie creyentiaina isiruicana omoi jai.

<sup>24</sup> Cai Nama Jesucristona omoi eo isiruilla jira, Jusiñamuidi omoina duenailasa. Mai. Pablocicue.

## FILIPOMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiai omoina uri jai itatate. Iena omoi uiñocana mai omoi jai.

### *Jusiñamuimo iobillacino fecade*

<sup>3</sup> Naga icaiño omoina cue comecia, Cristo rafuedo omoi jailla jira, Jusiñamuimo iobillacinona fecadicue.

<sup>4</sup> Naga icaiño Jusiñamui diga cue ñaia, omoi facaina caimare jiidicue,

<sup>5</sup> Jesucristo rafuena cue llwana cuena omoi canua jira. Nano bie rafuena omoi cacajamona, cuena canodomoi. Cuena nia canodomoi.

<sup>6</sup> Jusiñamuidi omoi comeciaina jaie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuridicue.

<sup>7</sup> Omoimo iese cue comecina cue facajia, omoina cue isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi uanaicino cue llwano, Jusiñamui cuena canocabide. Iemona naimie cana duenaillana jai uiñoticaí.

<sup>8</sup> Cuena omoina Cristo Jesús isiruitajamona, nana omoina isiruiticue. Jusiñamuidi uanaicinona cue llwana uiñote.

<sup>9</sup> Jiaie cominina eo isi-isiruicana omoi jaillena, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue.

<sup>10</sup> Iese omoina jitaidicue. Mare rafuedo omoi jaiacanana jitaidicue. Jiaruido Cristo abido biite. Ie jira omoi comeciai jeanillena jitaidicue, Jusiñamui jitailla isoi omoi comeciai marena illena.

<sup>11</sup> Jusiñamui jitailla isoi omoi illamona, mare rafuena jaca omoi finuana jitaidicue. Jesucristona omoi hnuamona, naimie omoina iena finotarede. Iese omoi finocana omoi jaia, Jusiñamuina eo iobitaitomoi.

### *Cárcelmo Pablo illamona, diga comini Jesucristo rafuena cacadimaci*

<sup>12</sup> Cue amatiai, bie rafuena omoi uiñuana jitaidicue. Cárcelmo cue illamona, diga comini Jesucristo rafuena cacadimaci.

<sup>13</sup> Cai illaíma jofomo itino cacadimaci. Nana bene itino jiaí cacadimaci. Jesucristo rafuena cue llua jira, cárcelmo iticue. Iena jai uiñotimaci.

<sup>14</sup> Cárcelmo iticue; ia jaciruiñoeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñoeno marefodo birui cue isoi llotimaci. Navui jaciruitimaci.

<sup>15</sup> Cuena uradoillamona, cue afemo iacanamon, damierie Cristo rafuena llofuetimaci. Jiaie llofueraini marecinona finuacanamon llofuetimaci.

<sup>16</sup> Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci.

<sup>17</sup> Cue afemo iacadino mare comeciainona llofueñedimaci. Iemona cuena duere finoacadimaci.

<sup>18</sup> Iese itimaci; iadedi uradoillamona naimaci llofuia, marecinona finuacanamona naimaci llofuia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue.

<sup>19</sup> Cueri Jusiñamuimo omoi jiano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje.

<sup>20</sup> Cue finolle rafuemona cue meiruiñellena eo jitaidicue. Jaie cue finocabilla isoi, Cristona marefodo birui iobitaiacadice. Cue nia fioidañenia, naimiena iobitaiacadice. Cue fioidallemona naimiena jiai iobitaiacadice. Iemona jiaie creyentiaidi Jusiñamuimo iobillacinona fecaitimaci.

<sup>21</sup> Nia cue fioidañenia, Cristo rafuena nia lloiticue. Mare; iadedi cue fioidaia, naimie dine cue illena jiai eo mare.

<sup>22</sup> Nia cue fioidañenia, diga cominimo Cristo rafuena nia lloiticue. Ie jira nie isoide cue illana cue comeci niese rainide.

<sup>23</sup> Nia raise uiñoñedicue. Jiaicaiño fioidaicaiñedicue. Jiaicaiño fioidaicadice. Cue comeci Cristo dine jaiacade. Nainomo cue illena cuemona eo mare;

<sup>24</sup> iadedi omoina cue canollena, nia fioidaicaiñedicue. Cue nia fioidañenia, omoina nia canoacadice.

<sup>25</sup> Cue comecina jai facajano, raite: “Nia fioidañeiticue. Omoi diga nia cue illana uiñoticue”. Cristona omoi innotacana omoi jaillana jitaidicue. Omoi innuamona, caimare omoi illana jiai jitaidicue.

<sup>26</sup> Iemei omoi dine dane cue illa jira, cueru Cristomo iobillacinona eo fecaitomoi.

<sup>27</sup> Cue fioidaia, cue fioidañenia, Cristo ie mare rafuedo omoi jai. Omoina cue cioia, omoina cue cioiñenia, mare rafuena omoi finuana fidiacadice. Cristo rafuena innotacana omoi jaillana, omoi comeciai daje isoi lloillana, Cristo rafuena omoi riiduana fidiacadice.

<sup>28</sup> Omoi dibeimo inedinona omoi jaciruiñenana fidiacadice. Iese omoi ia, Jusiñamuidi omoi dibeimo inedino faifillana uiñotaite; iadedi naimiedi omoina omoi jilluana uiñotaite. Naimie diga omoi jaca illena, omoina jai jillotate.

<sup>29</sup> Jusiñamui Cristona omoi inollena omoina fetode; iadedi Cristori omoi duere sefuillena omoina jiai fetode.

<sup>30</sup> Omoi nairaimo cue nano illa facaise Cristona inoñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jiai duere sefuidomoi.

## 2

### *Jiaie creyentiai diga raise omoi illacino*

<sup>1</sup> Jiaie creyentiai diga omoi marena illena, dajerie rafuena lloiacadice. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uiñuamona, Jusiñamui Joreño nana omoina nabaitajamona, coninina omoi comeciai eo duenaillacino illamona,

<sup>2</sup> cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata.

<sup>3</sup> Jaca buena finoñeno, jiaimie afemo jamai omoi illena. Abina iedumona buena finoñeno. Abina iedoñeno jiaimacimo comeciaina faca: “Naimaci cue baifemo faite”.

<sup>4</sup> Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jiai faca.

<sup>5</sup> Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade.

<sup>6</sup> Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede;

<sup>7</sup> iadedi iena fainonocaida, ie Moo ocuica rafuena finollena, imana naimie jaide.

<sup>8</sup> Jamai bue isoidimiena jaide; iadedi ie Moo uaina inote. Ie Moo jitailla jira, fiodaite. Marañede rafue finodimie isoi, cruzmo fiodaite.

<sup>9</sup> Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jítade.

<sup>10</sup> Jesúna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisaí naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jiaí fecaitimaci.

<sup>11</sup> Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

#### *Maraiñedino comeciaina lligaiñotomoi*

<sup>12</sup> Cue isiruiga amatiadomoi. Ie Moona Jesucristo inua jira, cue llua nia inocana omoi jai. Jaie omoi diga cue ia, Cristo rafuena raise inotomoi. Birui omoi diga inedicue; iadedi Jusiñamuina omoi inua jira, naimie jitailla rafuena jaciruiocaida, finocana omoi jai.

<sup>13</sup> Ie jitailla rafuena omoi finollena, Jusiñamui omoi comeciaina birui marena itatate. Naimie omoína iena finotaiacade. Naimie mare jitaillacinomona, omoína iena finotaite.

<sup>14</sup> Nana omoi finolle rafuemo abi jafueoicaiñeno fino. Uai uaitañeno fino,

<sup>15</sup> jiaie comini omoiri ñai raillanona, Jusiñamui uruiaina omoi illa jira, omoi comeciái jeanidemonona marena omoi i. Marañede comini motomo itomoi. Naimaci comeciái jearede. Naimaci comeciaina lligaiñotomoi, naimacimo ite jeacinona uiñotallena.

<sup>16</sup> Jesucristo rafuena llocana uitomoi. Iena naimaci inuamona, bie rafue Jusiñamui dine cominina jaca itatate. Cristo dane billirui omoiri cue iobiacana jira, omoi dine: “Tainona jaie lloticue” cue raillano, Jesucristo rafuena llocana nia omoi jai.

<sup>17</sup> Jusiñamuina omoi inua jira, naimiemo ailluena ucubena caidiñeno fecadomoi. Ie baifemona cue fiodaillana Jusiñamui jiaí jitaia, iobiticue. Omoi diga jiaí caimataiticue.

<sup>18</sup> Ie muidona caimare iitomoi. Cue diga caimataitomoi.

#### *Pablo Timoteona orede*

<sup>19</sup> Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jiaí iobiticue.

<sup>20</sup> Cue dine jiaíno naimie isoi inede. Dama naimie omoi ite rafuemo comecina facade.

<sup>21</sup> Jiaíno daní naimacimo ite rafuemo comeciaina facadimaci. Jesucristo rafuemo comeciaina facañedimaci.

<sup>22</sup> Timoteodi mareuidimiena uiñotomoi. Cue jito isoide diga, Cristo rafuena lloticoco.

<sup>23</sup> Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadicue.

<sup>24</sup> Cárcelmona cue jino jaillena cai Nama jitaia, omoi dine jiaí raire jaia-cadicue.

#### *Pablo Epafroditona abido orede*

<sup>25</sup> Epafroditodî cue ama isoide. Danomo Cristo rafuena llotîcoco. Danomo Cristo rafuena rîidotîcoco. Naimîena oredomoi, cuena canollena. Naimîena omoi dine abîdo oretaiacadîcue,

<sup>26</sup> omoi dine naimîe illemo naimîe comecîna facaja jira. Naimîe navui duillana omoi fidîa jira, naimîe uri îñede.

<sup>27</sup> Navui niadedî fiodaiacanamona jillode, Jusiñamui naimîena duenailla jira. Naimîe fiodaillamona, eo cue duere sefuiñellena, Jusiñamui cuena jîai duenaite.

<sup>28</sup> Ie jira Epafroditona eo raîre oretaiacadîcue, naimîena omoi cîuanona omoi iobillena. Iemei jîai uri îitîcue.

<sup>29</sup> Cai Nama mamecido naimîena eo caîmare feiño. Jîaîe naimîe isoidînona omoi dine ia, naimacîna iobita.

<sup>30</sup> Cristo facaina navui naimîe llofuiamona, omoi facaina cuena canollena, niadedî fiodaite. Omoi facaina naimîe cuena canuano, cue dine omoi îñena jira, cue muidona niadedî naimîe abîna faîfîtate.

### 3

#### *Moisés micorî llogacînuaido jaidînomona abîna rairui*

<sup>1</sup> Cue amatîai, omoi mo nia llotîcue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoi na canoite.

<sup>2</sup> Jearede rafue finode comînimona abîna rairui. Jîconîai isoidîmacî. Jîllobillena abî diana llofuetîmacî; iadedî cuemonadedî jamai ebena tuquica isoidîmacî. Naimacî abîaina detatîmacî; iadedî naimacî comecîai nia raise finoñedîmacî.

<sup>3</sup> Cai abîaina detatajamona, cai comecîai raise finoîñede. Cai comecîai raise finuamona, Jusiñamui Joreñodî caina Jusiñamuina raise sedatate. Cristo Jesúri iobidîcai. Cai jillobillena, cai abîaina detatañedîcai.

<sup>4</sup> Buena cai finuamona cai illamona jillobidîcaîdena, cue jilluana raise uiñoîticue. Cue comînimona jamai bue isoîñedîcue.

<sup>5</sup> Iena ja ñaîticue. Cue jeicîamona ocho digarui illamona, cue abîna degacue. Cue eîrue jîtodî Israel micorî. Benjamín isie imîedîcue. Cue comînidî judîuai imacîna jira, cue uruenamona judîuai uaido ñaîticue. Fariseo cue imîena jira, Moisés micorî llogacînuaido faînonocaiñeno iedo eo jaidîcue.

<sup>6</sup> Iena eo cue jitailla jira, Cristona ñnotînona duere finodîcue. Nana Moisés micorî llogacînuaido eo raise jaidîcue. Iena raise finodîcue.

<sup>7</sup> Iese jaîe itîcue. Cue comecî iena: “Mare” raite; iadedî Cristona jai cue ñnua jira, birui nana bie rafuedî cuemona ieñedîcînuai. Naie isoide rafue cuemo illamona, cue jeacînomona jilloñedîcue.

<sup>8</sup> Dane llotîcue: Cue Nama Cristo Jesúna cue uiñoiacana jira, jîaîe rafue cuemona ieñedîcîno. Naimîena cue uiñuacînodî nana jîaîe rafue baîfemo faîte. Jeacuaî isoi jai maraîñena jira, naimîe muidona cue jaie illacînona jai sofecaîdîcue. Iena sofetîcue, Cristo dîbeîmo raise cue illena,

<sup>9</sup> naimîemo raise cue duillena. Moisés micorî llogacînuaido cue jillamona marebicaiñedîcue; iadedî Cristona cue ñnuamona marebicaidîcue. Cristona cue ñnua muidona, Jusiñamui cuena jai marebicaitate.

<sup>10</sup> Cristona raise uiñoiacadîcue. Naimîe fiodaite; ia iemona jillode. Naiemona cue comecî marena illena, naimîena jillotate uaina uiñoiacadîcue. Naimîe rafuena cue llamona, naimîe isoi duere sefuitîcue. Iemona nîbaî fiodaitîcue.

<sup>11</sup> Cue fiodaille mei, fiodaillamona naimîe isoi cue jilloillemo ocuridîcue. Ie jira naimîena uiñocana jaiacadîcue.



*Pablo jitaillacino*

<sup>12</sup> Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote.

<sup>13</sup> Cue amatiai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue.

<sup>14</sup> Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena.

<sup>15</sup> Cai mona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite;

<sup>16</sup> iadedi caimo jai ite uiñuacinodo mai cai jailli.

*Pablo illa isoi cai illa*

<sup>17</sup> Cue amatiai, Cristona cue inua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena.

<sup>18</sup> Jaie omoimo llouidicue. Cue sunaillamona dane lloiticue. Ailluena comini Cristo fiodailla rafuena birui jitañedimaci.

<sup>19</sup> Ja muidomo faifitimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena.

<sup>20</sup> Monamo ite Jusiñamuimo cai jainaiaila jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima.

<sup>21</sup> Naimie bia, cai fiodaille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

**4**

<sup>1</sup> Ie jira Cristo rafuena inocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue lluamona Cristona jaie inotomoi. Ie rafuedo omoi jailla jira, iobidicue.

<sup>2</sup> Evodia raillañaiñomo rafuena lloiacadicue. Sintique raillañaiñomo jiai lloiacadicue. Cai Namamo iañuui duilla jira, iañuui comeci daje isoi lloillana jitaidicue. Coniño diga icirillana jitañedicue.

<sup>3</sup> Cue mare nabai, omo jicanoticue, iañuaina canollena, coniño diga iañuui dane marena ñaillena. Cristo rafuena cue diga llotiaiañuui. Clemente diga llotiaiañuui. Cue diga llofueuidino diga llotiaiañuui. Monamo ite rabenicomo nana naimaci mameciai jai cueba. Jusiñamui diga monamo jaca iite comini mameciai diese cueba.

*Iobillacino, uri illacino diga*

<sup>4</sup> Cai Namamo omoi duilla jira, jaca iobi. Dane lloiticue: Iobi.

<sup>5</sup> Omoi rininana nana comini uiñuana jitaidicue. Cai Nama dane abido billirui iairei ite.

<sup>6</sup> Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiaia, naimiemo iobillacinona jiai feca.

<sup>7</sup> Iemei Jusiñamui omoi comeciaina uri itataite. Omoi comeciai facajacino baifemo omoina uri itataite. Cristo Jesúsna omoi inuano, omoi comeciaina eenoite.

<sup>8</sup> Cue amatiai, ie muidomo daje rafuena nia lloiticue. Uanaicinomo comeciaina faca. Inogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca.

<sup>9</sup> Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue fino ca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga iite.

*Filipomo ite comini Pablona eo canodimaci*

<sup>10</sup> Cai Namari iobidicue, diga irui illamona dane cuena omoi comeci jira.

<sup>11</sup> Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue.

<sup>12</sup> Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue.

<sup>13</sup> Nie isoide rafue cuemo ia, Cristo cue comeciaina ocuiñotaja jira, naga rafuena finocana jaiticue.

<sup>14</sup> Cue duere sefuillamo cuena omoi duenaillamona, cuena omoi canua jira, cuemona mare.

<sup>15</sup> Omoimo Cristo rafuena nano cue llamona, cuena canodomoi. Macedoniamona cue jailla mei, jiaie creyentia cuena canoñedicue. Dani omoi cuena canodomoi. Iena uiñotomoi.

<sup>16</sup> Tesalónicamo nia cue ia, diga icaiño ucube cuemo oredomoi;

<sup>17</sup> iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue.

<sup>18</sup> Nana cue jitailla rana jai feiñoticue. Ailluena cuemo ite. Epafrodito-mona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue maijia jira, mare rana finodomoi. Ie jira Jusiñamui iena gaide, caimare soride rana cai gaia isoi. Naimie iena jiai feiñote.

<sup>19</sup> Naimiemo ailluena ite ramona cue Jusiñamui nana omoi jitailla rana fecaite, Cristo Jesúmo cai duilla jira.

<sup>20</sup> Cai Moo Jusiñamuimo iobillacino jaca cai fecacabillasa. Iena jitaidicue.

*Fuiduacino*

<sup>21</sup> Cristo Jesús mamecido cue facaina nana creyentiaimo cue uaina llono. Cue diga amatia imaci uaina jiai oredimaci.

<sup>22</sup> Nana benomo ite creyentia imaci uaina oredimaci. Cai illaima César jofomo maijidino imaci uaina ua oredimaci.

<sup>23</sup> Cai Nama Jesucristo omoi comeciaina jaca caimare itatajana jitaidicue. Mai. Pablodicue.

## COLOSAMO ITE CRISTONA HNOTINOMO PABLO ORETAGA RABE

### *Colosamo ite creyentiaimo Pablo carta orede*

<sup>1-2</sup> Colosas railla nairaimo ite creyentiaí, Pablodicue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiaí duilla jira, naimiedi cai amana eruaide. Jusiñamui jitailla jira, ie rafue llollena, Jesucristo oretagamiedicue. Naimiemo jai duidomoi. Naimiena raise inocana jaidomoi.

### *Naimaci facaina Pablo jide*

<sup>3</sup> Cai Nama Jesucristo Moodi Jusiñamui. Omoi facaina Jusiñamuimo coco jiaa, naimiemo iobillacinona jaca fecadicoco.

<sup>4</sup> Jesucristona nia omoi inuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco.

<sup>5</sup> Jusiñamui dine ico omoi illemo omoi ocuirilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuiridomoi. Omoi jai cacaja rafuedi uanaicino.

<sup>6</sup> Diga illanomo, diga comini iena jiaí jai cacadimaci. Iena inuamona Cristo dibeimo naimaci comeciai jai meidoga. Iena inuamona marecinodo jai jaidimaci. Ie isoidomoi. Jusiñamui omoina duenailana jai uinotomoi. Uanaicinona omoi raise uinuamona, iedo jaidomoi. Ie marecinona finocana jaidomoi.

<sup>7</sup> Epafra lluamona naie rafuena cacadomoi. Naimiena isiruiticai. Jesucristo dibeimo coco isoi, naimie jiaí llofuiana maijide. Omoi motomo cai inena jira, Cristo dibeimo cai facaina naimie raise maijuide.

<sup>8</sup> Naimiemono omoi ite rafuena fididicoco. Jusiñamui Joreño omoina canuamona, jiaie creyentiaina omoi isiruillana fididicoco.

<sup>9</sup> Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uinollena jidicoco. Nana naimiemo ite abi uinuacinona omoi eo raise uinuana jitaidicoco.

<sup>10</sup> Cai Nama: "Mare" omoina raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uinocana jaillana jitaidicoco.

<sup>11</sup> Nie isoide ramo omoi jiria, nana naimie siño ebirede uaido naimiedi omoi comeciaina ocuinotajana jitaidicoco. Iocire omoi illana jitaidicoco.

<sup>12</sup> Caina ie cominina naimie jai itataja jira, nana ie comini diga naimie illanomo ico jaca iiticai. Ie muidona naimiemo iobillacinona omoi fecacabilasa.

<sup>13</sup> Jeacino anamo navui cai illa jira, jitiredinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate.

<sup>14</sup> Naimie Jito muidona cai jeacinomona jillobidicai. Naimiedi cai jeacinona oni dotajamona, naimie jai feitete. Naimie ico abido linoite.

### *Cristo muidona Jusiñamui ricailifue anamo inedicai*

<sup>15</sup> Jusiñamuina cionidicai; iadedi Cristomona naimiena uinoticai. Jaca bue nia inena, Crsito nano jaca ite.

<sup>16</sup> Cristo uaido Jusiñamui nana rana finode. Monamo ite rana finode. Eniruemo ite rana finode. Cai civa rana finode. Cai cioinena rana finode. Cominina finode. Ie jaienisaina finode. Janabana finode. Dofina finode.

Taifena finode. Cristo uaido nana rana finode. Cristona iobitallena, nana rana finode.

<sup>17</sup> Nano dofoconi Cristo jaca ite. Naimie uaido naga ra marena icana jaide.

<sup>18</sup> Naimiedi nana creyentiai imaci illaïma. Fiodaitinomona naimie nano jillodimiena jira, cai fiodaia, ico jiai jilloiticaï. Naimiedi naga ra baifemo faite. Naimiedi nana comini baifemo jiai faite.

<sup>19</sup> Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite.

<sup>20</sup> Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fodailla jira, Cristo diaillamona, Cristona cai ñnoia, Jusiñamui ricailifue anamo jai iñedicaï.

<sup>21</sup> Jusiñamui dibeimo navui iñedomoi. Naimiena nabaillana jitañedomoi. Omoi comeciãmona naimiena enoidomoi. Maraiñedinona finouidomoi;

<sup>22</sup> iadedi cruzmo naimie abi illanona, nainomo Cristo fodailla jira, naimiedi naimie dibeimo omoïna itatate. Jusiñamuimona mareuidinona omoi illena, omoïmo nicino iñellena, Jusiñamui dine ico omoi ia, naimie dibeimo omoïna jai itatate.

<sup>23</sup> Naimiena raise ñnocana omoi jaia, danomo abido omoi jaiñenia, iese iïtomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

### *Pablo Cristo rafuena llofuecabite*

<sup>24</sup> Omoïmo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue.

<sup>25</sup> Jusiñamui cuena oretaja jira, naimie rafuena ailluena cominimo eo raise cue llollena, omoi creyentiai facaina llofueticue.

<sup>26</sup> Cai jaiagai bie rafuena uiñoñedimaci; iadedi Jusiñamuina ñnotinodi iena birui uiñotimaci.

<sup>27</sup> Jusiñamui naimacina iena uiñotade. Naie rafuedi eo ebirede. Judiañedinodomoi; iadedi bie rafue omoïmo jai duide. Omoi comeciãmo Cristo illana jai uiñoticaï. Ie jira naimie ebirede illanomo ico omoi jaca illemo ocuridomoi.

<sup>28</sup> Cristo rafuena llofueticaï. Nana cominimo Cristo dibeimo naimaci iacanana lloticaï. Cristona naimaci eo raise ñnollena, Cristo isoi naimaci marebicaillena, naimaci abi uiñuana lloticaï.

<sup>29</sup> Ie jira bie rafuena llofuecabiticue. Nana Cristo cuemo iga uaido eo llofuecabiticue.

## 2

<sup>1</sup> Omoïmo eo comecina facadicue. Iena omoi uiñuana jitaïdicue. Laodicea railla nairaimo jiai eo comecina facadicue. Diga comini cuena nia cioiñedimaci. Naimacimo jiai eo comecina facadicue.

<sup>2</sup> Omoi comeciãina ocuiñotallena, iese omoïmo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoïmo comecina facadicue. Naie rafuedi Cristona llote.

<sup>3</sup> Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide.

<sup>4</sup> Naimaci ñaiãmona omoïna bu jifuei raillanona, biena omoïmo lloticue.

<sup>5</sup> Omoi dine iñedicue; iadedi cue comecidi omoi dine ite. Omoïmo cue comecina facadicue. Danomo omoi marena illa jira, Cristona omoi raise ñnocana omoi jailla jira, iobidicue.

<sup>6</sup> Cai Nama Jesucristona omoi #nuamona, naimie lloga rafue finocana omoi jai.

<sup>7</sup> Naimie dibeimo raise icana omoi jai. Naimiena #nocana omoi jai. Omoi lloraini omoina llofuia isoi, naimiena #nocana omoi jai. Jusiñamuimo iobil-lacino eo fecacana omoi jai.

### *Cristona cai #nuano, cai illa rafue*

<sup>8</sup> Jiaie comini naimaci jamai comeci ai facajacinomona omoi jifuei rail-lanona, abina omoi rairui. Uanaiñedinomo comeciaina jamai facadimaci. Naimaci einamacimona iena otimaci. Naie rafuedo omoi jaillana jitaidimaci. Cristo rafuedo omoi jaillana jitañedinaci.

<sup>9</sup> Ero, Cristomo nana Jusiñamui uai ite. Eniruemo billanona, Cristo imana jaide. Naimiemona Jusiñamuina uiñoticaí.

<sup>10</sup> Cristomo omoi jainaiaila jira, naimiemona nana omoi jitaillacinona oitomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite.

<sup>11</sup> Cristomo omoi duilla jira, omoi comeciaino ite jeacino anamona omoina naimie jillotate. Omoi abiaina detatajamona naimie iena finoñede; iadedi omoi comeciaino ite jearede iuai meiduamona jillobidomoi. Naimie iena finode.

<sup>12</sup> Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai iñedicaí. Cristo fiodaite; iadedi fiodaillamona Jusiñamui naimiena jillotate. Jusiñamuina omoi #nua jira, jeacino anamo jai iñedomoi. Naie anamona Jusiñamui omoina jiai jillotate.

<sup>13</sup> Jeacino anamo jaie omoi illamona, naimiemona fiodaitino isoidomoi. Omoi marañede jitaillacino anamo jaie itomoi. Cristomo omoi jai duillamona, omoi jeacino oni dotajamona, naie anamona Jusiñamui omoina jai jillotate. Cristo dibeimo omoina itatate.

<sup>14</sup> Moisés micori jaie llogacinona jaie cai #noñena jira, Jusiñamui ricaillifue anamo iticaí; iadedi cruzmo Cristo fiodailla jira, naie llogacino anamo jai iñedicaí. Ie muidona Jusiñamui caimo ibana oñeite.

<sup>15</sup> Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uiñoticaí.

### *Cristomo ite rafuedo omoi jai*

<sup>16</sup> Cristo rafuedo omoi jailla jira, omoi guiga rana bu fimaia, naimaci ñaiamo cacarefiñeno. Judíuai einamací rafue dine omoi jaiñenia: “Omoi mareiñedomoi” bu raia, naimaci ñaiamo cacarefiñeno.

<sup>17</sup> Naie isoide rafuedo jaie jaidicaí; iadedi iedo birui jaiñedicaí. Cristo rafuedo birui jaidicaí.

<sup>18</sup> Dajerie llofueraini jiaie rafuedo jaidimaci. “Abina iedoñeno” raitimaci. “Jusiñamui jaienisaína seda” raitimaci. Nicairillacinodo jaidimaci. Naimaci isoi omoi jaiñenia: “Maraiñedomoi” omoina naimaci raia, naimaci ñaiamo cacarefiñeno. Naimaci illa isoi iñeno. Naimaci lluacino anamo iñeno. Naimaci lluacinodo omoi jaia, omoi jitaillanomo Cristo dine riñeitomoi. Naimaci comeci ai jearena jira, jamai buena uiñoñenano abina iedotimaci.

<sup>19</sup> Cristo rafuedo jaiñedinaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie dibeimo cai raise illena, naimiena cai raise inollena, naimiemona fueoticaí. Cristomo cai duilla jira, dani coninina nabaidicaí.

<sup>20</sup> Cristo fiodaillamona, jiaie rafue anamo jai iñedicaí. Naimiena #noñedino rafue anamo jai iñedicaí; iadedi naie rafuedo nia jaidomoi. Damierie llofueraínidi diga rana fimaidimaci.

<sup>21</sup> “Biena jetañeno. Biena guiñeno” raitimaci.

<sup>22</sup> Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedimaci.

<sup>23</sup> Naie fimaiduacínodi eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicaí. Cai abina isiruiñedicaí” raitimaci; iadedi naie isoide lluacínodo bu jaia, naimie comecimo ite jeacínomona jilloñede. Naimiedi jeacino finocana nia jaide.

### 3

<sup>1</sup> Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite.

<sup>2</sup> Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facañeno.

<sup>3</sup> Bene ite maraiñede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoina naimie canoite.

<sup>4</sup> Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

#### *Omoi comeciaino ite jeacínona fainonocai*

<sup>5</sup> Cristomo omoi jai duilla jira, omoi comeciaino ite jeacínona fainonocai. Omoi aiñede riño diga iñeno. Omoi iniñede ima diga iñeno. Jeare finoca rafuemo omoi comeciaina facañeno. Omoi maraiñede jitaillacínodo omoi jaiñeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi.

<sup>6</sup> Naie isoidicínona comini finua jira, naimiena naimaci #noñena jira, Jusiñamuidi naimacina duere finoite.

<sup>7</sup> Naie isoide rafuedo jaie jaidomoi.

<sup>8</sup> Nana bie isoide rafuedo jaiñeno. Iciríñeno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno.

<sup>9</sup> Tainona lloñeno. Omoi comeciaino ite jeacino anamo jaie itomoi. Naicino anamo omoi jai iñena jira, naicínodo jaiñeno;

<sup>10</sup> iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate.

<sup>11</sup> Cristo rafuedo birui omoi jailla jira, Jusiñamuimona nana creyentiaídomoidi daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatínodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo díbeimo omoi illa jira, jai amatiaína eruaídomoi. Cristomo omoi duillacino jiaie rafue baifemo faite.

<sup>12</sup> Jusiñamui omoina fetode. Omoi comeciaina maretate. Omoina isiruite. Ie jira jiaie cominina duenai. Jiaie cominina cano. Abi iedoñeno. Abi biríñeno. Iciríñeno.

<sup>13</sup> Daní omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga



marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita.

<sup>14</sup> Coninina omoi isiruicana jai. Isiruillacino nana jiaie lluacino baifemo faite. Coninina omoi isiruia, danomo marena iitomo.

<sup>15</sup> Jusiñamui omoina fetua jira, Cristomo daajena jai duidomo. Cristo omoi comeciaina uri itatajamona, nana comini diga uri i. Omoi comeciai uri illamona, Jusiñamuimo iobillacinona feca.

<sup>16</sup> Cristo rafuena omoi eo ñnuana jitaide. Naie rafuena coninimo omoi llofue. Iena raise uñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciaimona iocire rono. David micori cuela salmos omoi roia, Jusiñamui Joreño omoina birui cuetataga ruana omoi roia, omoi comeciaimona iocire rono.

<sup>17</sup> Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

### *Coniniri creyentia illa rafue*

<sup>18</sup> Inirediñaiñuai, omoimo rafuena lloiacadice. Cai Namamo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ñno.

<sup>19</sup> Airedino, omoimo jiai lloiacadice. Omoi ainiaina isirui. Naiñaiñuai diga iciricabiñeno. Naiñaiñuaimo riire lloñeno.

<sup>20</sup> Uruiai, omoimo rafuena lloiacadice. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

<sup>21</sup> Mootiai, omoi uruiaina jamai icineno. Naimacina omoi jamai icia, comecina facaitimaci: “¿Niese cai mootiai uaina raise ñnoiticai? Iena eo sefuiruiticai”. Ie muidona omoi uaina raise ñnoñeitimaci.

<sup>22</sup> Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnua jira, cai Namana raise omoi iobitaiacana jira, omoi patrones facaina raise maiji.

<sup>23</sup> Buena omoi maijia, omoi comeciaimona maiji. Dani comini facaina maijiñedomo; iadedi cai Nama facaina maijidomo. Ie jira raise maiji.

<sup>24</sup> Naimie jai llua isoi, cai Namamona ibana ico feiñoitomo. Cai Nama Cristo facaina omoi maijidomo;

<sup>25</sup> iadedi Jusiñamui raise maijiñedinona duere finoite. Jusiñamuimona naga maijidimie ie maijia diese feiñoite.

## 4

<sup>1</sup> Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueñeno. Omoi Nama monamo illamona, omoimo eruaide. Naimie anamo omoi illa jira, omoi anamo itinona marena raise fino.

<sup>2</sup> Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca.

<sup>3</sup> Cristo rafuena llocana cue jailla jira, cárcelmo birui iticue; iadedi naie rafue nia lloiacadice. Jusiñamui nana comini Cristo dibeimo jai jitaillana lloiacadice. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadice.

<sup>4</sup> Naimaci iena raise cacaillena, naie rafuena raise lloiacadice.

<sup>5</sup> Creyentiañedino motomo omoi ia, marena omoi i. Naimacimo Cristo rafuena llono.

<sup>6</sup> Bu diga omoï ñaia, caimare ñaino. Nie isoide Cristo rafuena omoïmo bu jicanoia, raise marena fairio.

*Damierie ie uaina orede*

<sup>7</sup> Tíquicodi nana cuemo ite rafuena omoïmo lloite. Naimiena isiruiticai. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide.

<sup>8</sup> Cai illana omoï uñollena, omoï ñine naimiena oredicue. Omoï comeciaina ocuiñotaite.

<sup>9</sup> Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoï comini imie. Nana bene jai suide rafuena omoïmo lloitiaimaia.

<sup>10</sup> Cárcelmo Aristarco cue diga ite. Omoïmo ie uaina orede. Marcos ie uai jiai orede. Naimiedi Bernabé ama. Omoïmo naimiena navui lloticue. Omoï ñine naimie ria, naimiena feiño.

<sup>11</sup> Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fañonocaillamona, Jusiñamui ie ñibeimo cominina jai jitaide” naimaci llumona, cue comeciaina ocuiñotadimaci.

<sup>12</sup> Epafras ie uaina jiai orede. Naimie omoï comini imie. Jesucristo ñibeimo naimie maijide. Jusiñamui diga naimie ñaia, omoï facaina jaca duere jicabide. Jusiñamui rafuedo raise omoï jaillena, ie omoïmo raise itabillena, Jusiñamui jitaillacinona omoï raise finollena, omoï facaina jicabide.

<sup>13</sup> Omoï facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide.

<sup>14</sup> Cai médico Lucas ie uaina jiai orede. Naimiena isiruiticai. Demas ie uaina jiai orede.

<sup>15</sup> Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono.

<sup>16</sup> Bie cartana omoï facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoï jiai faca.

<sup>17</sup> Arquipomo llono: “Cai Nama fetocamiedio. Naimie rafuena llocana raise o jai” llono.

<sup>18</sup> Cue uaina omoïmo oredicue. Dama bie uaina cueticue; iadedi nana bie carta cuemona illana uñotomoi. Cárcelmo cue illana cue facaina feitaño omoï jii. Jusiñamui omoïna duenaioillasa. Mai. Cue cueda rafue jai fuite. Pablodicue.

## TESALÓNICAMO ITE CRISTONA HNOTINOMO PABLO NANO ORETAGA RABE

### *Uaiduacino*

<sup>1</sup> Tesalónicamo ite creyentiai, omoimo cartana cueticue. Pablodícue. ¿Nigacino? ¿Nie isoidomoí? Silvano cue diga ite. Timoteo cue diga jiai ite. Iaimaiaí uaina orediaímaiaí. Cai Moo Jusiñamuimo, cai Nama Jesucristomo jai jainaiáidomoí. Ie jira iaimaiaí omoí duenaillana uiñocana omoí jaillana jitaídicaí. Iaimaiaí omoí uri itatajana omoí uiñocana jaillana jiai jitaídicaí.

### *Tesalónicamo ite creyentiai Jusiñamui uaina raise inotimaci*

<sup>2</sup> Jusiñamuimo cai jiiia, naimiemo omoí facaina iobillana jaca fecacabidícaí. Omoí facaina jicabidícaí.

<sup>3</sup> Cai Moo Jusiñamuimo cai jiiia, omoína comeciticaí. Jusiñamuina inotomoí. Naimiena isiruitomoí. Ie jira naimie facaina duere maijidomoí. Cai Nama Jesucristo billemo eo ocuridomoí. Iese omoína comeciticaí.

<sup>4</sup> Omoína naimie isiruillamona, Jusiñamui omoína fetuana uiñoticaí.

<sup>5</sup> Jamaí cai uaido Cristo rafuena omoína llofueñedícaí; ia siño uaido iena llofueticaí. Jusiñamui Joreño uaido iena llofueticaí. Naie rafuena inuanona llofueticaí. Omoí diga cai jaie ia, nie isoi cai illana raise uiñotomoí.

<sup>6</sup> Cai illa isoi ificaídomoí. Cai Nama illa isoi ificaídomoí. Iemona duere sefuidomoí; ia Jusiñamui Joreño omoína iocire itatajamona, Jusiñamui uaina iocire feiñotomoí.

<sup>7</sup> Ie jira nana Macedoniammo ite creyentiai omoímona fueotimaci. Nana Acayamo ite creyentiai omoímona jiai fueotimaci.

<sup>8</sup> Omoímona Macedoniammo ite comini cai Nama uaina fididimaci. Acayamo ite comini jiai fididimaci. Ailluena nairaiaí Jusiñamuina omoí inuana jai fididimaci. Ie jira naimacimo Cristo rafuena omoí inuana jai lloñedícaí.

<sup>9-10</sup> Omoí dine nano cai ria, caimare caina feiñotomoí. Cristo rafuena omoí cacajamona, jiraraina sedajana faionocaida, cajede nanoca Jusiñamuina jai sedadomoí. Jusiñamui Jito abido billemo birui jiai ocuridomoí. Iese jiaie creyentiai omoína birui ñaicabitimaci. Cristo fiodaillamona Jusiñamui naimiena jaie jillotade. Naimiena cai inuamona, Cristo Jusiñamui ricailifuemona caina jai jillobitade.

## 2

### *Pablo Tesalónicamo llofuiia rafue*

<sup>1</sup> Cue nabaiñiaí, omoí diga jaie cai ia, tainomo jaiñedícaí.

<sup>2</sup> Omoí dine cai nia riñenia, Filipomo iticaí. Nainomo itinodi caina jeare finodimaci. Iena jai uiñotomoí. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoína llofueticaí. Ailluena comini iena jitaíñedimaci; ia iena llofueticaí.

<sup>3</sup> Uanaíñedinona jaca llofueñedícaí. Jearedicinona jaca llofueñedícaí. Jifuerillacinona jaca llofueñedícaí;

<sup>4</sup> iadedí Jusiñamui uiñoganodícaí. Ie jira caina naimie oretajamona, ie rafuena llofueticaí. Cominina iobitallena llofueñedícaí; iadedí Jusiñamuina iobitallena llofueticaí, Jusiñamui cai comecina raise uiñua jira.

<sup>5</sup> Cai llofuiacino diga omoína bifueñedícaí. Omoímona ucube ollena, iese llofueñedícaí.

6 Cominimona iobillacinona jitañedicaí. Omoimona jitañedicaí. Jainomona jiaí jitañedicaí; iadedi Cristo oretaganona cai illa jira, cai jitaia, omoimona iobillacinona jicaredicaí.

7 Uruiaina raise sedaraño isoi, fecuise omoína llofueticaí.

8 Jusiñamui rafuena omoí raise uiñollena, omoína cai eo isiruillamona, niadedi omoí facaina fioidaiacadicaí.

9 Omoí motomo cai ucube ollena, jiaie rana maijuidicaí. Omoína cai duere finoñellena, nagarui iese maijuidicaí. Iena raise uiñotomoí. Iese Jusiñamui rafuena omoína llofueticaí.

10 Omoí motomo cai illana raise uiñotomoí. Jusiñamui jitailla isoi, nainomo iticaí. Maraiñede rafuena finoñedicaí. Mare rafuedo jaca jaidicaí. Iena uiñotomoí. Jusiñamui iena jiaí uiñote.

11 Omoí uruiaí omoí llofua isoi, omoína llofueticaí. Omoímo diga icaiño Jusiñamui rafuena llofueticaí.

12 Jusiñamui jitaillacinona omoí finollena, iena llofueuidicaí. Monamo ie cominina sedajanomo omoí jaca illena, naimie omoína jai fetode. Nainomo ie siño uai anamo jaca iitomoí.

13 Jusiñamuimo cai jiaia, omoí facaina iobillacinona fecacabidicaí. Jusiñamui rafuena caimona omoí jaie cacajamona, iena raise feiñotomoí. Cominimona cai oga rafue isoi feiñoñedomoí; ia Jusiñamuimona cai oga rafuena feiñotomoí. Cai lloga rafue omoí comeciaí iuai meidocana jaide. Ie jira Jusiñamuimo iobillacinona fecacabidicaí.

14 Judeamo ite creyentiaí isoi duere sefuidomoí. Omoí cominimona duere sefuidomoí. Naimaci judíuai cominimona duere sefuidimaci.

15 Judíuai comini cai Nama Jesúna jaie meinetimaci. Jusiñamui facaina lloraini micoriaina jiaí jaie meinetimaci. Caina jiaí birui duere finodimaci. Jusiñamuina iobitañedimaci. Jusiñamui rafue dibeimo jiaí iñedimaci.

16 Judíuaiñedinomo Cristo rafuena cai llwana jitañedimaci. Jusiñamui judíuaiñedinona jillotajana jitañedimaci. Iese jeacino finocana nia jaidimaci; ia ja muidomo Jusiñamui riicaillifue anamo jai itimaci.

### *Tesalónica comini dine Pablo abido jaiacade*

17 Omoimona cai billa mei, nigarui illanona, omoína dane cioacadicaí. Omoína cioiñedicaí; iadedi omoímo comecina facadicaí. Omoí dine eo jaiacadicaí.

18 Ua eo jaiacadicue. Diga icaiño jaiacadicaí; ia Taife cai jaillana jitañede.

19-20 Caina omoí jaca iobitaja jira, omoína cioacadicaí. Jesús abido bia, naie facaise omoíri eo iobiticaí. Iemo ocuiridicaí. Caina iocire itataitomoí. Omoí muidona iobiticaí.

## 3

1 Cai comeci jarire illamona, Atenas railla nairaimo fiebidicoco;

2 iadedi Timoteo omoí dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoí raise inotallena, omoí comeciaina ocuiñotallena, naimiena oretaticoco.

3 Duere sefuillamona bu bie uai sefuiruillana jitañedicaí. Creyentena cai illamona, jaca duere cai sefuillana uiñotomoí.

4 Omoí motomo jaie cai ia, iena llofueticaí. Omoí birui duere sefuillamona cai llwana raise uiñotomoí.

5 Cue comeci jarire illamona, Cristona omoí inuana raise uiñoiacadicue. Omoína Taife ramo faicabillamona, tainomo cai maijiana jacinaiticaí. Ie jira Timoteona oredicoco.

6 Omoimona Timoteo jai abido billamona, omoie mare rafuena cocomo llote. Cristona inocana jaidomoí naimie llote. Coninina isiruitomoí. Cocona

caimare comecitomoí. Omoína coco cioacana isoi, cocona dane cioacadomoi naimie llote.

<sup>7</sup> Birui duere sefuidicai; iadedi omoie rafuena cai cacajano, cai comeci marena ite.

<sup>8</sup> Cristo rafuena inocana omoí jaillana jai cai uiñuamona, cai comeci marena ite.

<sup>9</sup> Omoíri eo caimare jai iticai. Ie jira Jusiñamuimo iobillacinona eo fecaacadicai.

<sup>10</sup> Omoína dane cai cioillena, naimiemo nagarui jidicai. Naimiena nia omoí raise inoñenia, omoína naimiena raise inotaacadicai. Ie jira omoína cioacadicai.

<sup>11</sup> Iese omoí facaina, cai Moo Jusiñamuimo, cai Nama Jesúmo jicabidicai. Omoí dine caina naimie oretajana jidicai.

<sup>12</sup> Cai Nama coninina isiruitacana omoí jaillana jitaidicai. Caina omoí isiruilla isoi, nana jainona omoí isiruillana jidicai.

<sup>13</sup> Omoí comeciai ocuiñollena, omoí comeciai Jusiñamui jitailla isoi, marena illena jidicai. Nana ie comini diga cai Nama Jesús abido bia, Jusiñamui dine omoí ia, omoí comeciai marena illena jitaidicai. Iese omoí facaina jicabidicai.

## 4

### *Naimaci marena illena llofuite*

<sup>1</sup> Jiaie rafuena lloiacadicue. Cai Nama Jesúmo omoí jai duilla jira, Jusiñamui jitailla isoi omoí illana jitaidicai. Iese birui itomoí; ia nagarui iese omoí illana jitaidicai. Ie jira cai llua isoi, omoí jai.

<sup>2</sup> Cai Nama Jesús jitailla jira, navui iena llofueticai.

<sup>3</sup> Jusiñamui jitailla isoi omoí marena illena, omoí aiñede riño diga iñeno.

<sup>4</sup> Nagamiai riñona ie aina otena, mare; ia maraiñede rafuena finoñeno. Nagamiai dajena daje riño uana Jusiñamui jitaide. Dañaiño diga iaímaiai jionaillena jai jitaide.

<sup>5</sup> Naimiena inoñedino isoi, omoí ai uana jitañede. Naiñaiñuai abina jamai cioillena riñona otimaci.

<sup>6</sup> Jiaie creyentemo jeacinona finoñeno. Naimie aina jamai aifiedoñeno. Naie isoide rafuena bu finoia, cai Nama naimiena duere finoite. Iena navui omoímo lloticue.

<sup>7</sup> Jearede rafuena cai finollena, Jusiñamuidi caina fetone; iadedi mare rafuena cai finollena caina fetode.

<sup>8</sup> Bie llofuiacino nie creyente inoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jai jamaide.

<sup>9</sup> Jiaie creyentaina omoí isiruillana omoímo eo lloñeiticue. Jusiñamui omoína coninina isiruillana jai uiñotade.

<sup>10</sup> Nana Macedoniamoi ite creyentaina jai isiruitomoí; iade nia isiruicana omoí jai.

<sup>11</sup> Uri omoí i. Dani omoímo ite rafuena omoí uiuicai. Jainomona ucubena jicañeno; ia omoí ucube ollena, omoí onolli diga rairuioicaiñeno omoí maiji.

<sup>12</sup> Ie mei omoí jitailla ra iite. Iemona Cristona inoñedino omoína jai mameriñeitimaci.

### *Jesucristo dane abido billena llote*

<sup>13</sup> Omoí raise uiñollena, daje rafuena lloticue. Omoí creyentaimona dajerie jai fiodaitimaci. Jesúna inoñedynomona bu fodaia, fodaillamona jilluamo naimaci ocuirina jira, sunaitimaci; iadedi naimaci sunailla isoi, omoí illana jitañedicue. Fodaillamona jilluamo jai ocuiridomoi.

<sup>14</sup> Jesús fiodaillamona naimie jilluana ñnoticaí. Ie jira Jesús abido billa facaise, jai fiodaite creyentiaína Jusiñamui jilloitajana jiaí jai ñnoticaí.

<sup>15</sup> Cai Nama llofuiá isoi, bie rafuena lloiticue. Jesús abido bia, jai fiodaite creyentiaí, nia fiodañede creyentiaí diga, daacaiño naimie ñine a jaiticaí.

<sup>16</sup> Cai Nama Jesús abido bia, Jusiñamui ñinena naimie billanona, caina jidaite. Ie jaienicí caina uaidoite. Jusiñamui ie trompeta daacaiño jiaí fiite. Jai fiodaítino nano jilloítimaci.

<sup>17</sup> Iemei nia fiodañedinodí como jillodíno diga uillie motomo naimiemo dafaiñillena, Jesús caina uite. Iemei naimie diga jaca iíticaí.

<sup>18</sup> Bie llofuiacíno diga coniní comeciána omoí ocuiño.

## 5

<sup>1</sup> Bie rafue suilliruina uiñoñedicaí. Bie rafuena omoí jai uiñua jira, iena dane eo cueñeticue.

<sup>2</sup> Cai Nama abido billana jai uiñotomoi. Fiiredimie ñaíona ebena billa isoi, naimie abido biite.

<sup>3</sup> “Uri iticaí. Marena iticaí” Cristona ñnoñedíno raia, naie facaise naimacimo duere sefuillifue suite. Urue riño jigícomo casilla isoi, ebena suite. Naiemona jilloñeitimaci.

<sup>4</sup> Naie facaise suia, Cristo billena omoí jai uiñuamona, fiiredimie ñaíona ebena billa isoi, jacinaiñeitomoi. Cristona ñnoñedíno isoi, iñedomoi.

<sup>5</sup> Uanaicínona omoí jai uiñuamona, Cristo ie comínina jai jaidomoi. Jecino anamo omoí jai iñena jira, Cristona ñnoñedíno ñibeimo jai ñuiñedomoi.

<sup>6</sup> Ie jira abina sedacana omoí jai. Abina rairuioicaida omoí jai. Jifaidíno isoi ebena omoí jaiñeno.

<sup>7</sup> Cristona ñnoñedíno abina sedacana jaiñedimaci. Rairuioicaida ebena jaidimaci.

<sup>8</sup> Cristo ie comínina jai cai illa jira, ebena cai jaiñena. Imaci abina riidollena, soldaduai jogobe icodí ite. Imaci ifogí icodí jiaí ite. Ie isoide. Cai comeciána eenollena, Cristona ñnocana mai cai jailli. Jiaíno isiruicana mai cai jailli. Jusiñamui ñine íco cai illemo ocuricana mai cai jailli.

<sup>9</sup> Caina duere finollena, Jusiñamui caina fetoñede; iadedí cai Nama Jesu-cristo finoca rafue muidona, duere finollemona cai jilloillena, caina fetode.

<sup>10</sup> Cristo cai facaina jai fiodaite. Ie jira birui cai fiodaia, naimie bille facaise nia fiodañedinona cai ie, naimie diga jaca iíticaí.

<sup>11</sup> Ie jira conínina ocuiñotacana omoí jai. Cristo ñibeimo conínina itatacana omoí jai. Iese birui jaidomoi; ia nia iese omoí jai.

### *Omoí creyentiaína llofuerainí uaina ñno*

<sup>12</sup> Cue amatiaí, jiaíe rafuena lloiticue. Omoí creyentiaína llofuerainí uaina ñno. Cristo jitailla jira, omoí afemo ítimaci. Cristo ñibeimo omoína raise itatallena, omoí facaina llofuetimaci.

<sup>13</sup> Omoína naimaci canua jira, naimacína isiruillanona, naimaci uaina raise omoí ñno. Coniníri uri omoí í.

<sup>14</sup> Omoí motomona maijiacaiñedinona imaci maijillesa ocui. Duere sefuillamona jai comeciána ocuiñonidínona comeciána ocuiñota. Raise ñnollena, Cristona nia raise ñnoñedinona jiaí cano. Fecuisse naimacína ui-uillanona, naimacína cano.

<sup>15</sup> Omoína jiaímie duere finoia, íbana oñeno; iadedí naimiemo mare rafuena fino. Nain comínimo mare rafuena fino.

<sup>16</sup> Ñie isoide rafue omoímo ía, caimare omoí í.

<sup>17</sup> Jusiñamuimo nagarui jii-jii.



18 Nie isoide rafue omoimo ia, Jsuiñemui jitailla jira, naimiemo iobil-  
lacinona feca. Jesucristomona Jusiñamui jitaillacinona jai uiñoticaí.

19 Jusiñamui Joreñoa jamaiñeno.

20 Jusiñamui Joreño uaido lloraini llofuiana jamaiñeno;

21 iadedi Jusiñamui Joreño uaido naimaci llofuiana facaci. Mare rafuedo  
jaca omoi jai.

22 Nana marañede rafuemona eneno oni omoi i. Naie isoide rafuena omoi  
abimo omoi oñeno.

23 Ie jira Jusiñamuimo omoi facaina jiiiticue. Naimie omoína jai uri itatate.  
Naimie omoína nagarui marena itatacana jaillana jitaídícue. Iese omoi  
jaia, cai Nama Jesucristo dane abido bille facaise, naimie jitailla isoi, omoi  
comeciai marena iite.

24 Jusiñamuidi inogamiéna jira, iese omoína finoite.

25 Cue amatiai, Jusiñamuimo cai facaina omoi jicabi.

26 Cue facaido nana creyentiána camare uaido.

27 Cai Namamo cai duilla jira, naimie jitailla jira, bie cartana nana creyen-  
tiaí uicomo faca.

28 Cai Nama Jesucristo omoína duenailasa. Mai. Pablodícue.

## TESALÓNICAMO ITE CRISTONA HNOTINOMO PABLO IE EMODOMO ORETAGA RABE

### *Uaiduacino*

<sup>1-2</sup> Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiadomoi. Ie jira iaimaiai omoi duenailana uiñocana omoi jaillana jitaídicaí. Iaimaiai omoi uri itatajana omoi uiñocana jaillana jiai jitaídicaí.

### *Cristo dane abido bia, naimiena #noñedinona duere finoite*

<sup>3</sup> Jusiñamuimo cai jhia, omoi facaina naimiemo iobillacinona fecacabidicaí. Cristona #nocana raise jaidomoi. Coniniri isiruicana raise jaidomoi.

<sup>4</sup> Ie jira marena omoi illana jiaie creyentiai illanomo llocana uiticaí. Duere sefuidomoi; iadedi danomo abido jaiñedomoi. Cristona #nocana jaidomoi. Iena llocana uiticaí.

<sup>5</sup> Jiainomona birui duere sefuidomoi; ia #nocana jaidomoi. Iemona Jusiñamui omoi facaina illana uiñoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

<sup>6</sup> Jusiñamui omoína duere finodinona ico duere finoite. Omoi facaina ibana oite. Iese naimie finoia, naimiemona mare.

<sup>7</sup> Cai Nama Jesús abido bia, duere sefuillamona jilloiticaí. Monamona ie siño jaienisaí diga biite. Irai boua isoi ana biitimaci.

<sup>8</sup> Jusiñamuina #noñedinona diese duere finoitimaci. Cai Nama Jesús rafuena naimaci #noñena jira, naimacina duere finoitimaci.

<sup>9</sup> #noñena jira, jaca faifitimaci. Jaca legi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci.

<sup>10</sup> Cristo bille facaise naimiemo iobillacinona fecaiticaí. Naimieri nana naimiena #notino rajicaitimaci. Omoimo cai lloga rafuena omoi jai #nua jira, iese iitomoi.

<sup>11</sup> Ie jira omoi facaina jicabidicaí. Naimie jitailla isoi, omoína naimie marena itatajana jidicaí. Omoína naimie fetuamona, ie uaido mare rafuena finocana omoi jaillana jidicaí. Ie uaido naimiena #nocana omoi jaillana jidicaí.

<sup>12</sup> Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caína duenailamona iese iiticaí.

## 2

### *Jesucristo abido bille rafue*

<sup>1</sup> Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue.

<sup>2</sup> “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena #noñeno. Nie lloraíma iena lloia, iena #noñeno. “Pablomona cue feiñoga carta iena llote” damie raia, iena #noñeno.

<sup>3</sup> Naie isoide rafue diga omoína jiaíno jifueiacania, iena #noñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite;

<sup>4</sup> iadedi nano jiaie rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuidicue” raite.

<sup>5</sup> Omoi dine navui cue ia, bie rafuena omoimo lloticue.

<sup>6</sup> Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite.

<sup>7</sup> Taife maraiñede rafuena birui bainino finotate. Jusiñamui Joreño naimiena maraiñede rafuena birui marefodo finuana rairuide. Jusiñamui Joreño naimie rairuiñena mei,

<sup>8</sup> Taife dinena maraiñedimie biite; ia cai Nama Jesús abido ebire bia, fraiñuamona naimiena meineite.

<sup>9</sup> Cai Nama Jesús nia abido biñenia, comini jifuellena, Taife uaido bie maraiñedimiedi diga siño rafuena finoite.

<sup>10</sup> Cominina eo maraiñedicinodo jifueite. Naie comini ico faifitimaci. Jusiñamui ie uanaicinona naimaci ñnoñena jira, jilloiacaiñeitimaci.

<sup>11</sup> Ie jira Jusiñamui naimacina tainocinona ñnotaite.

<sup>12</sup> Jusiñamui ie uanaicinona naimaci ñnoñena jira, maraiñede rafuena naimaci ebiruilla jira, Jusiñamui naimacina duere finoite.

### *Jusiñamui omoina jai fetode*

<sup>13</sup> Jusiñamuina ñnoñedino isoi Jusiñamui omoina duere finoñeite. Naimie omoina jai fetua jira, naimiemo iobillacinona jaca fecacabidicai. Omoi jilloillena, nano dofoconi omoina fetode. Ie Joreño uaido naimie jitaillacinona omoi finollena, naimie uanaicinona omoi ñnuamona, omoina fetode.

<sup>14</sup> Ie rafuena cai llumona, Jusiñamui omoina jai jillotate. Iemona cai Nama Jesucristo ebirede illanomo jaca iitomoi.

<sup>15</sup> Ie jira, Cristona ñnocana omoi jai. Cai llogacinodo omoi jai. Iena caimona jai cacadomoi. Cai cartamona iena jiai cacadomoi.

<sup>16</sup> Omoi facaina cai Nama Jesucristomo, cai Moo Jusiñamuimo, jicabidicai. Naimie caina isiruite. Cai comeciaina jaca ocuiñotade. Caina duenaillamona naimie lloga rafue suillemo raise ocuiridicai.

<sup>17</sup> Naimie omoi comeciaina nia ocuiñotallena jidicai. Nie isoide rafuena omoi finoia, naie rafue omoi marena finollena jidicai. Buena omoi ñaia, omoi marena ñaillena jiai jidicai.

## 3

### *Cai facaina omoi jiana jitaidicai*

<sup>1</sup> Daje rafue nia lloiacadicue. Cai facaina omoi jiana jitaidicai. Cai Nama rafue llocana jaillana jitaidicai. Omoi ñnua isoi, jiaino ñnuana jiai jitaidicai.

<sup>2</sup> Maraiñedinomona cai jillobillena, omoi jiana jitaidicai. Ailluena comini Cristona ñnoñedimaci;

<sup>3</sup> ia cai Nama jaca ñnogamie. Omoi comeciaina ocuiñotaite. Maraiñedinomona omoina eenoite.

<sup>4</sup> Cristomo cai duilla jira, cai llogacinona omoi jai ñnuana jai uiñoticai. Iena nia ñnoitomoi.

<sup>5</sup> Cai Nama Jesús omoina Jusiñamui omoina isiruillana uiñotajana jitaidicue. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoi facaina jaiticue.

### *Maijuillasa*

<sup>6</sup> Cai Nama Jesucristo jitailla jira, jiaie rafuena nia lloiticue. Jiaie creyente maijiacaiñenia, naimie diga eo nabairiñeno. Iena navui omoimo lloticue; ia damierie iese ia, naimaci diga eo nabairiñeno.

<sup>7</sup> Caimona fueo. Navui omoi motomo iticai; ia cai ucube ollena, jaca maijidicai.

<sup>8</sup> Guillena ibaño guñedicai; ia nagarui eo maijidicai, omoina duere cai finoñellena.

<sup>9</sup> Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaicai.

<sup>10</sup> Navui omoi motomo cai illa facaise lloticai: “Bu maijiacaiñenia, guiñena”.

<sup>11</sup> Omoi motomo damerie jai maijiñenana jai fididicai. Maijiño jai itimaci.

<sup>12</sup> Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana jitaicai.

<sup>13</sup> Cue amatiai, nie isoide mare rafuena finollena sefuiruiño.

<sup>14</sup> Cue jai cuega cartamo ite rafuena bu ñnoñenia, nana creyentiaina naimiena uiñota. Naimie meidallena, naimie diga nabairiño.

<sup>15</sup> Naimiena enoiño; ia creyentena naimie nia illamona, naimiena fe-cuise llofue.

### *Fuiduacino*

<sup>16</sup> Cai Nama omoi jaca uri itatajana jitaicai. Naimie omoi diga jaca iite.

<sup>17</sup> Cuena canollena, naimiemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablodicue.

<sup>18</sup> Cai Nama Jesucristo nana omoina duenailasa. Mai. Macaibaite.

## TIMOTEOMO PABLO NANO ORETAGA RABE

### *Pablo Timoteona uaiduacino*

<sup>1-2</sup> Timoteo, bie carta omo cueticue. ¿Nigacino? ¿Nie isoidio? Pablodícue. Cristo Jesús oretagamiedícue. Ie rafue lollena, naimie cuena orede Naimiena cue cioillena, naimie isoi cue illena, naimie abido billemo ocuridícue. Jusiñamui cuena jiaí orede. Naimiedi cai Jilloitaraíma. Cue llofuiacínomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiímaiaí. Iena uiñocana mai o jai.

### *Cristo rafuena tainona llofueraíni llofuiacínodo jaiñeno*

<sup>3-4</sup> Macedoniamó jaie jaidícuemo, Efesómo o fiebicaillena omo llotícue. Nainomó dajerie Cristo rafuena raise llofueñedímaci; iadedi jiaíforie llofuetímaci. Diga igaiáina faca-facadímaci. Imaci usumatiaí mamecido siadocabitímaci. Iemona conini uaina uaitasíde. Jusiñamui jitailla isoi comini marena illana llofueñedímaci. Jusiñamuina cai inuamona, marena itícai. Iena llofueñedímaci. Ie jira naimaci uaina llicaita.

<sup>5</sup> Jusiñamuina comini isiruillena, jiaíe cominina jiaí naimaci isiruillena, Jusiñamui uaina llofuetícai. Naimaci comeciaí jeaninana jitaídícai. Jusiñamuina raise naimaci inuana jiaí jitaídícai. Ie jira Jusiñamui rafuena llofuecabitícai.

<sup>6</sup> Dajerie llofueraíni iese llofueñedímaci; iadedi jamai ñaitímaci.

<sup>7</sup> Moisés micorí jaie llogacínuaído llofueiacadímaci; iadedi iena llofuiana uiñoñedímaci. Naie llogacínuaína ua uiñoñedímaci.

<sup>8</sup> Iena raise llofuegana, Jusiñamuina uiñoñedinona naimiena uiñotallena, mare. Iena uiñotícai.

<sup>9-10</sup> Moisés micorí llogacínuaídi mareuidínomo jainaiáñede. Jainomó jainaiáide: Jusiñamui uaina inoñedinomó lloga uaina inorainidínomo, Jusiñamuina jitaíñedinomó, jeacino finorainimó, jeare ñaicabitínomo, Jusiñamuina enoidínomo, eina meinetínomo, mooná meinetínomo, jiaíe cominina meinetínomo, añede riño diga itínomo, iniñede ima diga itíñaiñuaimó, daje isoide ima diga conini aífuedotínomo, comena fíidínomo, taino llorainimó, taino lluana jifueridínomo, uanaí rafue facaisena iñedinomó. Nana Cristo rafue facaina iñedinomó Moisés micorí llogacínuaí ua jainaiáide;

<sup>11</sup> ia naie rafue cuemo jai jainaiáñede. Ie mare rafuena cue lollena, Jusiñamui cuena jai orede. Maremiena Jusiñamui illamona, naimie rafue jiaí eo ebirede.

### *Jusiñamui caína duenaila jira, Pablodí iobide*

<sup>12</sup> Cuena fetua jira, cai Nama Cristo Jesúsri iobidícue. Naimiena cue inollena, naimie cuena uiñuamona, cuena fetode, naimie rafue cue lollena. Iena lollena, cue comecina jiaí ocuiñotade.

<sup>13</sup> Jaie naimiena jeare ñaitícue. Naimiena inotinona jiaí duere finodícue. Abina cue uiñoñena jira, naie facaiseconi naimiena nia cue inoñena jira cuena duenailamona, naimie cuena fetode.

<sup>14</sup> Cuena eo duenaite. Iemona naimiena inotícue. Naimiena jiaí isiruitícue.

<sup>15</sup> Bie lluaídi mare cue uiñuamona, nana comini biena inuana jitaídícue. Maraiñedinona naimaci jeacínomona jilloitallena, eniruemo Jesucristo bite. Ero, nanoca jeacínona finoraimadícue;

<sup>16</sup> iadedi Jesucristo cuena duenaite. Naimiena cue inuamo jaie fecuise ocuride. Nana jeacinona finorainimo fecuise ocuride, naimiena inollena. Naimiena cai inuamona, Jusiñamui diga jaca iiticaí. Cuena duenailla jira, biruimona naimiena inoitinodi naimie naimacina duenaillana uinoitimaci.

<sup>17</sup> Jusiñamuidi nanocamie. Jaca fioldaiñeite. Naimiena cionidicaí. Naimie damiede. Jiaiena inede. Naimiena jaca iobicabillasa. Iena jitaídícue.

<sup>18</sup> Ero, Timoteo, cue jito, omo rafue lloiacadícue. Nano o llofueraimana jaiacana facaise ailluena Cristo rafuena llofueraínidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena.

<sup>19</sup> Cristona inocana o jai. O comecina marena finocana o jai. Dajerie naimaci comeciaí iuaimo comeciaina facañedimaci. Ie jira Cristona jai inoñedimaci.

<sup>20</sup> Iese ite Himeneo. Alejandro jiaí jai daje isoide. Jai inoñediaímaiaí. Ie mei iaímaiaína Taife anamo jai itabicaítaticue, duere sefuillena. Iaímaiaí fueollena, Jusiñamuina jeare ñaiñellena, iese itabicaítaticue.

## 2

### *Nana comini facaina jiiiticaí*

<sup>1</sup> Diga rafue omo lloítícue; iadedi daje rafue motomo ite. Nanoca rafue. Iena omo lloítícue. Jusiñamui diga omoi ñaía, nana comini facaina jii. Naimaciri iobillacinona Jusiñamuimo feca.

<sup>2</sup> Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii.

<sup>3</sup> Iese cai jiiia, Jusiñamuimona mare. Naimiedi cai jilloitaraima.

<sup>4</sup> Naimiedi nana comini naimaci jeacinomona jilluana jitaide. Uanaicinona naimaci uinhuana jiaí jitaide.

<sup>5</sup> Nana nairaiaí imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie imanana, comini facaisena ñairede. Ie muidona comini diga Jusiñamui jai nabairedé. Jusiñamui diga comini jiaí jai nabairedimaci.

<sup>6</sup> Cai jeacinomona cai eneno illena, Jesucristo nana cai facaina jai fioldate. Naimie jitailla facaiseconi Jusiñamuidi cominina bie rafuena jai uinoítade.

<sup>7</sup> Bie rafue cue lollena, Jusiñamui cuena fetode. Judíuaíñedinomo cue lollena, bie rafue naimaci inollena, uanaicinona naimaci uinoollena, cuena orede. Tainona lloñedícue.

<sup>8</sup> Ie jira naga roracomo ite iñiaí, cai comini onolliaí a ñuitacabilla isoi, comeciaino jeacino inenanomona, Jusiñamuimo jiiana jitaídícue. Naimaci comeciaino icirillacino inedemo, Jusiñamuimo jii. Naimaci comeciaino uaitajacino inedemo, Jusiñamuimo jii.

<sup>9-10</sup> Riñoniaímo jiaí lloítícue. Roracomo omoi jaia, abi ieduamo comeciaina facañenamona, omoi ifotiena fino. Jamai ebinai raillano, abi ieduamona abina finora jitañeno. Jamai ebinai raillano, abi ieduamona eo raífide iniroina jitañeno; iadedi mare rafuena omoi finuamona, ebinaitomoi. “Jusiñamuina inoticaí” omoi raillanona, naimie jitailla isoi, marena omoi finolle.

<sup>11</sup> Rollena comini ofia, ñaiñenanomona, uaitañenamona omoi fueo.

<sup>12</sup> Omoi ofia, omoi inñiaína llofuiana jitaíñedícue. Nainomo omoi ñaiñena. Inñiaí omoi anamo illana jitaíñedícue. Iese omoi riñoniaímo lloiacadícue.

<sup>13</sup> Jusiñamui Adán micorina nano finua jira, iese llotícue. Adán micori finua mei, Eva micorina jiaí finode.



<sup>14</sup> Taifedi Adán micorina jifueñede; iadedi Eva micorina jifue. Ie mei naie riño jeacinona finode.

<sup>15</sup> Iemona jilloite; iadedi uruiari jococana jaite. Riñoniaidi Jusiñamuina ñinoia, jiaie cominina isirua, Jusiñamui jitailla rafuena finoia, ie abina eenoia, jilloitimaci.

### 3

#### *Creyentiaina sedaraini illa rafue*

<sup>1</sup> Bicinodi uanaicino. Creyentiaina llofueraimana bu jaiacania, naimie começimo mare jitaillacino ite.

<sup>2</sup> Bie isoide llofueraimana jaiacadimiena jitaicue. Naga comini naimie mare raillamie. Dañaiñona airedimie. Abi eenotimie. Ebena iñedimie. ñnogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie.

<sup>3</sup> Jifairuiñedimie. Fuirirainidimie. Raire icirirainidimie. Ucubena nicidoñedimie.

<sup>4</sup> Naimie cominina raise sedadimie. Naimie anamo naimaci illanona, naimie uruiari ie uaina raise ñnotadimie. Ie isoidimie llofueraimana jaillana jitaicue.

<sup>5</sup> Iese naimie iñenia, ie anamo itinona naimie raise sedañenia, ¿niese jiaie creyentiaina raise sedaite?

<sup>6</sup> Como creyentena jaidimiena creyentiaina llofueraimana fetohenno, naie diga naimie abi iedoi raillano. Abi iedumona, Taife isoi jeacino finoite.

<sup>7</sup> Llofueraimana jaiacadimiena creyenteñedino: “Mare” raiñenia, naimiena fetohenno. Iese naimiena raiñenia, naimie joreñona jeare ñaitimaci. Iemei Taife ramo jiaie faite, naimie abido danomo uaillena. Ie muidona naimie uaina jaca cacareñeitimaci.

#### *Diáconuai illa rafue*

<sup>8</sup> Diáconuai creyentiaie llofueraini isoi marena illa. ñnouiganona illa. Jifairaiñena. Ucubena nicidoñena.

<sup>9</sup> Naimacidi Cristona cai ñnua rafuena jeanide começaimona ñnua.

<sup>10</sup> Bu omoi fetocania, naimacina nano facaci. Roracomo jiaie rana nano maijita. Iena raise finoia, diáconuaina jaite.

<sup>11</sup> Diáconuai ainiaie jiaie ñnogañaiñuaina illa. Jiaie comini joreñona ñaiñena. Jirorainina. Naga rafuena marena raise finua.

<sup>12</sup> Nana diáconuai aidi dañaiñoriede. Diáconuai uruiari naimaci uaina raise ñnua. Diáconuai imaci anamo itinona raise sedajana uiñua.

<sup>13</sup> Diáconuai marena maijia, comini naimacimo iobillacinona fecaitimaci. Cristo Jesúna ñnuano, naimiena marefodo jiaie lloitimaci.

#### *Jusiñamuina ñnotino*

<sup>14</sup> Timoteo, raire o dine jaiacacue; iadedi uicodo bie rafuena omo cueticue.

<sup>15</sup> Are cue riñenia, dani omoi creyentiaie diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedacai. Uanaicinona riidoticaie.

<sup>16</sup> Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaie:

Eniruemo Cristodi ñimana jai bairede.

Jusiñamui Joreñodi caina naimie uai siñonana uiñotade.

Jusiñamui jaienisai naimiena jiaie ciotimaci.

Jiaie nairaiamo naimiena lloticaie.

Iena cacajamona, ailluena cominidi diga nairaimona naimiena birui  
 inotimaci.  
 Monamo naimie abido jai jaide.

## 4

### *Jianodi jiaiforie rafuena lloitimaci*

<sup>1</sup> Jusiñamui Joreño caimo raise lloite: “Jesucristo nia abido biñena facaiseconi damerie creyentiai Cristona faionocaitimaci. Taife dibeimo ite lloraini lluana cacarefillamona, Janabamona ite llucacino jaitimaci. Taifemona ite llucacino jaitimaci”.

<sup>2</sup> Naie llorainidi: “Uanaicino llotica” raitimaci; iadedi taino llocabiitimaci. Naimaci comeciai jai tainomo iite.

<sup>3</sup> Ima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiai uanaicino uinuanona, iobillanona guillena, naimiedi naga rana finode.

<sup>4</sup> Nana Jusiñamui comuitaga guille radi mare. Iobillano iena cai feiñuanona, guitica.

<sup>5</sup> Jusiñamui llua jira, Jusiñamuimo cai jia, nana guille radi jai mare. Iemona marañede rafue jaca caimo comuiñeite.

### *Jesucristo rafuedo raise inocana jai*

<sup>6</sup> Timoteo, cue lluana creyentiaimo o lloia, Jesucristo dibeimo raise maijido. Cristo uaina inocana o jailla jira, mare llogacino o jailla jira, raise maijido.

<sup>7</sup> Jamai rafuemo, jamai igaiimo o comecina facañeno; iadedi Jusiñamui jitailla rafuena finocana o jai.

<sup>8</sup> Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jairuido o jaillena, o comecina marena jai raise finotaite.

<sup>9</sup> Bie llucacino uanaicino. Ie jira iena cai inua.

<sup>10</sup> Cai jillobillena, cajede Jusiñamuimo ocuiridica. Ie jira duere sefuillano maijidica. Jeacino mona Jusiñamuidi nana comina jillobitacade. Naimiena inotino jai jillotate.

<sup>11</sup> Nana creyentiaimo cue lluana raise llofue.

<sup>12</sup> Naimacina o llofueia, coniruena nia o illamona: “O afemo itica” naimaci raiadedi, damamai iese raitimaci. Mare illacino o jai. Ie mei iese raiñeitimaci. Marena o ñaiamona, marena o illamona, jiaie comina o isiruillamona, Jusiñamuina o inuamona, o jeanide rafuena o finoñenamona, naimacidi fueoitimaci.

<sup>13</sup> O dine nia cue riñenia, creyentiai ofia, Jusiñamuina ciegafuiaina ado faca. Iena llono. Iena llofue.

<sup>14</sup> Creyentiaina llofueraini navui ofidemo, Jusiñamuimona o baitajacino o feiñollena, naimaci onollia o ifogimo jonetimaci onollia o ifogimo jonetimaci. Naie facaiseconi Jusiñamui naimacina naicino ona llotatate. Naicino birui faionocañeno.

<sup>15</sup> Iena eo uiuca, nana comini Cristona inocana o jaillana uinollena.

<sup>16</sup> O comecina raise eeno. Marena raise llofue. Cristo uaina inocana o jai. Iese o jia, jeacino finuamona jilloitio. Iese ona cacacino jai jilloitimaci.

## 5

### *Timoteo afemo itino diga ie illa rafue*

1-2 Eimíaiina illamona, o afemo itinona riire llofueño; iadedi o moomo o llua isoi, naimacina fecuise llofue. O anafemo itinona o amatiamo o llua isoi, llofue. O afemo itíñaiñuaina o eimo o llua isoi, llofue. O anafemo itíñaiñuaina o miriñotiamo o llua isoi, llofue. Naiñaiñuaimo jeare comecina facañeno.

<sup>3</sup> Naiñaiñuaina canollena, feciñuai comini iñenia, naiñaiñuaina cano.

<sup>4</sup> Feciño uai uruai ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi ibana oite. Iese itena, Jusiñamuimona mare.

<sup>5</sup> Feciño uai uruai iñenia, da Jusiñamuimo naiñaiño ocuride, naimie naiñaiñona canollena. Jusiñamuimo nagarui jicabite. Bie isoide feciñuaina cano;

<sup>6</sup> iadedi Jusiñamuimo duiñede rana ebiruiga feciño canoño. Jusiñamui anamo naiñaiño jai raise iñenamona, Jusiñamuimona naiñaiñodi jai fioidaiñaiño isoide. Fiodaite cominina jaca canoñedicaí.

<sup>7</sup> Ie jira creyentiamo biena llono, feciñuaina jeare bu ñai raillanona.

<sup>8</sup> Ie cominina canoñedimie Cristo uaina jai fainonocaide. Naimiedi Cristona iñoñedimie baifemo eo jearedimie.

<sup>9</sup> Creyentiaina sedarainina canolle feciñuai mameciaina o joneia, iese jone: Jai jionaidiñaiñuai diese mameci jone. Dajede inirediñaiñuai mamecina jone.

<sup>10</sup> Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie uruai raise sedadiñaiñuai. Cominina nafuecabitíñaiñuai. Jiaí creyentiaina abina iedoño canocabidiñaiñuai. Duidinona canocabidiñaiñuai. Diese mare rafuena finocabidiñaiñuai mameci jone.

<sup>11</sup> Feciñuai diese mameci o joneia, nia jionaiñede feciñuai mameciaina joneño. Naiñaiñuai nano llotimaci: “Inina dane oñeiticaí. Da Cristona sedaiticaí” llotimaci. Ie mei uri iñenanomona, imana niciduamona, inina jitaitimaci. Ie jira naiñaiñuai mameci joneño.

<sup>12</sup> Naiñaiñuai navui llucina jai fainonocailla jira, jiaie comini naiñaiñuai joreñuaina ñaitimaci.

<sup>13</sup> Naiñaiñuai diga jofomo macariruillamona, rairaiedimaci. Eo ñaillaredimaci. Naiñaiñuai ñaiñenacinauido ñaitimaci.

<sup>14</sup> Nia jionaiñede itíñaiñuai iese iñellena, naiñaiñuai inina dane uana jitaídicae. Ie mei uruai renitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite.

<sup>15</sup> Cristona dajerie fainonocaida, Taife díbeimo jai jaidimaci.

<sup>16</sup> Creyente cominimona feciño iade, da naimie naiñaiñona canua. Jiaie creyentiamo naiñaiñona canolle rana jicañena. Ie muidona comininide feciñuaina canorenitimaci.

<sup>17</sup> Creyentiaina llofueraíni marena maijia, raise ibauiga. Naimaci lloia, naimaci jiaí llofueia, eo raise ibauiga.

<sup>18</sup> Moisés micori jaie ciegafuiai iena llote: “Trigo oni juillena jurareta saisia, ie fuena maiño, ie guillena”. Guillamona ibana jai ote. Cristo jaie llote: “Maijidimiedi ibauiga”.

<sup>19</sup> Creyentiaí llofueraímana damie llogidoia, iena cacarefiño. Mena comini, ñibai daje amani comini iese naimiena llogidoia, iemo cacarei.

<sup>20</sup> Creyentiaí llofueraínimona bu jeacina finocabia, nana creyentiaí uicomo naimiemo riire llono, jiaie creyentiaí daje isoi iñellena.

<sup>21</sup> Dacinodo naga jeacino finoraímamo llono. Nagamiemo riidoño llono. Fecuisse damiemo lloño, naimiedi o nabaina jira. Jusiñamui caina cide. Jesucristo caina cide. Jusiñamui fetoca jaienisai caina jiaí ciodimaci. Ie jira dacinodo llono.

<sup>22</sup> Jeacino naimiemo ia, naimie jeacino facaisena o iñellena, creyentiaí llofueraímana jaillena, buna raire fetono. Jeacinomona oni eneno o i.

<sup>23</sup> Eo o duia, da jinuina jiroño. O duicabilla jira, janore vino jiro, o jebe manollena.

<sup>24</sup> Jeacino dajerie finoia, iena uiñoitica; juez isoi Jusiñamui iena nia lloñenia. Jeacino jiaino finoia, iena uiñoñedica; iadedi jiairuido Jusiñamui lloia, iena uiñoitica.

<sup>25</sup> Ie isoide. Mare rafue bu finoia, iena uiñoitica; iadedi birui iena cai uiñoñenia, jicarena finoñena jira, jiairuido iena uiñoitica.

## 6

<sup>1</sup> Jusiñamuina ñnote majirainidi naimaci patrones eo ñnua. Ie mei Jusiñamuina ñnoñedino Jusiñamuina jeare ñaiñeitimaci. Cai llofuiacinona jamaiñeitimaci.

<sup>2</sup> Jesucristona naimaci patrones ñnoia, majiraini naimaci uaina jiai ñnua. Naimaci comeciai facañena: “Patrón creyentena illa jira, dani conima cai isiruilla jira, raise majiñeitica”; ia: “Raise majiñitica” comeciaina facaja.

### *Uanañedicinona llucino*

<sup>3-4</sup> Cai llogacinodi uanaicino. Cai Nama Jesucristona llotica. Bie llogacinomona naimie jitaile isoi cai illanona, raise uiñoitica. Jiaicinado bu llofueia, abi edote. Abi uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloñedimaci. Jiaie comini joreñoña ñaitimaci. Cai fiiena bitimaci.

<sup>5</sup> Uai uaitatimaci, naimaci comeciai maraiño illa jira. Uanaicinona jai uiñoñedimaci. “Cristo uai llumona, ailluena ucubena oitica” raillanomo comeciaina facadimaci. “Iemona caimare itica” raillanomo comeciaina facadimaci.

<sup>6</sup> Ie iadedi iese iñede. Cristona eo raise cai ñnuamona, caimo diese ite ra diga caimare itica.

<sup>7</sup> Cai jeicia, jaca buenidica. Cai fiodailla mei, cai rana uiñeitica. Cai radi benomo fiebicaite.

<sup>8</sup> Ie jirari, cai guille ia, cai ñiroi ia, caimare bene cai illa.

<sup>9</sup> Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga maraiñede rafuena finodimaci. Ja muidomo imaci abi faifitimaci.

<sup>10</sup> Ucubena ebiruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fañonocaidimaci. Ie muidona eo duere sefuidimaci.

### *Jusiñamui uaina ñnocana jai*

<sup>11</sup> Ero, Timoteo, odi Jusiñamui fetocamedio. Nana cue como lloga rafuemonona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñnocana o jai. Jiaie cominina isirui. Mare rafue dibeimo o comecina jone. Riicinado cominina llofueño.

<sup>12</sup> Jeacino dibeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio.

<sup>13</sup> Ie isoide Jesucristo. Poncio Pilato dne jaiie naimie itemo, marefodo: “Imedicue” llote. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue.

<sup>14</sup> Cai Nama Jesucristo nia abido biñenia, nana omo cue llogacinuai ñno. Jearede rafuena finoño, jiaie comini naie llogacinuaina uaitañellena.

<sup>15</sup> Naimie jitaillirui Jusiñamuidi eniruemo Jesucristona dane oretaite. Jusiñamuidi maremie. Nanocamie. Cai nanoca cai moto illaima. Cai nanoca Nama.

<sup>16</sup> Da jaca naimie fioidaiñeite. Eo isire lligaiñote ra dinomo naimie ite. Nainomo jaca bu iairei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaide. Iena jitaide.

<sup>17</sup> Eo ucuberedinomo llono: “Abina iedoñeno. Ucubedi fuirede. Ie jira ucubena uamo ocuiriñeno; iadedi Jusiñamui mo ocuiri”. Cai comeciai jaisillena, naimiedi caimo rana eo raise fecacabide.

<sup>18</sup> Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiñeno fecajana cano”.

<sup>19</sup> Ie muidona iese naimaci finoia, monamo naimaci isiruiga rana iite, jiairuido iena. Iese naimaci jiaia, jaca itatajacinona marena raise ua uiñoitimaci.

### *Fuiduacino*

<sup>20</sup> Timoteo, cue omo llogacinona faiñeno raise uiuicai. Jamai rafuemo cacarefiñeno. “Uanaicinona eo uiñotica” dajerie raitimaci; iadedi uiñoñedimaci. Naimaci ñaiana cacarefiñeno.

<sup>21</sup> Dajerie iena cacajano, Cristona nia uiñoñedimaci. Jusiñamui ona duenailasa. Jaca dinori omo rafuena lloticue. Mai. Pablodicue.

## TIMOTEOMO PABLO IE EMODOMO ORETAGA RABE

### *Uaiduacino*

<sup>1-2</sup> Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona lollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiamaiaí. Iena uiñocana mai o jai.

### *Jusiñamuimo iobillacinona fecade*

<sup>3</sup> Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaí, o facaisena iobillacinona fecadicue.

<sup>4</sup> Cue comeci caimareficaillena, ona eo cioacadicue. Navui cue o facadoia, o eiana comeciticue.

<sup>5</sup> Cristo Jesús o ñnuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uiñoticue.

<sup>6</sup> Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o lollena. Jusiñamuimona o baitajacinona naie facaiseconi feiñotio.

<sup>7</sup> Jusiñamuidi cominina o jaciruillana jitaiñede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade.

<sup>8</sup> Ie jira cai Nama rafuena o llua meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefuia, rairuioicaiñeno i. Jusiñamui o comecina ocuiñotaite.

<sup>9</sup> Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uiñotade.

<sup>10</sup> Cai Jilloitaramadi Cristo Jesús. Caímo Jesús jai bairia jira, Jusiñamui caina duenaillana jai uiñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui ñbeimo jaca illacinona jai uiñotade.

<sup>11</sup> Bie rafuena lollena, cuena fetode. Cuena oretaja jira, biena llofueticue.

<sup>12</sup> Ie jira duere sefuidicue; iadedi cue illana meiruiñedicue. Cue ñnogamiena cue uiñua jira, naimie bille ñnori naimiedi nana cuemo naimie jai iga rafuena cue llofuellena, cuena raise eenoite.

<sup>13</sup> Cue llua isoi o i. Uanaicinona lloticue. Cristo Jesús ñnocana o jai. Jiaie cominina isiruicana o jai, Cristo Jesús o jainaiaila jira.

<sup>14</sup> Jusiñamui Joreño caimo illa jira, omo naimie lloga uanaicinona fañonocaiñeno uiuicai. Uanaicinona o fañonocaiñellena, naimie ona canoite.

<sup>15</sup> Diga Asiamo ite cominidi cuena fañonocaidimaci. Naimacimona Figelo cuena fañonocaide. Hermógenes cuena jiaí fañonocaide.

<sup>16</sup> Onesíforo daje isoiñede. Diga icaiño naimie cue comecina ocuiñotade. Cuena meiruiñede. Cai Namadi Onesíforo jofomo itino duenaillasa.

<sup>17</sup> Romamo Onesíforo navui ria, cuena isire jenuano, cuena baite.



<sup>18</sup> Efesomo jaie cue ia, naimie cuena jiai canode. Iena raise uiñotio. Cai Nama ico abido bia, cai Namamona naimie iba feiñuana jitaidecue.

## 2

### *O maijia rafuena raise fuido*

<sup>1</sup> Cuena fainonocaidino isoi iñeno; iadedi cue jito, Cristo Jesús ona canuano, Cristo dibeimo o comecina ocuiñocana jai.

<sup>2</sup> Diga cominimo cue llwana navui cacadio. O uaina ñnotinomo cue llwana llono, iena jiaie cominina naimaci llofuellena.

<sup>3</sup> Cristo Jesús rafue muidona duere o sefua, rairuioicaiñeno i. Cai Nama rafuena o riiduamona, naimie soldado isoidio.

<sup>4</sup> Ie illaima uai naimie ñnoiacania, soldadodi soldadoñede rafuena maijiacaiñena. Ie illaima iobitallena, ie illaima ocuica rafuena finoacante. Ie isoide. Da Cristo Jesús rafuena o fino, naimiena iobitallena.

<sup>5</sup> Reglamientos llua isoi naimie raise jifanoñenia, jifanoraĩmadi bue isoide rana cioñede. Ie isoide. Ibaña o feiñollena monamo o jaia, Cristo Jesús llwado raise o jai.

<sup>6</sup> Illimo duere maijiraĩmadi maijia jira, naiemona naie guilledi oga. Ie isoide. Duere o maiji, ibana feiñollena.

<sup>7</sup> Cue llwamo o comecina facacabi. Cai Nama ona canoite, iena uiñollena.

<sup>8</sup> Jesucristo fiodaillamona jillode. Iena comeci. Naimie usumadi David micori. Jesucristona cue llua jira,

<sup>9</sup> marañedimie isoi cárcolmo duere jai sefuidicue; iadedi Jesucristo rafue nia llocana jaide.

<sup>10</sup> Ie jira Jusiñamui fetocano facaina duere sefuidicue, Cristo Jesúsna naimaci ñnuamona naimaci jilloillena, monamo naimaci jaca illena.

<sup>11</sup> Bie llwacinodi uanaicino:

Naimie dibeimo cai jaillamona, naimie diga jaca iiticaĩ.

<sup>12</sup> Naimie muidona cai duere sefua, naimie diga iiticaĩ, ie cominina naimie sedalle facaiseconi.

Naimiena cai janoia, naimie caina jiai janoite.

<sup>13</sup> Naimie raise cai ñnoñenia, naimie uai meidoñena muidona, naimiedi nia ñnogamie.

### *Timoteo illa rafue*

<sup>14</sup> O cominimo biena dane llono, iena comecillena. Jusiñamui facaina naimacimo llono: Uaina jamai uaitañeno, mare rafuena naicinomona comuiñena jira, naicinona cacadino comeciaina maretañena jira.

<sup>15</sup> Marena maiji, Jusiñamui ori iobillena. O meiruiñellena, naimie o maijia jibua, marena maiji. Uanaicino o uiñuamona, naimie uaina marena raise llofue.

<sup>16</sup> Jamai ñaiana cacarefiñeno. Comini jamai ñañoicaia, Jusiñamui jitailla rafuena finocana jaiñedimaci.

<sup>17</sup> Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiai jaide.

<sup>18</sup> Uanaicinsona fainonocaidiaĩmaiaĩ. Coco ñnua isoi, llofueñediaĩmaiaĩ. “Cai fiodaia, cai abi ico jilloñeite” llofuetiaĩmaiaĩ. “Cristona cai ñnua facaise jai jillodicaĩ. Cai fiodaia, cai joreño jaca iite” llofuetiaĩmaiaĩ; iadedi cai abi ico jillollena ñnoñediaĩmaiaĩ.

<sup>19</sup> Ie ia Jusiñamui comini jaca ñnocana jaidimaci. Ie cominimo Moisés micori jaie llwamona, iaĩmaiaĩ finoca rafuena jiai ñaite: “Jusiñamuidi ie cominina

uiñote. ‘Jusiñamuina ñnoticue’ raitimiedi maraiñede rafuemona eneno illasa” llote. Ie jira iaímaiaimona eneno o i.

<sup>20</sup> Ero, ucuberedimie jofomo diga guillirue joneuilla ra jai ite. Eo jitairede rana jai ite. Janore jitairede rana jai jai ite.

<sup>21</sup> Ie isoide. Jusiñamui díbeimo itinomona naga isoide comini ite; iadedi jeacinomona eneno bu ia, Jusiñamui naimiena fetoite, ie eo jitaile rafuena finollena. Jusiñamui díbeimo raise maijite.

<sup>22</sup> Ie jira conirueni comeciai jitailla maraiñede rafuemona eneno o i. Marena i, Jusiñamui jitailla isoi. Jesucristona ñnocana jai. Nana cominina isirui. Uri i. Mare comeciaimona nana cai Namana sedadino diga iese i.

<sup>23</sup> Jamai ebena rafuemo iñeno. Naiemona icirillacinodi comuide. Iena uiñotio.

<sup>24</sup> Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Ricaiñena.

<sup>25</sup> Naimie uaina jitañedinona fecuise llofuega. Ie mei Jusiñamui naimaci comeciai iuaina ñbai meidotaite, uanaicino díbeina uiñollena.

<sup>26</sup> Ie mei abi uiñuanona, Taife anamona jilloitimaci. Taifedi naimacina ie anamo jai itatate.

### 3

#### *Jusiñamui díbeimo iñedinomona abina rairui*

<sup>1</sup> Bie lluacinomo comecina raise faca. Jesucristo abido bille facaise iaírei ia, creyentena illena eo sefuirenite.

<sup>2</sup> Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biruitimaci. Jusiñamuina eo jeare ñaitimaci. Naimaci moo uaina, naimaci ei uaina ñnoñeitimaci. Jiaie cominimo iobillacinona jaca fecañeitimaci. Jusiñamuina jaca jitañeitimaci.

<sup>3</sup> Jiaie cominina duenaiñeitimaci. Comeciaina jaiarenitimaci. Jiaie comini joreña eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitañeitimaci.

<sup>4</sup> Naimaci nabaiñiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciai jitailla rafuena finoacanitimaci. Jusiñamui rafuena isiruiñeitimaci.

<sup>5</sup> “Jusiñamuina sedadicaí” raitimaci; iadedi Jusiñamui uaina jamaitimaci. Bie isoide comini diga nabairiñeno.

<sup>6</sup> Naimacimona dajerie jiaie jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniai ebena itimaci. Naimaci comeciai iuaillai raire meidocana uitimaci.

<sup>7</sup> Naga lloraíma lluomo naiñaiñuai cacareidimaci; iadedi uanaicinona jaca uiñoñedimaci.

<sup>8</sup> Naimaci comeciai eo maraiñede. Jusiñamui uaina ñnoñedimaci. Jannes, Mambres diga, Moisés micori lloga uai jaie uaitatíiaímaiaí. Ie isoi bie comini uanaicinona birui jai jitañedimaci.

<sup>9</sup> Nana comini naimaci rafue jamai ebe isoi finoca rafue uiñuamona, Jannes iaímaiaí Mambres rafue jaie fuilla isoi, naimaci rafue raire fuite.

#### *Timoteo uanaicinona ñnuanona jailla*

<sup>10</sup> Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue ñnuana uiñotio. Iciríñeno fecuise lloticue. Cominina isiruiticue. Duere cue sefuia, cue comecina ocuiñoticue. Iena uiñotio.

<sup>11</sup> Antioquíamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade.

<sup>12</sup> Jusiñamui jitailla rafuena finuano, Cristo Jesús uaido jaidinodi duere sefuitimaci.

<sup>13</sup> Ie facaiseconi maraiñedinodi maraiñede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci;

<sup>14</sup> iadedi cue llofuia uaido ñnocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie ñnotio.

<sup>15</sup> O uruenamona Jusiñamuina mare ciegafuiaina cacadio. Naie ciegafuiaia cai jilluana caimo llote. Cristo Jesúsna cai ñnuamona, jillobidicai. Iena caimo jai llote.

<sup>16</sup> Comini nana naie ciegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie ciegafuiaia Jusiñamuimona ite. Cominimona ññede. Ie jira naie ciegafuiaimona uanaicinona uiñoticai. Cai maraiñedinona caimo llote. Cai comeciai marena illena, Jusiñamui jitailla isoi, caimo llote.

<sup>17</sup> Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuereniticai. Naga Jusiñamui jitailla rafuena jiai raise finoreniticai.

## 4

<sup>1</sup> Jiairuido Cristo Jesúsdi illaimana eniruemo abido biite. Illaima isoi ie cominina sedajite. Naimiena ñnoñenamona nia cajedinona duere finoite. Jai fiodaitinona jillotajanona, naimiena ñnoñenamona, naimacina duere finoite. Jusiñamuidi birui caina jaca cide. Cristo Jesús birui caina jaca cide. Iena cue uiñuamona, bie uai omo lloiticue.

<sup>2</sup> Naimiena ñnoñedinona Cristo duere finoñellena, naimie rafuena naimacimo jaca llono. Comini o dafafia, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiai llono. Jeacinona bu finoa, naimacimo llono. Marena naimaci illena, naimacimo llono. Fecuisse jaca llofue.

<sup>3</sup> Jiairuido dajerie uanaicinona jitaiñeitimaci. Jiaifuenta jitaitemaci. Naimacimo dani naimaci cacaacana rafuena llollena, diga llofuerañina jenoitimaci.

<sup>4</sup> Uanaicinona fañonocaida, ñgaiaia icinuaído facajitimaci.

<sup>5</sup> Timoteo, o comecina eeno. Duere o sefuia, rairuioicaiñeno i. Jesucristo rafuena llocana o jai. O llofuiacinona marena fuido.

<sup>6</sup> Jai iairei ite cue meinellirui.

<sup>7</sup> Cai Nama rafuena llocana cue jaillano, iena marena jai riidoticue. Cue illa dinori jai fuiacade. Cai Namana fañonocaiñedicue.

<sup>8</sup> Cai Namamona marena cue illa jira, monamo ibana feiñoiticue. Iemo jai ocuiridicue. Iena cai Nama cuejena eenote. Naimie abido billiruimo iena feiñoiticue. Caia raise uiñuamona, dama cuemo fecañeite; iadedi nana naimie abido billena jitaidinomo ibana jiai fecaite.

### *Pablo damieriena ñaia rafue*

<sup>9</sup> Timoteo, raire cue dine bi.

<sup>10</sup> Binieimo ite rafuena Demasdi eo ebiruilla jira, Tesalónicamo naimie jaillano, cuena fañonocaide. Galaciamo Crescentedi jai jaide. Dalmaciamo Tito jai jaide.

<sup>11</sup> Dama Lucas cue diga ite. Marcos o diga ati. Cuena canollena, naimiena jitaidicue.

<sup>12</sup> Efesomo Tíquicono oredicue.

<sup>13</sup> O bia, cue fiebide iniroina ati. Troasmo Carpio jofomo fiebide. Cue libros ati, cue rabiaí diga.

<sup>14</sup> Alejandro raillamie navui cuena jeare finode. Naimiedi lloeomona rana finoraíma. Cai Nama naimiemo iba oite.

<sup>15</sup> Naimiemona o abi rairui. Naimie cue lluana eo jitaiñede. Iena uaitate.

<sup>16</sup> Illaicomini dine cue rafue nano cue riidoia, jaca buna cue facaina riidoñede. Nana cuena fainonocaidimaci. Jusiñamuidi naimacimo iba uana jitaiñedicue.

<sup>17</sup> Cai Nama cue facaina ite. Cue comecina ocuiñotade, nana judíuainedimonio naimie uai raise cue llollena. Naimie muidona cue fiodaisaillanomonajillobidicue.

<sup>18</sup> Cai Nama naga maraiñede rafuemona cuena eenoite, monamo ie cominina sedajonomo cue raise rillena. Iobillacino naimiemo jaca fecacabilasa. Iena jitaídicue.

### *Fuiduacino*

<sup>19</sup> Diga cominimo cue uai oredicue: Priscamo, Aquilamo, Onesíforo jofomo itinomo.

<sup>20</sup> Corintomo Erasto fiebide. Miletomo Trófimo duide fainonocaidicue.

<sup>21</sup> Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentiaí.

<sup>22</sup> Cai Nama o comeci ocuiñotajasa. Naimie nana omoina duenaillasa. Mai. Pablodícue.

## TITOMO PABLO ORETAGA RABE

### *Uaiduacino*

<sup>1</sup> Tito, omo cartana oretaiacaducue. ¿Nigacino? ¿Nie isoidio? Pabloducue. Naimie cominina cue illamona, naimie jitailla rafuena cue finuamona, Jusiñamui anamo llofuecabitucue. Ie rafuena llofuellena, Jesucristo ie ortagamieducue. Jusiñamui fetocanona inotallena, naimacina uanaicinona uinotallena, Jusiñamuina naimaci raise sedallena, cuena oretate.

<sup>2</sup> Naimie diga jaca cai illemo cai ocuirilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede.

<sup>3</sup> Iemei naimie jitaillarui caina ie rafuena jai uinotade. Naie rafuena cue llollena, naimie cuena oretate. Naimiedi cai Jilloitaraíma.

<sup>4</sup> Tito, bie carta omo cueticue. Cue isoi o inua jira, cue jitona cue mamecao. Coco Moodi Jusiñamui. Coco Jilloitaraímadí Jesucristo. Iaimaiaí ona jai duenaitiaímaiaí. Iena uinocana mai o jai. Ona uri jai itatitiaímaiaí. Iena uinocana mai o jai.

### *Creyentiaína sedaraini illacínuaí*

<sup>5</sup> Nainomo ite rafue o fuidollena, Creta railla uiasimo ona fainonocaiducue. Creyentiaína sedallena, naga nairaí illanomo llofuerainina o fetuana navui omo llotucue.

<sup>6</sup> Creyentiaína llofuerainina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruiaí creyentiaína itimie. Nana comini naimie uruiaí mare raillamie. Naimie uruiaí ie uaina inotimie.

<sup>7</sup> Jusiñamui facaina naimie majia jira, creyentiaí sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena.

<sup>8</sup> Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua.

<sup>9</sup> Naie uai raise llofuiamona comini comeciaina ocuinotallena, naimie uaina uaitatinona llucaitallena, cai llofua isoi uanaicinona inocana naimie jailla.

<sup>10</sup> Ie isoidinona feto, ailluena comini Cristo rafuena raise inoñena jira. Tainocinuaina ñacabitimaci. Cominina jifuecabitimaci. Judíuai creyentiamona diga comini iese itimaci.

<sup>11</sup> Ie jira naimacina llucaita. Naimacidi diga cominina uri itatañedimaci. Uanañedicinona llofuetimaci, ucube bifuiano ollena.

<sup>12</sup> Naimacimona comini rafuena lloraíma navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairaiiedimaci” raite.

<sup>13</sup> Naimiedi uanaicinona llote. Ie jira creyentiammo riire llono, naimaci Jusiñamui uaina raise inollesa.

<sup>14</sup> Judíuai igaiaina naimaci inoñellena, comini lletarafuena naimaci inoñellena, naimacimo riire llono. Damierie uanaicinona jitañedimaci.

<sup>15</sup> Ero, mareuidinomona naga ra mare. Jusiñamuina inoñedinomona naga ra jearede. Naimaci comeciadi jai jearena jira, jearerie comeciaina facacabidimaci.

<sup>16</sup> “Jusiñamuina uinoticaí” raitimaci; iadedi Jusiñamuina uinoñedimaci. Naimaci finoca rafuemonona iena uinoticaí. Jusiñamui naimacina eo gaiñede. Buena inoñedimaci. Ie jira mare rafuena finuana uinoñedimaci.

## 2

*Creyentia: marena illena, uanaicinona llofue*

<sup>1</sup> Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uiñollena.

<sup>2</sup> Uaicimaiana llofue. Canamacina jiai llofue: Jifaiñeno. ñnogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefuia, omoi comeciaina ocuiño.

<sup>3</sup> Uaicinuaina llofue. Cañaiñuaina iese jiai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeiñaiñuai mare rafuedo jaitimaci.

<sup>4</sup> Naiñaiñuai inina isiruillena, naiñaiñuai uruiaina jiai isiruillena,

<sup>5</sup> uairico isoi iñellena, jearede rafuena ñnoñellena, jofomo raise majillena, cominina duenaillena, naiñaiñuai iniñiai uaina ñnollena, jiaie comini Jusiñamui uaina jamaiñellena, naie cañaiñuaimona fueoitimaci.

<sup>6</sup> Einamacimo llono. Coniruenimo jiai llono: Ieñede ramo omoi comeciaina façaño. Uairico isoi iñeno.

<sup>7</sup> Tito, naga rafue o ñnuua diese, mare rafuedo o jai. O llofuia, uanaicinona llono. Jamai ebe isoi llofueño.

<sup>8</sup> Marena llofue. Marena o llofuia, ¿ñiese comini o uai uaitaitimaci? Uaitañeitimaci. Iemei o dibeimo iñedino meidaitimaci, caimo jearede rafue iñenia. Ie jira cairi ñaiñeitimaci.

<sup>9</sup> Patrón anamo itinomo iese llono: Omoi patrón uaina ñno. Naimie jitailla rafuena raise ñno. Naimie uaina oñeno.

<sup>10</sup> Rana ñiñeno. Naimie raruiai raise seda. Iese naimaci ia, naimaci raise majiia, naimaci patrón: “Jusiñamui uai mare” raite. Jusiñamuidi cai Jilloitaraima.

<sup>11</sup> Jusiñamui caina duenaillena jai cai uiñua jira, naicinona llofue. Naimiedi nana cominina jillotaicade.

<sup>12</sup> Naimie uai caimo llote: “Cue dibeimo iñede rafuena eneno fañonocai. Maraiñede rafuena jitañeno. Uairico isoi iñeno. Omoi ecimo itinomo, jiaie cominimo taino lloño. Naimaci rana ñiñeno. Jusiñamui uaina ñnocana jai”. Iese cai illana Jusiñamui birui jitaide.

<sup>13</sup> Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai Jilloitaraima”.

<sup>14</sup> Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai ñnollena, cai comeciaina marena dote.

<sup>15</sup> Naie rafuena llofue. Maraiñede rafue comini finoia, naimacimo llono. Illaima uai isoi llono. Cominidi o uaina jamaiñellena, raise llofue.

## 3

*Creyentia: illacinuai*

<sup>1</sup> “Omoi illaicomini uai anamo i” creyentiaimo dane llono. Omoi illaicomini llucanona ñno. Mare majille ia, iena raise ñno.

<sup>2</sup> Jiaie cominina jeare ñaiñeno. Fuirñeno. Fecuisse uiuicai. Nana comini diga marena ñaino.

<sup>3</sup> Jiaie cai jiai ebe isoidicai. Jusiñamuina ñnoñedicai. Taife caina jifuate. Dani cai comeci jitaillacino railla isoi ñnouidicai. Diga ie jearede rafuena ñnouidicai. Jiaie cominina jeare ñnouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai.

<sup>4</sup> Ie ia Jusiñamuidi maremenana jai fididicai. Naimie caina isiruillana jiai fididicai.



<sup>5</sup> Ie mei Jusiñamui caina jillotate. Mare rafuena cai finoñedica; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobaiñotica. Jusiñamui Joreño cai comeciaina marena finode.

<sup>6</sup> Ie Joreño caimo raise fecade, Jesucristo finua muidona. Jesucristo cai Jilloitaraima.

<sup>7</sup> Ie jira naimiemona marebicaidica. Caina duenaillamona, marebicaidica. Caina ie cominina itatate. Iemona naimie diga jaca illemo ocuridica.

<sup>8</sup> Tito, cue llucinodi uanaicino. Jusiñamuina inotino marena maijillena, cue llucinona llo-llocai. Cue llucino mare. Ie jira nana cominidi iena cacacabillasa.

<sup>9</sup> Ebena ñaiñeno. Omoi usumatia; mameciaina jamai sia-siadoñeno. Moisés micori llogacinuaina uaitaño. Naicino diga buena oñedica, Jusiñamui jitaillacinona cai finollena.

<sup>10</sup> Roracomo comini comeci jiaifocaitatimie ia, naimiemo llono: “Iena finoñeno”. Dacaiño o llumona naimie inoñenia, dane llono. Ie mei inoñenia, naimie diga omoi ñaiñeno. Naimie diga omoi nabairiño.

<sup>11</sup> Uanaicinodo naimie jai jaiacaiñede. Jeacinona jai finode. Naimie iena jai uiñote.

#### *Fuiduacino*

<sup>12</sup> Artemas o dine cue oretaia, Tíquico o dine cue oretaia, Nicópolis railla nairaimo are sedaño raire bi. Nainomo rollime facaiseconi cue comeci illana jitaide.

<sup>13</sup> Zenas railla abogado Apolos iaimaia; diga cano, iaimaia; oni jaiacana jira. Iaimaia; jitaille rana feca.

<sup>14</sup> Dueredino ia, naimacina canollena, creyentiaimo: “Marena maiji” jiai llono. Naimaci jamai ñellena, iese llono.

<sup>15</sup> Cue diga itino naimaci uaina omo oredimaci. Jesucristona cai inua jira, caina isiruitinomo cue uaina llono. Jusiñamui nana omoina duenaillana uiñocana omoi jaillana jitaidicue. Mai. Pablodicue.

## FILEMÓMO PABLO ORETAGA RABE

### *Filemómo Pablodi carta orede*

<sup>1</sup> Filemón, bie carta o dine oredicue. ¿Nie isoidio? Pablodicue. Jesucristo rafue cue llumona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamuimo jai cai jainaiaila jira, naimiedi coco ama. Coco diga Cristo facaina o maijia jira, ona isiruiticoco.

<sup>2</sup> Coco uaina Apiamo jiai oredicoco. Cristo dibeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiai oredicoco.

<sup>3</sup> Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoï jai. Iaimaiaï omoïna uri jai itatate. Iena omoï uiñocana mai omoï jai.

### *Filemón Cristona ñnocana jaide*

<sup>4</sup> Jusiñamui diga cue ñaia, o facaina cue jüia, naimiemo iobillacinona fecadicue. Mare rafuena o finuana cue fidiã jira, naimiemo iobillacinona fecadicue.

<sup>5</sup> Cai Nama Jesúna ñnocana o jaillana fididicue. Nana creyentiaïna o isiruillana jiai fididicue.

<sup>6</sup> Cristo dibeimo cai illa muidona, naimiemonã diga marecinona feiñoticaï. Cristona o ñnuamona, jiaie creyentiaïna o nabaia, omonã naie marecinona uiñoitimaci. Naga mare ra uiñocana naimaci jaillana jitaïdicue.

<sup>7</sup> Cue ama, creyentiaïna o isiruilla jira, iobidicue. O muidona creyentiaï comeciãï caïmare uri illã jira, cue comeci iocire ite.

### *Onésimo facaina Pablo ñaite*

<sup>8</sup> Cue comeci iocire ite; iadedi daje rafuena o diga ñaïacadicue. Cristo uai cuemo illamona ñaïñeiticue;

<sup>9</sup> iadedi conima coco isiruilla jira, o diga ñaiticue. Jai uaïcimadïcue. Jesucristo rafuena cue llua muidona, cárcelmonã jai ñaiticue.

<sup>10</sup> Onésimo facaina ñaïacadicue. Cárcelmo cue illã facaiseconi, cue muidona Cristona naimie ñnua jira, naimie cue jironã jaide.

<sup>11</sup> Omo naimiedi maraiñede rafue navui finode. O mullaïma naimie illanona, raise maijiñede. Bene aïsiamona, Cristona naimie ñnote. Cuena birui eo canode; iadedi birui o diga raise iacade.

<sup>12</sup> O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comeciã jiai oretaiticue.

<sup>13</sup> O facaina naimie cuena birui canode. Cue diga naimie fiebillana jitaïdicue;

<sup>14</sup> iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitaïñedïcue; iadedi dama o comeci jitaïlla jira, mare rafuena o finuana jitaïdicue.

<sup>15-16</sup> O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o dinena janorena facaise cue dine navui bite. Naimiedi o mullaïma; ia naimiedi jiai birui o ama. Naimiena isiruillanona feiño.

<sup>17</sup> O nabaina iticuenã cuena o feiñua isoi, naimiena feiño.

<sup>18</sup> Naimie maraiñede rafuena omo navui finode. Omo naimie nia debia, cue facaina jone.

<sup>19</sup> Iena íbaitícue. Bie carta dama cue cuiamona, naimíe debiana cue íbajana uíñotío. Omo eo lloñeítícue; iadedí cue muidona Cristona o ñnua jira, ailluena cuemo debedío.

<sup>20</sup> Cue ama, coco Nama Cristomo coco jainaiáilla jira, cue jítaille rafuena fino. Ie mei cue comeci uri iite.

<sup>21</sup> Cue jítaila rafue o finollena uíñotícue. Cue jítaila rafue baífemo o finollena uíñotícue.

<sup>22</sup> Jíaié rafuena lloiacadícue. O jofomo daje cuarto cuejena fino. Cue facaina o jíia, Jusiñamui jitaia, o díne jaitícue.

*Damíeríe ímací uainá jíai órede*

<sup>23</sup> Omo Epafra íe uainá órede. Jesucristo rafue llua muidona, cárcelmo cue díga naimíe íte.

<sup>24</sup> Marcos íe uainá órede. Aristarco íe uainá órede. Demas íe uainá órede. Lucas íe uainá órede. Cristo rafue naimací lluanona, naimací cue díga maíjíde.

<sup>25</sup> Cai Nama Jesucristo nana omoí creyentíai comeciáina ocuíñotajamona omoína duenailasa. Mai. Macaíbaite. Pablodícue.

## HEBREOS COMINIMO ORETAGA RABE

*Jesucristo rafuena jai cai cacajamona, Jusiñamuiña jai uiñoticaí*

<sup>1</sup> Jusiñamuidi caína ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena lollena, jiaicaiño ie jaienisaína orede. Jiaicaiño nicai anado Jusiñamui ie rafuena llote. Iena lollena, jiaicaiño ie facaina lloraini micoriaína orede;

<sup>2</sup> iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote.

<sup>3</sup> Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemoná Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

*Jusiñamui Jito Jusiñamui jaienisaí baífemo faíte*

<sup>4</sup> Jusiñamui Jitona naimie illamona, naimie illano Jusiñamui jaienisaí illano baífemo faíte. Ie illanomona naimie Jusiñamui jaienisaí baífemo faiana uiñoticaí.

<sup>5</sup> Jusiñamuidi: “Cue Jitodio” Cristomo llote; iadedi ie jaienisaímo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisaí ie Jito baífemo faíñena jira, ie jaienisaímo iena jaca lloñede.

<sup>6</sup> Ie dajede Jito eniruemo oretaja facaiseconi Jusiñamui llote:

Nana cue jaienisaí naimiemo iobillacinona fecaja;

<sup>7</sup> iadedi jiaie rafuedo ie jaienisaína ñaíte:

Cue ocuilla rafuena naimaci finollena, cue ocuilla diese naimacina oretacabiticue.

<sup>8</sup> Ie Jitona ñaianona raíte:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

<sup>9</sup> Mare rafue finuana jitaidio.

Maraiñedicinona finuana jitaíñedio.

Ie jira ona caimare jai itataticue.

Monamo o abido billanona, cue jaienisaí baífemo ona caimare itataticue raíte.

<sup>10</sup> Jiaicaiño Jusiñamui ie Jitona raíte:

Cue isoi o illa jira, o uai diga nanodofoconi eniruena jaie finodio.

Mona jiai finodio.

<sup>11</sup> Bie eniruedi mona diga ico fuite.

Iniroi fuilla isoi, iñeíte;

iadedi odi jaca iitio.

<sup>12</sup> Eniruena mona diga meidotaitio;

iadedi odi jaca daje isoitio.

Jaca iitio

raíte.

<sup>13</sup> Ie Jitomo buena llote; ia ie jaienisaímona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o dibeimo iñedinona o anamo itataitícue.

<sup>14</sup> Ie jaienisaímo iena lloñede; iadedí naimacína oretacabite, ie Jitona ñnotinona canollena. Ie jira nana naiemona, ie Jito ie jaienisaí baífemo faiana uiñotícaí.

## 2

### *Jusiñamui caína jillotaja rafuena caí jamaiñena*

<sup>1</sup> Jusiñamui Jito siño jitonana jira, naimíe birui lloga rafuena eo raise caí cacajasa. Naiemona abído caí jaiñellena, naiena caí feitañellena, naiena eo raise caí ñnuasa.

<sup>2-3</sup> Ero, Jusiñamui ie jaienisaína jaie oretajanona, Moisés micorímo díga rafuena jaie llote. Naie lloga rafuena bu raise finoñenia, iena bu raise ñnoñenia, Jusiñamui naimíena eo duere finode. Jusiñamui jaienisaí lloga rafue mare; iadedí Cristo birui lloga rafue jaienisaí jaie lloga rafue baífemo faía jira, Cristo rafuena caí ñnoñenia, Jusiñamui caína duere finollemona ua jilloñeitícaí. Ero, naimíe caí jeacínomona caína jillotaiacade. Naie rafuena caí jamaia, iena caí ñnoñenia, naimíe caína duere finollemona ua jilloñeitícaí. Caí Nama Cristo naie rafuena jaie llote. Naimíena cacadinodí caímo iena jai llotímací. Cristo rafuedí uanaicínona llotímací.

<sup>4</sup> Jusiñamui uai díga jiaíforiede siño rafuena naimací finuamona, Cristo rafuedí uanaicínona uiñotícaí. Naimíe jitailla díese naga creyentemo Jusiñamuidí ie uaina itatate. Naga creyente naimíe dibeimo raise maijillena, ie uaina itatate. Naga creyentemo naie uai illamona, Cristo rafuedí uanaicínona uiñotícaí. Ie jira naie rafuena caí ñnuasa.

### *Caí isoi illena, Jesucristo ñimana jaide*

<sup>5</sup> Jusiñamuidí ie jaienisaína oretauide, ie jitailla rafuena naimací finollena; iadedí naimací anamo comíní íco illena jaca lloñede. Cristo anamo comíní íco illena llote.

<sup>6</sup> Jusiñamuimo David micorí iena jaie llote:  
Caí jamai bue isoidícaí; iadedí caímo comecina facadio.  
Jamai comínídícaí; iadedí caína canodio.

<sup>7</sup> Caína comínína o finua jira, o jaienisaí isoi iñedicai.  
Fiodaiñedímací; iadedí nana eníruue rana o finuanona, Adán micorí anamo iena jaie o itataja jira, caína eo iobitadio.

<sup>8</sup> Nana rana naimíe anamo o itatajana jaie llotío.

Iese llote; iadedí nana naie lloga rafue nia suiñede, jeacínona Adán micorí jaie finua jira.

<sup>9</sup> Jesúna dane lloitícue. Naimíena uiñotícaí. Eníruemo naimíe jaie billamona, Jusiñamui ecímona naimíe billa jira, Jusiñamui jaienisaí illa isoi, dallu naimíe iñede. Comena jaide. Caí facaina duere sefuillanona, naimíe fiodaite. Caína Jusiñamui dueruillanona, nana caí facaina Jesús fiodaite. Naimíe fiodailla jira, ie abímo naimíena Jusiñamui abído itatajamona, Jusiñamui naimíena iobitade.

<sup>10</sup> Jusiñamui nana rana finode. Nana comínína comuitate. Naimíena iobitallena, nana finode. Naimíe jitailla jira, naimíemona marena jira, Jusiñamui ie Jitona orede. Caí facaina fiodaillena, ie Jitona orede. Caí jeacino facaina fiodaite. Ie Jito fiodaillamona, ailluena Jusiñamui comínína jaidícaí. Naimíe illanomo íco iitícaí. Naimíe jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimíena ñnotínodicína jai raise canorede.

<sup>11</sup> Naimie fiodaillamona marebicaidicai. Naimie dibeimo jai cai illa jira, daajena mooredicai. Ie jira naimiedi: “Cue cominidomoi” caina meiruiñeno llote.

<sup>12</sup> Jusiñamui facaina lloraini micoriai llogacinomona naie rafue uanaicinsona uiñoticai. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci jaie llotimaci.

<sup>13</sup> Jesúsna dane ñaitimaci:

Ie comini diga naimiedi Jusiñamuina ñinocana jaite.

Jusiñamui cominina damerie jailla jira, naimacidi jiai naimie comini ñaitimaci. Naimaci ñaia isoi, Jusiñamui cominina birui jaidicai.

<sup>14</sup> Jusiñamuina ñinotinodi cominina jira, cai isoi naimie illena, Jesúsdi comena jaide. Cai fiodailla isoi, naimie jiai fiodaite. Taife uaina cai ñnoia, jeacino finodicai. Iemona fiodaicana jaidicai. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo iñenanomona jai jillodicai.

<sup>15</sup> Jesús nia fiodaiñenia, nana cai illa dinori fiodaillana jaciruicana jaidicai. Jesús jai fiodailla jira, caina jaciruillacino anamona jillobitade.

<sup>16</sup> Jeacino anamo naimaci iñena jira, Jusiñamui jaienisaimo ie comecina facañede; iadedi Abraham micori isoi ñinotinomo naimie comecina facade. Naimacina naimie jilloitallena, naimiedi comena jaide.

<sup>17</sup> Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faimona, naimie fueollena, naimiena orede. Cai illana raise uiñote. Iemona caina dueruite. Jusiñamui jitaillacino finuana raise uiñote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinsona oni dotajana Jusiñamuimo jicanote.

<sup>18</sup> Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina cai finoñellena, cai comeciaina ocuiñotade.

### 3

#### *Jesús Moisés micori baifemo faite*

<sup>1</sup> Cue amatiai, jeacino anamo omoi jai iñena jira, ie dibeimo omoina Jesús jai fetua jira, naimie siño jitona jira, naimiemo omoi comeciaina faca. Naimiena ja ñaiticue. Ie rafuena lollena, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima.

<sup>2</sup> Ie Moo cominina naimie raise sedajanona, naimiedi ie Moo uaina ñnuanona, iena finode. Nana Israel cominina naimie sedajanona, Moisés micori Jusiñamui uaina ñnuanona, iena finode.

<sup>3</sup> Jusiñamuimona Jesúsdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúsdi Jusiñamui iobide. Cai jillua jira, Jusiñamui cominina jaidicai.

<sup>4</sup> Buena cai finuamona, naimie cominina jaiñedicai; iadedi naimie caina ie cominina dama itatarede.

<sup>5</sup> Naimie facaina maijjano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiemonona Jusiñamui ico llole uaidi uanaicinsona uiñoticai.



<sup>6</sup> Jusiñamui facaina maijianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuria, Jusiñamui ua cominidicai.

*Jusiñamuimona abido cai jaiñellena, bie rafuemonu cai fueua*

<sup>7</sup> Jusiñamui Joreño caimo birui lloia, iena cacarei. Ero, Jusiñamui jaie llwana cuetatate:

<sup>8</sup> Omoi jaiagai isoi iñeno.

Jofue iñenanomo omoi jaiagai ia, cue uaina ñnoñedimaci.

<sup>9</sup> “Naimie uaina raise uiñoticaí” raillanona, cuena facacabitimaci.

Cuarenta años cue siño ñnoca rana ciódimaci; iadedi jaca ñnoñedimaci.

<sup>10</sup> Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

<sup>11</sup> Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

<sup>12</sup> Cue amatiai, cai jaiagai rafuena cai uiñuamona, cai fueua. Uanai Jusiñamuimona abido omoi jaiñellena, naimie jai lloga rafuena omoi ñnocana jai. Omoimona bu raise ñnoiacañenia, naimiemo llono.

<sup>13</sup> Jusiñamui rafuena omoi raise ñnollena, nagarui conini omoi comeciaina ocuiñota. Omoimona jeacina ebiruiñellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jaia, Jusiñamui rafuena ñnoñeitomoi. Iemona naimie ricailafue anamo dane iitomoi.

<sup>14</sup> Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiena cai nano ñnua isoi, cai ñnocana jaia, marena caimare iiticaí.

<sup>15</sup> Ie jira naimiena ñno. Bie jaie cueda:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci

cueda. Naimaci isoi iñeno.

<sup>16</sup> Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise ñnoñedimaci.

<sup>17-18</sup> Cuarenta años jofue iñenanomo itimaci; iadedi naimiena naimaci ñnoñena jira, Jusiñamui naimaci diga icirite. Naimiena ñnoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fióditimaci.

<sup>19</sup> Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciái jaca uri illana uiñoñedimaci.

## 4

<sup>1</sup> Jusiñamui dibeimo raise cai illamona, Jusiñamui cai comeciái birui uri illana jitaide. Naimie lloga uai nia saiñede. Caimona damerie iese iñellesa, cai jaiagai isoi cai iñellena, abina rairuicana mai cai jailla.

<sup>2</sup> Jusiñamuidi comini comeciái uri illana jitaide. Cai jaiagaimo iena llote. Diga icaiño naie mare rafuena cacadimaci; iadedi iena naimaci ñnoñena jira, iemona buena oñedimaci.

<sup>3</sup> Jusiñamuidi cai comeciái uri illana birui caimo jai llote. Cristo ie mare rafuena jai cacadicaí. Naimie uaina cai ñnua jira, cai comeciái jai uri ite. Cai jaiagai comeciái uri iñede. Moisés micori cuimona iena uiñoticaí. Cueda: Naimaci diga Jusiñamui icirilla jira, naimacimo lloga eniruemo jaiñedimaci Comeciái uri illana jaca uiñoñedimaci

cuega. Jusiñamuidi nana comini comeciai uri illana jitaide. Eniruena naimie finocamo, comini comeciai uri illana jitaide.

4-9 Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci ñnoñena jira, naimaci comeciai jaca uri ññede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciai jaca uri ññede. Josué micori illa facaisemona diga años illanona, David micori comeciai uri illana jiai llote:

Naimie uaina birui omoi cacaia, iena ñno

llote. Naiemona Jusiñamui cai comeciai uri illana jitaillana uiñoticaí.

Naimiena ñnotinodicaimo naie rafue jai duide.

10 Jusiñamuina cai ñnuamona, cai comeciai jai uri ite. Cai comeciai uri illena, jiaie rafuedo jaiñedicaí. Naimiena cai ñnuamona, naimie illanomo ñco iiticaí. Nana naimie finoca rafuena naimie fuidua mei, nainomo uri iiticaí.

11 Cai jaiagai ñnoñedimaci. Cai faifiñellena, naimaci isoi cai jaiñena; iadedi Jusiñamui uaina ñnocana mai cai jailli. Jusiñamuina cai ñnuamona, naimiedi cai comeciai uri itatate.

12 Naimiena cai ñnoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate.

13 Jusiñamuimona buna reirinide. Jusiñamui nana caina ciodo. Nana cai finoca rafuena uiñote. Nana cai comeciaino iticinona uiñote. Ie jira naimie uaina ñnocana mai cai jailli

### *Jesúdi cai facaina Jusiñamui diga nanoca ñairaima*

14 Jesúdi naie uaina cai ñnuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena ñnocana jaiticaí.

15 Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie ñnoñede. Iemona Taife ramo faiacinona ñnoñenana naimie uiñua jira, jeacinona oñede. Caina canorede. “Naimacina cano” ie Moomo llocabite.

16 Cai facaina ie Moo abimo naimie illa jira, cai comeciaina naimie ocuiñotaicana jira, Jusiñamuina jaciruiñeno naimiemo cai jia. Naimie caina duenaillamona, cai jeacinona feitaite. Cai comeciaina jiai ocuiñotaite.

## 5

1 Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés micorimo Jusiñamui jaie lua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecauidimaci. Cominina Jusiñamui feiñollena, imaci ñairaima Jusiñamui diga ñaite.

<sup>2</sup> Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede.

<sup>3</sup> Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

<sup>4</sup> Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí.

<sup>5</sup> Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuega-fuiaimona iena uiñoticaí. David micori Jusiñamui llwana jaie cuega:

Cue Jitodio. Jai o Moodicue  
cuega.

<sup>6</sup> Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

<sup>7</sup> Eniruemo Cristo ia, iimana naimie jailla jira, duere sefuide. Naimie fiodiacana iaírei ia, Jusiñamuimo eo jüide. Naimie fiodiañena Jusiñamui jillotarede; iadedi Jusiñamuimo ado llote: “Cuenallegi cacaitaño; iadedi cue comeci jitailla isoi finoño. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiaiana cacajano fairiote.

<sup>8</sup> Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina inocana jaca jaillana naimie uiñote.

<sup>9</sup> Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite.

<sup>10</sup> Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jiaimiena jaca fetoñede. Ie isoi Jesús uai jaca saiñede.

### *Cristo dibeimona abido danomo jaiñeno*

<sup>11</sup> Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitañena jira, omoimo iena raise llonidicue.

<sup>12</sup> Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo nia raise omoi jaiñena jira, jiaimie omoina llofuiana nia jitaïdomoi. Cristo dibeimo omoina itatate rafuena nia jitaïdomoi. Cristona nano omoi cacaja rafuena nia jitaïdomoi. Cristo rafuena inocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaitaite. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi.

<sup>13</sup> Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede.

<sup>14</sup> Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiana uiñote. Maraiñedicinona finoñellena, llofuiana jiai uiñote.

## 6

<sup>1</sup> Diga icaiño bie rafuena jai cacadomoi. Cristona nano cai cacaja rafuena raise cai #nuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicai; iadedi cai comeciai iuai birui jai meidoticai. Cristo dibeimo itatate rafuedo birui jaidicai. Jusiñamuina #nuamona, naimie dibeimo jaidicai.

<sup>2</sup> Cristo dibeimo bautizajana jai uiñoticai. Llofueraimana jaillena fetuana jai uiñoticai. Creyentiaina naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uiñoticai. Nana creyentia fiodaillamona jilluana jai #noticai. Jusiñamuidi naimiena #noñedinona icojaca duere finollena jai #noticai.

<sup>3</sup> Naie isoide rafue mare; iadedi iena cai raise #nuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailli.

<sup>4</sup> Uanaicinona omoi comeciai uiñuamona, Cristona omoi #nuamona, Jusiñamui Joreño omoimo illamona,

<sup>5</sup> Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai.

<sup>6</sup> Cristo dibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai.

<sup>7</sup> Ero, iena jiaie rafuedo lloiticue. Jusiñamui noci deitacabilla jira, enirue naimie raitacabilla jira, iemo riará sicuanona, iena ie nama raitia, naiemona ie llisillana naimie uamona, Jusiñamui iobide;

<sup>8</sup> iadedi naie eniruemona riará sicoñenia, maraiñede. Monaigi cuiraiño diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañonocaide. Naie enirue isoidomoi. Jusiñamuimona mare rafuena cacadomoi. Iena #nocana omoi jaia, naimie omoina iobitaite. Iena omoi jitaiñenia, naimiemona duere sefuitomoi.

*Jusiñamui llua jira, cai comeciai ocuiñocana jaidicai*

<sup>9</sup> Cue isiruigaomoi, abi rairuillicinona omoimo lloticai; iadedi cai llofuiaicino omoimo duiñenamo cai comeciaina facañedicai. Cristona #nocana omoi jaillamo cai comecina facadicai.

<sup>10</sup> Jusiñamui omoina raise uiñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi.

<sup>11</sup> Omoi comeciaimona jiaie creyentiaina omoi canua isoi, Cristo rafuedo nana omoi ille dinori #nocana omoi iocire jaillana jitaidicai. Naimie diga icojaca omoi ille jira, iese omoi jaillana jitaidicai.

<sup>12</sup> Cristo rafuedo omoi jaillamona omoi sefuiruiñenana jitaiñedicai. Jusiñamui lloga uaina #nocana jaidino isoi, omoi jaillana jitaidicai. Naimiena naimaci #nuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiai oitomoi.

<sup>13</sup> Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona llote. Tainona lloñede.

<sup>14</sup> Abraham micorimo llote: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” llote.

<sup>15</sup> Abraham micorí naimie lloga uaina ñnote. Iena suillemo fecuise ocuride. Ie jito Isaac micorí, Jusiñamui llua isoi, comuide.

<sup>16</sup> Uanaicino cai llocabillana jiaie comini uiñollena, Jusiñamui mamecina llinoticaí. “Jusiñamui caina ciode” lloticaí. “Uanaicinona cai lloñenia, Jusiñamui caina duere finoite” lloticaí. Ie jira cai lloga uaina buna uaitañede.

<sup>17</sup> Ie isoide. Jusiñamuidi ie finolle rafuena caimo jai llote. Naimie lloga uai meidonillana cai uiñuana naimie jitaide.

<sup>18</sup> Naimiedi Jusiñamuina jira, ie uai naimie jai llua jira, naimie tainona llonillana uiñoticaí. Ie jira naimie lloga uai naimie finuana uiñoticaí. Naimiena cai ñnuamona, naimie anamo cai illa jira, caina naimie eenua jira, cai comeciaí ocuiñocana jaidicaí. Naimie illanomo ico cai jaca illemo ocuridicaí.

<sup>19</sup> Naie rafuena Jusiñamui llua jira, cai comeciaí ocuiñocana jaidicaí. Ie lloga uaina naimie finollemo ñnoticaí. Monamo Jusiñamui illanomo ico cai illena eo raise uiñoticaí. Nainomo fiebillena, barco ie lloelluna illemo dotaja isoi, cai comeciaí naganomo iñellena, Jesús caina eenote.

<sup>20</sup> Jesús nainomo jai illa jira, naimie muidona nainomo jiaí iiticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micorí ñaia uai saiñena isoi, Jesús cai facaina ñaia uai jaca saiñeite.

## 7

### *Melquisedec micorí illa isoi, Jusiñamui diga ñairaimana Jesús jaide*

<sup>1</sup> Iena omoi raise uibiñollena, Melquisedec micorí rafuena omoimo lloiticue. Naimie micoridi Salem railla nairai ie illaima. Naimiedi comini facaina cai Moo Jusiñamui diga ñairaima. Cinco illaimana Abraham micorí anafefitaja mei, ie jofomo Abraham micorí abido billano, naisomo naimie dine Melquisedec micorí bite. Abraham micorimo marecinona Melquisedec llote: “Birui Jusiñamui ona canode. Naimie ona jaca canollena uiñoticue” llote.

<sup>2</sup> Jusiñamui diga ñairaimana Melquisedec illa jira, naimiemo Abraham micorí dajerie rana fecade. Naie cinco illaimana anafefitajanona, naimaci rana bairuanona, nana naie ramona, riai uaimona ie décima facaina rana Melquisedecmo fecade. Melquisedec micoridi Salem railla nairai illaima. Melquisedec mameci oni dobañuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega.

<sup>3</sup> Naimie mooná, naimie eina, naimie cominina uiñoñedicaí. Naimie jeiciaruina uiñoñedicaí. Naimie fiodaillaruína uiñoñedicaí; iadedi Jusiñamui jito isoi Jusiñamui naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

<sup>4</sup> Ero, cai cominimona Abraham micorí cai jaiagai baifemo faite; iadedi Melquisedec micorí Abraham micorí baifemo faite. Ie jira naimiemo ie décima facaina rana fecade.

<sup>5</sup> Moisés micorimona Abraham micorí uruiaí Jusiñamui lloga uaina cacadimaci. Naimacimo Jusiñamui ie sedaja jofo finuana llote. Nainomo maijidinomo nainomo maijiana llote. Abraham micorí uruiaimona Leví railla nairaina fetode. Nainomo maijidino comini facaina Jusiñamui diga ñauidimaci. Jusiñamui ocuica rafue naimaci maijia jira, naimaci comini ramona décima facaina rana feiñoudimaci.

<sup>6</sup> Melquisedec micorimo Abraham micoridi ie rana fecade; iadedi Melquisedec micorí Abraham micorí cominiñede. Leví railla nairai imieñede. Naisomo Abraham micorí dine Melquisedec micorí billanona, Abraham



mīcorīmo marecinona llote: “Jusiñamui ona jaca canoite. O diga jaca iite” llote.

<sup>7</sup> Melquisedec mīcorī Abraham mīcorī baifemo faia jira, naie marecinona naimiemo llote.

<sup>8</sup> Ero, Melquisedec mīcorīmo Abraham mīcorī rana fecade; iadedi Melquisedec mīcorī fiodaillaraina uiñoñedīcai. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judiuaī comīnīdi fecauidimaci; ia naie ñairaini fiodaicana jaillana uiñotīcai. Naimaci uai sailla jira, jiaīno naimaci ifomo meiduidimaci.

<sup>9-10</sup> Levī mīcorīdi Abraham jito. Levī mīcorīmona Levī railla nairai comuide. Naimaci Jusiñamui diga ñairainina jaidimaci. Comīnīmona décima facaina rana feiñouidimaci. Levī mīcorī nia comuiñenia, Melquisedec mīcorīmo Abraham mīcorī décima facaina rana fecajamona, Abraham mīcorī Levī ie usumana jira, Melquisedec mīcorīdi Levī nairai baifemo faiana uiñotīcai. Melquisedec mīcorīdi Jusiñamui diga ñairaini baifemo faiana uiñotīcai. Melquisedec isoi Cristo illa jira, Cristodi Levī baifemo faiana uiñotīcai. Cristodi nana naie ñairaini baifemo faiana jiaī uiñotīcai.

<sup>11</sup> Jusiñamui diga ñairaini finouilla rafuedo Jusiñamui jitailla isoi marebicaiñedīcai. Naimaci finouilla rafuedo cai jillobidīcaidena, jiaīe rafuena jitaīñedīcai. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillana, naimiena orede. Caina jillobitallena, naimiena orede, jiaīe rafuedo cai jillobiñena jira. Jusiñamui Moisés mīcorīmo jaie llua isoi, comini facaina nano ñairaimadi Aarón mīcorī. Naimiedi Levī railla nairai imie. Naimie jitoniamona comini facaina ñairainina itimaci. Iena uiñotomoi. Aarón jitoniamona Cristo iñede. Aarón maijia rafuemo Cristo duiñede; iadedi Melquisedec rafuemo duide.

<sup>12</sup> Comini facaina ñairainina jaillana jai meidua jira, Jusiñamuidi naimaci rafuena jiaī meidote.

<sup>13</sup> Iena lloiticue. Aarón di Levī railla nairaimo duide. Dani Levī nairaidi comini facaina ñairainidimaci. Dani naimaci di comini facaina Jusiñamuimo rana fecauidimaci. Cristo naie nairaimo duiñede.

<sup>14</sup> Cristo jiaīe nairaimo duide. Judá nairaimo duide. Judá nairaimona Jusiñamui Jito comuillana uiñotīcai. Naie nairaimona comini facaina ñairaimana bu jaillana Moisés mīcorī jaie jaca lloñede.

<sup>15</sup> Cristo billa jira, Moisés mīcorī lloga rafue meiduana uiñotīcai. Melquisedec mīcorī illa isoi, comini facaina ñairaimana Cristo jaca iite.

<sup>16</sup> Moisés mīcorī lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide.

<sup>17</sup> Jusiñamui lloga uaimona iena uiñotīcai. David mīcorī naimiena jaie cuega:

Melquisedec mīcorī illa isoi, odi comini facaina ñairaimana jaca iitio cuega.

<sup>18</sup> Comini facaina ñairaimana jaillana Moisés mīcorī jaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci.

<sup>19</sup> Naiedo jaillamona, Jusiñamui jitailla isoi marebicaiñedīcai. Iedo birui jaiñedīcai. Jiaīe rafuemo birui ocuridīcai. Cristo finoca rafue muidona, Jusiñamuina cai nabaillamona, Jusiñamui diga birui ñairedīcai.

<sup>20</sup> Jusiñamui llua jira, Cristo cai facaina ñairaimana jaide.



21 Leví micorí jitoníaidí imaci jeiciamona, comini facaina ñairainina jaidimaci. Naga icaiño Jusiñamuidí naimacina ñairainina jaillana fetofede; iadedí ie lloga uaina jira, Cristo cai facaina ñairaimana jaide. David micorí Jusiñamui llua jaie cueba:

Cue jai llua jira, cue llua finoitícue.

Cristomo llotícue: “Comini facaina ñairaimana jaca iitío”  
cueba.

22 Jesús ñairaimana jaca illa jira, naimie jailla rafue Moisés micorí lloga rafue baífemo uaide.

23 Moisés micorí lloga rafue anamo ailluena ñairainidí itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena.

24 Naimie jaca illa jira, Cristo ñairaimana jaca iite. Naimie ifomo jaca buna meidoñeite.

25 Naimie jaca illa jira, comini facaina Jusiñamui diga jaca ñaicabite. Ie jira Cristodí nana Jusiñamui díbeimo iacadinona, naimaci jeacinomona, ua jaca jillotarede.

26 Caina canollena, naimie isoide nanoca ñairaimana jitaídicaí. Ie Moo isoi naimiedí mareuidimie. Naimie jeacino jaca iñede. Jeacino finouidino díbeimo naimie iñede. Jusiñamuidí ie ecimo naimiena itatate. Ie jira naimie caina canorede.

27 Jusiñamui fecaillena, naimaci jeacino facaina naimie iba oñellena, Moisés micorí llua isoi, nanoca ñairainidí nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiaí finodimaci. Cristo naimaci isoíñede. Naimie jitailla jira, comini jeacino facaina naimie fiodailla jira, comini facaina dacaiño fiodaite. Naimaci jeacino facaina naimie dane foidañeite.

28 Moisés micorí facai ñairainidí jeacinona finocana jaidimaci. Fiodaicana jiaí jaidimaci; iadedí jiaie rafue birui illa jira, ie uaido Jusiñamuidí ie Jitona ñairaimana jaillana jai fetode. Naimiedí jaca mareuidimie. Jeacino jaca finoñede.

## 8

### *Cristo muidona jiaie rafue birui ite*

1 Cristomo ite rafuena llotícue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite.

2 Jusiñamui illanomo naimie illanona, nainomo cai facaina birui ñaicabite. Moisés micorí facaise comini finoca jofomo Jusiñamui diga ñauidimaci; ia birui Jusiñamui finoca illanomo Cristo illamona, cai facaina ñaicabite.

3 Moisés micorí naga ñairaima jeacino facaina Jusiñamui faga toiniaina fecauillena llote. Cristodí comini jeacino facaina toiniaina fecañede; iadedí naimie jitailla jira, cai jeacino facaina naimie dama fiodaite.

4 Moisés micorí jaie llua isoi, benomo ite ñairaini faga toiniaina fecauilla jira, enruemo Cristo nia ia, ñairaimana naimie jainide.

5 Comini facaina Jusiñamui diga ñaillena, Moisés micorí facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñotícaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micorí jaie niacania, Jusiñamui naimiena llofuate: “Monamo itícue; ia cue jofu enruemo jiaí finoitomoi. Sinaí railla anedu navui o ia, ona llofuetícue. Ona cue llofuia isoi, cue jofona fino” llofuate.

6 Enruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedí Moisés micorí facaise

ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite.

<sup>7</sup> Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

<sup>8</sup> Moisés micori lloga uaina cai jaiagai ñnoñena jira, Jusiñamui jai llote: Naie cominimo jiaie rafuena ico jiairuido lloiticue.

<sup>9</sup> Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

<sup>10</sup> Naimacimo jiaie rafuena ico jiairuido lloiticue.

Iena naimaci uiñuamona, cuena raise ñnoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

<sup>11</sup> Nana naimaci cuena uiñoitimaci.

Ie jira naimacimo: “Cai Namana omoi ñno” buna niese lloñeite.

Jamai bue isoidinomona cuena ñnoitimaci.

Jamai bue isoiñedynomona cuena jiai ñnoitimaci.

<sup>12</sup> Naimacina cue duenaillamona, naimaci jeacinona jaca feittaiticue llote.

<sup>13</sup> Jiaie rafuena Jusiñamui jai llamona, Moisés micorimo lloga rafue jai saillana uiñoticaí. Moisés micori lloga rafue caimo jai duiñede. Cristomona jiaie rafuena birui jai cacadicaí.

## 9

*Hebreos comini Jusiñamui jofona enruemo jaiie nitimaci. Monamo Cristo birui illanona, Jusiñamui ecimo naimie ite*

<sup>1</sup> Jusiñamuidi Moisés micorimo diga rafuena jaiie llote. Naie rafuemonona cai fueollena, iena lloiticue. Naimiena sedajana llote. Naimie sedalle jofuana jiai llote.

<sup>2</sup> Jusiñamui llua isoi, hebreos comini naie jofona nitimaci. Jedaciede ñniroimona finoca jofona nitimaci. Naie jofu jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenico joide.

<sup>3</sup> Mena cuartos illena ñniroina sebiñoga. Naie baifemo iticuartodi Jusiñamui illano.

<sup>4</sup> Naie ñniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguida nainomo jiai ite. Jusiñamui uaido naie jiguida dacaiño llisilla jira, nainomo ite. Jusiñamui cuega nofici ibici jiai ite.

<sup>5</sup> Cajón emodo ibaillabici ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uiñua jira, iena omoimo are lloñeiticue.

<sup>6</sup> Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci.

<sup>7</sup> Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabici llerede. Dama naimie jeacino facaina diruena nano llerede.

Chivo fajanona, dane fo jaide, ie comini jeacino facaina diruena llerellena. Iena finuamona, cominina duenailamona, Jusiñamui naimaci jeacino facaina ibana oñede.

<sup>8</sup> Jusiñamui Joreño caina llofuiamona, biena birui uiñoticaí. Naie jofon nia ia, jamai comini fo jainina jira, Jusiñamui diga, cominidi atona nabairinidimaci.

<sup>9</sup> Bie rafuena birui nia finodimaci. Moisés micori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci.

<sup>10</sup> Jusiñamuina naimaci raise sedallena, Moisés micoridi diga guille fimaide. Jiruana jiai fimaide. Naimaci abiaina finollena jiai llote. Nie isoide guille, nie isoide jirole, niese naimaci abiai finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

<sup>11</sup> Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicaí. Cai comeciái raise jai finobide.

<sup>12</sup> Naimie fiodailla mei, dane jilluanona, Jusiñamui dine monamo naimie abide jaide. Toiniái diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate.

<sup>13</sup> Maraiñede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toiniái diailla mei, jobaide toiniái ie jusefo oni faianona, Jusiñamui jofomo jairedimaci. Nainomo naimiëna sedallena, fo jairedimaci. Iemona Jusiñamui naimacina duere finoñede.

<sup>14</sup> Toiniaina fañeno Jusiñamuina birui sedadicaí. Cristo fiodaiacana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiëna oretaja jira, naimie fiodaite. Cristodi Jusiñamui Jitona jira, naimiëmo jeacino iñena jira, cai jeacino facaina naimie fiodaillamona, cai comeciaina raise finobitade.

<sup>15</sup> Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina inotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiëna bu inoia, naimie jeacino facaina Jusiñamui birui ibana oñeite. Nana Jusiñamuina inotinodi naimie jai llua isoi, naimie diga jaca iitimaci.

<sup>16-18</sup> Jusiñamui jofon jaie finua mei, Moisés micorimo Jusiñamui llote: “Cue lloga rafuena raise finodomoí. Bie jofomo cuena sedallena, faga toiniái dirue diga bie jofona llerca. Nana naiemo ite rana jiai llerca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicaí.

<sup>19</sup> Ie cominimo nana naimiëmo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue cugabiaina llerede. Cominina jiai llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede.

20-21 Jusiñamui jofona dirue diga llerede. Nana nainomo ite rana jia llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”.

22 Moisés micorimo Jusiñamui llua isoi, raise finobillena, nana rana dirue diga llerede. Toñiaí fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

*Cristo fiodailla jira, Jusiñamui cai jeacino oni dotade*

23 Jusiñamuidi Moisés micorimo toñiaína fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toñiaí baifemo faia jira, monamo cai jaca illena, jeacino oni dotallena, Cristo fiodaite.

24 Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite.

25 Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toñiaína fajanona, ie diruena uite.

26 Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite.

27 Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai ñnoia, caina feiñoite. Naimiena ñnoñedinona duere finoite.

28 Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritinona monamo Jusiñamui illanomo uite.

## 10

1 Moisés micori facaise naie ñairainidi Jusiñamuimo fecallena, toñiaína fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñoticai. Jusiñamui cai jeacino oni dotajana uiñoticai. Jusiñamui jaca mareuidimiena uiñoticai. Jusiñamuina nabaillena janore uiñoticai. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicai.

2 Naie faga toñiaí Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toñiaína dane fecañedimaci; iadedi naimacimo jeacino jaca illa jira, faga toñiaína fecaidimaci.

3 Naiena fecauillamona, jeacino finocana naimaci nia jaillana uiñotimaci.

4 Toñiaí dirue illa jira, Jusiñamuidi comini jeacino jaca feitañede. Dama Jesús dirue illamona, Jusiñamuidi comini jeacino faitate.

5 Eniruemo jaie billanona, Jusiñamuimo iena Cristo llote:

Jeacino facaina toñiaí fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

6 Jeacino facaina ailluena faga toñiaína jai jitañedio.

7 Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriai iena jaie cuetimaci

llote.

<sup>8</sup> Cristo lluana dane ñaiticue. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitaiñede.

<sup>9</sup> Cristodi: “Jusiñamui jitailla rafuena finuaibiticue” llumona, Moisés micorimo llogacino jai saillana uiñoticaí. Jiaie rafue birui illana jiaí uiñoticaí.

<sup>10</sup> Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

<sup>11</sup> Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede;

<sup>12</sup> iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide.

<sup>13</sup> Nana naimie dibeimo iñedinona naimie emodofillemo naimie birui ocuride.

<sup>14</sup> Dacaiño Cristo fiodaillamona, naimiena cai inuamona, Jusiñamuimona jaca marebicaidicaí.

<sup>15</sup> Jusiñamui facaina lloraima micori ciegafuemona Jusiñamui Joreño caina iena uiñotade. Naimie facaina lloraima micori Jusiñamui lluana jaie iese cueda:

<sup>16</sup> Hebreos cominimo jiaie rafue ico jiairuido lloiticue.

Cue rafuena naimaci uiñuamona, cuena raise inoitimaci.

<sup>17</sup> Jiaí cueda:

Naimaci jeacino jaca feitaiticue.

<sup>18</sup> Cristo jai fiodailla jira, jeacinona Jusiñamui jai faitaja jira, faga toiniaina naimiemo fecajana dane jai jitaiñede.

### *Jusiñamuina cai nabailli*

<sup>19</sup> Cue amatiaí, Jesús fiodailla jira, Jusiñamuina jaciruiñeno birui nabairedicaí. Naimie cai Moo jai illanona, naimie diga meiruiñeno jaciruiñeno birui jiaí ñairedicaí.

<sup>20</sup> Moisés micori facaise nanoca ñairaima fo iticuartomo jaillena, sebiñoga iniroi oni dibeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicaí. Naimie diga birui atona nana ñairedicaí.

<sup>21</sup> Cristona jai cai inua jira, cai facaina nanoca ñairaimana naimie illa jira,

<sup>22</sup> cai mare comeciainona Jusiñamui diga birui cai ñailli. Naimiena eo cai inuamona, cai comeciai jeanillamona, naimie dibeimo cai bautizamona, naimiena mai cai nabailli.

<sup>23</sup> Cristo caina jilluana inoticaí Monamo naimie diga cai illemo ocuridicaí. Jusiñamui inogaimena jira, naie rafuena inocana mai cai jailli.

<sup>24</sup> Jiaie creyentiamo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli.

<sup>25</sup> Rollena omoimona damerie oficabiñedimaci. Naimaci isoi omoi iñeno; iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise inollena, conini omoi comeciai ocuiñocana mai omoi jai.

<sup>26</sup> Cristo finoca rafuena bu uiñua mei, iena naimie inoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite;



<sup>27</sup> iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie dibeimo iñedinona duere finoite.

<sup>28</sup> Moisés micori jaie cuega: “Jusiñamui llote: ‘Menamie naimiena daje isoi lloillamona, Moisés micori llogacinona jamaidimiena dueruiñeno meinega’”.

<sup>29</sup> Iese duere sefuillana jaie llote; iadedi birui ite lloga rafue bu jitaiñenia, bai duere sefuite. Jusiñamui Jitona bu jitaiñenia, Jusiñamui birui lloga uaina bu jitaiñenia, Cristo fodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fodaillamona, Jusiñamui naimiena ñnotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitaiñenia, Jusiñamui naimiena bai duere finoite.

<sup>30</sup> Ero, Jusiñamui jaie llote: “Maraiñedinona bu finoa, ibana oiticue. Cueno ñnoñedinona duere finoitice” llote.

<sup>31</sup> Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi iñellena, Jusiñamui lloga rafuena jamaiñeno.

<sup>32</sup> Creyentiaina nano omoi jaillamo dane comeciaina faca. Creyentiañedinomona eo duere sefuidomoi; iadedi Cristona ñnocana jaidomoi.

<sup>33</sup> Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci.

<sup>34</sup> Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedinomoi omoi rana bairodimaci; iadedi omoi comeciaina iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi.

<sup>35</sup> Jusiñamuimona iba ico omoi feiñua jira, Cristona nia ñnocana omoi jai.

<sup>36</sup> Jusiñamui jitaillacino omoi finollena, monamo jaca omoi illena, nie isoide ramo omoi jiria, Jusiñamuina nia ñnocana omoi jai.

<sup>37</sup> Jusiñamui biena llua jira, iese suite:

Cristo abido billirui iairei illa jira, naimiena ñnocana omoi jai.

<sup>38</sup> Naimie nia abido biñenia, omoina cue jai marebicaitaja jira, cuena ñnocana mai omoi jailli;

iadedi cuena jitaiñedinori iobiñedicue.

<sup>39</sup> Naie isoidino jillobiñeitimaci. Naimaci isoi iñedica. Jusiñamuina ñnocana cai jaillamona, jaca jillobidica. Ie jira naimiena ñnocana mai cai jailli.

## 11

### *Jusiñamuina ñnocana jaidica*

<sup>1</sup> Jusiñamuina cioiñedica; iadedi naimie illana ñnotica. Naimie lloga uaina ñnocana jaidica. Naimie lloga uai suillena ñnotica. Ie lloga uai suillemo ocuridica.

<sup>2</sup> Cai jaiagamona damierie iese ñnocana jailla jira, Jusiñamuimona marebicaidimaci.

<sup>3</sup> Jusiñamui finoca rana birui ciodica; iadedi jaie nano dofoconi jaca buena iñede. Naie facaiseconi dama ie uaido Jusiñamuidi enruena finode. Mona finode. Nana rana finode. Nana rana comuitate. Iena ñnotica.

<sup>4</sup> Cai jaiagai rafuena ja lloiticue, naiemona cai fueollena. Abel micori Jusiñamuina jaie ñnuamona, naimiemo faga toica llaudana fecade. Ie feiñuamona, Jusiñamui naimieri iobide. Jusiñamuina ie ama Caín raise ñnoñena jira, naimie fecaca rari iobiñede. Iena feiñoñede. Abel micori Jusiñamuina



ñnua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise ñnollena, naimiemona nia fueoiticaí.

<sup>5</sup> Enoc Jusiñamuina jaie ñnote. Naimiedi Jusiñamuina eo iobitate. Moisés micori ciegafuiaimona iena uiñoticaí. Jusiñamuina ñnuamona, Jusiñamuina eo iobitaja jira, naimie fiodaiñede; iadedi fiodaiñeno monamo Jusiñamui naimiena namiëna uite.

<sup>6</sup> Jusiñamuina cai ñnoñenia, naimiena iobitañedicaí. Jusiñamuina cai nabaia-cania, naimiena cai raise sedaacania, naimie illana ñnoticaí. Naimiena cai nabaiacania, cai jitai raillano, caina canollena ñnoiticaí.

<sup>7</sup> Noé micori Jusiñamuina jaie jiai ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui llua Noé micori ñnua jira, jillode. Noé micori Jusiñamui llua ñnote; iadedi naimie facaise ite comini ñnoñena jira, Jusiñamui ricailafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micori marebicaide.

<sup>8</sup> Abraham micori Jusiñamuina jaie jiai ñnote. Ie moo eniruemona naimie jaianillena Jusiñamui naimiemo llote. Are ite eniruemo naimie jaianillena llote. “Jiaie enirue omo iiticue” Jusiñamui llote. Abraham micori ñnote; iadedi ie jaillinona uiñoñede.

<sup>9</sup> Jusiñamui lloga eniruemo Jusiñamuina ñnocana jaide. Naie eniruemo ride; iadedi naie enirue naimiemo nia raise duiñede. Chivo itiraímona niga ñniroimona sebiñoga jofomo naimie jaca ite. Ie jito, Isaac micori, naie isoide jofomo jiai ite. Isaac micori jito, Jacob micori, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoimo iiticue” llote.

<sup>10</sup> Abraham micori mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

<sup>11</sup> Abraham micori aidi Sara micori. Jusiñamuina Sara micori ñnua jira, Jusiñamui naiñaiño abina mairitate. Naiñaiño eo jionaide; iadedi uruesite. Naiñaiño Jusiñamui llua isoi, naiñaiño uruesillana ñnote.

<sup>12</sup> Abraham micori jiai eo jionaide; iadedi jítona comuitate. Naimie jítomona naimie nairai eo jebuide. Facadonide ucuaí isoi jebuidimaci. Facadonide conillie isoi jebuidimaci. Ailluena ucuaí illa jira, naimaci facadonidicaí. Ailluena conillie illa jira, iena facadonidicaí. Ie isoide. Eo ailluena Abraham micori uruaí illa jira, naimacina facadonidicaí.

<sup>13</sup> Abraham micori, Isaac micori, Jacob micori Jusiñamuina ñnocana jaidimaci. Nana naimacimo Jusiñamui lloga uaina suiñedemo fiodaitimaci. Nia fiodaiñenia, Jusiñamui llogacina cacadimaci. Iena ñnotimaci. Ie jira bie eniruemo naimaci jaca illemo comecina facañedimaci;

<sup>14</sup> iadedi monamo jaca illemo comeciaina facadimaci.

<sup>15</sup> Naimaci jaie billa eniruemo comeciaina naimaci facadena, nainomo abido jaidimaci;

<sup>16</sup> iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

<sup>17-18</sup> Jusiñamuina Abraham micori ñnua jira, ie jítona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena ñnuana

raise uifollena, facacite. “O jítóna fano” Abraham micorimo llote. Abraham micori Jusiñamuina inuanona, ie jito faiacade.

<sup>19</sup> Ie jito fiódaillemona, Abraham micoridi Jusiñamui naimiena jilloitallena inote. Isaac micori fiódaiñede; iadedi fajamona jillode.

<sup>20</sup> Isaac micori Jusiñamuina jiai inote. Naimie fiódaiacania, Jusiñamui ie llogacino finollena inuamona, mena ie urue iaímaiamo ie uaina fecade. Llote: “Jusiñamui llua isoi, jebuicana jaitomíco”.

<sup>21</sup> Jacob micori Jusiñamuina jiai inote. Naimie fiódaiacania, Jusiñamuimo jianona, ie jiguidamo juita naidaidemo, José micori ie mena urue iaímaiamo marecinona llote. Jusiñamui ie llogacino finollena inuanona, llote: “Jusiñamui llua isoi, jebuicana jaitomíco. Naimie omícona canoite” llote.

<sup>22</sup> José micori fiódaiacania, ie comínimo llote: “Jusiñamui omína canuano, Egiptomona íco jairuido omói jaillena inotícue. Omói jaia, cue illaiciaina omói díga uifó. Canaán railla eniruemo omói ria, nainomo cue illaiciaina raino”.

<sup>23</sup> Moisés micori moo, ie ei díga Jusiñamuina jiai inotiaímaiai. Hebreos comini jebuiñellena, naie facaiseconi Egipto illaíma nana hebreos isaiaína meiniana llote. Iaímaiai jito jeicia mei, iaímaiai uruena daje amani fívuí reidiaímaiai. Jusiñamuina inuanona, naimie maresana eruaila jira, jaciruiñeno naimiena jofomo fo reide. Illaíma lluamona Jusiñamui naimiena jillotajana inotiaímaiai. Ie jira Faraón jisa anamo comuide. Faraón di Egipto nairai illaíma.

<sup>24</sup> Moisés micori Jusiñamuina inote. Naimie eimienamona, naimiedi Faraón jisa ie jítóna mamecíreacaiñede;

<sup>25</sup> iadedi naimiedi Jusiñamui naimiena ie comínina Egiptomona jillotajana inote. Jusiñamui naimie fetua jira, ie comini díbeimo naimie iacade. Ie comini díga duere sefuiacade. Jusiñamuina inoñedíno díga ie comeci jamai íobitaiacaiñede.

<sup>26</sup> Faraón jisa anamo naimie comuilla jira, naimiemo eo aillue rana ite; iadedi Egiptomona ite ebirede ramo ie comecina eo facañede. Jusiñamuimona íba naimie íco feiñoiacana jira, Jusiñamui Jito billemo ie comecina facajano, duere sefuide.

<sup>27</sup> Ie jira Egiptomona Moisés micori Faraóna jaciruiñeno oni jaide. Jusiñamui naimiena eenuana inote. Jusiñamuina íoiñede; iadedi Jusiñamui illana naimie inua jira, inocana jaide.

<sup>28</sup> Jusiñamui ie comínina jillotajana Moisés micori inua jira, Jusiñamui llua isoi, pascua railla rafuena finode. Ie comínimo toica llauda fallena llote. Ie dírué nase fuemo jidellena llote. Naie naío Jusiñamui jaíenici nana nano doforánina meinesiñellena, Jusiñamui lluana finodímaci.

<sup>29</sup> Egiptomona naimaci billa mei, jiaírede railla monaillai ruica díne jaillena, Jusiñamuina inotímaci. Jusiñamui Moisés micorimo lluana naimaci inuamona, jinui motodo saferedífo do ruica jaidímaci; iadedi Egipto soldaduai daje ísoi ruica jaiacadímacimo, nana corobaitímaci.

<sup>30</sup> Canaán railla eniruemo hebreos comini rilla mei, Jericó railla nairai díne ridímaci. Jusiñamuina inuanona, Jusiñamui llua isoi finodímaci. Siete dígarui Jericó ecímo naimaci macarilla mei, Jusiñamui llua isoi, naie llaígafo ana bíjide. Naie nairaina emodofidímaci.

<sup>31</sup> Naie facaiseconi Jericómo Rahab micori fiódaiñede. Naiñaiñodi calirediñaiño. Nana Jericó comini Jusiñamuina inoñena jira, fiódaitímaci; iadedi jofue íñenanomo, nia Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina inote. Mena hebreos comini

iaimaina naiñaiño feiñua jira, Jericó nairaina emodofilla facaise naiñaiño na meineñedimaci.

<sup>32</sup> Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefte micori, David micori, Samuel micori Jusiñamui facaina jaie llorainina jiai eo cueñeticue.

<sup>33</sup> Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaïma isoi jiaïno naimaci cominina raise marena sedadimaci. Jusiñamui llogacino suillana cidimaci. Leones naimacina riïacanamona damierie jillode.

<sup>34</sup> Iramo usillamona damierie jillodimaci. Lloebi diga meiniamona damierie jillodimaci. Jiaïno jamai bue isoidino; iadedi jamai bue isoiñedinona jaidimaci. Jobaïme raise finuamona, jiaïno imaci bacuai soldaduaina judaisitade.

<sup>35</sup> Dañaiñorie riñoniaïmona uruai fiodailla mei, fiodaillamona Jusiñamui damieriena jillotate. Illaïcominimona jiaïno duere fiodaitimaci. Jusiñamuina faïnonocaiacaiñena jira, naimacina meinetimaci. Naimaci fiodaiacania, monamo Jusiñamui diga ico jaca illena naimaci ñnua jira, Jusiñamuina faïnonocaiñeno fiodaitimaci.

<sup>36</sup> Jiaïno duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damieriena maïanona, cárcelmo jonetimaci.

<sup>37</sup> Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaïno buenidimaci. Naimaci iniroi jamai igoï ie. Dueredimaci. Naimaci iniroi raise iñede. Aïme guisoidimaci. Jiaïe cominimona duere sefuisoidimaci.

<sup>38</sup> Jiaïe cominimona jamai bue isoidimaci; iadedi Jusiñamuimona jamai bue isoiñedinomaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruemo jamai bita inuïuidimaci.

<sup>39</sup> Jusiñamuina ñnocana jaidimaci. Naimaci finoca rafuemona Jusiñamui comini naimaci illana uiñoticaï. Jusiñamuina ñnotimaci; iadedi nana naimacimo Jusiñamui lloga rafue naimaci illa facaise suiñede.

<sup>40</sup> Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaïllena Cristona jai orede. Ie cominina birui cai jiai jaïllena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

## 12

### *Jesús finoca rafuemo cai comeciaina cai facalli*

<sup>1</sup> Cai jaiagai Jusiñamuina ñnocana jaïllana uiñoticaï. Ie jira caïdi naimaci isoi, Jusiñamuina ñnocana birui mai cai jaïlli. Marena riïre cai aïsiacania, aïlluena rana abiñedicaï. Ie isoïde. Jeacïnona cai finoñellena, naimiena raise cai ñnollena, jeacïno finuacïnona mai cai faïnonocaiïlli. Nie isoïde rafue caïmo ia, Jusiñamui jitaïllacïnona finocana mai duere cai jaïlli.

<sup>2</sup> Jesús finoca rafuemo cai comeciaina cai facalli. Cai jeacïno facaina naimie fiodaïlla jira, cai comeciaina naimie ocuiñotajanona, Jesúna ñnoticaï. Cruzmo maraïñedinie isoi fiodaïte. Fiodaïllamona jilluana naimie uiñuamona, naimie fiodaïte. Ie Moo ecïmo dane illena naimie uiñuamona, iocïre fiodaïte. Illaïmana naimie illamona, ie Moo ecïmo birui ite. Jesúmo cai comeciaina facajamona, caïmare mai cai jaïlli.

<sup>3</sup> Jusiñamui dibeimo iñedinomona Jesús eo duere sefuide. Ie isoi cai duere sefuia, Jesúmo cai comeciaina facajamona, cai comeciaina ocuiñotacana mai cai jailli.

<sup>4</sup> Jusiñamui dibeimo iñedinomona duere sefuillamona, Jesús isoi duere nia sefuñedomoi. Omoina nia meineñedimaci.

<sup>5</sup> Duere omoi sefuia, bie jaie cuegafuiaina feitaño. Naimie cominina omoi illamona, Jusiñamui llote:

Cue uruiaí, omoína cue duere finoia, cuena nia ñno.

Duere sefuillamona, cuena fañonocaiño.

<sup>6</sup> Omoína cue isiruillamona, omoína duere finodicue.

Cue dibeimo omoína raise itatallena, omoína duere finodicue.

Nana cue cominina cue llofuecabillamona, naimacina duere finodicue llote.

<sup>7</sup> Naimie jitaillacinona cai finollena, caina duere finode. Ie uruiaína cai illamona, caina duere finode. Ero, nana ie uruiaína isiruillamona, naimaci ie jitaillacinona finollena, naga eniruemo ite moo ie uruiaína duere finocabide. Ie isoide Jusiñamui. Ie jitaillacinona cai finollena, caina duere finocabide.

<sup>8</sup> Caina ñnotallena, Jusiñamui caina duere finoñenia, naimie cominiñedicai. Naimiedi nana ie cominina duere finocabide.

<sup>9</sup> Cai eniruemo ite cai mootiaí caina duere finoia, naimaci uaina ñnoticai. Ie isoide. Cai Moo Jusiñamui caina isiruillamona, caina duere finoia, naimie uaina cai ñnuva. Naimiena cai ñnuamona, monamo naimie diga ico jaca iiticaí.

<sup>10</sup> Naimaci comeciái llua isoi, cai eniruemo ite mootiaí dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataiacade.

<sup>11</sup> Jusiñamui mona duere cai sefuia, iena gaiñedicai. Iena jitañedicai; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

### *Jusiñamui rafuena cai cacaia, iena cai aruiruiña*

<sup>12</sup> Nie isoide ramo caimo jiria: “Jusiñamui caina nibai canoñede” raiticaí. Iemona naimiena fañonocaiacadicai; ia iemo cai comeciaina cai facañena. Jusiñamui rafuena cai sefuirua, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise ñnuamona, cai comeciái ocuiñocana mai cai jailli.

<sup>13</sup> Jiaie rafuedo cai jaiña; iadedi Cristo rafuedo raise ñnocana mai cai jailli. Iese cai jaia, Cristo rafuedo naimaci jiaí raise jaillena, jiaie creyentiaina canoíticaí.

<sup>14</sup> Nana comini diga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite.

<sup>15</sup> Jusiñamui caina duenailamona, nana cominina jillotaiacade. Omoimona buna Jusiñamui duenailacinona fañonocailana jitañedicue. Omoimo iese suia, iemona conini gaiñenacino comuirede. Iena jitañedicue. Omoi comeciái daje isoi lloillana jitaidicue.

<sup>16</sup> Jearede rafuena jaca finoño. Esaú micori jaie finoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiña facaise dacaiño Esaú aimetailla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade.

<sup>17</sup> Ie amamo ie uaina fecaja mei, ie comeci uai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede;

iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

<sup>18</sup> Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude.

<sup>19-20</sup> Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toini ai nainomo macaria, nofici diga fairinuamona, naimiena omoi meine” llote. Jusiñamui llwana cacajamona, eo jaciruitimaci. Moisés micorimo: “Jusiñamui caimo nia llwana jai jitaiñedicaí” llotimaci.

<sup>21</sup> Eo jacirede ra illa jira, nana comini diga Moisés jiai jaciruite.

<sup>22</sup> Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicaí. Monamo Jusiñamui ite; iadedi birui naimiena atona nabairedicaí. Cai fodaia, naimie dne jaiticaí, naimie diga jaca cai illena. Nainomo ie jaienisaí naimiemo iobillacinona fecacabidimaci.

<sup>23</sup> Ailluena comini diga, Cristona birui inoticaí. Nana caina Jusiñamui fetuanona, cai mameciaí monamo ite rabenicomo jai cuega. Jusiñamui nana comini comeciaina uiñote. Naimiena inotinomona ailluena jai fioidaitimaci; ia naimie ecimo naimaci joreñuai jiai jai itimaci.

<sup>24</sup> Jesús fioidailla jira, Jusiñamuina nabairedicaí. Naimie fioidailla jira, caimo jiaie rafue birui ite. Naie rafuena cai inuamona, cai comeciái jai marena iticaí. Jiai cai jeacinona oni dotade. Iena jiai jai feitade. Abel micori jaie fioidaia, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

<sup>25</sup> Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaíno iena jitaiñedimaci. Iena inoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baífemo faite. Jusiñamui duere finollicinomona buna jillobinide. Cai duere sefuiñellena, Cristo rafuena cai inua.

<sup>26</sup> Moisés micorimo ie rafue llua facaise, Jusiñamui naie eniruena niraídotade. Jusiñamui jairuido jiai llote: “Eniruena dane niraídotaiticue. Ucuaina, fivuina, jitoma diga, jiai niraídotaiticue” llote.

<sup>27</sup> Naimie lloga uaimona enirue fuillena uiñoticaí. Monamo ite ra fuillena jiai uiñoticaí. Nana naie rana naimie fuidoite; iadedi naimiena cai inua jira, naimie caina fuidoñeite. Ico cai illinona jai finode. Iena naimie fuidoñeite.

<sup>28</sup> Illaimana naimie illamona, naimie caina sedaite. Ie jira naimiemo iobilacinona cai fecaja. Naimiena cai inuamona, naimiena cai raise sedajamona, naimiena cai iobitaja.

<sup>29</sup> Naimiena inoñedinona Jusiñamui eo duere finolle jira, naimiena jaciruillanona naimiena cai inua.

## 13

### *Jusiñamuina cai iobitaja*

<sup>1</sup> Dani conini jiaie creyentiaína isiruicana omoi jai.



<sup>2</sup> Abraham micorí Jusiñamui jaienisaína uifioñeno jaie nafuete. Jiaie il-lanomona jiaie creyentiaí bia, naimaci inillino iñena jira, naimacina nafue. Jusiñamuimona ibana feiñoitomoí.

<sup>3</sup> Cristo rafue muidona damierie creyentiaí cárcelmo itimaci. Nainomo omoí jiaí itomoidena, naimacina feitaño. Naimacina isiruillamona cano. Damierie creyentiaí duere sefua, naimacina jiaí cano. Jiaíruido naimaci isoi níbaí duere sefuitomoí.

<sup>4</sup> Airedimie jiaie riño diga illemo ie comecina facañena. Inirediñaiño jiaie iima diga illemo ie comecina facañena. Ie aiñede riño diga bu ia, ie iniñede iima diga bu ia, marañede. Iena finoño. Iena bu finoa, ie jeacino Jusiñamuimo lloñenia, Jusiñamui naimiēna duere finoite. Naiñaiñoña jiaí duere finoite.

<sup>5</sup> Ailluena ucube ollena, iemo niciño. Omoimo ite ra diga caimare i. Iena Jusiñamui facaina lloñena jaie cuela: “Jusiñamui llote: ‘Omoína jaca canoíticue. Omoína jaca fañonocaiñeiticue’ llote”.

<sup>6</sup> Naiena cai uifiamona, cai comeciaina ocuiñoiticaí. Jaie cuela fue isoi lloíticaí:

Cai Nama caina canoite.

Ie jira cai comeciái jarire finoñeiticaí.

Buena jaciruiñeiticaí.

Jiaimie buena caina jaciruitanide.

<sup>7</sup> Cristo rafuena omoimo navui lloganomo omoí comeciaina faca. Naimacimona Cristo rafuena nano cacadomoí. Cristo díbeimo naimaci illamo omoí comeciaina facajanona, naimaci isoi Jesucristona ñnocana mai omoí jai.

<sup>8</sup> Naimie jaca ñnogamiēna uifioíticaí. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiēna cai ñnua.

<sup>9</sup> Cristo ieñede rafuedo jaiño. Diga jiaie llofuiacino ite; iadedi iedo jaiño. Jusiñamui caina canuamona, cai comeciaina birui ocuiñoñocana jaiticaí. Moisés micorimo lloga rafuedo navui jaidicaí. Diga ra fimaide; iadedi naiedo cai jaillamona, cai comeciái raise illena, buena oñedicaí.

<sup>10</sup> Cruzmo Cristo fodaillamona, cai jeacino facaina fodaite. Moisés micorí lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci.

<sup>11</sup> Moisés rafue llua isoi, nanoca ñairaima toñiaína faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide.

<sup>12</sup> Ie isoide. Cristona comini jitaiñena jira, ie comini nairaimona jino uillanona, naimiēna meinetimaci. Nainomo jeacino facaina fodaite, comini comeciaina raise finollena.

<sup>13</sup> Ie jira Moisés micorí lloga rafuena cai fañonocaida, dani Jesucristo rafuedo cai jailli. Naimiēna jeare finodimaci. Caina jeare finoa, naimiēna jaca ñnocana cai jailli.

<sup>14</sup> Beno jaca cai illemo ocuirñedicaí; iadedi monamo Jusiñamui diga cai jaca illemo ocuiridicaí.

<sup>15</sup> Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uifiamona, naimiēmo iobillacinona jaca cai fecaja.

<sup>16</sup> Marecinona finocana mai cai jailli. Jiaie creyente jitaí raillano, omoí raruaímona naimiēna omoí cano. Iena omoí finoa, Jusiñamui omoíri iobite.

<sup>17</sup> Omoí llofueraíni uaina ñno. Naimaci anamo raise omoí i. Cristo díbeimo omoína raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoí ñnoia, Cristo díbeimo caimare maijítimaci. Naimaci uaina omoí ñnoñenia, sunaitimaci. Sunailla jira, naimaci llofuiacinomona buena oñeitomoí.



<sup>18</sup> Jusiñamui diga omoi ñaia, cai facaina omoi jii. Jusiñamuimona cai comeciai marena illana uiñoticaí. Naimie jitailla isoi, mare rafuena finocana jaia-cadicaí.

<sup>19</sup> Omoi dine cue raire illena cue facaina Jusiñamuimo eo omoi jii.

*Naimaci marena jaca illana jitaide*

<sup>20</sup> Jusiñamui conini omoi comeciaina uri itatajana jitaidecue. Cai Nama Jesús fiodailla mei, Jusiñamui naimiena jai jillotate. Jusiñamui lla isoi, Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede.

<sup>21</sup> Jusiñamui ie jitaillacino omoi finuana canoite. Cristona omoi ñnuana canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidecue.

<sup>22</sup> Cue amatiaí, bie cartana caimare feiño. Eo are rafuena cueñedice. Janore cueticue.

<sup>23</sup> Cai ama Timoteo cárcelmona jai jino bite. Cue dine naimie raire bia, omoi dine naimiena atitice.

<sup>24</sup> Nana omoi llofuerañimo cue uaina oredice. Ua nana creyentiaimo cue uaina oredice. Italamona bitino imaci uaina jiaí oredimaci.

<sup>25</sup> Jusiñamui omoina jaca duenailana omoi uiñuana jitaidecue. Mai. Macaibaite.

## SANTIAGO ORETAGA RABE

### *Uaiduacino*

<sup>1</sup> Caímaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

### *Ramo omoi jiriadedi, omoi comeciaina mairita*

<sup>2</sup> Amatiai, diga ie ramo omoi jiriadedi, eo iobilla.

<sup>3</sup> Ramo omoi jiriadedi, Jusiñamui uaina raise omoi ñnuana uiñoitomoi. Iemona omoi comeciai mairillemona, ñnocana omoi jaitomoi. Biena omoi uiñua jira, iobilla.

<sup>4</sup> Mairicana omoi comeciai jaia, omoi comeciadi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo ñnoitomoi;

<sup>5</sup> iadedi omoimo rafue ia, ñese nibaiana omoi uiñoñenia, Jusiñamuimo jica. Ie mei omoimo naimiedi abí uiñoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite;

<sup>6</sup> iadedi omoi jicaia, uai ñnuanona jica. Omoi comeciai ñnoñenia, jicañeno. Comecina ñnoñedimiedi aifi betaja jorai isoide. Naimie comeci naganomo ite.

<sup>7</sup> Naimiedi Jusiñamuimona ra feiñollemo tainona sedaite.

<sup>8</sup> Naie isoidimiedi nana naimie illa ñnori ie comeci naganomo iite.

<sup>9</sup> Naimie ramo jiriadedi, Jusiñamuimona naimie jamai bue isoñena jira, duerede creyente iobilla;

<sup>10</sup> iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ñco safe-naite.

<sup>11</sup> Jitoma a ia, eo ecasillamona, safia safenaite. Llríde. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

### *Nana mare rafue Jusiñamuimona feiñoticaí*

<sup>12</sup> Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuen a isiruitinona cue illanomo jaca itataiticue”.

<sup>13</sup> O ramo bu faia, lloñeno: “Jusiñamuidi cuena ramo faite”. Maraiñede rafue ñibeimo naimie iñena jira, naimiedi buna ramo jaca fañede.

<sup>14</sup> Cai comecimo naie jitaillacino illa jira, ramo faia uai ñnoticaí. Naie facaiseconi caimona ebirena jirari, iena finoacadicaí.

<sup>15</sup> Cai jitailla jira, jeacinona finodicaí. Jeacinona finocabillanona jaillano, faifiticaí.

<sup>16</sup> Ero, cue isiruiga amatiai, Jusiñamui omoína ramo faitatañena jira, naimiemona da mare rafue billa jira, ñani omoi abina jifueñeno.

<sup>17</sup> Nana mare rafue cai Moomona feiñoticaí. Naimiedi monamo ite lligaiñoraniana jaie finode. Naie radi nagarui daje isoi lligaiñoñede; iadedi naimie daje isoñede. Naimie comeci jacanano ñanoconi nagarui ite.

<sup>18</sup> Naimie jitailla jira, ie uai lluno, naimie caína ie uruiana itatate. Ie uruaimona nano doforanidicaí.

*¿Nie isoide rafuena finoacadica?*

<sup>19</sup> Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriñeno.

<sup>20</sup> Icirillamona, Jusiñamuidi cai marena jitailla isoi, buna jaca marebi-caiñede.

<sup>21</sup> Ie jira nana maraiñedicinona oni fañonocai. Jusiñamui uai omoi comecimo fecuise abi iedoñeno nagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede.

<sup>22</sup> Cacajamona iena ñnocana jai. Cacajanona iena omoi ñnoñenia, dani abina jifuetomoi.

<sup>23</sup> Bu naie uaina cacajamona ñnoñenia, naimiedi acaranimu eruaidimie isoide.

<sup>24</sup> Ie uiecona eruaide. Naimie jailla meinoconi, ie eruailla ie uiecona jai raire feitate.

<sup>25</sup> Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena ñnua jira, naimie comeci caimare ite.

<sup>26</sup> “Jusiñamuina sedadique” raillanona ie comecina facadimiedi jeare ñaia, maraiñeno ñaia, dama naimie abina jifuate. Jusiñamuina taino sedade.

<sup>27</sup> Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui dibeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

## 2

*Nana cominimo comeciaina lloitaicadica*

<sup>1</sup> Amatiai, cai Nama Jesucristo uai eo ebirede. Naimiena omoi ñnua jira, naimacimo daje isoi comeciaino lloillamona, nana cominina daje isoi nafue.

<sup>2</sup> Ero, omoi roracomo mena ñima bia, ¿nie ñimana nafueitomoi? Dame ucuberedimie. Naimiemo oro ie anillos ite. Eo mare ñiroina jítade.

<sup>3</sup> Ucuberedimie llotomoi: “Bai bene bancomo rai”. Dueredimie llotomoi: “Bai bene naidai. Raiacania, eniruemo rai”.

<sup>4</sup> Iese omoi lloia, damiena jai raise nafuetomoi; ia damiena jai raise nafueñedomoi. Iaimai ñiroimo omoi eruaillamona, nafuetomoi. Mare rafuemo comeciaina facañedomoi.

<sup>5</sup> Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenedimaci, naimiena naimaci eo ñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”.

<sup>6</sup> Ero, Jusiñamui dueredinona nafuete; iadedi dueredimiena jai nafueñedomoi. Dueredinomona duere sefuiñedomoi; ia dueredimiena jai duere finodomo. Ucuberedinomona duere sefuicabidomoi; ia ucuberedimiena raise nafuetomoi. Maijítallena, juez dine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci.

<sup>7</sup> Cristomo omoi jainaiailamona, ucuberedino naimiena jeare jiai ñaitimaci.

<sup>8</sup> “Cristo llogacino finodica” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofocimo itinona isirui, dama o abina o isiruilla isoi”. Iese omoi ia, cuemona mare;

<sup>9</sup> iadedi nana cominina daje isoi omoi nafueñenia, jeacinona jai finodomoí. Jai Jusiñamui llogacinona ñnoñedomoí. Jusiñamui llogacinomona jai maraiñeno itomoí.

<sup>10</sup> Nana Jusiñamui llogacinuaimona daje llogacinona omoi ñnoñenia, Jusiñamuimona nana naie llogacinuaina jai ñnoñedomoí.

<sup>11</sup> Jusiñamui caimo jai llote: “O aiñede riño diga iñeno. O iniñede iima diga iñeno”. Jiai llote: “Jiaimiena meineñeno”. O aiñede riño diga iñedio; iadedi jiaimiena o meineia, nana Jusiñamui llogacinuai jai ñnoñedio.

<sup>12</sup> Jiairuido Jusiñamuidi juez isoi omoimo lloite. Omoi comeciaino iticino diese omoimo lloite. Ie jira marena ñaino. Marena i.

<sup>13</sup> Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

*Jusiñamuina cai ñnuamona, diga rafuena cai finua*

<sup>14</sup> Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite.

<sup>15</sup> Jiaie rafuedo iena lloiticue. Omoimona daje creyente iniroinia, guille iñenia,

<sup>16</sup> naie creyente omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoí?

<sup>17</sup> Ero, Jusiñamui omoi ñnuamona mare rafuena omoi finoñenia, omoi ñnoracino ieñede.

<sup>18</sup> Omoimona damie cuemo nibai lloite: “Jusiñamuina raise ñnoticue”. Jiaimie cuemo nibai lloite: “Mare rafuena finocabidicue”. Iaimaiaino lloiticue: “Jusiñamuina cai raise ñnoia, mare rafuena finocabiticai. Mare rafuena cai finuamona, Jusiñamuina cai raise ñnuana uiñoiticai”.

<sup>19</sup> Dajede Jusiñamuidi illana ñnotio. Iena o ñnuano, mare; iadedi jananiai iena jiai ñnotimaci. Ie jira Jusiñamuina jaciruitimaci.

<sup>20</sup> “Jusiñamuina raise ñnoticue” nibai nia raitio. Abina raise nia uiñoñedio. Mare rafue o jiai finoñenia, dama abi o ñnoracinodi ieñede.

<sup>21</sup> ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori.

<sup>22</sup> Abraham micori ñnote. Mare rafuena jiai finode. Mare rafue naimie finuamona, naimie jai raise ñnote.

<sup>23</sup> Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”.

<sup>24</sup> Abraham micori rafuemono daje rafuena uiñoticaí. Dama ie ñnoracino diga jaca bu marebicaiñede; iadedi Jusiñamuina ñnuano, mare rafuena finuano, marebicaide.

<sup>25</sup> Jiaie rafuedo iena lloiticue. Jaiie Rahab railañaiño ite. Naiñaiño calirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraímaiaina feiñote. Naiñaiño nairaidi iaímaiaina meinellena jenodimaci. Meineñellena, naiñaiño iaímaiaina reide. Ie mei iaímaiaina bainino oretate. Mare rafuena naiñaiño finuamona, Jusiñamuimona naiñaiño marebicaide.

<sup>26</sup> Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

## 3

*Cai fuiaimona jeacinodi comuide*

<sup>1</sup> Amatiai, omoimona diga comini creyentiaina llofuerañina jaiñeno. Jusiñamuidi juez isoi ico lloite. Llofuerañi jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jiaño baifemo duere finoite. Iese riire naimacimo llwana jaciruillano, llofuerañina ailluena jaiñeno.

<sup>2</sup> Nana caidi diga maraiñede rafuena finocabidicai. Maraiñedinona bu ñaiñenia, jai marebicaide. Naimie nana ie comeci namarede.

<sup>3</sup> Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai.

<sup>4</sup> Riire aifi aillue botena ñine uiacade; iadedi eo janorede quilla diga, ie jailla ñine piloto botena dataoicaide.

<sup>5</sup> Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate.

<sup>6</sup> Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille ñinori caina jearedicinona finotaiacade.

<sup>7</sup> Nana rana toiredicai: ocainai, sillini, ofomai, eniruemo bicaidino, llicai. Nana toiredicai;

<sup>8</sup> iadedi jaca bu ie fuena namatanide. Cai fuiai jaca eo maraiñede. Iemona eo maraiñede rafue icabite.

<sup>9</sup> Cai fuiai diga cai Namamo, ua cai Moomo, marecinona lloticai. Caina naimie finuamona Jusiñamuina eruidicai; iadedi cai fuiai diga naimiena jeare jiai ñaiticai.

<sup>10</sup> Cai fuedi dajede; iade marecinona ñaiticai. Maraiñedinona jiai ñaiticai. Amatiai, iese cai ñaiñena.

<sup>11</sup> Ero, daje pozomona mare jinui, erirede jinui diga, oñedicai.

<sup>12</sup> Amatiai, higuera railla riararamona aceitunadi comuiñede. Uvas railla riararamona higo railla riaradi jiai comuiñede. Cuerede jinui mona mare jinui na oñedicai. Cai fuiaimona jeacino comuiñellena, cai fuiaina cai namataja.

*Ua abi uiñoracino*

<sup>13</sup> Omoimona, ¿bu ua abi uiñote? Naimie ua abi uiñoia, naimie marena illa mona, iena uiñoitomo. Abi iedoño mare rafuena naimie finoia, naimiemo ua abi uiñoracino illana uiñoitomo;

<sup>14</sup> iadedi naimie abi eo uradoia, dama naimiemo ite ramo comeci facaia, naimie abi uiñoracino diga naimie abina iedoña. Jai tainona llote. Naimie llua isoi iñede.

<sup>15</sup> Naie isoide uiñoracinodi Jusiñamuimona iñede. Bie enirue ie. Comini ie. Taife ie.

<sup>16</sup> Comini abina uradoia, ñani naimacimo ite ramo comeci facaia, comini uri iñedimaci. Diga maraiñede rafue naimacimo ite.

<sup>17</sup> Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede.

<sup>18</sup> Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

## 4

*¿Bue ñellena uri iñedicai?*

<sup>1</sup> ¿Bue ñellena fuiriruidomoi? ¿Bue ñellena iciriruidomoi? Omoi comeciáimo maraiñedicino illa muidona. Omoi comeciáimo maraiño jitaillacino illa muidona. Naie jitaillacino omoi comeciáimo namataacana muidona.

<sup>2</sup> Rana jitaidomoi. Iena omoi feiñoñena jira, naimaci rana fillena, comena meinetomoi. Eo uradoidomoi. Omoi jitaile rana feiñoñena jira, fuiridomoi. Omoi jitaile rana Jusiñamuimo omoi jicañena jira, iena feiñoñedomoi.

<sup>3</sup> Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñollena, omoi comeci jaisillena, jicadomoi.

<sup>4</sup> Jusiñamuina birui raise jitañedomoi; ia naimie dibeimo iñedinona jai jitaidomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Ñiese iena uiñoñedomoi? Bu naie rafuena isiruiacania, Jusiñamui dibeimo jai iacaiñede.

<sup>5</sup> Jusiñamui cuetatagafuiaina raise facañedomoi. Naiedi caimo llote: “Jusiñamui omoimo jai fecaca Joreñodi omoi comecina eo raise namataacade”.

<sup>6</sup> Caina eo duenaila jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuia iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie dibeimo iacaiñedimiena ñaite. Naimie dibeimo iacadimiena canuana jai ñaite.

<sup>7</sup> Ie jira Jusiñamui anamo omoi i. Naimiena raise omoi ñno. Taife uaina jitañenanona, naimie uaina oni caiño. Ie mei omoimona naimie oni jaite.

<sup>8</sup> Jusiñamuina nabaillena, naimie dine iaie omoi i. Ie mei naimie omoi dine iaireno iite. Jeacinona finoraini, omoi comeciá iuaillaina meido. Naganomo omoi comeciáina facañeno. Omoi comeciáina marena fino.

<sup>9</sup> Maraiñede rafue omoi jai finuamona, omoi sunai. Jaisiño, ie ia omoi jeacino facaina omoi mai ee. Caicare iño; ia omoi jeacino facaina omoi mai sunai.

<sup>10</sup> Jusiñamui dibeimo abina iedoño omoi i. Ie mei naimie omoi comeciáina iobitaite.

### *Jiaino jinafomo jeare ñaiño*

<sup>11</sup> Amatai, maraiñede rafuena naimaci finoiadedi, jiaino jinafomo jeare ñaiño. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñnoñede. Jusiñamui uaina naimie ñnoñenamona, Jusiñamui uaina jai jamaiñoacade.

<sup>12</sup> Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoño.

### *Ico are caimo suite rafuena uiñoñedicai*

<sup>13</sup> Jiaie rafuena lloiacadicue. Nibai llotomoi: “Birui jiaie nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iiticai”.

<sup>14</sup> Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticai. Dallu bene iticai. Ie mei jai iñedicai.

<sup>15</sup> Ie muidona omoi llua: “Cai Nama jitaia, nia iiticai. Cai Nama jitaia, nie isoide rafuena finoiticai”.

<sup>16</sup> Iena lloñedomoi; iadedi dani omoi comeciáina facajano llotomoi. Iemona eo abina iedotomoi. Abina ieduadi maraiñede.

<sup>17</sup> Mare rafuena finuana uiñotimiedi mare rafuena finoñenia, jeacino jai finode.



## 5

*Ucuberedinomo llucino*

<sup>1</sup>Ucuberedino, daje rafuena omoimo jiai lloiacadicue. Omoimo ramo jirite. Ja eo duere sefuitomoi. Ie jira cui-ri-cui ee.

<sup>2</sup>Omoi raruiai ja sabite. Omoi mare iniroi ja sabite, ibuisai guilla jira.

<sup>3</sup>Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi.

<sup>4</sup>Ero, ailluena ucube irairuillai iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade.

<sup>5</sup>Omoi illa dinori ailluena raruiai omoimo ite. Nana omoi comeciai jitailla rafuena finodomo. Omoi comeci jitailla isoi itomoi. Naie iba ollirui jai ride.

<sup>6</sup>Maredinona duere finodomo. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

*Cai Nama billemo fecuise omoi ocuiri*

<sup>7</sup>Amatai, cai Nama billemo fecuise omoi ocuiri. Cominidi imaci illimona riaru feiñuana sedadimaci. Noci deillemo fecuise ocuridimaci. Ie mei riaru llisillana otimaci.

<sup>8</sup>Ie isoi cai Nama billemo fecuise ocuiri. Omoi comeciai rucaicueriñeno, cai Nama bille iaire illa jira.

<sup>9</sup>Duere omoi sefuia, Jusiñamui juez isoi omoimo lloi raillano, "Jiaie creyente muidona duere sefuidicue" raiñeno. Jusiñamui omoi illana raise uiñote.

<sup>10</sup>Amatai, Jusiñamuina lloraini micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci.

<sup>11</sup>Naimaci Jusiñamuina fañonocaiñena jira: "Naimaci comeciadi caimare itimaci" raiticai. Job micorina jiai comeciticai. Naimie jaie ite. Naimie eeñeno duere sefuide. Duere sefuide; ia Jusiñamuina fañonocaiñede. Ie mei ja muidomo nie isoide cai Nama naimiena finuana uiñotica. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

<sup>12</sup>Cue amatai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. "Iena cai llinoia, cai lloga uaina cai finoñenia, Jusiñamui caina duere finoite" raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llumona, uanaicinona jaca llono. Iese llono, Jusiñamui omoina duere fino raillano.

<sup>13</sup>Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua.

<sup>14</sup>Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena.

<sup>15</sup>Finuano jia, jilloite. Cai Nama naimiena jillotaite. Naimie finoca jeacinona oni jiai dotajite.

<sup>16</sup>Ie jira coninimo omoi marañedicinona llono. Ie mei Jusiñamuimo coniniaina omoi jii, omoi duicomona omoi jilloillena. Jusiñamuimo marebi-caidimie jia, diga rafuena finorede.

<sup>17</sup>Elíana comecitomoi. Jaie ite; ia naimiedi cai isoide. Jusiñamuimo jide, noci deiñellena. Ie mei daje amani fiemona abimo atomonado jaca deiñede.

<sup>18</sup> Ie mei dane j#de, noci deillena. Ie jira noci deide. Ie mei riara dane sicode.

<sup>19</sup> Amatiai, omoimona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare.

<sup>20</sup> Iena bu finoia, naimiena ie uaiñedinomona itatate. Fai fillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.

## PEDRO NANO ORETAGA RABE

### *Tuude cominimo Pedrodi cartana cuete*

<sup>1</sup> ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue.

<sup>2</sup> Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

### *Jesucristo diga jaca cai illemo ocuridicai*

<sup>3</sup> Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñnocana cai jaillamo jiaie ocuridicai.

<sup>4</sup> Omoi ocurillafuedi monamo ite. Faiñeitomoi; ia nainomo caimare marena jaca iitomoi. Jusiñamui iese omoina itataite.

<sup>5</sup> Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi.

<sup>6</sup> Ieri iobidomoi; iadedi dallu diga rafuemona duere sefuidomoi.

<sup>7</sup> Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemona duere sefuidomoi. ñnocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite.

<sup>8</sup> Jesucristona jaca cioiñedomoi; iadedi naimiena jai isiruitomoi. Naimiena jaca cioiñedomoi; iadedi naimiena jai ñnotomoi. Ie jira eo iocire itomoi.

<sup>9</sup> Cristona omoi ñnuamona, jeacinomona jai jillobidomoi.

<sup>10</sup> Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naiemo comeciaina facauidimaci.

<sup>11</sup> Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiaie llotimaci. Monamo naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jiaie facadimaci.

<sup>12</sup> Jusiñamuidi naie rafue naimacimo duiñenana uiñotade. Naimacina naie rafue caimo duillana jiaie uiñotade. Jusiñamui ie Joreñona monamona naimacimo oretajanona, ie uaido naimaci llumona, naimie facaina llorainimona bie mare rafuena birui jai cacadomoi. Jusiñamui jaienisaie bie rafuena jiaie raise uiñoiacadimaci; ia cai isoi iena uiñoñedimaci.

### *Naimie jitaillacinona cai ñnollena, Jusiñamui caina fetode*

<sup>13</sup> Ie jira omoi comeciaina raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuri.

<sup>14</sup> Jusiñamuina omoï nia uiñoñena facaise danï omoï comeciã jïtaille rafuedo jaisoidomoï. Naimïena omoï jai ñnua jira, naimïena omoï nia uiñoñega facaise finoca rafuedo birui omoï jaiñeno. Mare uruiaï imaci moo uaina ñnotimaci. Jusiñamui uruiaïna omoï jai illa jira, naimïe uaina ñno.

<sup>15</sup> Jusiñamui ie uruiaïna omoï illena, jai omoïna fetode. Naimïe mareuilla jira, marena omoï i.

<sup>16</sup> Iena naimïedi jaie cuetatate: “Cue mareuidimïena isoi, marena omoï i”.

<sup>17</sup> Cai Moona Jusiñamui illamona, naimïemo birui jïdomoï; iadedi juez isoi nagamiemo ico Jusiñamui llua jira, nana omoï ille dinori jacirucana omoï jai. Nagamiëna ie maraiñede finoca rafue ñese duere finoite; ia maraiñede rafuena finoiñedimïena duere finoite.

<sup>18</sup> Omoï einamacï rafuedo jaie jaisoidomoï. Naie rafue jamaifue. Naimïemona Jusiñamui omoïna jai jillotate. Ñbatajamona omoï jeacïnomona jillotañede. Ucubedi raire cueruide. Raire cueruide ra ñiga omoïna jillotañede;

<sup>19</sup> iadedi Cristo ñruedo naimïe dacaiño fiodaillamona, omoïna jaca jillotate. Cai comini imaci jeacino facaina mare toïca llaudana fauidimaci; ia Cristomo jeacino iñena jira, cai jeacino facaina birui dacaiño fiodaite.

<sup>20</sup> Caina jilloitallena, enïrue nia iñena facaiseconi Jusiñamui Cristona jaie fetode. Naimïena omoï uiñollena, birui bene enïruemo Jusiñamui naimïena oretate.

<sup>21</sup> Cristo muidona Jusiñamuina ñnotomoï. Cristo fiodaite; ia iemona Jusiñamui naimïena jillotate. Ie mei monamo ie ecimo naimïena dane itatate. Ie jira Jusiñamuina ñnotomoï. Omoï fiodaia, dane jilloillemo jiaï jai ocuiridomoï.

<sup>22</sup> Uanaicïnona omoï ñnuamona, omoï comeciã jai jeanidimaci. Ie muidona jiaie creyentiãna isirucana omoï jai. Omoï comeciãmona conini omoï isirui.

<sup>23</sup> Jusiñamui cominina jai jaidomoï. Naimïe uaido iese jaidomoï. Comini uaido iese jaiñedomoï. Naimïe uai jaca fuiñeite. Jaca iite. Naie uaido naimïe cominina jaca iiticaï.

<sup>24</sup> Jusiñamui facaina lloraïma micori iena jaie cuete:

Nana cominidi raiticiaï isoidimaci.

Safia dallu ebirede; iadedi raiticiaï ie safia ñiga are iñede.

Ie isoide. Ñiga rafuena finuanona, dallu iticaï.

Are iñedicaï;

<sup>25</sup> iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoï.

## 2

<sup>1</sup> Jusiñamui cominina cai illa jira, jiaie cominina gaiñenacïnona fainonocai. Nana jifuiacïnona fainonocai. Abina caitajacïnona feita. Nana abi uradoil-lacïnona feita. Jiaie comini joreñona ñaiñeno.

<sup>2</sup> Ero, raise moonaillena, raise ecairellena, janosa monoï ijina jitaide. Ie isoide. Omoï comeciã raise marena illena, Jusiñamui rafuena jitaïdomoï.

<sup>3</sup> Cai Nama omoïna duenaillana jai omoï uiñuamona, naimïe uaina ñnocana jai.

### *Cristodi jofomo ite nanoca nofici isoide*

<sup>4</sup> Ie cominina raise omoï illena, Jusiñamui rafuena finocana jai. Naimïe omoïna jai fetode. Naimïemo omoï raise duillana jitaide. Iena omoï raise uiñollena, jiaie rafuedo iena lloiticue. Naimïedi jofona niacade isoide. Noficïmona niacade. Ñiga noficiãna jitaide. Naimïe naie noficiãna jai fetode. Nanoca nofici ñiga naie jofo nillana tainede. Cristodi naie nanoca nofici

isoide. Cai nairai Cristona jaie jitaiñedimaci; iadedi Jusiñamui naimie maredimiena jira, Jusiñamui naimiena fetode. Caidi jiaie noficiai isoidicai. Ie jofona nillena isoillena, Jusiñamui caina fetode.

<sup>5</sup> Naimiena cai jai inua jira, naimie cominina jai jaidicai. Naimie diga jai atona ñairedicai. Naimie diga jiaie comini facaina jiai ñaicabiticai. Naimiena cai raise sedallena, Jesucristo caina canuamona, Jusiñamui jitaillacinona finocana jaidicai.

<sup>6</sup> Jusiñamui facaina lloraima iena jaie cuega: Ero, Jerusalémo cue jofona nillena, daje noficina fetoiticue. Eo mare noficina fetoiticue. Cue Jitona ñaiticue. Naimiena jai fetodicue. Naimiedi eo mare. Naimiena inuamona, comini iobitimaci cuega.

<sup>7</sup> Naimiena omoi inoia, Jusiñamui omoina iobitaite. Naimiena omoi inoñenia, faifitomoi. Jusiñamui facaina lloraima micori iena jaie cuega: Jofona finoraini jitaiñena noficidi nana naie jofomo ite noficiai baifemo jai faiga

cuega. Ie isoide. Cai nairai Cristona jitaiñede; iadedi Jusiñamui naimieri eo iobide.

<sup>8</sup> Dane cuega:

Nine naimaci macaria, naie noficimona eicaitaillamona, uaitimaci cuega. Cristona cuete. Cristo uaina naimaci inoñena jira, Jusiñamui llua isoi faifitimaci.

### *Pedro Jusiñamui fetocanona llofuede*

<sup>9</sup> Jusiñamui jai fetocanodomo. Naimiemo omoi jai duillamona, naimie diga atona ñairedomo. Jusiñamui ua cominidomo. Naimiena omoi nia inoñenia, jeacino anamo omoi illa jira, jitrederinomo itomoi isoidomo. Naiemona omoina jai jillobitade. Naimie anamo jai omoi illamona, userederinomo jai itomoi isoidomo. Eo mare rafue omoimo naimie finua jira, iena llocana omoi jai.

<sup>10</sup> Jaie Jusiñamui cominiñedomoi; iadedi birui Jusiñamui cominidomo. Naimie omoina duenaillana jaie uiñoñedomoi. Birui iena uiñotomoi.

### *Pedro Jusiñamui jitaillacinona finocana cai jaillana llofuede*

<sup>11</sup> Cue isiruiganodomo. Jusiñamui illanomo omoi birui jainaiaila jira, eniruemo jaca iñeitomoi. Eniruemo jaca omoi iñena jira, jeacinona finocana jaiñeno. Jeacino omoi comeciaina namataacana jira, iena ebiruiñeno, naie anamo omoi i raillano.

<sup>12</sup> Jusiñamuina inoñedino motomo omoi illamona, mare rafuena finocana jai. Omoina birui jeare ñaitimaci; iadedi omoi marena illana naimaci uiñuamona, Jusiñamuina ico naimaci inoia, naimiemo iobillacinona fecaitimaci.

<sup>13</sup> Cai Namamo omoi duilla jira, illacomini anamo raise i. Riai diga omoi nanoca illaima uaina ino.

<sup>14</sup> Naimacina omoi illacomini fetua jira, omoi gobernadores uaina ino. Maraiñede rafue omoi finoia, omoina duere finoitimaci; iadedi mare rafuena omoi finoia, omoiri iobitimaci.

<sup>15</sup> Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina llicaitatomoi.

<sup>16</sup> Jusiñamui anamo cai illamona: “Jiaie illaima uaina inoñeiticai” raiñeiticai. Cai enirue illaima uaina cai inoñenia, jeacinona finodicai. Jusiñamui dibeimo cai illa jira, naimie jitaillacinona finocana cai jailli.

17 Nana cominimo marena fino. Nana creyentiaina isirui. Jusiñamuina jaciruiocaída ñno. Riaí diga omoi illaíma uaina ñno.

*Cristo duere sefuilla rafuemonafueoitícaí*

18 Patrón anamo damierie itomoi. Omoi patrón ocuica uaina ñnocana omoi jai. Omoi patrón marena fecuise ocuica, naimie uaina ñno. Naimie raire iciría, naimie ocuica uaina jiaí ñno.

19 Maraiñede rafuena omoi finoñenia, omoi patrón omoiña duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare.

20 Maraiñede rafuena omoi finoia, omoi patrónona duere sefuitomoi; iadedi maraiñede rafuena omoi finoñenia, omoi patrón omoiña duere finoia, ibana omoi oñenia, Jusiñamuimona mare.

21 Duere omoi sefuia, ibana oñeno. Iese omoi illena, Jusiñamui omoiña fetode. Cristo caí facaina ibana oñeno duere sefuide. Naimie isoi caí illena, naimie isoi rafuena finocana caí jailli.

22 Naimiedi maraiñede rafuena jaca finoñede. Tainona jaca lloñede.

23 Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoiña ico duere finoitícue” raiñede. Naimiedi Jusiñamui naimicina ico raise duere finollena uiñote.

24 Cruzmo naimie fiodaillamona jeacino anamo caí iñellena, caí jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, caí jeacinomona jai jillodícaí.

25 Sedañega toíca llaudaíai isoi jaie ebena jaisoidícaí. Caí sedaraíma anamo jai itícaí. Naimiedi caí comeciaina jai eenote.

### 3

*Pedrodi inirediñaiñuaina, airedino diga llofujete*

1-2 Inirediñaiñuai, omoiño jai lloiacadícue. Omoi iniñiaí uaina ñno. Nibaí biruí Cristo rafuena ñnoñedimaci; iadedi omoi marena illamona, Cristo díbeimo naimicina itataítomoi. Jusiñamui uaina omoi ñnuamona, omoi marena illamona, damierie Cristona ñnoitímaci.

3 Dañaiñorie abina eo finocabidímaci, naiñaiñuaina jiaie comini ebinaillena. Naiñaiñuai ifotiena eo finocabidímaci. Eo raífide rana jítacabidímaci. Eo ebirede raífide iniroina jítacabidímaci. Naie isoide ra comeciaina marena itatañede; ia Jusiñamui jitaillacínodo jaillamona, comeci marena ite. Jiaie comini omoiña ebinai raillano, iese omoi iñeno;

4 iadedi jiaie comini omoiña ebinaillena, omoi comeciaina marena fino. Omoi iniñiaí uaina oñeno. Naimiaci jitailla rafuena fino. Omoi comeciaina iese ia, Jusiñamuimona eo mare.

5 Caí jaiagai facaise Jusiñamuina ñnotiñaiñuai iese itímaci. Cue biruí llofuia isoi, naiñaiñuai abina jaie finodímaci. Naiñaiñuai iniñiaí uaina ñnotímaci.

6 Iese Sara micorí ie ini Abraham micorí uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jaia, buena omoi jaciruiñenia, naiñaiño isoi itomoi. Iemona naiñaiño uruiaína jaitomoi isoítomoi.

7 Airedino, omoiño jai lloiacadícue. Omoi ainiaimo comeciaina faca. Caí isoi naiñaiñuai mairiñena jira, naiñaiñuaina isiruillamona, naiñaiñuaina marena raise seda. Jusiñamui omoiña duenaillamona, naimie cominina jai jaidomoi. Omoiña jai jillotate. Omoi ainiaína omoi raise sedañenia, Jusiñamuimo daajena raise jínidomoi.

*Cristo díbeimo caí illa rafue*



<sup>8</sup> Daje isoi comeciaí lloicana jai. Coninina duenai. Naga creyentena isirui. Jiaisona cano. Abina iedoño.

<sup>9</sup> Omoína jiaie comini duere finoia, ibana oño. Omoína naimaci jeare ñaia, ibana oño; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui dinena: “Mare” caina raite.

<sup>10</sup> Jusiñamui facaina lloraima micori iena jaie cuega: Marena uri jaca bu iacania, jeare ñaiño.

Tainona lloño.

<sup>11</sup> Jearede rafue finuana faionocai. Mare rafuedo jai.

Omoi ecimo itino diga, uri icana omoi jai.

<sup>12</sup> Naimie jitailla rafue omoi finoia, Jusiñamui iena uiñuamona, omoina raise sedade.

Naimie diga omoi ñaia, iena cacade;

iadedi marañede rafue bu finoia, Jusiñamui naimie diga icirite.

<sup>13</sup> Mare rafuena omoi finocana jaia: “Marañede rafuena naimaci finua jira, naimacina duere finoiticaí” rainidimaci;

<sup>14</sup> ia mare rafuena omoi finuamona omoi duere sefuia, Jusiñamui omoina canoite. Omoína duere finodinona jaciruiño. Jarire iño;

<sup>15</sup> ia omoi comeciaí jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoi mo bu jicanoia, uaina raise ono. Fecuisse icirino, uaina ono.

<sup>16</sup> Mare rafuena finocana jai. Omoína jiaino jeare ñaia, mare rafuena omoi finocabillamona meidaitimaci. Omoi marena illamona, tainona naimaci llua bairenate.

<sup>17</sup> Mare rafuena omoi finuamona, Jusiñamui jitaillamona omoi duere sefuia, dama iese duere sefuitomoi; ia marañede rafuena omoi finuamona omoi duere sefuia, omoi muidona.

<sup>18</sup> Cristomo omoi comeciaina faca. Dacaiño cai jeacino facaina naimie fiodaite. Naimie mareuidimie; iadedi marañedino facaina fiodaite. Jusiñamui dibeimo caina itataiacade. Naimiena meinetimaci; iadedi naimie Joreño jaca ite.

<sup>19</sup> Ie Joreño naimie jaillanona, jaie fiodaitino imaci joreñuai eenoronomo ie finoca rafuena lluaide. Naimaci nia fiodaiñenia, Jusiñamuina jaca ñnoñedimaci; ia Cristo ie finoca rafuena naimaci joreñuaimo lluaide.

<sup>20</sup> Jusiñamui rafuena jaie ñnoñedimaci. Noé micori facaise Jusiñamuidi naimaci naimiena ñnuamo fecuisse ocuride. Jinuimona jillobillena, Noé micori ie balsana finode. Ocho digamie jillobidimaci.

<sup>21</sup> Ie isoide. Omoi bautizaia: “Jusiñamui dibeimo jai iticaí” llotomoi. “Jeacinomona jai jillobidicaí” llotomoi. Omoi abimo ite jearenamona jillobiñedomoi; iadedi omoi comeciaí jai marena ite. Fiodaillamona Jesucristo jillua muidona, jillobidicaí.

<sup>22</sup> Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisaí naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

## 4

### *Jusiñamuimona cai feiñoa uai diga, naga jiaie creyentena cai canua*

<sup>1</sup> Cai isoi naimie illamona, Cristo duere sefuide. Naimie duere sefuide; ia jeacina finoñede. Duere omoi sefuia, naimie illamo omoi comeciaina faca.

<sup>2</sup> Nana omoi ille dinori comini jitaillacinodo jaiño; iadedi Jusiñamui jitaillacinodo omoi jai.

<sup>3</sup> Jusiñamuina uiñoñedino isoi jaie bie isoide rafuena finouidomoi: Omoi aiñede riñoniai diga isoidomoi. Omoi iniñede iñiaia diga isoidomoi. Jearede rafuena ebiruitomoi. Jifairuidomoi. Jiruana ebiruitomoi. Jusiñamui rairuica jiraraina sedauidomoi.

<sup>4</sup> Naie isoide rafuena omoi jai finoñenia, Jusiñamuina uiñoñedinodi omoi ri rajicaidimaci. Omoina jeare ñaitimaci.

<sup>5</sup> Iese itimaci; iadedi Jusiñamui uicomo ico iitimaci. Naimacina duere finoite. Nia fiodaiñedinona duere finoite. Jai fiodaitinona jiaia duere finoite.

<sup>6</sup> Naimaci nia fiodaiñena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

<sup>7</sup> Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoi jai.

<sup>8</sup> Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feिताitomoi.

<sup>9</sup> Jiaie cominina jafueoicaida feiñoño; ia caimare feiño.

<sup>10</sup> Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano.

<sup>11</sup> Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, cana jaca sedade. Naimiemo iobillacinona jaca cai fecacabillasa. Iena jitaidicue.

### *Cristo dibeimo cai illamona, duere sefuiticai*

<sup>12</sup> Cue isiruiganodomoi. Eo duere omoi sefuia, rajicaañeno. Creyentiaina omoi jailla jira, duere sefuitomoi. Jusiñamuidi Cristona raise omoi ñnuana facacite.

<sup>13</sup> Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi.

<sup>14</sup> Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana uiñoitomoi. Naimie: “Mare” omoina raite.

<sup>15</sup> Jiaínodi cominina meinetimaci. Rana fñdimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoi finoñeno. Naie isoide rafuena omoi finuamona omoi duere sefuillana jitañedícue.

<sup>16</sup> Creyentiaina omoi illamona omoi duere sefuia, ieri meiruiñeno; iadedi creyentiaina omoi illamona, iobillacinona Jusiñamuimo feca.

<sup>17</sup> Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, cana janore duere finoite; iadedi naimie cominiñedinona cai baifemo eo duere finoite.

<sup>18</sup> Jusiñamui facaina lloraima micori iena jaie cuega: “Mareuidinodi niadedi jillobiñedimacimo, ¿niese comeciaina jearedinodi jillobitimaci? ¿Niese marañedínodi jillobitimaci? Nibai jaca jillobiñeitimaci” cuega.

<sup>19</sup> Iena omoi uiñuamona, mare rafuedo jai. Jusiñamui jitaillamona duere omoi sefuia, mare rafuedo jai. Jusiñamui caimo finuana omoi uiñuamona, naimie anamo raise i. Naimie omoina raise eenoite. Ie lloga uaina jaca finoite.

## 5

*Pedro creyentiaina nia llofue*

<sup>1</sup> Creyentiaina llofueraini, omoimo rafuena lloiacadicue. Cuedi jiai llofueraimadicue. Cristo fiodallana cidicue. Naimie ebire abido bia, jiaie creyentiai diga iena cioiticue. Iese cue illamona, omoimo lloiacadicue.

<sup>2</sup> Omoi anamo ite creyentiaina raise seda. Naimacina raise llofue. Jiaimie railla jira, llofueño; iadedi omoi jitailla jira, llofue. Rana ollena llofueño; iadedi iocire llofue.

<sup>3</sup> Omoi anamo itinona riire llofueño; iadedi mare rafuedo omoi jaillamona, naimacina llofue.

<sup>4</sup> Cai creyentiai nanoca sedaraimadi Cristo. Naimie abido bia, naimiemonabana feiñoitomoi. Naimie diga jaca iitomoi.

<sup>5</sup> Conirueni, omoi llofueraini uaina raise ino. Coninimona abina iedoño. Jusiñamui facaina lloraima micori iese jaie cuega:

Bu abina iedoia, Jusiñamuimona marañede; iadedi bu abi iedoñenia, Jusiñamuimona mare.

Jusiñamui naimiena duenaite cuega.

<sup>6</sup> Iese illa jira, cai Jusiñamui siñona jira, naimie anamo abina iedoño mai raise omoi i. Iemona naimie jitailliruido omoina iobitaite.

<sup>7</sup> Nie isoide rafue ia, Jusiñamui omoina canocabillana omoi uiñuamona, omoi comeciai jarire finoño. Naimie omoina eenoite.

<sup>8</sup> Ebona jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide.

<sup>9</sup> Naimie ra faia uaina inoño; ia Cristona inocana jai. Omoi duere sefuilla isoi, nana jiaie creyentiai duere sefuidimaci. Iena omoi uiñuamona, omoi comeciai ocuiñocana jai.

<sup>10</sup> Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iitica. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiñotaite.

<sup>11</sup> Illaimana naimie illamona, caina jaca sedade. Naimiemo iobillacino cai fecocabillasa. Iena jitaidicue.

*Naga creyentiaimo carta oria rafue*

<sup>12</sup> Silvanona uiñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise inogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uiñuamona, bie rafuena inocana jai.

<sup>13</sup> Babiloniamos ite creyentiai omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiai orede. Cristomo naimie jai duilla jira, naimie cue jitona eruaide.

<sup>14</sup> Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uiñocana mai jai. Macaibaite. Pedrodicue.

## IE EMODOMO PEDRO ORETAGA RABE

### *Pedro creyentiaimo carta orede*

<sup>1</sup> ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo díbeimo maijiamona, ie rafuena lloticue. Cuenafajamona, ie lloga uaina finodicue. Cai isoi jai inotomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai inotomoi. Jusiñamuimona cai isoi omoi illa jira, bie carta omoi dine oredicue.

<sup>2</sup> Jusiñamuina omoi uñuamona, cai Nama Jesús omoi uñuamona, iaimaiai omoina duenaillana uñocana jai. Iaimaiai omoi uri itatajana uñocana jai.

### *Creyentia marena illa rafue*

<sup>3</sup> Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode.

<sup>4</sup> Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciai jaie jitailla jira, faificana jaidicai; iadedi naimie rafuena cai inuamona, naimie illa isoi, icana jaidicai.

<sup>5</sup> Jesucristona jai inotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai.

<sup>6</sup> Jearede rafue finocana jaiñeno; iadedi omoi comeciaina eeno. Iena oculiñocana jai. Jusiñamuina sedacana jai.

<sup>7</sup> Jiaie creyentiaina isiruicana jai. Nana cominina isiruicana jai.

<sup>8</sup> Naie isoidicinona jitaidomoi. Iedo omoi raise jaia, cai Nama Jesucristona eo raise uñocana jaitomoi;

<sup>9</sup> iadedi iedo omoi jaiñenia, abina nia raise uñoñedomoi. Omoi jeacinomona jai jilluana jiai jai feitatomoi. Mare rafuena finocana jaillena, omoi jeacinomona jillobidomoi. Iena feitañeno.

<sup>10</sup> Cue amatiai, naie isoidicinona finocana jai. Iemona Jusiñamui omoina fetuana raise uñoitomoi. Abido danomo jiai jaiñeitomoi.

<sup>11</sup> Iese omoi jaia, cai Jilloitaraimana naimie illamona, cai Nama Jesucristo ie illanomo omoina eo marena feiñoite. Nainomo naimie anamo jaca iitomoi.

<sup>12</sup> Ie jira bie isoide rafuena diga icaiño omoimo lloticue. Bie rafuena uñotomoi. Bie rafue uanaicinona jai raise uñocaidomoi.

<sup>13-14</sup> Cai Nama Jesucristo cuemo jai llua jira, raire cue fiodaillena uñoticue. Nia cue fioidañenia, bie rafuena omoimo diga icaiño lloticue. Iese omoimo cue lloia, cuemona mare.

<sup>15</sup> Bie rafue omoi raise nagarui uñollena, omoina birui canoiticue. Cue fiodaile mei, nagarui bie rafuena omoi feitañenana jitaidicue. Ie muidona bie rafuena jai cueticue.

### *Pedro Cristona ebirenana jaie cide*

<sup>16</sup> Jamai rafue omoimo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jiai lloticai. Naimiena ebirenana jaie ciodicai.

<sup>17-18</sup> Eniruemo naimie jaie ia, anedu muidomo naimie diga jaidicai. Jusiñamui nainomo jiai illa jira, naie illano mare. Naie facaise Jusiñamui llua cacadicai. Jusiñamui naimiena iobitaiacade. Ebire llote: “Bimie cue

isiruiga Jito. Naimieri iobidicue”. Iena jaie cai ciuanona, birui naimie siñonana lloticaí.

<sup>19</sup> Naiemona Jusiñamui facaina jaie lloraini micoriai lloga rafue suillena jai raise uiñoticaí. Naimaci lloga rafuemo omoi comeciaina faca. Lamparín jitiredinomo lligaiñua isoi, naie rafue cai comeciaina uanaicinona uiñotade. Monairaicuduna cai cioia, iaiei monaille ua illana uiñoticaí. Ie isoide. Cristo dane baieia, iena raise uiñoticaí. Jusiñamui facaina lloraini micoriai rafuena cai uiñuamona, uanaicinona ua uiñoticaí.

<sup>20</sup> Biena uiñoticaí. Dani comeciaina Jusiñamui facaina lloraini micoriaidi naimaci lloga uaina llofueñedimaci.

<sup>21</sup> Dani naimaci comeciái jamai facajamona naie rafuena oñedimaci; iadedi Jusiñamui Joreño naimacimo illamona, naimacina iena uiñotajamona, Jusiñamui rafuena jino llotimaci.

## 2

### *Pedro tainona llofuerainina llote*

<sup>1</sup> Cai jaiagai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeitimaci; iadedi naie rafuemonona omoína itataiacanitimaci. Naimaci facaina Jesucristo fodaite; iadedi: “Jesucristo cai Nama” raiñeitimaci. Naimaci finolle rafue muidona, raie ebena faifitimaci.

<sup>2</sup> Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci.

<sup>3</sup> Ucube ollena, naimaci tainona llofuiacinodo omoína jifueiacanitimaci; iadedi Jusiñamui ricaillafue anamo jai itimaci. Jusiñamui naimacina ico duere finoite.

<sup>4</sup> Naimie ecimo ite jaienisaímona damerie jeacino jaie finua jira, Jusiñamui naimacina jai oni dotade. Naimie ricaillafue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dine illirui ia.

<sup>5</sup> Jusiñamui Noé micori facaise ite comina jaie duere finode. Noé micori Jusiñamui ie mare rafuena naimacimo llote; iadedi Jusiñamuina ñnoiacañedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate.

<sup>6</sup> Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua.

<sup>7</sup> Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite.

<sup>8</sup> Naimaci motomo naimie illamona, nagarui naimaci marañede rafue naimie ciuamona, naimie comeci uri iñede.

<sup>9</sup> Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faíamona jilloitajana uiñote. Jusiñamui naimiena ñnoñedino naimie ricaillafue anamo illana jiaí uiñote. Ico naimacina duere finoite.

<sup>10</sup> Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaína jaciruiñeno jeare ñaitimaci.

<sup>11</sup> Jusiñamui jaienisaí uai naimaci baífemo faíte; iadedí Jusiñamui illanomo naimaci illamona, bie tainona llofuerainina jeare ñañedimaci.

<sup>12</sup> Ocainaiaí abina raise uiñoñena muidona, cai rillena naimacina fatícaí. Bie tainona llofueraini ocainaiaí isoidimaci. Naimaci raise uiñoñega rafuena jeare ñaitimaci. Ocainaiaí faifilla isoi, faifitimaci.

<sup>13</sup> Jiaie cominina naimaci duere finua dinori duere sefuitimaci. Birui ite rafuena nagarui ebiruitimaci. Danomo omoí guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi.

<sup>14</sup> Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise inoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci.

<sup>15</sup> Cristo rafuena fañonocaillanona, jiaie rafuedo birui jaidimaci. Balaam micorí rafuedo jai jaidimaci. Balaam micorí Beor micorí jito. Ucube ollena, Balaam micorí uanaicinona jaie lloiacañede; iadedí jiaie rafuena llollena, jiaie nairai dine jaide.

<sup>16</sup> Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micorí jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

<sup>17</sup> Omoína canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeciaí daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jaca iitimaci.

<sup>18</sup> Jamai ñaia diga abina iedotimaci. Uañañede rafuemona, como Cristomo inotinona ramo faitimaci. “Jearede rafue finuana mare” raitimaci.

<sup>19</sup> “Cai jitailla rafuena finoredicaí” raitimaci. Iese raitimaci; iadedí jeacino anamo jai itimaci. Jeacino finocana naimaci jailla jira, ie anamo jai itimaci.

<sup>20</sup> Cai Nama Jesucristo. Naimiedí cai Jilloitaraíma. Naimiena naimaci jaie inuamona, marañedicino anamona jai jillodimaci; iadedí marañedicinona dane finocana jaidimacina, naie marañedicino anamo dane itimaci. Eo fodo jai jaidimaci.

<sup>21</sup> Cristo rafuena jaie uiñoñedimaci. Birui iena uiñotimaci; iadedí naie mare rafuedo raise jañedimaci. Iena fañonocaillamona, eo jai fodo jaidimaci.

<sup>22</sup> Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodí daje isoidimaci.

### 3

#### *Pedro cai Nama Cristo dane billena llofuate*

<sup>1</sup> Cue isiruiganodomoi. Navui jiaie carta omoimo oredicue. Birui dane cueticue. Bie rafuena jai uiñotomoi; iadedí iena omoí ua raise uiñollena, iena dane cueticue. Iemo omoí comeciaí raise facajana jitaídicue.

<sup>2</sup> Jusiñamui facaina jaie lloraini micoriaí lloga rafuena jai uiñotomoi. Cai Nama caina oretajanona, ie lloga rafuena omoimo jai lloticaí. Naimie muidona jillobidomoi. Bie rafuemo omoí comeciaí facajana jitaídicue.

<sup>3</sup> Biemo nano omoí comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci.



<sup>4</sup> Jicanoitimaci: “¿Niese Cristo nia abido biñede? Enirue finua facaisemona nana ra daje isoi comuicana jaide. Cai mootiaí jai fiodaicana jaidimaci. Cristo jaca biñeite”.

<sup>5</sup> Iese raitimaci; iadedi iese iñede. Jaie suide rafuemo comeciaina facaa-caiñedimaci. Jusiñamui jaie llamona, ie uaido mona finode. Enirue jiaí finode. Jinuimona iena finuamona, jinuimona eniruedi bairede.

<sup>6</sup> Jinui diga Jusiñamuidi Noé micori facaise cominina jaie fuidode.

<sup>7</sup> Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena inoñedinona iese duere finoite. Ie uai jai llote; ia nia suiñede.

<sup>8</sup> Cue isiruiganodomoí. Biena feitañeno. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide.

<sup>9</sup> Damierie comeciái facadimaci: “Are suiñena jira, cai Nama ie lloga uaina nibaí finoñeite”. Iese cai Nama iñede; iadedi comini naimiena inuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede.

<sup>10</sup> Firiraima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite.

<sup>11</sup> Bie rafue suillena uiñoticaí. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa.

<sup>12</sup> Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite.

<sup>13</sup> Naimie jai llua isoi, jiaie mona, jiaie enirue diga illena sedadicaí. Nainomo Jusiñamui jitailla isoi marena jaca iiticaí. Nainomo mare rafue finocana jaiticaí.

<sup>14</sup> Cue isiruiganodomoí. Bie rafue nia suiñena jira, naimie abido nia biñena jira, jeacino finoñeno i. Uri icana omoi i. Iese omoi ia, naimie abido bia, omoína: “Mare” raite. Omoi i iobite.

<sup>15</sup> Raire abido cai Nama biñenia, naimiedi comini naimiena inuamo ocuride. Iena uiñoticaí. Cai isiruiga ama Pablo, bie isoide rafue omoímo navui cuete. Cristo naimiena uiñotaga rafue diese cuete.

<sup>16</sup> Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise inoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuiaina tainonana llofuecabitimaci.

<sup>17</sup> Bie rafue birui uiñotomoí. Iena omoi uiñuamona, jearede rafue finocabidino rafuedo jaiñeno. Abido danomo omoi jaiñellena, iemona abina rairui.

<sup>18</sup> Cai Nama cai duenaillana uiñocana jai. Naimiedi cai Jilloitaraima. Naimiena omoi uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

## JUAN NANO FUEÑE ORETAGA RABE

### *Jusiñamui diga cai jaca illena, Juan cuete*

<sup>1</sup> Cue uruiaina omoi isoilla jira, omoimo cartana oredicue. ¿Nie isoidomoi? Nano dofoconi itimiena lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicaí. Naimiena ciodicaí. Naimiena jiaí jetadicaí. Caina Jusiñamuina uiñotade. Jusiñamui diga cai jaca illena, jiaí caina llofuate.

<sup>2</sup> Jusiñamui dinena billanona, imana jaide. Naimiena jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiena jai ciodicaí.

<sup>3</sup> Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaídicue. Jusiñamui Jito Jesucristona, cai diga omoi nabaillena jiaí jitaídicue.

<sup>4</sup> Omoi comeciaí caimareficaillena, omoimo bie rafuena cueticue.

### *Jusiñamuidi jaca mareuidimiena jira, userednomo ite isoide*

<sup>5</sup> Jesucristomona cai cacaja rafuena omoimo ja lloiticue. Jusiñamuidi jaca mareuidimiena jira, userednomo ite isoide. Naimie comecidi jaca jeanina jira, jitednomo iñede isoide.

<sup>6</sup> “Jusiñamuina nabaidicaí” cai raia, iadedi jeacinona finocana cai jaia, tainona lloticaí. Uanaicnodo nia jaiñedicaí.

<sup>7</sup> Jusiñamui jeacino jaca finoñede. Naimie isoi jeacino finoñeno cai jaia, coninina nabaidicaí. Jesucristo fodaillamona, naimie diaillamona, Jusiñamui cai jeacinona oni dotade. Iena feitate.

<sup>8</sup> “Caimo jeacino jaca iñede” cai raia, dani cai abina jifueticaí. Uanaicnodo nia jaiñedicaí.

<sup>9</sup> Naimiemo cai finoca jeacino cai lloia, Jusiñamui cai jeacinona dotaite. Nana cai marañedicinona dotaite. Naimie inogamiena jira, naimie maremiena jira, iese finoite.

<sup>10</sup> “Omoimo ite jeacino” Jusiñamui llote; iadedi: “Jeacino finocabiñedicaí” cai raia, “Jusiñamui tainona llote” raiticaí. Iemona naimie uaina jai uaitaticaí.

## 2

### *Cai facaina riidotimiedi Cristo*

<sup>1</sup> Cue uruiaí isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitaíñedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiena jira, cai facaina caina riidoite.

<sup>2</sup> Cai jeacino facaina naimie fodaite. Iemona Jusiñamui riicaillifue anamona jillobidicaí. Jesucristo cai facaina fodaite; ia nana comini facaina jiaí fodaite.

<sup>3</sup> Jusiñamui llogacinona cai inuamona, naimiena cai uiñuana jai uiñoticaí.

<sup>4</sup> “Naimiena uiñoticue” raitimiedi ie llogacinuaí inoñenia, naimiedi tainona lloraíma. Uanaicnona uiñoñede;

<sup>5</sup> ia Jusiñamui llogacinuaina inotimiedi Jusiñamuina eo isiruicana jaite. Naimiena cai isiruillamona, naimiena cai nabaillana jai uiñoticaí.

<sup>6</sup> “Cristona nabaidicue” raitimiedi, Cristo isoi, mare rafuena finoite.

### *Cristo rafuedo jaidomoi*

7 Cue isiruiganodomoí. Creyentiaína omoí jailla facaise bie rafuena cacadomoí. Ie jira jiaíe rafuena birui omoímo cueñeíticue;

8 ia naicinona abido dane lloíticue. Cristo iedo jaide. Iedo jiaí jai jaidomoí. Jeacino anamo omoí jaie illamona, jitiredinomo itomoí isoidomoí; ia Cristo rafuena omoí jai uíñuamona, useredinomo jai itomoí isoidomoí.

9 “Cristo rafuedo jaidicue” raitimiedi jiaíe creyentena enoia, Cristo rafuedo nia jaiñede. Jitiredinomo naimie nia ite isoide.

10 Jiaíe creyentena bu isiruia, Cristo rafuedo raise jaide. Iedo naimie jaia, jiaimiena jeacinona finotañeite;

11 iadedi jiaíe creyentena bu enoia, jitiredinomo nia ite isoide. Jeacino anamo nia ite. Uisínidimie ie jaillinona raise uíñoñena isoi, Jusiñamui dine rillena raise uíñoñede. Ie isoi abina uíñoñede.

12 Cue uruiaí isoi cue mamecaomoí. Cristo muidona omoí jeacino Jusiñamui jai dotajamona, nana omoímo bie cartana cueticue.

13-14 Einamací, Jusiñamuina are omoí jai ñnuamona, omoímo bie cartana cueticue. Naimie nano dofoconi jaca ite. Conirueni, jeacinona finoñellena omoí comeciaina ocuiñuamona, Jusiñamui uai omoí comeciáimo raise itabil-lamona, marañedimiena omoí jai anafefitaja jira, omoímo bie cartana cueticue. Naimiedi Taife. Uruiaí, Jusiñamui uaina omoí como ñnuamona, omoímo bie cartana cueticue.

15 Omoí ecimo marañede rafuena ebiruiño. Iena bu ebiruia, cai Moo Jusiñamuina isiruiñede.

16 Cai comeciáimo ite marañede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiaí diga, abi ieducinodi Jusiñamui ieñede.

17 Jusiñamui ieñede rafue jaca fuite. Naie isoide rafuedo jaidinodi jiaí faífitimaci; iadedi Jusiñamui jitaillacinona finodimie Jusiñamui illanomo jaca iite.

### *Cristona abi caitadino rafue*

18 Cue uruiaí isoidomoí. Jesucristo abido billirui iaírei jai ite. Nanoca Cristona abi caitadimie billena jai fididomoí. Ailluena Cristona abi caitadino birui jai bairédimaci. Iemona Jesucristo abido billirui iaírei illana jai uíñotomoí.

19 Cai creyentiaí motomo nano itimaci; ia Cristo díbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duiñenana jai uíñoticaí.

20 Jesucristomona Jusiñamui Joreñoña jai omoí feiñua jira, nana omoí Jusiñamui díbeimo ite rafuena jai uíñotomoí.

21 Ie jira uanaicinona bu llofueia, iena uíñotomoí. Uanaíñedicinona bu llofueia, iena jiaí uíñotomoí.

22 Tainona llofueraínina ja cueíticue. “Cristo cai jilloitaraimañede” llotinodi taino llofueraíni. “Jusiñamuidi cai Mooñede” llotinodi taino llofueraíni. “Jesúdi Jusiñamui Jitoñede” llotinodi taino llofueraíni.

23 Cristona ñnoñedinodi Jusiñamuina jiaí ñnoñedimaci. Cristona ñnotino Jusiñamuina jiaí ñnotimaci. Jusiñamui Joreño omoímo illamona, iena jai uíñotomoí.

24 Ie jira creyentiaína omoí jailla facaise omoí cacaja rafuedo ñnocana nia omoí jai. Iedo omoí ñnocana jaia, Jusiñamui Jitona raise nabaitomoí. Jusiñamuina jiaí raise nabaitomoí.

25 Jusiñamui caímo jai llua isoi, naimie diga jaca iiticaí.

26 Omoína damerie jífueiacana jira, bie rafuena jai cueticue.

<sup>27</sup> Jusiñamui Joreñona jai feiñotomoi. Omoina Jusiñamui rafuena naimie uiñotaja jira, jiaie rafuena llofuerainina jai jitañedomoi. Jusiñamui Joreño uanaicinona omoina uiñotacabide. Naimie omoina uiñotaja isoi, Cristona nabaicana omoi jai.

<sup>28</sup> Cristo ico abido biite. Omoi jacinaiñellena, naimiena omoi meiruiñellena, naimiena birui raise omoi nabai.

<sup>29</sup> Jusiñamui maremiena cai uiñuamona, nana mare rafuena finocabidino naimiemo duillana jiai uiñoticaí.

### 3

#### *Juandi Jusiñamui cominina llua rafue*

<sup>1</sup> Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídicae. Naimiena naimaci uiñoñena jira, Jusiñamuina ñnoñedino cai uiñoğa rafuena jiai raise uiñoñedimaci.

<sup>2</sup> Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiena cai cioillemona, iena raise uiñoiticaí.

<sup>3</sup> Iemo cai ocuirillamona, naimie marena illa isoi, cai comeciái marena itataja.

<sup>4</sup> Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode.

<sup>5</sup> Jusiñamui ñnena Cristo billanona, ñmana jai jaide. Cai jeacinona oni dotallena, enruemo naimiedi bite. Naimiemo jeacino jaca iñena jira, jeacino ñibeimo naimie jaca iñede.

<sup>6</sup> Naimiena nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiena nia raise uiñoñede.

<sup>7</sup> Cue uruiaí isoidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoina jifueñellena, abina rairui. Jes Cristo jaca maremie. Mare rafuena finocana cai jaia, naimie isoi mareniticaí;

<sup>8</sup> ia jeacino finocana bu jaia, Taífemo duide. Nano dofomona Taífedi jeacino finocana jaide. Ie jira Jusiñamui Jito bite, Taife rafuena anafetallena.

<sup>9</sup> Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide.

<sup>10</sup> Iemona Jusiñamui ñibeimo itinona raise uiñoticaí. Taife ñibeimo itinona jiai raise uiñoticaí. Mare rafuena finocana jaiñedimie Jusiñamuimo ñuiñede. Jiaie creyentena isiruiñedimie Jusiñamuimo jiai ñuiñede.

#### *Coninina cai isiruilla rafue*

<sup>11</sup> Creyentaina omoi jailla facaise: “Coninina isirui” raillana cacadomoi. Jiaie creyentaina nia omoi isiruiñenia, Jusiñamuimo nia ñuiñedomoi.

<sup>12</sup> Caín micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete.

<sup>13</sup> Ie isoide. Jusiñamui jitailla rafuena birui cai finuamona, Jusiñamui ñibeimo iñedimodi caina enoidimaci. Ieri jacinaiñeno.

<sup>14</sup> Cristona nia cai ñnoñena facaise jeacino anamo cai illa jira, Jusiñamuimona fiodaitino isoidicaí. Jiaie creyentena cai isirua, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite.

15 Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede.

16 Cristomona cai fueua. Naimie jitailla jira, cai facaina fiodaite. Iemona jiaie creyentiaina cai isiruillana uiñoticaí. Ie jira naimaci facaina naimaci ramo jiriñellena fiodaianiticaí.

17 Jiaie creyentiaina cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñenia, Jusiñamuina raise isiruiñedomoi.

18 Cue uruiaí isoidomoi. “Jamai uaido jiaie creyentiaina isiruiticaí” cai raiñena; iadedi cai finoca rafuemona naimacina cai canua.

#### *Jusiñamuimo jaciruiñeno jiredicai*

19 Jiaie creyentiaina isiruicana cai jaia, Jusiñamui cominina cai illana raise uiñoticaí. Jusiñamui muidona cai comeci uri ite.

20 Cai comecimo iticinona uiñoticaí. Siñonamiena jira, Jusiñamui iena jiaí uiñote.

21 Cai comecimo jeacino iñenia, Jusiñamuimo jaciruiñeno jiredicai.

22 Naimie llogacinona cai inoia, naimie jitaillacinona cai finoia, naimiemo cai jicaca rafuena birui feiñoticaí.

23 Naimie Jito Jesucristo cai inuana jitaide. Cristo llua isoi, coninina cai isiruillana jiaí jitaide.

24 Naimie llogacinuaina cai inoia, naimiena nabaidicaí. Caina jiaí nabaide. Naimie Joreño caimo illamona, naimie caina nabaillana jai uiñoticaí.

## 4

#### *Juan tainona llofueraínina llua rafue*

1 Omoína isiruiticue. Naga llofueraíma uaina inoñeno. Ailluena tainona llofueraíni birui illa jira, Jusiñamuimona naimaci feiñoga uaina nica naimacina facaci:

2 “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci;

3 ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini comeciaina feidocana birui jaidimaci.

4 Ero, Jusiñamuimo jai cai duillamona, Jusiñamui caimo ite. Taino llofueraíni dibeimo omoi jaiñena jira, naimaci llofuiana oñedomoi. Naie taino llofueraínimo Taife ite; ia Jusiñamui Taife baifemo faite.

5 Naie tainona llofueraíni Jusiñamuina inoñedinomo duidimaci. Naimaci ecimo ite rafuena llofuecabitimaci. Jusiñamuina inoñedino naimaci llofuiana ebiruitimaci.

6 Jusiñamuimo jai duidicaí. Jusiñamuina inotino cai llofuiana cacaacadimaci; ia Jusiñamuina inoñedino cai llofuiana cacaaiñedimaci. Iemona Jusiñamui uaina llofueraínina uiñoticaí. Iemona tainona llofueraínina jiaí uiñoticaí.

#### *Jusiñamui caina isiruilla rafue*

7 Omoína isiruiticue. Coninina cai isiruilla. Jusiñamui caina isiruillamona, caina jiaínona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci.

8 Jusiñamuimo cai duillamona, caina jiaínona naimie isiruitaja jira, jiaínona isiruiñedimiedi Jusiñamui rafuena nia uiñoñede.

<sup>9</sup> Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticaí. Ie finoca rafuemonona Jusiñamui caina isiruillana jai uñoticaí.

<sup>10</sup> Jusiñamuina cai isiruillana ñañedícue; ia Jusiñamui caina isiruillana ñaitícue. Cai jeacino facaina fiodaillana, ie Jito eniruemo orede. Iemona cai jeacínona feitate. Iemona isiruillana raise uñoticaí.

<sup>11</sup> Caina Jusiñamui isiruilla isoi, coninina cai isiruilla.

<sup>12</sup> Buna Jusiñamuina jaca cioñede; iadedí coninina cai isiruillamona, Jusiñamui caino illana jai uñoticaí. Naimiena isiruicana jai jaidicaí.

<sup>13</sup> Naimie Joreño caino itatajamona, naimiena cai nabaillana uñoticaí. Caina naimie nabaillana jai uñoticaí.

<sup>14</sup> Bie rafuena jai uñoticaí. Jusiñamui ie Jitona eniruemo jai orete. Naimiena ñnoñedinona jilloitallana, naimiena oretate. Naimie Jitona cioticaí. Ie jira iena birui lloticaí.

<sup>15</sup> “Jusiñamui Jitodí Jesús” llotimiedí Jusiñamuina nabaide. Jusiñamui naimiena jai nabaide.

<sup>16</sup> Ie jira Jusiñamui caina isiruillana uñoticaí. Caina jainona naimie isiruitade. Iedo cai jaillamona, caina nabaide. Naimiena jai nabaidicaí.

<sup>17</sup> Iemona Jusiñamuina isiruicana jaiticaí. Naimie uicomo íco nana cai ille facaise naimiena jaciruiñeíticaí. Jusiñamui Jitona Cristo illanona, Jusiñamui cominina cai jai illanona, naimiena birui jaciruiñedicaí.

<sup>18</sup> Jusiñamuina cai isirua, naimiena jaciruiñedicaí. Eo raise naimiena cai isirua, ¿niese naimiena jaciruiticaí? Naimiena cai jacirua, naimie caina duere finuana jaciruiticaí. Jusiñamuina jaciruitimiedí Jusiñamuina nia raise isiruiñede.

<sup>19</sup> Nano Jusiñamui caina isiruilla jira, caidí naimiena isiruiticaí.

<sup>20</sup> “Jusiñamuina isiruitícue” raitimiedí jai creyentena enoia, jai taino llote. Creyentena cide; ia naimiena isiruiñede. Jusiñamuina cioñede. ¿Niese ie cioñenamiena isiruite?

<sup>21</sup> Jusiñamui iena caino jai llote: “Cuenta isiruitimie jai creyentena jai isiruite”. Ie jira coninina isirui.

## 5

### *Taife ie rafuena anafefitatícaí*

<sup>1</sup> Jusiñamuimona Jesús billana cai ñnoia, Jesús cai Jilloitaraimana cai ñnoia, Jusiñamui cominina jaidicaí. Jusiñamuina cai isirua, nana naimie cominina jai isiruiticaí.

<sup>2</sup> Jusiñamuina cai raise isirua, naimie llogacínuaína cai ñnoia, naimie cominina jai isiruiticaí.

<sup>3</sup> Jusiñamuina cai isirua, naimie llogacínuaína jai jai ñnoticaí. Naimie uai raise ñnuamona, iena finollana sefuiruiñedicaí.

<sup>4</sup> Jusiñamui díbeimo itinodí Taife ie rafuena anafefitatimaci. Cristona cai ñnuamona, Taife ie rafuena anafefitatícaí.

<sup>5</sup> Jesudí Jusiñamui Jitonana cai ñnuamona, Taife rafuena anafefitatícaí.

### *Jesucristodí Jusiñamui Jito*

<sup>6</sup> Jesucristona dane ñaitícue. Naimiedí Jusiñamui Jitona ñnoticaí. Naimie bautizajamona, naimie fiodaillamona naimiedí Jusiñamui Jitonana uñoticaí.

<sup>7</sup> Uanaicínona naimie uñnuamona, Jesucristo bautizaja facaise Jusiñamui Joreño caina iena jai uñotade.

<sup>8</sup> Jusiñamui Joreñomona, Jesús bautizajamona, Jesús fiodaillamona, Jesudí Jusiñamui Jitonana raise uñoticaí.



<sup>9</sup> Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticaí. Comini llua baifemo Jusiñamui llua faia jira, Jusiñamui llua jiaí ua feiñoiticaí.

<sup>10</sup> Jesúdi Jusiñamui Jitonana cai ñnuamona, cai comeciaí daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci.

<sup>11</sup> Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate.

<sup>12</sup> Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca ñneitimaci.

*Jusiñamui caina raise uiñote*

<sup>13</sup> Jusiñamui diga ico omoi jaca illena omoi raise uiñollena, bie cartana jai cueticue.

<sup>14</sup> Jusiñamuina cai ñnuamona, naimiena jai jaciruiñedicai. Naimiemo cai jiaí, naimie jitailla isoide rafuena cai jicaia, naimie caina cacajana raise uiñoticaí.

<sup>15</sup> Iese cai jiaí, naimie jaca fairiuana jiaí uiñoticaí.

<sup>16</sup> Jiaie creyente jeacino finuana omoi cioia, naimie facaina Jusiñamuimo jiaí. Iemona Jusiñamui ñbeimo naimiena dane itataitomoi. Jusiñamui rafuena jamaidimie facaina omoi jiaí lloñedicue. Naimie faificana jaiacade.

<sup>17</sup> Jusiñamui llogacinona bu ñnoñenia, jeacino jai finode; ia naimie facaina omoi jiaí, Jusiñamui iena feitaite. Faificana jaiacadimie facaina omoi jiaí lloñedicue.

<sup>18</sup> Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere finonide.

<sup>19</sup> Jusiñamuimo jai duidicaí. Naimie anamo jai iticaí; ia naimiena ñnoñedino Taife anamo jai itimaci.

<sup>20</sup> Jusiñamui Jito jaie eniruemo billana uiñoticaí. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicaí. Jesucristomo jiaí jai duidicaí. Ie jira Jusiñamui diga ico jaca iiticaí.

<sup>21</sup> Cue uruiaí isidomoi. Daje rafuena nia lloiticue. Jiraraimona abina rairui. Jusiñamui ieñede rafuedo omoi jaiñeno. Mai. Juandicue.

## JUAN IE EMODOMO ORETAGA RABE

### *Uanaicinona coninina cai isiruilla*

<sup>1</sup> Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiaimo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci.

<sup>2</sup> Naie uanaicinona cai uiñua jira, omoina isiruiticai. Iena uiñocana jaca jaiticai.

<sup>3</sup> Cai Moo Jusiñamui ie Jito Jesucristo diga, caina jaca duenaite. Iaimaia caina jaca uri itataite. Uanaicinona cai uiñuamona, iaimaiaina cai isiruillanona, iese iiticai.

<sup>4</sup> Caimo cai Moo llua isoi, uanaicimodo o uruiaimona dajerie jailla jira, iobidicue.

<sup>5</sup> Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticaí. Coninina cai isiruillana ñaiticue.

<sup>6</sup> Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

### *Diga taino lloraini ite*

<sup>7</sup> Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifuate. Naimiedi Cristona abi caitadimie.

<sup>8</sup> Cristo rafuedo omoi jailla jira, Jusiñamuimona buena omoi faifñellena, omoi abina rairui. Jusiñamuimona ibana feiñoitomoi.

<sup>9</sup> Cristo llogacinona bu fainonocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jaia, cai Moo Jusiñamuina uiñote. Ie Jitona jiai uiñote.

<sup>10</sup> O jofomo Cristo rafuedo jaiñedimie bia, Cristo rafuena cue llofuia isoi naimie llofueñenia, naimiena nafueño. “Jusiñamui ona canuamona, marena o jai” lloño.

<sup>11</sup> “Marena jai” o lloia, naimie marañede rafue facaina jai itio.

### *Rafuena nia lloiacade*

<sup>12</sup> Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuiridicue. Danomo cai rillamona ñaiticai, cai comeciai caimarecaillena.

<sup>13</sup> O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

## JUAN IE EMODOMO JIAIE ORETAGA RABE

### *Gayo mare rafue finocana jaide*

<sup>1</sup> Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue.

<sup>2</sup> Cue isiruigamedio. Nana o finua rafue marena jaillana jitaidicue. O ecairenana jiai jitaidicue. O comei marena illana jai uñotocue.

<sup>3</sup> Cue dine dajerie creyentiai bite. Uanaicnodo omoi jaillana llote. Cristo rafuedo omoi jaillana llote. Ie jira iobidicue.

<sup>4</sup> Uanaicnodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isoidomoi. Uanaicnodo omoi jailla jira, eo iobidicue.

<sup>5</sup> Cue isiruigamedio. Naga icaño jiaie creyentiaina o canoia, eo mare. Nia o uññoega creyentiai o illanomo ria, naimacina o canoia, ua eo mare.

<sup>6</sup> Naie isoide creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillinomo naimaci jai, naimacina o canoia, Jusiñamui jitailla isoi, ua eo mare.

<sup>7</sup> Naimie rafue llua muidona, jai macaritimaci. Jusiñamuina uññoedinomona jaca buena feiñoñedimaci.

<sup>8</sup> Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

### *Diótrufes marañede*

<sup>9</sup> O dine ite creyentiaimo cartana jai oredicue. Diótrufesna janore ñaiacadicue. Naimiedi eo uicoidimie. Naimiedi cue uaina uññoiacañede.

<sup>10</sup> O dine cue ria, naimie finoca rafuena omoimo lloiticue. Cuena jeare ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

<sup>11</sup> Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uññoñede.

### *Demetrio marena ite*

<sup>12</sup> Nana creyentiaidi Demetriona marena ñaitimaci. Uanaicnodo naimie jaide. Iese naimiena jiai ñaiticai. Cai llucacnodi uanaicinona uñnotio.

### *Rafuena nia lloiacade*

<sup>13</sup> Diga rafuena cueiacadicue; iadedi cueñeiticue.

<sup>14</sup> Raire ona cue cioillemo ocuridicue. Ie mei ñaiticoco.

<sup>15</sup> Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

## JUDAS ORETAGA RABE

### *Judadi Jusiñamui fetocanomo cartana orede*

<sup>1</sup> Cue nabaiñiai, bie carta omoi ðine oredicue. ¿Ñie isoidomoï? Judadicue. Ie rafuena llolena, Jesucristo ðibeimo jai maijicue. Jacobo cue ama. Jusiñamui omoïna jai fetuana cue uiñuamona, bie cartana oredicue. Cai Moo Jusiñamui omoïna isiruïte. Jeacïnona omoi fïnoi raillano, Jesucristo omoïna jai sedade.

<sup>2</sup> Jusiñamui omoïna eo duenaïllana omoi uiñocana omoi jaïllana jitaïdicue. Naimïe omoi comeciaina raise uri itatajana omoi uiñocana omoi jaïllana jitaïdicue. Naimïe omoïna eo isiruïllana omoi uiñocana omoi jaïllana jitaïdicue.

### *Tainocïnona llofueraini ite*

<sup>3</sup> Cue isiruïgano, omoïmo Jusiñamui caina jai jillotaja rafuena iocïre cueïacadicue; iadedi jiaïe rafue birui illa jira, omoïmo cueticue. Jusiñamuïmona cai feiñoga rafuena omoi eo riïduana jitaïdicue. Naïe rafuena Cristo oretaganomona cacadicai. Naïe rafuena meïdonïdicai. Ieconi ðuide. Jusiñamui jiaïe rafuena lloñeïte.

<sup>4</sup> Caïmo ite rafuena omoi eo riïduana jitaïdicue. Cai creyentiaï motomo dajerie tainocïnona llofueraini illa jira, iena jitaïdicue. Uanaïcïnona llofuecana naimaci illamo cai comeciaina facadicai; iadedi Jusiñamui jitaïllacïnona fïnoñeïmaci. “Jusiñamui caina duenaïllamona, jeacïno fïnocana cai jaïa, cai jeacïnona oni ðotaïte” llofuecabitïmaci. “Cai jeacïno facaina caina ðuere fïnoñeïte” llofuecabitïmaci. “Jeacïno fïnocana cai jaiacania, caïmona mare” llofuecabitïmaci. “Jesucristo cai Namana” llofueñeïmaci. Naimïe lloga rafuedo jaiacaiñeïmaci.

“Naimaci isoidïnona ðuere fïnoïticue” Jusiñamui jaïe llote. Naimïe ðuere sefuïllacïno anamo jai itïmaci.

<sup>5</sup> Iemona omoi raise fueollena, bie rafuemo omoi comeciaina faca. Bie rafuena navui llofueïcaci. Iena raise cacadomoï; iadedi iena dane uibiño. Iena lloïticue. Ero, bie enïruemo naimaci billena, Egiptomona Jusiñamui cai jaiagaina bitatate. Naimïena naimaci ïnoñena jira, bie enïruemo riñeïmaci; iadedi Jusiñamuidi jofue iñenanomo naimaci fïodaïllena llote. Iemona naimaci fïodaitïmaci. Ie isoïde. Naimïena birui omoi ïnoñena, omoïna ðuere fïnoïte.

<sup>6</sup> Ero, bie rafuemona omoi fueua. Jusiñamui ecïmo ite jaienisaimona dajerie imaci illanona jaïe jitaïñeïmaci. Naimïe isoï iacadïmaci. Naimaci illano naimïe ecïmo jaïe itïmaci. Naimaci jitaïlla rafuena naimaci fïollena, naimïe ecïmo illana faïnonocaidïmaci. Iemona naimïe naimacina jai oni ðotade. Naimïe illanomo dane iñeïtïmaci. Naimacïmo ite uai jai iñede. Naimïe riïcaïllafue anamo jai itïmaci. Naimïe ðine nana comïni illïrui ia, naimacina ðuere fïnoïte. Naimacïmona omoi fueua. Jeacïnona Jusiñamui ðibeïmo itïno fïnoïa, Jusiñamui naimacina ðuere fïnoïte.

<sup>7</sup> Ero, bie rafuemona omoi fueua. Sodoma raïlla naïraï micoriaï maraïñeïcïnona jaïe eo fïnoïdïmaci. Gomorra raïlla naïraï micoriaï daje isoidïmaci. Nainomo ianori ite naïraïaï daje isoidïmaci. Naimaci aïñede riñoniaï ðiga itïmaci. Naïñaiñuaï iñeïde iñiaï ðiga itïmaci. Conïnina aïfïeïdotïmaci. Iemona Jusiñamui naimacina jaïe ðuere fïnode. Nana naimaci illanona raise jaïe jobaitate. Naimacïmona omoi fueua. Jusiñamui nana jeacïnona fïnodïnona ðuere fïnoïte.

<sup>8</sup> Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaia jeare ñaitimaci.

<sup>9</sup> Miguelna mameciredo jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiafade. Taife diga Moisés micori abina uaitate. Taife Moisés micori abina bairoafade. Miguel iena jiai jitaide. Miguel Taife diga riire ñaite; iadedi Taifena jeare ñaiñede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”.

<sup>10</sup> Naie taino llofueraini iese iñedimaci. Jusiñamui jaienisaia jeare ñaitimaci. Ocainaijai imaci comeciai uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci.

<sup>11</sup> Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judíuai cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori ñinoñena jira, Jusiñamui naimie micorina meinete. Jusiñamui uaina naie taino llofueraini ñinoiacaiñena jira, jiai faifitimaci.

<sup>12</sup> Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riara isoidimaci. Llisilla facaise riara llisiñenia, maraiñede. Riara llisiñenia, iena oni aiñodicai. Maraiñena jira, safenaite. Naimaci maraiñena jira, naie taino llofueraini jiai safenaitimaci.

<sup>13</sup> Naie taino llofueraini jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñaicosite. Ucuaina eruaillamona naiona cai macarillana uiñotica; iadedi ucudu ana feia, cai macarillana raise uiñoñedicai. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuiacinomona Jusiñamui jitailla rafuedo cai raise jaillana uiñoñedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

<sup>14</sup> Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisaia diga biite,

<sup>15</sup> nana naimiena ñinoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote.

<sup>16</sup> Naie taino llofuerainidi creyentiaina sedarainina uaitaside. Jusiñamuina jeare ñaoidimaci. Dani naimaci jitailla rafuena finoidimaci. Eo abina biruidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

<sup>17</sup> Cue isiruiga amatiai, cai Nama Jesucristo oretagano jai llogacinona omoi começi.

<sup>18</sup> Raitimaci: “Jesucristo nia abido biñena facaiseconi naimie uaina ñnoñedino jaca iitimaci. Naimaci jearede jitaillacinodo jaitimaci” raitimaci.

<sup>19</sup> Naie taino llofueraini comini começiai daje isoi lloillana itatañedimaci. Jusiñamui dibeimo ññede rafuena gaidimaci. Jusiñamui Joreño naimacimo ññede.

<sup>20</sup> Cue isiruigano, naimaci isoi omoi ññeno; iadedi Jusiñamui rafue ñnocana mai omoi jai. Naie rafuedi mare. Jusiñamui Joreño omoïna canuacinodo Jusiñamuimo omoi jii.

<sup>21</sup> Jusiñamui omoïna isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenaila jira, naimie ecimo jaca iiticaï.

<sup>22</sup> Diga comini naie taino llofueraini rafuedo jaidimaci. Iemona dajerie Jusiñamui uaina raise nia ñnoñedimaci. Naimacimo llono: “Mai ñno.

<sup>23</sup> Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruiocaida duenai.

*Jusiñamuimo iobillacinona cai fecacabillasa*

<sup>24</sup> Jusiñamuidi omoïna jeacinona finoñenana itatarede. Naimie uicomo omoïna ico itataite. Omoïna jeacinona omoi jaca finoñedena nainomo itataite. Nainomo iocire iitomoï.

<sup>25</sup> Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Nagerana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.



## JUAN ICO SUILLE RAFUENA CUIAFUE

### *Jesucristo ico suille rafue lluana cueticue*

<sup>1</sup> Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jaiiruido ico ebena suille rafuena uiñotade. Cuen a iena uiñotallena, iena cuemo llollena, ie jaienici cue dine oretate.

<sup>2</sup> Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue cúa rafuena jiai jai cueticue.

<sup>3</sup> Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iairei illa jira, iemo raise cacarei.

### *Siete creyentiai illanuaimo bie carta oredicue*

<sup>4</sup> Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaicue. Iena omoi uiñollena, biena cueticue. Jusiñamui ie Joreño diga, Jesucristo diga, omoina duenaicabide. Omoina uri itatacabite. Iena omoi uiñocana mai omoi jai. Jusiñamui jai jaca ite. Birui naimie jaca ite. Ico jaca iite. Ie Joreño naimie abimo illamona, omoina bie rafuena raise cacataite. Iena inotaite.

<sup>5</sup> Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodañena jira, nana illaicomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade.

<sup>6</sup> Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaicue.

<sup>7</sup> Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaiie meinete nairaidi naimiena cioitimaci. Duere sefuillana jacinaillamona nana comini eecuitimaci. Iese jaca suite.

<sup>8</sup> Cai Nama Jusiñamui cuemo llote: “Jaca bue nia iñenia, jaiie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iticue. Siño jitodicue”.

### *Juan Cristona cide*

<sup>9</sup> Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iticai. Naimie cai comeciaina ocuiñotajamona iemo birui ocuridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illaicomini bene cuena birui oredimaci.

<sup>10</sup> Jusiñamuina cue sedajamona, naimie Joreño cuena namatajamona, inñenamona nicairilla isoi cue jinafo dine damie ado lluana cacadicue. Trompeta isoi ie uaidi ficirede.

<sup>11</sup> Cuemo llote:

—O cioacalle rafuena cueno. O cacacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —llote.

<sup>12</sup> Cuemo llotimiena cue cioillena, jinafo dine erodaticue. Siete oromona finoca lamparíniai ciodicue. Naga lamparín ie oromona finoca rairacomo raide.

<sup>13</sup> Naie lamparíniai motomo imana eruaidimiena ciodicue. Naimiedi Cristo. Areroina jitade. Oromona finoca cinturóna jitade.

<sup>14</sup> Naimie ifotirai userede iniroi isoi eo userede. Naimie uisi irai boa isoi eruaide.

<sup>15</sup> Naimie eillidi bronze eo dua isoi quenirede. Naimie uai aillue ille tua isoi eo ficirede.

<sup>16</sup> Ie nabeillimo siete ucuduna llide. Naimie fuemo nagafebei eo jairede lloebi ite. Naimie uieco eo quenirede, jitoma eo lligaiñua isoi.

<sup>17</sup> Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuena jaciruiño. Siño jitona cue illamona, jaie jaca iticue. Ico jaca iiticue.

<sup>18</sup> Jaie fiodaiticue; iadedi naiemona jaie jillodicue. Jaca iiticue. Dane fiodaiñeiticue. Cue uai siñona jira, comini fodailliruina lloticue. Cuena inoñedino fodailla mei, naimaci joreñuai illinona jiai lloticue.

<sup>19</sup> O como ciua rafuena cueno. Omo cue ja llole rafuena cueno. O ciolle rafuena jiai cueno.

<sup>20</sup> Ailluena rafue omo lloiticue. Ona iena uiñotaiticue. Cue nabeillimo siete ucuduaina ciodio. Bie siete ucuduaidi bie siete creyentiai llofueraini isoide. Bie siete lamparíniaidi bie siete illanomo ite creyentiai isoide. Bie creyentiaina ja ñaiacadicue —raite.

## 2

### *Cristo Efesomo ite creyentiaimo lloga rafue*

<sup>1</sup> Cristo cuemo llote:

—Efesomo ite creyentiaimo llolena, nainomo ite llofueraimamo cue llua cueno: “Cue nabeillimo siete ucuduai ite. Siete oromona finoca lamparíniai motomo iticue. Omoina ñaiticue. Omoi llofueraima cue anamo ite. Omoi motomo cue illamona, cuena nabaidomoi.

<sup>2</sup> Omoi motomo cue illa jira, omoi illana raise uiñotacue. Omoi comeciiai ocuiñocana iciriño itomoi. Maraiñedicinona finoraini diga nabairiñedomoi. Omoi motomo damerie ‘Cristo oretagaca’ raitinona facciamona, naimaci tainona llorainina uiñotomoi.

<sup>3</sup> Omoi comeciiai ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuena inocana nia jaidomoi.

<sup>4</sup> Iese itomoi; iadedi omoi abi rafue cuemona birui janore ite. Creyentiaina omoi nano jailla facaise cuena eo isiruitomoi; iadedi birui iese cuena isiruiñedomoi.

<sup>5</sup> Iemo omoi comeciaina faca. Cue dibeimo dane raise i. Cuena omoi nano isiruilla facaiseconi omoi illa isoi, cue jitaillacinona birui omoi fino. Cue dibeimo omoi comeciiai dane raise iñenia, omoina duere finoiticue. Iemona omoi lamparín oni uiticue. Omoi creyentiaina ñaiticue. Cue dibeimo raise omoi iñenia, jiairuido omoi illanomo creyentiai iñeitimaci.

<sup>6</sup> Omoina marecinona jiai lloiticue. Nicolaítas railla comini finoca rafuena gaiñedomoi. Iena jiai gaiñedicue. Eo maraiñede rafuena finocana jaidimaci.

<sup>7</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai inua. Cuena raise inotonomo Jusiñamui illanomo ite riarana iiticue. Ie lilllemona jaca iitimaci” cueno.

### *Cristo Esmirnamo ite creyentiaimo lloga rafue*

<sup>8</sup> Cristo cuemo llote:

—Esmirnamo ite creyentiaimo lollena, nainomo ite llofueraimamo cue lluana cueno: “Jaie jaca iticue. Eniruemo jaie cue ia, fiodaiticue; iadedi naiemona jai jilloditcue. Jaca iititcue.

<sup>9</sup> Cue cominina omoi illa jira, duere sefuidomoi. Omoi duerenana uifnoticue. Benomo dueredomoi; iadedi Jusiñamuimona duenidomoi. Naimie dine ico omoi ia, buerenitomoi. Damierie omoi na jeare ñaiana uifnoticue. Naimacidi judíuai comini; iadedi cue dibeimo iñedimaci. Taife anamo itimaci.

<sup>10</sup> Ico omoi duere sefuia, jaciruiño. Taife cárcelmo omoi mona damieriena itataite. Abido danomo omoi jaillena, iese omoi na duere finoite. Diez digarui duere sefuitomoi. Omoi ille dinori cuena ñnocana omoi jai. Duere sefuillamona bu fiodaia, cue diga jaca iite.

<sup>11</sup> Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faifñeitimaci; ia Jusiñamui dine jaca iitimaci” cueno.

### *Cristo Pérgamomo ite creyentiaimo lloga rafue*

<sup>12</sup> Cristo cuemo llote:

—Pérgamomo ite creyentiaimo lollena, nainomo ite llofueraimamo cue lluana cueno: “Nagafebei eo jairede lloebi cuemo ite.

<sup>13</sup> Omoi illana uifnoticue. Taife anamo itino motomo itomoi; iadedi cuena ñnocana nia jaidomoi. Omoi mona Antipas micorina navui meinetimaci. Naimie micoridi cue rafuena raise llofueuide. Naie facaise cuena fañonocaiñedomoi;

<sup>14</sup> iadedi cuemona janore rafue omoi diga birui ite. Omoi mona damieriedi Balaam micori llofuiacinodo jaidimaci. Balaam micori Balac micorimo jaie llua jira, omoi jaiagai jeacino finodimaci. Balac cominimo omoi jaiagai diga nabairillena llote. Ie jira omoi jaiagai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naiemona jearede rafue comuide. Omoi mona birui damierie iese isoidimaci. Cuena ñnoñedinomona ainiaina otimaci.

<sup>15</sup> Omoi mona damierie nicolaítas railla llofuiacinodo jiai jaidimaci. Naimaci llofuiacinodi uanaiñedicino.

<sup>16</sup> Naie llofuiacinomona eneno mai omoi i. Iedo jaiño. Naie llofuiacinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena ñnoñedinona duere finoitcue.

<sup>17</sup> Jusiñamui Joreñomona cue lloga rafue ite, omoi creyentia iena. Bie rafue bu cacajia, iena jiai ñnua. Judíuai jaiagaimo maná railla guille cue illa isoi, cuena raise ñnotinomo monamo jai ite maná isoi iititcue. Biena ñaiticue. Imaci comeciaina ocuiñotajacinona iititcue. Cue cominina naimaci illamona, naimacimo userede noficina jiai iititcue. Nainomo mameci ite. Dani naiena feiñotino naie mamecina uifnotimaci” cueno.

### *Cristo Tiatiramo ite creyentiaimo lloga rafue*

<sup>18</sup> Cristo cuemo llote:

—Tiatiramo ite creyentiaimo lollena, nainomo ite llofueraimamo cue lluana cueno: “Jusiñamui Jitona cue illanona, bie rafue omoi mo lloiacaditcue. Cue uisi irai isoi boode. Cue eilli bronze eo dua isoi quenirede.

<sup>19</sup> Omoi finoca rafuena uifnoticue. Jusiñamuina omoi isiruillana uifnoticue. Jiaie cominina omoi isiruillana uifnoticue. Cuena omoi ñnuana uifnoticue. Jiaie creyentiaina omoi canocabillana uifnoticue. Duere sefuidomoi; iadedi

omoi comeciai ocuiñuana uiñoticue. Navui iese icana jaidomoi. Birui bai lliai jaidomoi;

<sup>20</sup> iadedi cuemo omoi diga rafue ite. Omoi motomo maraiñede riño ite. Jezabelna ñaiticue. Naiñaiñona omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanaiñedicinona llofuecabilla jira, omoimona damieriena jifue. Jearede rafuena llofuecabite. Omoi aiñede riño diga illana llofue. Omoi iniñede iima diga illana llofue. Jiraraimo fecaca guille guillena llofue. Iena guilla jira, omoimona damierie naie jiraraina sedade. Iese naiñaiño llofuecabite.

<sup>21</sup> Naiñaiño comeci iuai meidollena are sedadicue; iadedi naiñaiño naie jearede rafuena faionocaiacaiñede.

<sup>22</sup> Naiñaiño duere sefuillena, naiñaiñona duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue.

<sup>23</sup> Naiñaiño dibeimo itinona meineiticue. Nana creyentiaidi nana comini comeciai iuaillaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi.

<sup>24</sup> Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue;

<sup>25</sup> iadedi cue nia abido biñenia, cuemona omoi uiñooga rafuena ñnocana mai jai.

<sup>26</sup> Cue Moomona cue uaina feiñoticue. Cuen a raise ñnuamona, abido cue bia, cue jitaillacinona finocabidinomo cue uaina iiticue. Naie faise cue uai diga cue anamo ite nairaiaina raise sedaitimaci.

<sup>27</sup> Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llailla isoi.

<sup>28</sup> Cuen a ñnotinomo monairaicuduna jiai iiticue.

<sup>29</sup> Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cueno.

### 3

#### *Cristo Sardimo ite creyentiaimo lloga rafue*

<sup>1</sup> Cristo cuemo llote:

–Sardimo ite creyentiaimo lollena, nainomo ite llofueraimamo cue llua cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise ñnoticai’ raitomoi; iadedi omoi comeciaimona raise iñedomoi.

<sup>2</sup> Cue dibeimo raise dane i. Cuen a dane raise ñnocana jai. Cuen a jai faionocaiacadomoi. Jusiñamui omoi finoca rafueri iobiñede.

<sup>3</sup> Cue rafuena jai cacajamona, iena ñnotomoi. Iedo dane jai. Omoi comeciai iuaina dane meido. Cue dibeimo dane raise omoi iacaiñenia, firiraima bainino billa isoi, omoina duere finollena, ebena biiticue. Omoi dine cue billiruina uiñoñeitomoi.

<sup>4</sup> Omoimona damierie jearede rafuena finocana jaiñedinomoi. Jusiñamui naimaci comeciai marena jira, cue dine naimaci illena, userede iniroina jitaimitimaci.

<sup>5</sup> Cuen a ñnocana jaidinodi userede iniroina jitaimitimaci. Cuemo ite rabenicomona naimaci mameciaina doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue.

<sup>6</sup> Jusiñamui Joreñomona cue lloga rafue ite, omoi creyentiaï iena. Bie rafue bu cacajia, iena jiaï ñnua” cueno.

*Cristo Filadelfiamo ite creyentiaïmo lloga rafue*

<sup>7</sup> Cristo cuemo llote:

–Filadelfiamo ite creyentiaïma llollena, nainomo ite llofueraïmamo cue llwana cueno: “Mareuidimiedicue. Uanaicinona jaca lloticue. David micori jitona cue illamona, illaïmana cue illa jira, siño uai cuemo ite. Ie muidona cue jitailla diese cominina feiñoticue. Jusiñamui illanomo naimaci illena, naimacina feiñoticue. Cue jitailla diese cominina feiñoñedicue.

<sup>8</sup> Omoi finoca rafuena uiñoticue. Omoïna cue canua jira, jaca buna cue rafuena omoi llwana itatanide. Jamai bue isoidomoi; iadedi cue rafuena ñnocana jaidomoi. Cuena janoñedomoi.

<sup>9</sup> Omoi dine damierie Taife anamo itimaci. Naimacidi judíuai; iadedi cue dibeïmo ñnedimaci. Tainona llocabitimaci. Ero, omoi dine naimacina cue bitatajamona, omoïna cue isiruillana uiñoitimaci. Cue dibeïmo naimaci jailla mei, cuemo iobillacinona fecaitimaci.

<sup>10</sup> Nana cuena ñnoñedinona ico eo duere finoiticue. Iemona cuena naimaci ñnoñenana uiñoiticue. Omoi duere sefuiñellena, naie facaisemona omoïna jillotaiticue.

<sup>11</sup> Eniruemo ebena abido biiticue. Cuemona ñbana omoi feiñoñeni raillano, cue dibeïmo ñnocana omoi jai. Cue dibeïmo raise omoi jaiñenia, cuemona jiaïmie omoi facaina ñbana feiñoite.

<sup>12</sup> Cuena raise ñnotino comeciaina ocuiñotaiticue. Cue illanomo jaca iitimaci. Cuemo naimaci duilla jira, cue jiaïe mamecina naimaci abimo cueiticue. Jusiñamui mamecina naimaci abimo cueiticue. Jusiñamui illano mamecina naimaci abimo cueiticue. Naimie illanodi comue Jerusaléna mameciredede. Naimiemona, monamona ico ana biite.

<sup>13</sup> Jusiñamui Joreñomona cue lloga rafue ite, omoi creyentiaï iena. Bie rafue bu cacajia, iena jiaï ñnua” cueno.

*Cristo Laodiceamo ite creyentiaïmo lloga rafue*

<sup>14</sup> Cristo cuemo llote:

–Laodiceamo ite creyentiaïmo llollena, nainomo ite llofueraïmamo cue llwana cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate.

<sup>15</sup> Omoi finoca rafuena uiñoticue. Cue rafuedo jaillana nia faïnonocaiñedomoi; ia cue rafuedo eo raise jaiñedomoi. Janore ñnocana jaidomoi.

<sup>16</sup> Omoi finoca rafuena cue gaiñena jira, cuemona omoïna oni dotaiticue.

<sup>17</sup> ‘Ucuberedicai’ raitomoi. ‘Raruiaredicai. Nana cai jitailla ra caïmo ite’ raitomoi. Cuemona iese ñnedomoi. Cuemona dueredomoi; ia iena uiñoñedomoi. Cuemona caïmare ñnedomoi. Cuena omoi raise ñnoñena jira, uisïnidino isoidomoi. Taimiedomoi isoidomoi.

<sup>18</sup> Ie jira omoïna dajerie rafuena llofueiticue. Cuemona omoi eo duerena jira, omoi comeciï raise ññena jira, omoïmo fiebidicinona cuemo jica. Cuemona ono. Omoi duenillena, cuemona eo mare oro isoide rana ono. Omoi taimieñelle isoïñellena, cuemona omoi meiruiñellena, userede ñiroi isoide ra cuemona ono. Omoi uisïna cioille isoïllena, cuemona manue ono. Omoi comeciïna ñaiticue. Cuena raise omoi ñnoïa, buena omoi comeciïmo fiebiñeite.



<sup>19</sup> Cue isiruigano cue dibeimo raise illena, naimacimo riire llocabiticue. Cue uaina naimaci ñnollena, naimacina jiai duere finocabiticue. Ie jira cue dibeimo raise omoi i. Jeacino omoimo ia, iena fainonocai.

<sup>20</sup> Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacaja mei, iena omoi ñnoia, cuena feiñoitomo. Iemona conini nabaiticai.

<sup>21</sup> Eniruemo cue Moo jitailla rafuena jaie cue fuidua mei, naimie ecimo abido jai iticue. Cueri naimie iobillamona, illaimana cue illamona, naimie ecimo jai iticue. Ie isoide. Cuena raise ñnotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue.

<sup>22</sup> Jusiñamui Joreñomona cue lloga rafue ite, omoi creyentia iena. Bie rafuena bu cacajia, iena jiai ñnua” cueno.

## 4

### *Juan Jusiñamui illanomo ciua rafue*

<sup>1</sup> Dallu illanona monamo cue eruaia, jiaie rafuena cioticue. Nainomo Jusiñamui illanomo econoga nasena cioticue. Ailli cue diga ñaitimiedi cuena uaidote. Naimie uai trompeta isoi ficirede. Llote:

—Monamo bi. Jiairuido suille rafuena omo acataiticue.

<sup>2</sup> Jusiñamui Joreño anamo cue illamona, nicairilla isoi Jusiñamui illanona cioticue. Nainomo naimie ana raillana cioticue.

<sup>3</sup> Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiairede. Naie illano ecimo ameona cioticue. Ameo mocorena jira, esmeralde railla noficina eruaide.

<sup>4</sup> Naie illano ecimo veinticuatro raibrabici jiai ite. Nainomo userede ñniroina jitajanona veinticuatro einamací ana raídímaci. Naimaci ifogimo oromona finoca nuicirai ite.

<sup>5</sup> Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraídi Jusiñamui Joreño mamecido nainomo boode.

<sup>6</sup> Jusiñamui illano uicomo vidriona eruaide joraina cioticue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite.

<sup>7</sup> Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide.

<sup>8</sup> Nagamiaiimo seis iaico ite. Ailluena uisi naimaci iaicuaiimo ite. Naimaci abimo uisi jiai eo ite. Nagarui ñniño jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaie jaca ite. Birui ite. Ico jaca iite.

<sup>9</sup> Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia,

<sup>10</sup> naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona,

<sup>11</sup> rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.



O jitailla jira, naimaci itimaci.  
Ie jira iobillacinona omo fecacabidicai.

## 5

### *Juan Jusiñamui illanomo ferinoga rabe illana ciodicue*

<sup>1</sup> Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ibaibide.

<sup>2</sup> Jusiñamui ie nanoca jaienici ado lluana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

<sup>3</sup> Monamo itinomona, enirue itinomona, jai fioidaitinomona, bummo ie uai iñede, naie rabe oni econollena. Naie rabe facanidimaci.

<sup>4</sup> Jaca bummo naie uai iñena jira, eo eedicue.

<sup>5</sup> Naie facaise naie veinticuatro einamacimona damie cuemo llote:

—Mai eeñeno. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

<sup>6</sup> Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamacimaci naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimmo Cristodi Jusiñamui Joreña jai orede.

<sup>7</sup> Naie facaise Jusiñamui ie nabellimona naie rabena ote.

<sup>8</sup> Iena naimie ua mei, naie cuatro cajedino, naie veinticuatro einamacimaci diga, naimiena sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamui comini jiacino mamecido ite.

<sup>9</sup> Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jai ona meinetimaci.

O fioidailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

<sup>10</sup> Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jairuido eniruemo ite cominina sedaitimaci.

Ie jira naie rabena oni suiñoredio.

<sup>11</sup> Iemei dane eruaillamona, naimie ecimo eo ailluena Jusiñamui jaienisaia ciodicue. Naie cuatro cajedino ecimo, naie veinticuatro einamacimaci ecimo itimaci. Diga illa jira, facanide.

<sup>12</sup> Ado llotimaci:

Bie Toica Llauda isoidimie jai fioidaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uiñotajamona, naimiena jiai iobitaiacadica.

Naimiena cai inuanona, naimiemo iobillacinona feaacadica.

<sup>13</sup> Iie facaise nana comini, nana Jusiñamui comuitaga ra diga, lluana cacadicue. Monamo itino, enirue itino, jai fioidaitino, monaillaimo itino lluana cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feacaadicaí. Caina jaca sedallesa.

<sup>14</sup> Naie cuatro cajedino raitimaci:

—Ie isoi jiaí lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

## 6

### *Juan siete nitaca ra oni suiñuana ciode*

<sup>1</sup> Toica Llauda isoidimie mo iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi lluaana cacadicue. Naimie llote:

—Mai bi.

<sup>2</sup> Naimie llua mei, userede caballo billana ciodicue. Caballo emodo itimie mo sicuirá ite. Illaimana jira, naimie ifogimo nuicirai jide. Ie bacauai anafefitallena, oni jaide.

<sup>3</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>4</sup> Naimie llua mei, jiairede caballo billana ciodicue. Caballo emodo itimie mo are lloebi illamona, Jusiñamui jitaila jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

<sup>5</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite.

<sup>6</sup> Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomeniconá finoia, dacaiño guille raifi ite. Tres kilos cebada ie core darui maijia ua ucube diese raifide. Iena damie oia, iemona llomeniconá finoia, dacaiño amani guille raifi ite. Illimo riarania ite; ia iena iballena ucube baiñede. Ie muidona aime guitimaci —llote.

<sup>7</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>8</sup> Naimie llua mei, liai usereoide caballona ciodicue. Ie emodo itimie mamecidi fiodaitimie. Jusiñamui uai naimie mo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, rairede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riaí uaimona ie cuarta facaina comini fiodaitimaci.

<sup>9</sup> Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicaí” naimaci llua jira, Jusiñamuina ñoñedino naimacina meinetimaci. Jai fodaillamona naimaci joreñuai Jusiñamui illanomo jai itimaci.

<sup>10</sup> Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

<sup>11</sup> Jusiñamui cominina illamona, naimacimo Jusiñamuidi userede areroína jitalleña fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meineitimaci. Naimacina meinia mei, ibana oiticue.

<sup>12</sup> Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi diruena eruaide. Jiairede.

<sup>13</sup> Riirede aifi riara ana llutaja isoi, monamona eniruemo ucuaillude.

<sup>14</sup> Ferinoga rabe oni uilla isoi, mona iñebicaide. Naga anedu, naga uiasi diga jiaie oni jaide.

<sup>15</sup> Ie jira illaicomini, jamai bue isoinedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci.

<sup>16</sup> Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui ricaillafuemona caina reirita. Llauda isoidimie ricaillafuemona caina reirita.

<sup>17</sup> Iaimaiaie ricaillarui jai ite. Naiemona buna jillobinide —llotimaci.

## 7

### *Juan ailluena Israel comini Jusiñamui sello diga nitajana ciode*

<sup>1-2</sup> Naie facaise jiaie ico sülle rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiaie beicimo itiaimaiaie. Aifi biñellena itimaci. Ie muidona monaillai dine aifi iñede. Aifi iñena jira, amenaiaie nirairiñede. Eniruena monaillai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado llote:

<sup>3</sup> —Eniruena aifi diga maraiñeno nia finoñeno. Monaillaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecuai itofiaie sello diga nia cai nitañenia, eniruena maraiñeno finoñeno.

<sup>4</sup> Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci.

<sup>5</sup> Judá micori cominimona doce mil ite. Rubén micori cominimona doce mil ite. Gad micori cominimona doce mil ite.

<sup>6</sup> Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite.

<sup>7</sup> Simeón micori cominimona doce mil ite. Leví micori cominimona doce mil ite. Isacar micori cominimona doce mil ite.

<sup>8</sup> Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

### *Juan ailluena comini userede iniroina jitajana ciode*

<sup>9</sup> Naie facaise ailluena cominina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuaie ite.

<sup>10</sup> Ado llotimaci:

Bie Llauda isoidimie jiaie fodaillamona, cai jeacinomona Jusiñamui caina jai jillotate.

<sup>11</sup> Naie facaise nana Jusiñamui jaienisaie naimie ecimo naidailana ciodicue. Naie veinticuatro einamacie ecimo, naie cuatro cajedino ecimo jiaie naidaidimaci. Naie facaise Jusiñamui uicomo ana bitadajanona, naimiena sedadimaci.

<sup>12</sup> Raitimaci:

Bie comini isoi omo iobillacinona jiaie feaacadicaie.

Odi mareuidimedio. Abina eo uiñotio. Odi jaca siño jitodio.

Ie jira iese lloticaie.

Ona jaca cai iobitajasa.

<sup>13</sup> Naie facaise naie veinticuatro einamacimona damie cuemo jicanote:

—¿Userede iniroina jitadinodi nimaci? ¿Ninena bitimaci?

<sup>14</sup> Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina inoñedino meinogano. Naimaci iniroina jai jocoritimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiai ñaiticue. Llauda isoidimie fiodailla jira, naimaci comeciai jai jeanide.

<sup>15</sup> Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite.

<sup>16</sup> Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci.

<sup>17</sup> Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunaiñeitimaci.

## 8

### *Juan Llauda isoidimie iraiie nitaca ra oni suiñuana cide*

<sup>1</sup> Toica Llauda isoidimie iraiie nitaca ra oni suiñuanona, media hora monamo tii raiñoicaide.

<sup>2</sup> Iemei siete Jusiñamui jaienici naimie uicomo illana ciodicue. Nagamiemo daje trompetana fecade.

<sup>3</sup> Naie facaise jaiie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina inotino jiacino Jusiñamuimo jaide.

<sup>4</sup> Jobaillamona Jusiñamui uicomo a jaide. Nana Jusiñamuimo jiacino diga a jaide.

<sup>5</sup> Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

### *Juan trompetas fillana cacade*

<sup>6</sup> Iemei naie siete jaienici naimaci trompetas fillena llinote.

<sup>7</sup> Damie ie trompetana fite. Filla jira, monamona janorede hielu, boode ra diga, dirue diga, eniruemo uaide. Atuedo enirue booñede; ia ailluena boode. Riai uaimona ie tercera facaina boode. Nainomo nana amenaiai boode. Nainomo nana raiticño boode.

<sup>8</sup> Jiaie jaienici ie trompeta fite. Filla jira, Jusiñamui anedu isoide boode ra monaillaimo faite.

<sup>9</sup> Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciai fiodaite. Nainomo ite botemona ie tercera facaina jiai anabaite.

<sup>10</sup> Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illenai, ie tercera facaina jorainiai diga erireficaide.

<sup>11</sup> Ie muidona naie ucudu Ajenjona mameciredede. Riaí uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fiódaitimaci.

<sup>12</sup> Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

<sup>13</sup> Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

## 9

<sup>1</sup> Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana cidicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci.

<sup>2</sup> Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide.

<sup>3</sup> Uilliemona fióduaína eruaillanona, Taife comini, Janaba comini diga jino billanona, nana eniruemo bitimaci. Jusiñamui lua jira, acaido isoi fióduai eruidinodi maitimaci.

<sup>4</sup> Raiticiño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci.

<sup>5</sup> Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite.

<sup>6</sup> Iese ico suia, eo duere comini sefuilla jira, fiódailana jitaitimaci. Naimaci abina meineacanitimaci. Fiódaiacanitimaci; ia fiódainitimaci.

<sup>7</sup> Fióduaídi jobaime dine jaide caballuaina eruidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruidimaci.

<sup>8</sup> Naimaci ifotie arena illanona, riño ifotiena eruaide. Naimaci isiduai leones isiduaína eruaide.

<sup>9</sup> Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci.

<sup>10</sup> Naimaci omacai acaido isoide. Naie diga maillanona, cinco fivui cominina duere finoitimaci.

<sup>11</sup> Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie.

<sup>12</sup> Daje duere sefuilla rafue jai fuite. Mena nia suiñede.

<sup>13-14</sup> Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño —llote.

<sup>15-16</sup> Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñeditimaci. Riaí uaimona ie tercera facaina meinetimaci.

<sup>17</sup> Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mocorede. Daje facaise borarede. Caballos ifogiai leones ifogiaína eruaide. Naimaci fueomona boode radi, uillie diga, azufre boa isoi jino bite.

<sup>18-19</sup> Naimaci fueomona bite rado ailluena cominina meinetimaci. Ie tercera facaina meinetimaci. Caballos omacai jaiona eruidimaci. Naimaci

omacaimo jaiona eruaide ifogi itimaci. Ailluena cominina jiai duere finodimaci.

<sup>20</sup> Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, broncemona, noficimona, amenamona finoca jiraraiana nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci.

<sup>21</sup> Conini meinecabitimaci. Aimaniai dine jaicabidimaci. Naimaci aiñede riño, naimaci iniñede ima diga icabitimaci. Rana ficabidimaci. Jeacinona finocana nia jaidimaci.

## 10

### *Juan Jusiñamui jaienici, econoga rabenico diga, billana ciod*

<sup>1</sup> Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide.

<sup>2</sup> Naimie onollimo econoga rabenico ite. Eniruemo naimie ria, naimie nabei eilli monailai emodomo naidaide. Ie jarifebei eilli eniruemo naidaide.

<sup>3</sup> León eo irilla isoi, ado llote. Naie facaise siete gurua ñaia isoidino uai cacadicue.

<sup>4</sup> Naimaci llwana cacaja mei, iena cueiacadicue; iadedi monamona damie cuemo llote:

—Naie llwana lloño. Iena cueño.

<sup>5</sup> Naie jaienici ie nabei onolli mona dine ñuitajanona,

<sup>6</sup> Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monailai nainomo ite ra diga jiai finodio. Cue baifemo o faia jira, uanaicinona cue llwana uiñotio. O lloga uaina jaca suite.

<sup>7</sup> Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jiaie lloga rafue suite. Comini naie rafue jiaie raise cacaiñedimaci; ia iena ja raise cacaitimaci —llote.

<sup>8</sup> Monamona cuemo ailli llotimie dane llote:

—Jaienici onollimo econoga ite rabeniconna llinuai.

<sup>9</sup> Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Cifo isoi o fuemo iena cacaitio; iadedi o jebemo erirede ra isoi iena cacaitio.

<sup>10</sup> Llinua mei, iena guiticue. Cifo isoi naimeredede rana cacadicue; ia guilla mei, erirede ra isoi cue jebemo ite.

<sup>11</sup> Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

## 11

### *Juan menamie Jusiñamui rafuena llwana cacade*

<sup>1</sup> Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca.



<sup>2</sup> Cue jofu ecimo ite taibirina facañeno. Naie illano judíuainedino jainaiade. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci.

<sup>3</sup> Naie facaise menamiemo cue uaina iiticue. Iaimaiaie cue lolle rafuena daje amani años abimo atomonado lloitiaimaiaie. Comini comeci iuai meidua ana iaimaiaie jitailla jira, sunaillamona, ebinide iniroina jitaitiaimaiaie —llote.

<sup>4</sup> Iaimaiaie mena olivos railla riará mamecido itiaimaiaie. Enirue Namana Jusiñamui illanona, naimie uicomo mena ite lamparín ie rairaco mamecido itiaimaiaie.

<sup>5</sup> Iaimaiaina duere bu finoacania, naimiena meineitiaimaiaie. Iaimaiaie fue mona boode ra billanona, naimiena meinetiaimaiaie Iaimaiaina duere finodino iese fioidaitimaci.

<sup>6</sup> Iaimaiaie Jusiñamui rafue lolle facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaiaie jitaicabilla facaise, diga isoide rafue finuamona cominina duere finoitiaimaiaie;

<sup>7</sup> iadedi Jusiñamui rafue iaimaiaie llua mei, eo ana ite ifomona ocainana eruailanona, Taife jino biite. Jino billanona, iaimaiaie diga fuirite. Iaimaiaina anafetitaja mei, iaimaiaina meineite.

<sup>8</sup> Raiafomo joneñeitimaci; iadedi iaimaiaie abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiaie isoidimaci. Jerusalémo Jesúsna jaie jiaie meinetimaci.

<sup>9</sup> Raiafomo iaimaiaie joniana rairuitimaci. Darui amani abi atomonado ailluena comini, naga nairaiamona iaimaiaina jibuisabitimaci.

<sup>10</sup> Nana eniruemo ite comini iaimaiaie fioidaillari iobitimaci. Iaimaiaimona comini duere sefuilla jira, iaimaiaie jai fioidailla jira, iobitimaci. Rafuena finuanona, dani coninina rana fecaitimaci.

<sup>11</sup> Darui amani abi atomonado illanona, fioidaillamona iaimaiaina Jusiñamui dane jillotaite. Ie muidona naidaitiaimaiaie. Nana iaimaiaina ciolino eo jacinaitimaci.

<sup>12</sup> Naie facaise monamona damie iaimaiaina uaiduana cacadiaimaiaie. Llote:

—Bene mai bi.

Iecon iaimaiaina enoidimacidi uillie motomo monamo iaimaiaie jaillana cioidimaci.

<sup>13</sup> Naie facaise aillue ñuisaño suide. Ie jira janore facai Jerusalén goide. Riaie uaimona ie décima facai goide. Naiemona siete mil comini fioidaitimaci. Fioidañedino jacinailamona:

—Jusiñamuidi ua siño jito —lloitimaci.

<sup>14</sup> Mena duere sefuilla facaise jai fuite. Nia daje suiñede; ia raire suite.

### *Juan irai trompeta fillana cacade*

<sup>15</sup> Naie facaise jiaie jaienici ie trompetana fite. Monamo itino ado llotimaci: Jusiñamui, Cristo diga, illaima isoi, eniruemo ite cominina biruimona jaca sedaite.

Naie comini naimie anamo raise iitimaci.

<sup>16</sup> Naie veinticuatro einamacie Jusiñamui ecimo illanona, naimie uicomo ana bitadajanona naimiena sedadimaci.

<sup>17</sup> Llotimaci:

Jusiñamui, cai Nama, omo iobillacinona fecaacadicaie.

Siño jito dio. O jitailla rafuena jaca finodio.

O uaido bie cominina jai sedadio.

<sup>18</sup> Ona naimacie inoñenamona, o diga iciritimaci; iadedi naimacina emodofidio.

Bie facaise jai fioidaitino jillotajamona, ona naimaci ñnoñena jira, naimacimona ja ibana oitio.

Jearede rafuena naimaci finua jira, naie facaise ona ñnoñedinona duere finoitio.

O dibeimo maijidino, o facaina lloraini, nana ona ñnotino omona ibana feiñoitimaci.

Nibai jamai bue isoidimaci.

Nibai jamai bue isoñedimaci; iadedi omona ibana feiñoitimaci.

<sup>19</sup> Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconí boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

## 12

### *Juan daje riñona, eo aillue jaio diga, cide*

<sup>1</sup> Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uñuana jitaide. Naiñaiño ñniroidi jítoma isoi bairedé. Naiñaiño eilli anamo fivui ite. Naiñaiño ifogimo nuicirai isoi doce ucuduai ite.

<sup>2</sup> Jai uruesite. Jocoacana jira, como isiredé.

<sup>3</sup> Ie facaise monamo jaiñmiena ciodicue. Naimiedi Taife. Naimie illamona jiaie rafue suillena uñoticue. Naimiedi eo aillue jaiona eruaide. Jiairedé. Siete ifogi naimiemo ite. Diez sigai naimiemo ite. Naga ifogimo nuicirai ite. Riaí uaimona naimiedi dragón.

<sup>4</sup> Naimie omacai diga ailluena ucuaina eniruemo ana butade. Riaí uaimona ie tercera facaina butade. Ie uruena gutallena, riño uicomo naidaita naiñaiño jocollena sedade.

<sup>5</sup> Naiñaiño ñimana jocode; ia jaio naimiema gutañede. Nana nairaiaí naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie ñia sedañena, monamo Jusiñamui ie illanomo naimiema uite. Ie ecimo Jusiñamui naimiema itatate.

<sup>6</sup> Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiño sedaite.

<sup>7</sup> Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jiaí fuiridimaci. Jusiñamui jaienisai illaima mamecidi Miguel.

<sup>8</sup> Naimaci ñinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede.

<sup>9</sup> Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifuate.

<sup>10</sup> Monamo damie ado lluana jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise ñnoñenia, jeacinona bu finoia, Jusiñamui uicomo birui naimie finocabilla isoi, Taife caína llogidoñeite.

<sup>11</sup> Toica Llauda isoidimie naimaciri fioidailla jira, naimie rafuena naimaci lluamona, Taifena emodofidimaci. Fioidaitimacina, naie rafuena llocana jaiacadimaci.

<sup>12</sup> Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemonu duere sefuitimaci. Naimie eo icirite. Nainomo naimie are iñellena uñote. Naimie icirillamona eniruemo itino eo duere sefuitimaci —llote.

<sup>13</sup> Eniruemo jaiona eruaidimie dotajamona, naiñaiñona duere finollena, naimiedi imana jai jococa riñona racade.

<sup>14</sup> Naimiemonna jilloillena, Jusiñamui mena iaico, majaiño iaico isoi, naiñaiñomo ite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide.

<sup>15</sup> Ie facaise jaiona eruaidimie fuemona eo ailluena jinui bite. Ille isoi tote, naiñaiñona corobaitallena;

<sup>16</sup> ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede.

<sup>17-18</sup> Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino inotino diga, nana “Jesúmo duidicai” raitino diga, jobairiacade.

## 13

### *Juan mena riirede ocainana ciod*

<sup>1</sup> Naie facaise monailai fuemo cue naidailanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiaimo Jusiñamuina jeare ñaia mameci ite.

<sup>2</sup> Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruaidimiedi ie siño uaina fecade.

<sup>3</sup> Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci.

<sup>4</sup> Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

<sup>5</sup> Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade.

<sup>6</sup> Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite.

<sup>7</sup> Taife uai naimiemo illa jira, Cristona eniruemo ite inotino diga jobairite. Naimacina emodofide. Iemona nana comini naga nairaiaimona naimie anamo itimaci.

<sup>8</sup> Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena inotino mameciaina naie rabenicomo jai cuete. Naimie illanomo jaca illena, naimaci mameciaina cuete.

<sup>9</sup> Omoi jeforena jira, raise fueollena, bie rafuemo cacarei.

<sup>10</sup> Duere sefuillena, naie facaise cárcelmo Cristona inotinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona inotino comeciai ocuiñocaida inocana jailla.

<sup>11</sup> Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite.

<sup>12</sup> Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedatate.

<sup>13</sup> Eo siño rafuena finocabite. Comini cioillena, monamona eniruemo boode ra ana bitatate.

<sup>14</sup> Siño rafuena finuamona, Taiŕe jitailla jira, eniruemo itinona jifue. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiama jai jillode.

<sup>15</sup> Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide.

<sup>16</sup> Nana cominimo naimie número cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo iñedinomo cuetatate.

<sup>17</sup> Iese bummo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie número cuetatate.

<sup>18</sup> Iena raise cacailena, iemo omoi começaina faca. Abina uiñotimie bie número uiñoite. Come mamecido iite. Bie número seiscentos sesenta y seis.

## 14

### *Juan 144,000 comini ruana cacade*

<sup>1</sup> Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuega.

<sup>2</sup> Monamona damie ñaiana cacadicue. Aillue ille surua isoi, eo ficirede. Eo gurua jiai ficirede. Ailluena comini arpas tailla isoi, naimie ñaiana cacadicue.

<sup>3</sup> Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo iñedinomona jai jillodimaci.

<sup>4</sup> Bie ciento cuarenta y cuatro mil comini jearede rafuena ebiruiñedinomaci. Llauda isoidimie rafuena ñnocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena.

<sup>5</sup> Cristo rafuedo jeacinona finocabiñeno raise jaidimaci.

### *Juan daje amani jaienici rafue lluaana cacade*

<sup>6</sup> Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide.

<sup>7</sup> Ado llote:

–Jusiñamuina ñnuanona naimiena seda. Naimiemo iobillacinona feca. Naimiemo ñnoñedinona ja duere finoite. Monana, enirue diga, monaillai diga, ille diga, naimie finua jira, naimiena seda.

<sup>8</sup> Jiaie jaienici billanona llote:

–Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiana jeacinona jiai eo finotatimaci. Babiloniamo jiaie itino isoi, Jusiñamuimona duere sefuitimaci.

<sup>9</sup> Naie facaise jiaie jaienici billanona, ado llote:

–Monaillaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bummo ia,

<sup>10</sup> Jusiñamui rícaillafuemona, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci.

11 Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fioldaiño jaca duere sefuitimaci –llote.

12 Bie rafue suille facaise Jusiñamui lloga uaina raise #nuanona, Jesús dibeimo raise illanona, comeciai ocuiñocana naimaci jaille.

13 Iemei monamona Jusiñamui Joreño llote:

–Biena cueno: “Biruimona Jesúsna #nuamona, meineganodi camare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

### *Juan Jusiñamui eniruemo itinona duere finua rafuena cacade*

14 Naie facaise monamo cue eruaia, userede uilliena ciodicue. Uillie emodo Cristo raide. Imana eruaide. Naimie ifogimo oromona finoca nuicirai ite. Ie onollimo jairede lloebi ite.

15 Jusiñamuina sedajanomona jiaie jaienici billanona, Cristomo ado llote:

–O lloebi diga eniruemo ite riarana cota, iena ollena. Jai einaite –llote.

Iese llote; ia cominina duere finollena ñaite. Naimaci duere finua facaisena ñaite.

16 Jaienici llua isoi, ie lloebi diga Cristo cotade. Nana iena finode. Cominina duere finode.

17 Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite.

18 Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

–Jai einailla jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite.

19-20 Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui ricacillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

## 15

### *Juan siete jaienisa cominina duere finoacana ciodicue*

1 Naie facaise monamo jiaie rafuena ciodicue. Ieri eo rajjicaidicue. Iena cue ciuamona, Jusiñamuidi eniruemo itinomo suille rafuena cue uifnuana jitaide. Siete jaienisaia ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie ricacillifue saite.

2 Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona,

3 jai emodofilla jira, Moisés micori ie ruana rotimaci. Moisés micori Jusiñamui facaina jai maijuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

4 Cai Nama, nana comini ona jaciruillamona, ona #noitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

<sup>5</sup> Jusiñamuina sedajanomo dane eruaidicue. Ie fo iticuartomo ciodicue.

<sup>6</sup> Naiemona siete jaienisaí billana ciodicue. Nagamié cominina duere finoacade. Eo userede linomona finoca iniroina jítade. Oromona finoca cinturones naimaci jogobemo jítade.

<sup>7</sup> Naie cuatro cajedinomona damié naga jaienícimo oromona finoca copana fecade. Copamo Jusiñamui eniruemo itinona eo duere finollícino ite isoide. Jusiñamui jaca illa jira, ie lloga uai suicana jaite.

<sup>8</sup> Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

## 16

### *Juan eniruemo copas oni totajanona cide*

<sup>1</sup> Ie sedajanomona Jusiñamui naie siete jaienisaímo ado llote:

—Cue ricailafue omoi copamo illa jira, eniruemo itinona duere finollena, omoi copas oni tota.

<sup>2</sup> Daje jaienici iena finode. Eniruemo ite cominina duere finode. Monailaimona bite ocaina cuetataganona jiaí duere finode. Ocaina joreñona sedadinona duere finode. Naimaci abiaímo jodollaiaina comuitate. Iemona duere sefuidimaci.

<sup>3</sup> Iemei jiaie jaienici ie copa oni totajamona, monaillaina duere finode. Nana monaillaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

<sup>4</sup> Iemei jiaie jaienici ie copa oni totajamona, nana illiaí, nana jorainiaí diga, duere finode. Diruena jaide.

<sup>5-6</sup> Naie facaise nana jinuína sedacabide jaienici llote:

—Jusiñamui, o jaca mareuidimedio. Ona inotinona eniruemo itino meinia jira, o facaina llorainina naimaci meinia jira, naimacina o raise uíñuamona, naimacina duere finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

<sup>7</sup> Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

<sup>8</sup> Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci.

<sup>9</sup> Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uíñotimaci; ia naimie díbeimo naimaci comeciaí iuaina meidoiacaiñedimaci. Jeacinona finuana fainonocaiacaiñedimaci. Naimiemo iobillacinona fecaacaiñedimaci.

<sup>10</sup> Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitreificaide. Eo duere sefuillamona, comini imaci ifena ainitimaci.

<sup>11</sup> Duere sefuillamona, Jusiñamuina jeare ñaitimaci. Naimaci abiaímo ite jodollaiái isirede; iadedi naimaci comeciaí iuaina meidoñedimaci. Jeacinona finuana fainonocaiñedimaci.

<sup>12</sup> Naie facaise jiaie jaienici ie copamona ie duere sefuillacinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiaí illaicomini, imaci soldaduaí diga, ruica dine raise birenitimaci.

<sup>13</sup> Naie facaise aillue jaio fueмона, monaillaimona bite ocaina fueмона, naimie facaina lloraima fueмона, daje amani jananiaí billana ciodicue. Nagamiemona daje janaba bite. Nai jananiaí jerocina eruaide.



14 Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicomina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci.

15-16 Armagedón railla illanomo ofitimaci. Naie illano mamecidi judíuai uai mameci. Ieconí cai Nama cuemo llote:

—Fíiriraima isoi ebena biitícue. Cue billemo ocuridimie iocire iite. Cue billemo naimie ocuria, cue bia, naimie cue jitaillacinona finuamona, naimie meiruiñeite.

17 Naie facaise jiaie jaienici jafaici dine ie copamona ie duere sefuillacinona totade. Ieconí ie sedajanomona Jusiñamui llote:

—Bie duere sefuillacino diga, comina cue duere finoacanacino ja fuite.

18 Ieconí boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede.

19 Iemona nanoca nairai illano daje amani facaina goide. Nana jiaie illanuai jiaie goidimaci. Jusiñamuidi Babilonia railla nairaina raise uiñuamona, nana ie ricai llafuemona iena eo duere finode.

20 Naie ñuisañomona naga uiasi jai cioñena. Naga anedu jiaie cioñena.

21 Monamona noci deilla isoi, hielu jiaie ana jurude. Naga hielu cuarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

## 17

### *Juan eo marañede riñona duere sefuillana ciode*

1 Naie facaise naie siete copas diga ite jaienisaímona cue dine damie billanona cuemo llote:

—Cue diga bi. Eo marañede riño duere sefuillana omo acataitícue. Monai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci.

2 Naiñaiñona sedajamona, naiñaiño diga, illaicomini jearede rafuena finocabidimaci. Naiñaiñona nabaillamona, eniruemo ite comini jearede rafuena eo ebiruitimaci —llote.

3 Nicaírilla isoi, jaienici cue joreña uillanona, jofue iñenanomo cue joreña uite. Eo jiaie de riirede ocaina emodomo naie riño raillana cioidícue. Jusiñamuina eo jearede ñaiacino ocaina abímo eo ite. Ocainamo siete ifogiai ite. Diez sigai jiaie ite.

4 Naie riño jiduirede inroi, jiaie de inroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide.

5 Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodícue. Cuemona eo jearede rafue comuicana jaicabide. Cue muidona comini jearede rafuena finocabide”.

6 Naiñaiñodi ailluena Jusiñamuimo duidinona, ailluena ua Jesúsna innotinona meinetajana eo ebiruite. Naiñaiñona cue cioia, eo rajicaidícue.

7 Jaienici cuemo jicanote:

—¿Bue ñe rajicaidí? Naiñaiño ite rafuena omo lloitícue. Naiñaiñodi ocaina emodomo raide. Naie ocaina rafuena jiaie lloitícue.

8 Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona innoñedíno rajicaítimaci. Jesucristona naimaci innoñena jira, monamo Jusiñamuidi ie rabenicomo

enirue nia finoñena facaise naimaci mameciaina jaca cueñede. Naimie illanomo jaca iñeitimaci.

<sup>9</sup> Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide.

<sup>10</sup> Ie siete ifogidi siete illacomini mamecido ite. Naimacimona cinco illacomini jai iñede. Damie cominina birui sedade. Jiaimie cominina nia sedañede. Cominina naimie sedaia, are naimacina sedañeite. Dallu sedaite.

<sup>11</sup> Ifomona bite ocainana dane lloiticue. Cominina jiai sedaite; ia bie siete illacomini sedajacinomo dute. Cominina naimie sedaja mei, naimie faifite.

<sup>12</sup> Ie diez sigaidi diez illacomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci.

<sup>13</sup> Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci.

<sup>14</sup> Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illacomini baifemo faia jira, nanoca imiena jira, naimacina emodofite. Ie cominina naimie fetode. Naimiena innotimaci. Jai emodofitimaci —llote.

<sup>15</sup> Jaienicí nia llote:

—Riño monailai emodomo raillana ailli ciodio. Monailaidi nana comini mamecido ite. Naga nairai mamecido ite.

<sup>16-17</sup> Naie diez illacomini, ocaina diga riñoena enoitimaci. Naiñaiñoa duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñoena iese fuidoitimaci. Naiñaiño iniroina oni dotatajanona, naiñaiño taiñaiñoena iite. Naiñaiñoena meineitimaci. Ie llicisina ritimaci. Ja muidomo iraimo naiñaiñoena dotaitimaci. Iese naiñaiñoena duere finuanona, naiñaiñoena fuidoitimaci.

<sup>18</sup> Bie riñodi nanoca nairai illano mamecido ite. Naie nairai anamo nana eniruemo ite illacomini iitimaci —llote.

## 18

### *Juan Babilonia railla nairai illano goilla rafuena ciodo*

<sup>1</sup> Ie facaise monamona jiaie jaienicí ana billana ciodicue. Naimie uai siño. Naimie uai siñoena jira, eniruena lligaiñote.

<sup>2</sup> Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaienisai birui itimaci. Jananiai nainomo birui itimaci.

<sup>3</sup> Nia goiñenia, bie nairai jeacinona eo finuamona, nana nairai iena ebiritimaci. Bie nairaina nabaillamona, nana illacomini jearede rafuena jiai finocabidimaci. Jearede rafuamona nana rana fecaraini bie nairaimona ailluena ucubena ganacabidimaci —llote.

<sup>4</sup> Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i.

<sup>5</sup> Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade.

<sup>6</sup> Jusiñamui, naimaci finua diese ibana ono. Naimacina ua eo duere fino.

<sup>7</sup> Jeacino finuamona iobidimaci. Iemona abi iedotimaci. Jeacino finuana eo ebiritimaci. “Illaicomindicai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci;

<sup>8</sup> iadedi cai Nama Jusiñamui naimacina ebena eo duere finoite. Duicomona, sure illamona, aime guillamona fiodaitimaci. Naimaci jofue booite. Jusiñamui siño jitona jira, naimacina raire fuidoite —llote.

<sup>9</sup> Bouamona uillie naimaci cioia, sunaillamona, naie nairai diga nabairite illaicomini eo eeditimaci.

<sup>10</sup> Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

<sup>11</sup> Naimaci rana naie nairai jai oñena jira, rana fecaraini eo sunaillamona eo eeditimaci.

<sup>12</sup> Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronze, lloona, mare nofici,

<sup>13</sup> guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci.

<sup>14</sup> Sure illamona lloitimaci:

—Caimona omoi comeciai jitailla rana ja oñeitomoi. Omoi ebiruiga rana ja oñeitomoi.

<sup>15</sup> Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eeditimaci. Sunaitimaci.

<sup>16</sup> Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiruitimaci. Eo raifide abina finolle rana eo ebiruitimaci. Oromona finoca ra, perlamona finoca rana eo ebiruitimaci;

<sup>17</sup> iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijuidino diga, nainomo jaidino diga, botedo rana fecaraini diga,

<sup>18</sup> aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai bai femo navui faite. Jiaie nairai ie isoi ebinide.

<sup>19</sup> Sure illamona, naimaci ifogimo imuicina faianona, eeditimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

<sup>20</sup> Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

<sup>21</sup> Naie facaise jiaie jaienicimo siño uai illanona, eo aillue nofici llinuanona, monaillaimo iena faite. Llote:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite.

<sup>22</sup> Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberañeite. Llomenicono finollena, buna dane maijiñeite.

<sup>23</sup> Nainomo naiona lampariniai dane booñeite. Rafue dane iñeite. Eo caimare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci.

<sup>24</sup> Naie nairai ailluena Jusiñamuina inotina meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

## 19

<sup>1</sup> Ie facaise monamo eo ailluena comini ado lluana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi siño jitodio.

<sup>2</sup> O anamo itinona raise uñuamona, uanaicinona o uñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

<sup>3</sup> Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

<sup>4</sup> Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi llucino mare. Ie isoi jiai lloiacadica. Jusiñamuina cai iobitajasa.

<sup>5</sup> Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena inotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

### *Juan Toica Llauda isoidimie aina ua rafuena cacade*

<sup>6</sup> Naie facaise monamo eo ailluena comini lluana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

<sup>7</sup> Eo iobidica. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

<sup>8</sup> Mare iniroi naiñaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci.

Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie inotino imaci mare finoca rafue isoide.

<sup>9</sup> Jaienicí cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

<sup>10</sup> Jaienicí uicomo eillimo ana bitadaticue, naimiena sedallena; ia cuemo llote:

—Dama ite. Cuenas sedaño; ia dama Jusiñamuina seda. Jesús ie dibeimo itinona uanaicinona jai uñotade. Ie jira naga o diga naimiena inotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

### *Juan userede caballo emodomo itimierna cide*

<sup>11</sup> Naie facaise mona ecorillana cidicue. Nainomo userede cabalona cidicue. Naie emodomo itimiemo mena mameci ite. Inogamierna mameciredede. Uanaicinona llocabitimierna jiai mameciredede. Naimacina raise uñuamona, naimie dibeimo inedonona duere finollena, naimaci diga jobairite.

<sup>12</sup> Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uñoñede. Dama naimie iena uñote.

<sup>13</sup> Naimie jitaca iniroi ie dibeimo inedino diruemo mutaca. Jusiñamuina naimie uinotaja jira, Jusiñamui Uairedimiena mameciredede. Naimiedi Jesucristo.

<sup>14</sup> Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jítadimaci. Userede caballuai emodomo itimaci.

<sup>15</sup> Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicaillifue anamo itinona eo duere finoite.

<sup>16</sup> Naimie iniroimo, naimie idaimo jai cuega: “Nanoca Illaima. Nanoca Nama”.

<sup>17</sup> Naie facaise jaienici jitoma lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite.

<sup>18</sup> Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoinedino itimaci. Patrones anamo itino itimaci. Patrones anamo inedino itimaci. Naimaci llicisi mai riabi —llote.

<sup>19</sup> Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci.

<sup>20</sup> Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreña sedadinona jifuecabite. Naie iaimaiaina gaitaja mei, eo boode iraimo iaimaiaina cajena dotadimaci. Azufre boa isoi irai boode.

<sup>21</sup> Caballo emodomo itimiedi ie fuemo ite lloebi diga iaimaiai soldaduaia meinete. Jaienici llua isoi, inoniái naimaci llicisina ritimaci. Iemona eo monidimaci.

## 20

### *Juan mil años Taife maiana cide*

<sup>1</sup> Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite.

<sup>2</sup> Aillue jaiona eruidimiena gaitade. Naimiedi Taife. Riái uaimona Satanás. Jiaici dragón. Mil años iese illena lloeo diga naimiena maite.

<sup>3</sup> Ana ite ifomo naimiena dotade. Llave diga ifona ibaide. Cominina ramo fañellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

<sup>4</sup> Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillacinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaia jaitajanona, naimacina meineganodimaci. Monaillaimona bite ocainana sedañedimaci. Ie joreña sedañedimaci. Ie cuetataga ra naimaci uiecomo, naimaci onollimo inede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci.



<sup>5</sup> Naimacidi nano jillodino. Naie mil años nia fuiñenia, jiaie jai fiódaitino nia jilloñeitimaci; ia mil años fuilla mei, jilloitimaci.

<sup>6</sup> ¡Nano jillodino caimare marena iitimaci! Dane fiódaiñenamona Jusiñamui illanomo jaca iitimaci. Faiñeitimaci. Cominina sedajanona, comini Jusiñamuina raise uiñollena, comini Cristona raise uiñollena, naimacina canoitimaci. Cristo diga mil años naimacina sedaitimaci.

<sup>7</sup> Bie mil años fuilla mei, Jusiñamuidi ana ite ifomona Taife jino oretaite.

<sup>8</sup> Nana eniruemo ite nairaiaina jifuiabite. Gog railla illaicominina, Magog railla nairaiadi ga, jifueite. Naimaci nairaiaina ofitaite. Eo ailluena naimaci illa jira, conillena cai facadonina isoi, naimacina facadonidicue. Jusiñamuina inotino diga jobairillena, ofitimaci.

<sup>9</sup> Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite.

<sup>10</sup> Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jaiie dotade. Naimie facaina tainona loraíma jaiie dotade. Nainomo ua jaca duere sefuitimaci

*Juan aillue rairabicina ciode. Nainomona Jusiñamui duere finollicinona llwana cacade*

<sup>11</sup> Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai iñede.

<sup>12</sup> Naie facaise Jusiñamui uicomo nana fiódaitino naidaillana ciodicue. Jamai bue isoiñedino itimaci. Jamai bue isoidino itimaci. Naimacimo juez isoi Jusiñamui llollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue diese Jusiñamui naimacimo duere sefuillena llote.

<sup>13</sup> Monailaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue diese Jusiñamui naimacimo duere finollena lloite.

<sup>14</sup> Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci.

<sup>15</sup> Monamo ite rabenicomomo cueñega comini mameciai diese itinona iraimo dotaite.

## 21

*Juan comue monana, comue enirue diga ciode*

<sup>1</sup> Birui ite mona, birui ite enirue diga jai iñede. Monailai jiai jai iñede. Iemei comue mona ciodicue. Comue eniruena jiai ciodicue.

<sup>2</sup> Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede.

<sup>3</sup> Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci.

<sup>4</sup> Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiódaiñeitimaci. Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —llote.



<sup>5</sup> Jusiñamui llote:

—Ero, nana ra comuena birui finoiticue. Cue lluacino uanaicinona jira, cue lluacinona cue finua jira, bie rafuena cueno.

<sup>6</sup> Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciai eo caimare itataiticue. Ibatañeno cue diga illena, naimacina jaca itataiticue.

<sup>7</sup> Cuen a raise inotinona iese itataiticue. Jaca naimaci Jusiñamuiniticue. Naimaci jaca cue comininitimaci.

<sup>8</sup> Jiaño jaca eo boode iraimo jaca iitimaci. Azufre boa isoi irai boote. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinetino, aiñede riño diga icabitino, iniñede ima diga icabitino, aiñinai, jiraraina sedacabidino, tainona llocabitino —llote.

### *Juan comue Jerusaléna llote*

<sup>9</sup> Naie facaise naie siete jaienisaïmona damie cue dine bite. Naie jaienisaïimaci copamo cominina duere finollicinona navui ite isoide. Naimie cuemo llote:

—Cue diga mai bi. Ima ie aina jai ua isoi, Toïca Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

<sup>10</sup> Nicairilla isoi, Jusiñamui Joreño cue joreñona eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

<sup>11</sup> Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruailla jira, enefebecodo ciode.

<sup>12</sup> Ie llaïgafo eo a ite. Eo jedaciede. Doce nasiai ite. Naga nasemo daje jaienici ite. Israel micori uruai mameciai naie nasaiïmo cuega. Doce uruai illa jira, naga naserie daje mameci cuega.

<sup>13</sup> Jitoma bicabillano dine eruaide llaïgafomo daje amani nase ite. Jitoma jaicabillano dine eruaide llaïgafomo daje amani nase ite. Naga beici dine eruaide llaïgafomo daje amani nase ite.

<sup>14</sup> Naie llaïgafo anamo doce nofici ite. Nainomo Toïca Llauda isoidimie ie doce llofueoicaigano mameciai cuega.

<sup>15</sup> Cue diga ñaite jaienicoïmoroïmona ra facara ite. Naie nairai facallena ite. Ie nase, ie llaïgafo diga, facallena ite.

<sup>16</sup> Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite.

<sup>17</sup> Ie llaïgafona jiai facade. Sesenta y cuatro metros a ite. Comini facaja isoi, jaienici iena facade.

<sup>18</sup> Ie llaïgafo jaspe railla noficimona finoca. Bie nairai difai oromona finoca. Enefebecodo ciode.

<sup>19</sup> Diga eo quenirede noficina eruaide ra llaïgafomo ite noficimo jai nitade. Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede.

<sup>20</sup> Jiaie ónice. Jiaïrede userede diga faïga. Jiaie cornalina. Jiaïrede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie

crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafu anamo ite noficiái doce díga ite.

<sup>21</sup> Ie doce nasiáidi perlas. Userede. Naga nase daje perlamona finoca. Bie nairai naisuáidi difai oro. Enefebecodo cíode.

<sup>22</sup> Bie illanomo Jusiñamuina sedajanona cíoiñedicue. Nana bie illanodi naimie sedajano. Cai Nama Jusiñamui, Toica Llauda isoidímie díga, nainomo illa jira, iaímaiaí uícomo sedaitícaí.

<sup>23</sup> Jusiñamui siñona jira, nainomo comíni jitomana jítaiñeitímaci. Fívuina jítaiñeitímaci. Jusiñamui, Llauda isoidímie díga, iena lligaiñoite.

<sup>24</sup> Nana comíni iaímaiaína nabaicana jaitímaci. Nana illaicomíni iaímaiaí díne billanona, iaímaiaímo íobillacíno jaca fecaitímaci.

<sup>25</sup> Bie nairai nasiái jaca íbaiñeite. Nainomo naíonadi jaca íñeite.

<sup>26</sup> Iaímaiaímo íobillacínona fecallena, nana comíni nainomo bíitímaci.

<sup>27</sup> Nainomo jeacíno jaca íñeite. Jearede rafue finodíno nainomo bíñeitímaci. Tainona lloraíni bíñeitímaci. Dani Llauda isoidímíemo ite rabenicomo cuega mamecíai ítinodí nainomo bíitímaci. Bie rabenicomo Jusiñamui illanomo jaca íitíno mamecíai jai cuega.

## 22

<sup>1</sup> Naie facaise jaíenici cuena daje ille acatate. Nainomo ite jínui jiruamona comína jaca ítataite. Uífinide. Jusiñamui, Llauda isoidímie díga, illanomona tote.

<sup>2</sup> Nanoca náiso motodo tote. Nagafebelle díne jaca ítataite amenaiái ite. Naga fívuí llísillamona, naga fívuí llísilla ite. Ie íbiaí íllamona, comíni caímare marena ítímaci.

<sup>3</sup> Jeacíno nainomo íñena jira, Jusiñamui jaca buna duere finoñeite. Jusiñamui, Llauda isoidímie díga íllamona, naimie comíni naimíena jaca sedaitímaci.

<sup>4</sup> Naimíena marefodo cíoitímaci. Naimíemo naimaci duíllamona, naimaci uíecuaí ítofiáímo naimie mamecí cueite.

<sup>5</sup> Nainomo naíonadi íñeite. Lamparína jítaiñeitímaci. Jitomana jítaiñeitímaci. Cai Nama Jusiñamui naimacína lligaiñoite. Illaicomíni ísoi jaca íitímaci.

*Juan Jesucristo bíllírui íaírei íllana cacade*

<sup>6</sup> Jaíenici cuemo llote:

—Bie lluacínodi uanaicíno. Naimie facaina lloraínímo íe rafuena llollena, íe uaina ítatate. Naimíena ínotínona íco suílle rafuena ja uíñotaíacade.

<sup>7</sup> “Raíre bíitícue” Cristo llote.

Bie rabenicomo íte íco suílle rafuena ínotínodi caímare íitímaci.

<sup>8</sup> Juandícue. Bie rafuena cacadícue. Iena cíodícue. Iena cue cacaja meí, íena cue cíua meí, íena cuemo acataga jaíenici uícomo ana bítatadícue. Naimíena sedaacadícue;

<sup>9</sup> íadedí cuemo llote:

—Dama íte. Cuena sedaño. O díga, naimie facaina lloraíni ísoi, bie rabenicomo íte llogacínona ínotíno ísoi, naimie díbeímo jíaí maíjídícue. Dama Jusiñamuina seda.

<sup>10</sup> Bie rafue suíllírui íaírei ílla jira, íena jino llono. Iena uíñota.

<sup>11</sup> Bie rafuena bu íñoñenia, naimie jítaílla jira, marañede rafue naimie fínoacania, íena nía fínoite. Jearede rafue bu fínoacania, íena nía fínoite; ía bie rafuena naimie íñoía, naimie jítaílla jira, mare rafue naimie fínoacania, mare rafuena fínocana jaílla. Jusiñamui jítaíllacínona bu fínoacania, naimie jítaíllacínona nía fínocana jaílla.

<sup>12</sup> Jesucristo cuemo llote:

—Ero, raire biitícue. Naimie finoca rafue diese nagamiemo ibana fecaitícue.

<sup>13</sup> Jaca bue nia iñenia, jaie jaca itícue. Nana rana finodícue. Nana ra cue uaido icana jaide. Nana rana fuilla mei, jaca iitícue. Jaca siño jitodícue.

<sup>14</sup> Naimaci iniroina naimaci jocoia, caimare iitimaci. Naimaci comecina ñaitícue. Ie jeacinona oni dotacamie jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite;

<sup>15</sup> ia naimacina jeacinona naimaci fainonocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabitino, inñede iima diga icabitino, cominina meinetino, jiraraina sedacabidino, tainona llocabitino duiñeitimaci.

<sup>16</sup> Creyentiaina bie rafuena uiñotallena, cue jaienici o dine jai oretatícue. David micori ie jitodícue. Monairaicudu bairia isoi, Jusiñamui jitaillacinona cue finollena, baireitícue —llote.

<sup>17</sup> Bie facaise Jusiñamui Joreñodi, Cristo jai oga ai raila comini diga, naimiena nia inoñedinona uaidote:

—Bie rafuena mai cacarei. Iena mai ino. Iena bu inoia, jaimiemo iena lluai: Iena mai cacarei. Iena mai ino.

Jiroacadimiemo llotícue:

—Mai jiruaibi. Bie jinua raifiñede. Biena o jiroacania, jaca iitio. Iese llotícue; ia ie comecina ñaitícue. Bie rafue inuana ñaitícue.

<sup>18</sup> Bie ico suille rafue ite rabeniconu bu facajia, naimiemo rafuena lloiacadícue. Bie rafue baifemo bu lloia, bie rafuena bu meidoia, bie rabenicomo ite duere finuacino isoi, Jusiñamui naimiena duere finoite.

<sup>19</sup> Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabeniconu jaca cueñeite. Comue Jerusalémo jaca duiñeite. Naiena jai llotícue.

<sup>20</sup> Cristo raite:

—Bie rafue jaca suite. Ua raire biitícue.

Iena raire suillena jiai jitaídícue. Cai Nama Jesús raire billena eo jitaídícue.

<sup>21</sup> Naimie duenaillacinona nana Jesucristona inotino uiñocana jaillana jitaídícue. Macaibaite. Juandícue.